

ქართული ემიგრანტული ლიტერატურა

# დაბრუნება

მრავალტომეული

2

გურამ შარაძის საერთო რედაქციით

თბილისი 1991

ექვთიმე თაყაიშვილი

ემიგრანტული  
ნაშრომები

გამომცემლობა "მეცნიერება"  
თბილისი 1991

## წინასიტყვაობა

ზაფხულში, 1910 წელს ჩვენ მოვაწყვეთ არქეოლოგიური ექსპედიცია ლეჩხუმ-სვანეთში. საშუალება მოგვცა აწ განსვენებულმა ჩვენმა მეგობარმა პავლე იოსების ძე თუმანიშვილმა, რომელიც დღიდან დაარსებისა „საქართველოს საისტორიო და საეთნოგრაფიო საზოგადოებისა“ გახდა გულწრფელი მოჭირნახულე და მეცენატი ამ საზოგადოებისა. მთელი ხარჯი ექსპედიციისა მან მიიღო თავის თავზედ. ექსპედიციაში მოვიწვიეთ: მთელს კავკასიაში კარგად ცნობილი აწ განსვენებული ფოტოგრაფი დიმიტრი ივანეს ძე ერმაკოვი, აგრეთვე აწ განსვენებული ხუროთ მოძღვარი სიმონ გიორგის ძე კლდიაშვილი და ტფილისის პირველი გიმნაზიის მასწავლებელი ივანე თეოდორეს ძე ნიჟარაძე, ყოფილი ჩემი მოწაფე, შთამომავლობით სვანი, მზრუნველი და მოამაგე სვანებისა და ყველა სვანთაგან დიდათ მიჩნეული და პატივცემული.

პავლე თუმანიშვილი ფიქრობდა მასაც მიეღო მონაწილეობა ექსპედიციაში და გვთხოვა მისთვის დაგვეცადა ცაგერში, რომ სვანეთში ერთად გამგზავრებულიყავით, მაგრამ ეს განზრახვა მან ვეღარ განახორციელა: ის მაშინ ასრულებდა ტფილისის გუბერნიის თავადაზნაურთა მარშლის თანამდებობას და ვერ მოიცალა.

ექსპედიციის მიზანი იყო: გვენახა ზოგიერთი ეკლესიები ლეჩხუმისა, მანამ პ. თუმანიშვილი შემოგვიერთდებოდა, შემდეგ შეძლებისდაგვარად დაგვევლო ყველა სვანეთის ეკლესიები; ცნობაში მოგვეყვანა და ფოტოგრაფიულად გადმოგველო მათში დაცული სიძველენი, შეგვეკრიბა არქეოლოგიური, ისტორიული და ეთნოგრაფიული ნივთები და მასალები „საქართველოს საისტორიო და საეთნოგრაფიო მუზეუმებისათვის“.

დასახელებული მიზანი საერთოდ საკმაოდ შესრულებულ იქმნა: ჩვენ დავიარეთ უმეტესი ნაწილი ლეჩხუმის ეკლესიებისა; ვნახეთ თითქმის ყველა ეკლესია როგორც ცხენისწყლის, ისე ენგურის სვანეთისა. არ ვყოფილვართ მხოლოდ ლახამულაში (იქ მაშინ ხოლერა გაჩნდა), ჩუბის-ხევში და ადიში (იმ დროს იქ თოვლი მოვიდა), მაგრამ ცნობილი ადიშის სახარება იქიდან მოვატანიინეთ და მესტიაში გადავიღეთ ფოტოგრაფიულად; საკმაოდ ბევრი და ძვირფასი სამუზეუმო ნივთები შევაგროვეთ; ზოგი მათგანი შემოწირულობის სახით მივიღეთ, ზოგი ფასით შევიძინეთ. ჩვენი მუზეუმი გამდიდრდა საყურადღებო ტყავის ხელნაწერებით და საარქეოლოგიო-საეთნოგრაფიო ნივთებით; ხოლო სამწუხაროდ უნდა აღვნიშნოთ, ს. კლდიაშვილს დაეკარგა დღიურ-რვეული მის მიერ გაზომილი სვანეთის ეკლესიებისა და ციხე-კოშკებისა, ამიტომ ამ ეკლესიათა გეგმების დამუშავება შეუძლებელი შეიქმნა. დარჩა მხოლოდ გეგმები ლეჩხუმის ეკლესიებისა და ხუთიოდე თავისუფალი სვანეთისა.

ცნობილია, როგორც ლეჩხუმში, ისე სვანეთში მხოლოდ სიონური ანუ ბაზილიკური ეკლესიებია, უგუმბათო. გამონაკლისს შეადგენს ერთი, მცხეთის გუმბათიანი ეკლესია ლეჩხუმში, მაგრამ მაინდამაინც ძველი არც ის არის. ყველა საყურადღებო სიძველენი ჩვენ მიერ ნახულ ეკლესიებისა გადმოღებულია ფოტოგრაფიულად. გამონაკლისს შეადგენს მცირე ნაწილი, რომელიც არ გამოვიდა

ჯეროვნად. სულ გადაღებული იყო ათას ხუთასზე მეტი სურათი; ამათში შედის, რასაკვირველია, პეიზაჟებიც საუკეთესო ადგილებისა, სოფლებისა და ციხე-კოშკებისა. ფრესკების გადმოღება არ მოხერხდა. განსვენებული ერმაკოვი გაფრთხილებული იყო, რომ სვანეთში პატარა ეკლესია და მათში სამუშაოდ განსაკუთრებული აპარატია საჭირო და პტყელ-კუთხედი ობიექტივი. – ვიცი, ვიციო, – იძახოდა ტფილისში, მაგრამ მას ასეთი აპარატი აღარ აღმოაჩნდა სვანეთში. ამას გარდა ჩვენ გაგვაკვირვა კიდევ მეორე გარემოებამ, – უმეტესი ნაწილი „პლასტინკებისა“, რომელიც მას წამოეღო, წამოღებულ ჩარჩოებში არ ეტეოდა. უფრო დიდრონი იყო, და ის იძულებული გახდა ჩამოეჭრა ნაწილი თითოეული „პლასტინკისა“ და ისე მოეთავსებინა ჩარჩოში. ეს სიძნელე მან დიდის შრომით და დაუღალავი მუშაობით გადალახა. ფრესკების გადასაღებად სვანეთში არა ერთი, არამედ რამოდენიმე მხატვართა ექსპედიცია არის საჭირო. საჭიროა არა მარტო ფოტოგრაფიის საშუალებით გადმოღებული ფრესკებისა, არამედ მათი გადმოხატვა ფერადებით ტილოზედ. ზოგი მათგანი განსაკუთრებით საყურადღებოა არა მარტო სიძველით, რიგით, სტილით, არამედ შინაარსითაც. საკმარისია აღვნიშნოთ, რომ ერთს ეკლესიაში წარმოდგენილია დიმიტრი მეფის კურთხევა, ზოგიერთებში კიდევ ზღაპრული ამირანი და მასზე თქმულებანი და სხვა. ბევრ ეკლესიაში ყოფილა აგრეთვე მაშენებელთა ანუ კტიტორთა სურათებიც, მაგრამ უმეტეს შემთხვევაში ფრესკები და სურათები მოშლილია; რაც გადარჩენილა გასვრილია მტვრით და უფრო ხშირად ჭვარტლით. ყველა ეს უნდა გაიწმინდოს, გაირეცხოს ფრთხილად და შემდეგ საკმაოდ გამოჩნდება სურათებიც და წარწერებიც და მათი გარჩევა შესაძლებელი იქნება. ჩვენ ამისათვის დრო არ გვქონდა. აღვნიშნეთ მხოლოდ, რაც ასე თუ ისე საკმაოდ მოჩანდა; მაგრამ ამითაც ბევრი უცნობი მასალა მოგვემატა. მთელი შეგროვილი მასალა ექსპედიციისა ჩვენ დამზადებული გვქონდა გამოსაცემად უკვე 1911 წელს და გვპირდებოდნენ მის გამოცემას, სურათებით, პეტერბურგში და მოსკოვშიც, მაგრამ ომიანობის გამო ეს განზრახვა ჩაიფუშა. მხოლოდ მოსკოვის არქეოლოგიურმა საზოგადოებამ მოასწრო ერთად ერთის ადიშის საყურადღებო სახარების გამოცემა ფოტოტიპიის საშუალებით და ჩემის წინასიტყვაობით (იხ. „მატერიალი პო არხეოლოგიი კავკაზა“, წიგნი 14) აქაც, საზღვარ გარეთ ზოგიერთები გვპირდებოდნენ მთელი სვანეთის მასალის გამოცემას სურათების ალბომებითურთ, მაგრამ ეს დაპირებაც მარტო დაპირებად დარჩა. ეხლანდელი კრიზისი ჩვენ იმედს აღარ გვაძლევს არც ამ ექსპედიციის ალბომების გამოცემისა, არც სხვა ჩვენი ექსპედიციების მასალებისა, როგორც არის მაგალითად, ექსპედიცია ოლთისის მხარეში 1907 წელს, ექსპედიცია თორთუმ-ისპირში 1917 წელს, რაჭა-იმერეთში 1918-1920 წლებისა და სხვა. გამოუცემელი რჩება აგრეთვე სამეგრელოს ეკლესიათა სიძველეთა ალბომები, დამზადებული უკვე 1913 წელს. გამოვეციტ მხოლოდ მათი მოკლე აღწერილობა და წარწერები (იხ. ჩვენი „არხეოლოგიური მოგზაურობანი და შენიშვნანი“, წიგნი მეორე, ტფილისი, 1914 წ.), სურათებით მათი გამოცემა დავიწყეთ პეტერბურგში „ხრისტიანსკი ვოსტოკ“-ში, სადაც ოთხიოდე ეკლესიათა სიძველეთა მოთავსება მოესწრო; შემდეგ „ხრისტიანსკი ვოსტოკი“ დაიხურა.

ჩვენ ამ გამოცემაში ვათავსებთ მოკლე აღწერილობას ჩვენ მიერ ლეჩხუმ-სვანეთში ნახულ სიძველეთა და წარწერათა.

ვინც მოისურვებს ალბომების გამოცემას ან თავისთვის შედგენას ალბომისა ჩვენი ექსპედიციის მიერ გადაღებული სურათებით, მისთვის ამ გამოცემის შემდეგ

ადვილი იქნება ამის შესრულება, ვინაიდან ჩვენ ვუჩვენებთ ტექსტში ნომერს ყველა სურათის ერმაკოვის კოლექციიდან, რომლის ნეგატივები და ალბომები მოიპოვება ჩვენს უნივერსიტეტში და საისტორიო და საეთნოგრაფიო საზოგადოებაში. ეს მით უფრო საჭიროა, რომ ფოტოგრაფიის რუსული წარწერები ყველა სწორი როდია, ერმაკოვს არეული აქვს ზოგჯერ სოფელთა და ეკლესიათა სახელები, რომელთაც ესა თუ ის ნივთი ეკუთვნის.

აქ უნდა შევნიშნოთ: ერმაკოვის სურათები ორგვარის ნომრების სათვალავით არის აღნიშნული. ერთი მარცხნივ უფრო რთულით, მეორე მარჯვნივ უფრო მარტივით; ჩვენ ვუჩვენებთ საზოგადოთ მხოლოდ რთულს, რომელიც მარცხნივ არის აღნიშნული, მაგრამ როდესაც ეს ნომერი არა სჩანს ან ჩვენს ცალზე არ არის აღნიშნული, მაშინ ვუჩვენებთ მარტივ სათვალავს და წინ ვუსვამთ ასეთ ნიშანს: №-. სამწუხაროდ ზოგიერთი სურათი აღუნიშნავი რჩება. ამის მიზეზია შემდეგი: როდესაც ჩვენ სურათები მივიღეთ ერმაკოვისაგან, ზოგიერთ სურათზე ჯერ კიდევ არ იყო ნომერი აღნიშნული; ამას გარდა ზოგიერთი ფოტოგრაფია, რომელზედაც რამოდენიმე ხატიჯვარი თუ სხვა ნივთი იყო გადმოღებული, ჩვენ დავსჭერით და ცალ-ცალკე სურათად ვაქციეთ, ხოლო ნომრები აღარ აღგვინიშნავს იმ თავით და ეხლა მოკლებული ვართ საშვალეებს ეს აღვნიშნოთ. მაგრამ საბედნიეროდ ასეთი სურათები, რომელთა ნომრები არა მაქვს ნაჩვენები, ცოტაა და მათი მიგნება ერმაკოვის კოლექციაში ადვილია ჩვენი აღწერილობის საშვალეებით და თემების და ეკლესიების ჩვენებით თვით სურათებზე.

ამრიგად ეს გამოცემა მრავალ მხრივ ნაკლოვანია. ნაკლოვანია თავდაპირველად მით, რომ უსურათებოდ გამოდის. სურათი აუცილებლად საჭიროა არქეოლოგიური საგნის და ხელოვნების ძეგლის შესასწავლად; კარგი სურათის ერთი თვალის გადავლება უფრო მეტს წარმოდგენას გვაძლევს საგანზე, ვიდრე მისი დეტალური აღწერა. ნაკლოვანია ეს გამოცემა მითაც, რომ ჩვენ არა გვაქვს ხუცური შრიფტი, რომლითაც უნდა აწყობილიყო წარწერათა ტექსტები; არა გვაქვს აგრეთვე სხვა და სხვა ზომის მხედრული შრიფტიც. მიუხედავად ამისა ჩვენ მაინც სასარგებლოდ მიგვაჩნია ეს შეკვეცილი გამოცემა: ნათქვამია – სულ არარაობას ცალი უღელი ხარი სჯობსო.

სვანეთში მოგზაურობის სიძნელეზე, უგზოობის გამო, მეტია ლაპარაკი; ეს იმას შეუძლია წარმოიდგინოს, ვისაც ეს გზები ანუ, უკეთ ვთქვათ, უგზოობა გამოუცდია, მაგრამ ამ შემთხვევაში ჩვენ მაინც უკეთეს პირობებში მოვხვდით: იმავე ზაფხულს კავკასიის „ნამესტნიკის“ თანამშემწე ვატაცი მიემგზავრებოდა სვანეთში, რომ ეს მხარე დაეთვალაიერებინა და მკვიდრთა საჭიროებას ადგილობრივ გაცნობოდა. ეს არა-ჩვეულებრივი მოვლენა იყო: რუსეთის მმართველობის დამყარებიდან არც ერთს დიდ ადმინისტრატორს ფეხი არ დაუდგამს სვანეთში. ეს მხარე ერთ „პრისტავის“ ამარად იყო მიგდებული; იშვიათად თუ მაზრის უფროსი გამოჩნდებოდა იქ ლეჩხუმიდან (სვანეთი ლეჩხუმის მაზრაზე იყო მიწერილი). დაიწყეს სიჩქარით გზის შეკეთება ვატაცისათვის ლათფარის ზეკარით (უღელტეხილით), და ჩვენ ამ შეკეთებული გზით ვისარგებლეთ, ვინაიდან გავემგზავრეთ ორი კვირით წინ ვატაცისა.

სვანეთში ორი გზა მიდის: ერთი ლეჩხუმიდან, ქალაქ ცაგერიდან, ჯერ ქვემო სვანეთში, ცხენის წყლის ანუ სადადიანო სვანეთში, შემდეგ ლათფარის ზეკარით ანუ უღელტეხილით ზემო სვანეთში ანუ ენგურის სვანეთში. ამ გზით სარგებლობა

შეიძლება მხოლოდ ზაფხულში; სხვა დროს გზა შეკრულია დიდი თოვლის გამო. მეორე გზა მიდის სამეგრელოდან, სოფელ ჯვარიდან, მდინარე ენგურის ნაპირით, სადადეშველიანო სვანეთში, და შემდეგ თავისუფალ სვანეთში. ეს გზა საუკეთესოდ ითვლება და დიდის გაჭირვებით მისვლა-მოსვლა აქედან ზამთარშიც წარმოებს. სწორედ აქედან იყო არა ერთხელ ცდა გზის გაყვანისა, მაგრამ რუსის ხელისუფლებამ ეს ვერ შესძლო ასი წლის განმავლობაში. მათი გაკეთებული გზა პირველ წყალდიდობამდის სძლებდა, მერმე ისპობოდა ნიაღვარისაგან. ასე მოხდა 1910 წელსაც. ვატაცი დარწმუნებული იყო, რომ იმავე წლის სექტემბრისათვის საფოსტო გზა მზად იქნებოდა სოფელ ჯვარიდან სვანეთში. ეს მე მან თავმომწონედ გამიცხდა წასვლის წინ სოფ. ოქრო-ყანაში, სადაც ის სააგარაკოდ იყო. როდესაც მე ეჭვი გამოვთქვი, ცოტა არ იყოს, იწყინა. ხოლო შემდეგ, როდესაც თავის თვალთ ნახა, რომ იქ არავითარი ახალი გზა არ იყო, არამედ ძველი ზერელედ შეკეთებული, მის აღშფოთებას საზღვარი არ ჰქონდა; ინჟინრის სამართალში მიცემამ საქმეს ვერ უშველა. აუარებელი ფული დახარჯული იყო და სვანეთი კვლავინდებურად უგზოდ დარჩა.

ჩვენ ქუთაისში მოვიმარაგეთ ყველაფერი, რაც საჭირო იყო მგზავრობისათვის, და ჩვეულებრივად აღპანამდის „ლინეიკით“ გავემგზავრეთ. ქუთაისში ჩვენ შემოგვიერთდა ჩვენი მეგობარი გიგო დიასამიძე, რომელიც თავის ქალით მიდიოდა ლეჩხუმში სააგარაკოდ. ბატონმა გიგომ ერთი კარგი სამსახური გაგვიწია; მან გვასწავლა გზა ლაბეჭინაში მისავალი: მას ის წინა წელში ენახა. ლაბეჭინა ფრიად საინტერესო აღმოჩნდა თავის სიძველეებით.

ეხლანდელი აღპანა (ვახუშტის გეოგრაფიით, არპანი) ლაბეჭინის სახარების მინაწერში არპანა-დ არის ცნობილი; იმავე წერილიდან ვტყობილობთ, რომ აქ ძველად გაბრიელ ლაბეჭინელს აუგია ქვის ეკლესია, შიგან მოუხატავს და მოუკაზმავს, შეუმკვია ხატებით და წიგნებით, აუშენებია ქვითკირის სახლები, ბეღელნი, მარანი და სხვა. მაგრამ ამ შენობებიდან ეხლა აღარაფერი არ შენახულა. ძველი ეკლესიის საფუძველზე ეხლა პატარა, ახალი, ქვის ეკლესია არის აშენებული, ხის გუმბათით, წმიდა გიორგის სახელობაზე; ეკლესიაში მოიპოვება ხატი წ-ა გიორგისა, წამლით დახატული, ვერცხლის აშიით შეჭედილი და ასომთავრულის წარწერით: წ ა გ ი. წმიდა გიორგი წარმოდგენილია ცხენით, ვეშაპს გმირავს შუბით. ხელობა ახალია, მე-19 საუკუნისა; ახალია აგრეთვე მეორე ღვთის მშობლის ხატი, წელს-ზევითი, წამლით დახატული. უფრო საყურადღებოა დაფარნა ოქრომკერდით ნაკერი, რომელზედაც წარმოდგენილია ქრისტე, ბერძნულის წარწერით სახელისა.

აღპანაში დამე გავათიეთ ცნობილ აღპანის დუქანში, რომელიც გაშენებულია რიონის ნაპირზე იქ, სადაც მდ. ლაჯანურა (მეორე სახელით აჭარის წყალი) შეერთვის რიონს. აქ ყოველთვის იმოვება განთქმული ყიფიანის ღვინო და ხშირად ცოცხალი თევზიც. მეორე დღეს გავემგზავრეთ ლაბეჭინაში; გზად გავიარეთ საირმეში და აქედან დაიწყო ჩვენი მუშაობა.

ვინემ ამ მუშაობაზე დავიწყებდეთ საუბარს, ვალად ვთვლით ჩვენს თავს გულითადის მადლობით მოვიხსენიოთ ყველა ის პირნი, რომელთაც ჩვენ პატივი დაგვძვეს, ხელი შეგვიწყვეს და დაგვეხმარენ ჩვენი მუშაობისა და მოგზაურობის დროს.

ლეჩხუმში დიდი სამსახური გაგვიწია ლეჩხუმის „ბლალოჩინმა“ მარგიანმა. მან მიგვიღო თავის სახლში, ცაგერში და იქიდან თავისი თანხლებით მოგვარონია

უმეტესი ნაწილი ლეჩხუმის ეკლესიებისა. თავისუფალ სვანეთში ჩასვლისას შემოგვეგება აწ განსვენებული სვანეთის „ბლადოჩინი“ ბესარიონ ნიჟარაძე, რომელიც კარგად ცნობილია ჩვენს ლიტერატურაში თავისი საყურადღებო ეთნოგრაფიული წერილებით. ის სწერდა ფსევდონიმით: „თავისუფალი სვანი“. ბესარიონი მოვიდა ჩვენთან სოფელ კალაში და გვირჩია მასთან წავსულიყავით პირველად სოფ. მესტიაში, რომელიც შუა ადგილია ენგურის სვანეთისა, იქ დავბინავებულიყავით და იქიდან დაგვეწყო ექსკურსიები სხვა და სხვა სოფლებში. ჩვენც აგრე მოვიქცით. ცოტა ხნით, როდესაც ვატაცი მოვიდა სვანეთში, ის მას ეახლა და როდესაც გაისტუმრა, მერმე თავის მკვირცხლის და სიმპატიურის შვილით, კუკურით, (მაშინ გიმნაზიის მოსწავლე იყო) ჩვენ არ მოგვცილებია, ყოველგან დაგვეყვებოდა, ცდილობდა ყველაფერი ეჩვენებინა. არაფერი არ დაგვრჩენოდა უნახავი. მისი დახმარებით და შუამდგომლობით შევიძინეთ ჩვენ ბევრი ხელნაწერი და ნივთი. დიდი პატივი გვცა აგრეთვე, როდესაც სოფელ ეწერში მივედით, ოთარ დადეშკელიანმა და მისმა მეუღლემ, აწ განსვენებულმა; ოთარი დიდათ დაინტერესებული იყო ჩვენის მუშაობით, გადმოგვცა რამოდენიმე ხელნაწერი, გვაახლო თავის კაცები და საშვალემა მოგვცა კარგად მოგვეარა ეწერის არე-მარე. მისი ძმა თათარხანი, ცნობილი პატრიოტი, რომელიც ჩვენს საისტორიო და საეთნოგრაფიო საზოგადოებაში იღებდა მხურვალე მონაწილეობას, მაშინ უკვე ცოცხალი აღარ იყო. მისი ისტორიული წერილები და მასალები ოთარმა გადმოსცა ჩვენს საისტორიო და საეთნოგრაფიო საზოგადოებას. აგრეთვე დიდი პატივი გვცეს და ხელი შეგვიწყეს განსვენებულმა ლევან დადეშკელიანმა და მისმა ძმამ ჯანსუყიმ. ლევანი, როგორც მოგეხსენებათ, წინამძღოლი და მოთავე იყო რევოლუციის მოძრაობისა სვანეთში 1905 წელს, ხოლო მეორე რევოლუციას, 1917 წ. ის მსხვერპლად შეეწირა. ნეტარ იყოს ხსენება განსვენებულთა, რომელთაც ჩვენს ექსპედიციაში მონაწილეობა მიიღეს ანუ ხელი შეგვიწყვეს და დახმარება გაგვიწიეს; დღეგრძელობა და მადლობა მათ, რომელნიც დღეს კეთილად ცხოვრობენ. განსაკუთრებით ჩვენთვის სამწუხარო და სავალალოა დიდებული ქართველის, გულწრფელი პატრიოტის და დიდათ სათნოიანი ადამიანის პავლე იოსების მის თუმანიშვილის უდროოდ გარდაცვალება. ის გარდაიცვალა ემიგრაციაში, პოლონეთში, შევიწროებული ნივთიერად. საუკუნოდ დარჩება ხსენება ამ წარჩინებული მოღვაწისა და ადამიანისა ჩვენში<sup>1</sup>.

---

<sup>1</sup> მისი საზოგადო მოღვაწეობა და განსაკუთრებით მისი ამაგი „საქართველოს საისტორიო და საეთნოგრაფიო საზოგადოებისადმი“ ჩვენ უკვე აღვნიშნეთ (იხ. „დამოუკიდებელი საქართველო“, იანვარი, 1936 წელი, № 109, გვ. 12-13) და აქ აღარ ვიმეორებთ.

# ნ ა წ ი ლ ი I

## ლ ე ჩ ხ უ მ ი

### სოფელი ლაბეჭინა.

აღპანიდან ჩვენ გავემგზავრეთ ლაბეჭინაში, რომელიც რვა კილომეტრით შორავს აღპანას. გზად გავიარეთ საირმეს სოფელში და გავშინჯეთ მისი ახალი ეკლესია. გზა აღპანიდან საირმემდე სულ აღმართ-აღმართ მიდის; საირმედან ლაბეჭინამდის აღმართი ისე ძლიერი აღარ არის.

ეკლესია ლაბეჭინისა, ცაგერის შემდეგ, საუკეთესოდ უნდა ჩაითვალოს მთელს ლეჩხუმში. აქ წინად მონასტერი ყოფილა, ეხლა სამრევლო ეკლესია არის, მაგრამ სოფელი ახლოს არ ახლავს. ტაძარი აშენებულია მთის მაღალ სერზე, რომელიც მიჰყვება რიონის მარჯვენა ნაპირს. აქედან თქვენს თვალს წინ იშლება საუცხოვო პანარამა მწვანით შემოსილი რიონის ხეობისა. (ფოტ. №17385).

ეხლა ამ ეკლესიის სახელია ლაბეჭინა, მაგრამ ვინაიდან ძველ წყაროებში ლაბეჭინა სწერია, ჩვენც ამ სახელწოდებას ვხმარობთ.

ლაბეჭინა მოხსენებულია ორს ხელნაწერში, მაწიეთის ეკლესიის მარხვანში 1566 წლისა და საეკლესიო მუზეუმის ტყავის ხელნაწერში მეთორმეტე-მეცამეტე საუკუნისა, №388, რომელიც შეიცავს თეოდორე აღმსარებელის სიტყვებს. პირველ ხელნაწერს აქვს შემდეგი მინაწერი მერმინდელის ხელით:

„ჩვენ ყ<sup>რ</sup> დ სამღვდელო ცაგერელ მიტროპოლიტმან იოანე შემოგწირეთ ს<sup>ა</sup>ლთა განმანათლებელი მარხვანი ესე ლაბეჭინის მთავარ-ანგელოზის ეკლესიას სულისა ჩვენისა საოხად“.

ეს მინაწერი ეკუთვნის მეთვრამეტე საუკუნის მეორე ნახევარს. იმ დროს ცხოვრობდა ცაგერელი იოანე, დადიანი კაცია მეორის ძე, რომელიც პირველად ცაგერელი იყო და შემდეგ 1792 ჰყონდიდელი. მოჰყავს რა ეს ცნობა დ. ბაქრაძეს, ის შენიშნავს: „ლაბეჭინის ეკლესია მთავარ-ანგელოზთა ჩემთვის უცნობია, მაგრამ ის უნდა მდებარეობდეს სადმე სამეგრელოს სამფლობელოში“ (იხ. დ. ბაქრაძის „მოგზაურობა გურია-აჭარაში“, გვ. 215). მეორე ხელნაწერის მინაწერიდან მეჩვიდმეტე საუკუნისა ვტყობილობთ, რომ ხელნაწერი ეკუთვნოდა ლეჩხუმის მონასტერს ლაბეჭინას და წაეღო რუსეთში ბერს ევდემონს, კირილეს მონასტერში, სადაც ის დატყვევებული ყოფილა და ეს წიგნი დარჩენილა მასთან და მორჩილ ლაზარესთან 1667 წლიდან 1671 წლამდის (იხ. თ. ჟორდანიას „აღწერა საეკლესიო მუზეუმის ხელნაწერთა“, წიგნი პირველი, გვ. 381). ამ ცნობების გარდა ლაბეჭინის შესახებ სხვა არაფერი არ ვიცოდით, არც მისი მდებარეობა, არც მისი სიძველენი.

ლაბეჭინა საკმაოდ დიდი ეკლესია არის, მოგრძო, ოთხკუთხედი, სიონურის რიგისა, უგუმბათო, ერთ-ნაოსიანი; ნაშენია თლილის ქვით და ეტყობა მრავალჯერ შეკეთებულია. უკანასკნელი შეკეთება განუცდია ოცი წლის წინეთ, ვიდრე ჩვენ ვნახავდით, და მაშინ მოუშლიათ ძველი ქვის კანკელი, რომლის სვეტები და ქვები



ეხლა ჰყრია ეკლესიის ეზოში, და მის მაგიერ გაუკეთებიათ ახალი ხის კანკელი. ეკლესია დახურულია ეხლა ყავრით, მაგრამ წინეთ, ეტყობა, ქვის ლორფინით ყოფილა დახურული. თავი მასსა ეხლანდელი ეკლესიისა უნდა ეკუთვნოდეს მე-13-14 საუკუნეს, როდესაც გაბრიელ ლაბეჭინელს ხელმეორედ აუგია აქ ეკლესია ძველი ეკლესიის სრულიად განადგურების შემდეგ უსასტიკესი მიწისძვრის გამო. წინეთ ეკლესიას ჰქონია ეკვტერები სამხრეთით, დასავლეთით და ჩრდილოეთით, მაგრამ ეხლა ყველა ესენი განადგურებულია და თითქმის აღმოფხვრილი; დარჩენილია მხოლოდ მეოთხე ეკვტერი სამხრეთ-დასავლეთის მხრით, ყველაზე გვიანი; ხოლო დღეს ისიც დიდათ დაზარალებულია: სახურავი და თალი ჩამონგრეულია და ნანგრევებს დაუფარავს საფლავი ეკვტერის მაშენებლისა. ჩვენს დროს ეკვტერი არ იყო ჯერ კიდევ ნანგრევისაგან გაწმენდილი.

აღმოსავლეთის ფასადი ეკლესიისა გამშვენებულია ორის მაღალის უბით, მომრგვალებული თავებით, ხოლო შუაში ფანჯარაა აგრეთვე მომრგვალებული თავით. როგორც უბეები, ისე ფანჯარა შემკობილია ორმაგი მოჩუქურთმებული ნახევარ სვეტებით; ყველა სვეტებს ჩუქურთმიანი სვეტის თავები აქვთ და ქვემოდან ოთხკუთხედი კვარცხლბეკები სხვა და სხვა რიგად და ლამაზად მოჩუქურთმებულნი. ფანჯრის შუა ნაწილიდან ქვემოდ ეშვება სამმაგი ჩუქურთმიანი ზოლი ნახევარი სვეტებისაგან შემდგარი, რომელიც თავდება ოთხკუთხედი კვარცხლბეკით. კვარცხლბეკზე ჩუქურთმიანი ლამაზი ჯვარია გამოსახული. ფანჯარა შეკეთების დროს გაუფართოებიათ, მაგრამ ფანჯრის თავის ლამაზი ჩუქურთმა დაცულია. თვით კონცხში აღმოსავლეთისა ყოფილა ჩუქურთმიანი ჯვარი, რომელიც ეხლა გაფუჭებულია; დაზიანებულია აგრეთვე ასეთივე ჯვარი, რომელიც, ეტყობა მარცხენა უბეში. მარცხენა მხრით აღმოსავლეთის ფასადისა, კუთხეში ემჩნევა ნიშნები ასომთავრული წარწერისა: ნ ი / ვ ნ / ვ.

აღმოსავლეთის ფასადი იხ. ფოტო №17382.

დასავლეთის ფასადი შემკობილია ჩუქურთმებით ირგვლივ დასავლეთის კარისა და მომრგვალებული ფანჯრისა ორმაგი ნახევარ-სვეტებით (ფოტ. №17384), ხოლო კონცხში დაცულია ჩუქურთმიანი ჯვარი.

სამხრეთის ფასადის ოთხკუთხედი კარი მორთულია ირგვლივ ჩუქურთმებით და ნახევარ-სვეტებით (ფოტ. 17380): ზემოდ მოჩანს ქანდაკება მამაკაცისა და დედაკაცისა, რომელნიც ხელებს უშვერენ ერთმანეთს; ქანდაკება ვერ არის ლაზათიანი; ქვემოდ გამოქანდაკებულია სტილიზაციით მხეცი, მოგრძო ფრჩხილებით ფეხებზე და წამოტარახინებული კუდიით (ფოტოგ. №16764). ამის ქვემოდ კიდევ გამოქანდაკებულია ქვაზე მარაო.

შიგნით, სამხრეთისა და ჩრდილოეთის კედლები დაყოფილნი არიან სამ-სამ თაღად; საკურთხეველში ორი უბე მოჩანს. ტრაპეზი შუაშია აგებული; კედლები ტაძრისა მოხატული ყოფილა ფრესკებით, მაგრამ ეხლა თითქმის აღარაფერი დარჩენილა.

სამხრეთ-დასავლეთის ეკვტერს შესავალი დასავლეთიდან აქვს და აქედან მეორე კარს მიჰყავხართ დასავლეთის ეკვტერში. ამ კარს ზემოდ ქვაზე გამოქანდაკებული ჯვარი ამშვენებს და სანახევროდ გადასული ასომთავრული წარწერა (ფ. №17381). სიტყვები და ასოები, რომელნიც აღარ მოსჩანან და ჩვენი აზრით ვუმატებთ, ჩასმულნი არიან ფრჩხილებში.

წ. (1) : ნებიტა : ღმრისათა

აღვადგეთ :: ეკუდრი ესე  
ჩუენ:: ინასარიძემან:: [გიორგიმ]  
და თანა :: მეცხედრემან ჩემმან ჩხეტიმ  
ის :: ქალმა :: ანა[მ]  
მ-წსნელად ცოდვილისა [სულისა]  
ჩვუნისათუის აწ [ვინცა და რომანცა]

მემან : კაცისამან ან [დიდმან]  
ანუ :: მცირაე :: მან :: ჩუ ...

---

1) დედანში ასო „წილ-ქანი“ უზის, მგრამ ვინაიდან ასეთი ასო არა გვაქვს, ამიტომ ჩვენ აქაც და სხვა ასეთ შემთხვევებში მარტო წ-ს ვტოვებთ.

დანარჩენი ნაწილი წაბღალულია და თუმცა ზოგიერთი სიტყები და ასოები განირჩევიან, მაგრამ ვინაიდან სრულის აზრის აღდგენა ძნელია, ამიტომ აღარ მოგვყავს, მით უმეტეს, რომ ტექსტი ჩვეულებრივი წყევლის დასასრულია.

ეკვტერი სასაფლაო ყოფილა გიორგი ინასარიძისა, მაგრამ საფლავი დაფარული იყო ჩამოწოლილი თაღის ნანგრევებით და ადგილობრივმა მღვდელმა ბოჭორიშვილმა საფლავის წარწერა, ხელით გამოღებული, მომაწოდა უკვე ტფილისში დაბრუნების შემდეგ, რისთვისაც დიდ მადლობას ვუცხადებთ. მოწოდებული წარწერა გადაბმული ასომთავრულით არის შესრულები და იკითხება ასე:

ღო. შეიწლე ფდ: ცდვლი: ინსარიძე: ესე არს: გნსს-ნბლი:

ჩი: უკი: უკე: ამს დვემკუდრო:

რ: მთნვს: ესე ნტრს: გზა: ესე რსა: წრსმრთებ-ლ

ხრ: შნ: გბი: გი: უ: დბ: შნდა,

უქარაგმოდ:

ღმერთო, შემიწყალე ფრიად ცოდვილი ინასარიძე, ესე არს განსასვენებელი ჩემი უკუნითი უკუნისამდე, ამას დავემკვიდრო, რამეთუ მთნავს ესე. ნეტარ არს გზა ესე, რომელსა წარმართებულ ხარ. შენ გევედრები გიორგი, უფალო, დიდებად შენდა.

ჩრდილოეთის კედელზე მოჩანს აქა-იქ ასომთავრული წარწერები. სულ ქვემოდ:

ქე შ-ე კე ჩოპე	ქრისტე, შეიწყალე კონსტანტინე (ანუ
რი და ნთლ	კვირიკე) ჩოპერი და ნათელ
დეფ-ლი	დედოფალი (ანუ დეოფალი).

ნათელ დედოფალი ჩვენ ერთი ვიცით, მეფის დიმიტრი მესამის მეუღლე (1289), გიორგი ბრწყინვალის დედა; მაგრამ არა ვგონებთ, აქ იმაზე იყოს საუბარი. უფრო საგულისხმოა „დეოფალის“ წაკითხვა. ამ ხარისხს ერისთავის ცოლები ატარებდენ. აქ ჩოპერის ცოლი უნდა იგულისხმებოდეს.

ამის ზემოდ:

ქე შსყ-ლენ ივნე და

გბრლ გალოტზ

ნი

ამის ზემოდ:  
ქრისტე, შეიწყალენ ივანე და  
გაბრიელ გალატოზნი

ქე შე ად. . .

სამხრეთის კედელზე, რამოდენიმე ადგილას, მოჩანს ნაშთები წარწერებისა, გადასული თუ კირით შეთხუპნული. ზოგი მათგანი დამალული ყოფილა წინეთაც შემდეგ დროის მიშენებულის ეკვტერებისაგან. ამათში ერთი მოიპოება მარჯვნივ.

სამხრეთ-დასავლეთის ეკვტერისა: . . . ორდა ქი / . . . ერს მთავ / . . . მა დვ  
ილიე / . . . ზლდ ნა ამსი.

მეორე წარწერა ამის ქვემოდ არის:

ამის [ეკლ]ესისა შენე. . . / გითხ[ვთ] მქლ ფლთა/ გლტ ზთა . . . ან.

წარწერების ნარჩენები ეტყობა დასავლეთ კედელზეც. ერთი წარწერიანი ქვა თავუკულმა ჩატანებული კედელში:

ქე შე ლ/მგ.

მეორე ადგილას ოთხი სტრიქონის უკანასკნელი ნაწყვეტი მოსჩანს:

. . . ომთა / . . . არანე / ბერა / აფქსძე (აფაქისძე)

ფანჯრის ქვემოდ:

. . . შეიწყალე / . . . რეანუმ (?).

ჩვენ დრო არა გვქონდა წარწერები გაგვერეცხა, კირი მოგვეცილებინა, თორემ მეტის ამოკითხვა შეიძლებოდა. ეს შემდეგ მკვლევართათვის მიგვინდვია. ფოტოგრაფიები: აღმოსავლეთის ფასადის №17382, სამხრეთის კედელი და კარი – 17380, ეკვტრის კარი, წარწერით – 18381, დასავლეთის კედელი და ფანჯარა – 17384. ეკლესიის გეგმაც გვაქვს ხელში.

### ნივთები ლაბეჭინის ტაძრისა.

1. **სახარება ოთხთავი.** ეხლა ლაბეჭინაში მარტო ერთი ხელნაწერი ტყავის სახარებაა დარჩენილი; წინეთ ბევრი ხელნაწერი ყოფილა, ზოგი დამპალა, ზოგი ფურცლებ-დაშლილი ყოფილა. 25 წლის წინეთ, ჩემს იქ მისვლამდის, მნათეს ეს ხელნაწერები რომელიღაც კუნჭულში დაუმარხავს მიწაში, თვით ეკლესიაში. მნათე გადაცვლილა და აღარავინ იცის, თუ რა ადგილას არის დამარხული ხელნაწერები.

ლაბეჭინის სახარება, in quarto, 24X18,5 სანტ., დაწერილია ეტრატზე ნუსხა ხუცურის ხელით, ჩვენის აზრით, მეცამეტე საუკუნისა, ორ სვეტად. სვეტზე 22 სტრიქონია. სათაურები და მეთაური ასოები ნაწერია წითლურით, სხვა შავის მელნით. ყდა ხისა აქვს, მიხაკისფერ ტყავ-გადაკრული, რომელზედაც ჩაჭრით გამოხატულია სახარების სცენები. წინა პირი შემკობილია კიდევ ვერცხლის ლურსმის თავების სახით ჯვარედინად. ხელნაწერი შემკობილია ოთხ მახარობელთა ფერადიანი სურათებით, რომელნიც ცოტა დაზიანებულნი არიან (იხ. ფოტ. №№ 16800, 16802, 16997). იოანეს სახარების ბოლოს ტექსტში მოყვანილია გიორგი მთაწმინდელის ანდერძი, რომელიც იწყება ასე:

„ესე საცნაურ იყავნ ყოველთა, რამეთუ ესე წმიდად ოთხთავი ჩვენ ახლად გვითარგმნია“ . . .

ამის შემდეგ ტექსტისავე ხელით არის ბოლოსიტყვაობა (№ 16806):

დბ-ღ და მდ-ლი ღ-ა ყ-თა  
 კთ-ლთა მიზეზსა : -  
 სრ-ლ იქმნა წ-ღ ესე  
 ოთხთ-ვი. თრგმნილ  
 ნი. გ-ი მთაწ-დლის-ნი : -  
 მე ს-ლთა სწყლბლ  
 მ-ნ. .... (1) ::  
 უჯისძემ-ნ : მო  
 ვიგენ წ-ნი ესე ოთ  
 ხთ-ვნი. სალცვე  
 ლად სლისა ჩ-ისა  
 და მშბ-ლთა ჩ-მთა  
 და [d]მ-თა ჩ-მთა .... (1)  
 ..... (1)  
 მშობელსა შეუნდვნეს  
 ღ-ნ ა-ნ : -  
 დაიწერნეს ჯ-ლითა

---

1) ეს ნაწილი ამოფხევილია

დვალ გ-ისითა შეუნ  
 დვნეს ღ-ნ. მწირსა  
 და ც-დვილსა :.  
 ამ-თ ოთხთ-ვთა ეტრა  
 ტისა შემქ-ნელსა, სუფსა  
 შ-უნდვნეს :. - ღ-ნ.

მთელი ეს ბოლოსიტყვაობა და გიორგი მთაწმინდელის ანდერძის დასასრული გადმოღებულია (იხ. ფოტ. 16806).

შემდეგ არის მშვენიერად შედგენილი სამიებელი დღიურ-საკითხავებისა შემდეგი სათაურით:

გ-ნგებ-ღ : სხრბ-თა : სძიებ-ლისა : წელიწდისა : დღსს-  
 წ-ლთა : ვითა ძ-ვლს : სჯნაქს-რი : წესსა ზ-ა : ბერძულსა :  
 სრ-ლებით :

პირველ გვერდზე ხელნაწერისა არა ტექსტის ხელით კვინკლოსია მოყვანილი, შემდეგ ერთი ფურცელი აკლია და მერმე ტექსტის ხელით მათეს სახარების თავების ნუსხაა და ამის ბოლოს სწერია:

ქ-ე : ღ-თისა : ძ-ლო : შემეწიე : უძლორსა : გიორგის : მწირსა :

შემდეგ სხვა ხელით მოყვანილია: „კალანდაა თქმული ეზრათისი?“, რომელიც იწყება ასე:

ოჯკ-თუ დადგეს იანვარი დღესა კვირიაკესა : ზამთარი იყოს ნოტია ზაფხული და არე ქართი და ჯმელ იყოს ნყ-ფი კეთილ სთუწლი მცირედ თაფლი ფ-დ ცხოვრთა შუჭბა : -

მათეს სახარების ბოლოს სხვა ხელით მოყვანილია „ზედნადებნი ქრონიკონისნი“. აქ არის წინასწარმეტყველება ზედნადების რიცხვის მიხედვით. დასაწყისი:

უკ<sup>3</sup> თუ იყოს ზ<sup>3</sup> ანდები ია: მ<sup>3</sup> ს<sup>3</sup> წელიწადსა იყოს ზამთარი  
თოვლიანი ყინელი მავნე : ფბრვლისა კიდევ<sup>3</sup> ნ<sup>3</sup> კარგი იყოს:  
და მოკმელე გაზაფხული წვმიან : ზაფხული ჯმელი :  
სთუწლი ნოტია : თ<sup>3</sup> ვა<sup>3</sup> ძვრად : მთანი : სჯობდენ  
ბარნი ზოგად ჩრდილოდ კ<sup>3</sup> თლ : ზამთრის ყინელმ<sup>3</sup> ნ<sup>3</sup> ვე-  
ნაჟსა ავნოს : თაფლი და ნაშრომი მცირედ : ფბრვ<sup>3</sup> ლსა :  
ბ : დაბნელდეს მზე : და ივნისსა კ<sup>3</sup> ზ :

ეს სტატია გაგრძელებულია კიდევ მარკოზის სახარების ბოლოს. შემდეგ მოყვანილია წინასწარმეტყველება ძვრისა და ქუხილის გამო. დასაწყისი:

იანვარსა თუ იქუხნეს იფქლისა და ღვინისა სავსებად იყოს  
თუ იძრას ერთობით ყ<sup>3</sup> ლსა ქ<sup>3</sup> ყნსა სიკ<sup>3</sup> დილი იყოს .:

იოანეს სახარების თავების ნუსხის შემდეგ მოყვანილია წესი მონაზონთა კურთხევისა.

სულ ბოლოს სახარებისა არის ფრიად საყურადღებო ვრცელი წერილი გაბრიელ ლაბეჭინელისა, თუ როგორ აუშენებია მას ლაბეჭინის ეკლესია სასტიკი მიწის ძვრისაგან განადგურების შემდეგ. ეს რასაკვირველია სხვა ხელით არის დაწერილი ერთ სვეტად ნუსხა ხუცურით, არა უგვიანეს მე-13-14 საუკუნისა. ამ წერილს თავში აქვს შესავალი წითლითურთ დაწერილი, რომლისაგან ცხადდება, რომ ყოფილა დაწერილი ისტორია ლაბეჭინელთა წინამძღვრების მოქმედებისა, რომელსაც ჩვენამდის არ მოუღწევია. სამწუხაროდ, უკანასკნელი ფურცლები წერილისა დაკარგულა და ამას გარდა ბოლოში 12 სტრიქონი სულ გაფუჭებულია და აქა-იქ ცალკე სიტყების მეტი აღარაფერი იკითხება. მოგვყავს ეს შესანიშნავი წერილი, რომელიც, სხვათა შორის, საყურადღებოა სააღმშენებლო და სამხატვრო ტერმინოლოგიისათვისაც:

ესე რ<sup>3</sup> დცა მ<sup>3</sup> თ<sup>3</sup> ს<sup>3</sup> ლკ<sup>3</sup> ლთა : ლ<sup>3</sup> ბეჭინელთა მოძღვრთგ<sup>3</sup> ნ.  
მოჭირვებული და შენებ<sup>3</sup> ლი .: ყოფილა : მ<sup>3</sup> თ<sup>3</sup> ყ<sup>3</sup> ლთგ<sup>3</sup> ნ<sup>3</sup>  
თითოეულ<sup>3</sup> დ<sup>3</sup> აქა დაწერილა. ამას ადგილსა ზ<sup>3</sup> ა:.

ეს არის შესავალი წითლითურთ ნაწერი. შემდეგი ტექსტი მოგვყავს ქარაგმების გახსნით და ჩვეულებრივის ნიშნებით. დასაწყისი და შემდეგი ნიმუში ტექსტისა იხ. ფოტო №№16807, 16808.

მათად შემდგომად მე გაბრიელ ლაბეჭინელი დავრჩი.  
ვიდრემდის ჩემი გამზდელი ცოცხალი იყო, რადცა შემემლო,  
ეკლესიისა სამსახურსა და პატრონთა სამსახურსა  
და სხუასა ყუელასა მეცა ვიქმოდე, რად ცოდვათა ჩემთაგან  
იგი მიიცვალა, მაშინცა მევე მიბრძანეს ამის ადგილისა  
პატრონთა ყუელათა წ<sup>3</sup> თა მთავარ ანგელოზთა  
სამსახური და თვთ მათ(ი) სამსახური ; რადცა ჩემსა ძალსა და  
ღონესა დაეტეოდა, ყოვლითა მოწყობილობითა მოვაწყე,  
ჰასრე რომელ არათა თანად არად არ აკლდა. ამას

შინა მრავალნი ჟამნი და წელიწადნი გარდაჰდეს და ცოდვათა ჩუენთა ღმერთმან მოაგო და მოიწია დიდი და საშინელი ძრვაჲ. მათ პირველთა ლაბეჭინელთა<sup>1</sup> მოჭირვებული და შენებული და თვთ ჩემი ყუელაჲ ერთსა დღესა საფუძველითურთ დაირღუა. შიგან ეკლესიასა, რაჲცა ხატნი იყვნეს და მოწყობილებაჲ, დაილეწნეს და იავარ იქნეს. გარეთ ნაშენებიცა ყუელაჲ. ამას ყუელასა ზედა შეგუჭქნა შეჭირვებაჲ და წუხილი, რაჲმცა ვქმენით, არაჲ ვიცოდეთ, და არავინ ეჭუდა რგებასა ამის ადგილისასა, და არცა ვის ეგონა, თუ ლაბეჭინის ქვაი ქვასა ზედა გაღაედებისო. და არცა თვთ მე დადგომად გამეგო. მერმე მოვეგე გონებასა, მეშინოდა და მრცხუწნოდა ღვთისაგან და წ-თა მთავარ ანგელოზთაგან და ყოველთა კაცთაგან. ვევედრე და შევეხუეწე ღმერთსა და ამათ წ-თა მთავარ ანგელოზთა: „უკეთუ ჯერ გიჩნდეს ჩემგან შენებაჲ თანადგომითა და შეწევნითა თქუენითა, მიბოძეთ გამარჯულებაჲ, რათა წ-თა მთავარ ანგელოზთა საყდარი აღვაშენო“. ყვეს წყალობაჲ და თანადგომად ჩემზედა, ჰელვყავ შენებად და მოვასხენ გალატოზნი თორმეტნი ერთსა ზაფხულსა და ვშრომე, რაჲცა ძალმედვა და გავეც ფასად, რაჲცა ღმერთსა ებოძა ჩემთვის მაშინ. მეორესა ზაფხულსა მოვასხენ ცემეტნი გალატოზნი და ეკლესიაჲ ზედა შევკარ მას ზაფხულსა. შეუენდვნეს ღ-ნი დედოფალთ დედოფალსა, ვახტანგის

1) თავიდან აქამდე ტექსტი გადაღებულია (იხ. ფოტო. №16807).

(ვნის<sup>1</sup>) დედასა რუსუდანს: მის ჟამისა შენებისათვის გალატოზთა ზედა ფასი მან გასცა, ცოთაჲ მეცა შევეწიე მაშინ. მოვასხენ კულავცა გალატოზნი მესამესა ზაფხულსა, და მოვარეთ საცურე. გავეც მე ფასი, რაჲცაღა მქონდა. და სრულ იქმნა ეკლესიაჲ და მოვგლისე შიგან, და დავდგენ კანკელნი ქვისანი, და გავეც ფასი მისთვის. მოვიყვანე მხატვარი. და რაჲცა ხატი დალეწილ იყვნეს, ყუელაჲ ახლად დავაწერინე. მოვიყვანე ოქრომჭედელი, რაჲცა ხატნი<sup>2</sup> დალეწილ იყვნეს, ყუელაჲ ახლად მოვაჭედინე, რაჲცა შეიკაზმოდა, შევაკაზმვინე. ორნი მთავარანგელოზთა ხატნი დიდნი, ერთი ყოვლად წ-ისაჲ ვედრებისაჲ, ერთი ზე კანკელითა ყოვლად წ-სა ვედრებისაჲ, და პეტრე-პავლეთ ხატნი. ესენი ახლად მოიჭედნეს, სახენი შეეკაზმენ, ჯუმლათ თერთმეტნი ხატნი ახლად მო(ვ)აჭედინე, კანკელთა კარითურთ ოცი ხატი წამლითა დავაწერინე. ამისსა შემდგომად მოვიყვანე მხატვარი და მოვახატვიე სრულად ეკლესიაჲ, და გავეც,

რადც მართებდა ფასი ჩემი. ჯუარსა ცხოვრებისასა აკ-  
ლია ჯერ(ე)თ შეკაზმვად, და თუ ცოცხალ ვიყო, მისსაცა  
შეკაზმვასა ვლამი. მოვახსენ მწერალნი და დავაწერიე  
ერთი დიდი ნეტაფრასი, და ერთი სუნქსარი, მოთხრობია-  
ნი ე, ერთი მარხვანი, ერთი საწინასწარმეტყულოდ,  
ერთი პირველი ჳმად პარაკლიტონი, ცხრად თუწ, ერთი  
სტოდელი, ერთი ნიკოლოზის ცხოვრებად, და დიმიტ-  
რის წამებად და შესხმად, და კონდაკი – სამსგეფსოდ .:  
ამის ყოველისა ფასი ჩემი გამიცემია. ესე ყოველი წიგნი  
შემოსილ არიან, მათთვისცა ფასი მე გამიცემია. კანკელ-  
თა ზედათ რომელ ჯუარცმისა ხატი არს, მისი ფასი რუ-  
სუდანვე გასცა. ეკლესისა კარის ბჭენი და [კიდევ] ამას  
ქედსა ზედა თუ სახლნი არიან, ანუ ზღუდენი არიან, და  
თუ ჭურმანი არს, რადცა ჭურჭელი [ველსადგი] და  
რადცა ბედელნი არიან, რადცა შეშის ვოდა, შევკაზმი, და  
სხუად ახლად აღვაგე. მრავალნი ქუაბ-საქვაბენი და სხუა-  
ნი მრავალნი წურილმალნი ჭურჭელნი, რომელი თითო-  
ეულად არ დაიწერებოდა. სამჭედლოდ ჭურჭელი უკლე-  
ბი, ველვენაწნი და ყანად ურიცხვ, რომელი მიშენებია,  
მომიგია და მიყიდია, აქა ზემოსა აგარასა და კვრიკე წმი-  
დასა რადცა მიშენებია და მიმატებია, ორგანვე თვთ ჩანს,  
ქუჭმოსა აგარასა საპირუტყუწ სახლნი დავდგენ. უწყის  
ღ-ნ, ვიდრე შემემლო, ამას ქედსა ზედა შენებად არაღს  
თანად მიკლია, ძალი და ღონე არსადთ რად მომწევდა,

1 ამ სიტყვას ქვემოთ აშიაზე შენიშვნა აქვს არა ტექსტის ხელით: „მგ-ნივ : ვახტანგის : დედასა :  
იტყვის“ (იხ. ფოტ. №16808).

2) სიტყვებიდან: „ყვეს წყალობად და თანადგომად ჩემზედა“, აქამდის ტექსტი გადაღებულია  
(იხ. ფოტო. №16808)

რასაცათვს არ ვიჭირვოდე ჩემობასა. ექუსნი გლეხნი მო-  
მიგიან ზოგიშს, ოთხნი ტეგიაანისეულნი, ერთი ნიკოლო-  
ზის ინასარიძისეული ბენმუქის ძე, ერთი საგლეხოდ  
კიდევ ჳამარის ძემან შემოსწირა და მე ზედა კაცი და-  
ვასახლე: ჟომხას ჟომქოფადს ძე და გოგელაური პარ-  
ტახტი. ესე ორნი ივანე ქობულისძემან მოაქსენა ეკლე-  
სიასა. საირმეს თურქანადსძესა არავინ ემართლების ეკ-  
ლესიასა წაღებასა: ამით რომელ გაბისულადს ძისა სახ-  
ლისა მკუდართა, აქა დამარხულთა, ანდერძი არს, ნა-  
სისხლად აღებულია კერძოთაგან, მას საუკუნესა ბრა-  
ლია, თუ ვინ წაუღებს. არჰანას რომელ მიშენებია და მო-  
მიგია, ესე არს: ეკლესია ავაგე. შიგან მოვხატე, და მოვ-  
კაზმე, და ხატნი დავასუწნენ. და სხუად წიგნი და რად-  
ცა უნდოდა, დავსხენ, ბედელნი ახლად გამოვცვალენ,  
სამნი ახალნია და ორი ძუწლი; ჩემითა ფასითა მიყიდია;

ჭურმარანი შევჰკაზმენ, ოთხი კარგნი საწნეხელნი დავ-  
დგენ, [კარგ]ნი რეკუნნი. და ზედა აქუს ქვთვირისა სახლი  
საკაცე და საპირუტყუფ. სხუად ჭურჭელი, ქუაბ საქუაბე და  
სამჭედური და სხუად, რაიცა ჭურჭელი სახლსა შიგან  
ჯამს, ყუფლად უკლებად დამიდგამს, გარემემო რა-  
ცა ზღუდენი არიან და ზღუდეთა შიგნით რომელ ვენაჯ-  
ნი და ნაშენებნი არიან, იგიცა მე მიშენებია და მიქნია.  
მანდა ზეგანთა ციხისა კერძოთა კაცთაგან ვენაჯნი იყვ-  
ნეს, იგი აქა მკუდართათვს ეკლესიასა მოაქსენეს და არს  
იგი. სხუად ზოგი მიშენებია და ზოგთათვს ფასი გამიცე-  
მია, უნებლით არავისთვს ეკლესიასა მოაქსენეს და არს  
იგი. სხუად ზოგი მიშენებია და ზოგთათვს ფასი გამიცე-  
მია, უნებლით არავისვს წამილია, ღმერთია მოწამე. ბა-  
ღუმელადის სახლი და მამული ნახევარი შუმანასა სა-  
ლოცველად და სააღაპოდ შემოწირულია, ნახევარისათვს  
ე[ქუსასი ბოტინატი ფა]სი პატრონთათვს მოგვკსენებია  
და აწ ეკლესიასა აქუს.

შემდეგ 12 სტრიქონი მოთხუპნულია და ცალკე სიტყვები და ასოები განირჩევა:

... ის ძისა მ... ად ... ა ... ვინცა ... და ... აქს ეკლესიასა ...  
... ხლასად. ... ბოტინატი .. ანუ ფა. ... ესე ... ნებისათვს და  
საყდრისათვს გამიცემია. ... გარეთ მოსაღებათა მისნია. ...  
კულა რადმე ... მეტი არაა შემერთო. ...

გაბრიელის წერილი იხსენიებს დედოფალთ დედოფალს რუსუდანს. ვინ არის ეს დედოფალი რუსუდანი, სინამდვილით თქმა ძნელია. თუ მართლა ის ვახტანგის დედაა, როგორც აშიაზე შენიშვნა უჩვენებს (ფ. №16808 და 16807), მაშინ შესაძლებელია რუსუდანი იყოს მეუღლე მეფის დავით მეოთხე ნარინისა, რომელიც იყო ქალი მიხეილ პალეოლოგისა. მისი სახელი ისტორიას არ შეუნახავს. ვიცით მხოლოდ, რომ ამ ქალიდან დიმიტრის ჰყავდა შვილი ვახტანგ, რომელიც გარდაიცვალა 1292 წელს.

2. ხატი წმიდა გიორგისა (ფოტ. №16768), ვერცხლისა, ოქროთ დაფერილი, ნაჭედი, 62X48 სანტ. წმ. გიორგი წარმოდგენილია სრულის ტანით, ფეხზე მდგომარე, რომაული სამხედრო ტანისამოსით; მარჯვენა ხელში ლახვარი უჭერია; მარცხენა დადებული აქვს ფარზე, რომელიც ლამაზად შემკობილია. ეზო ხატისა გამშვენებელია ვენახის შტოს მსგავსი ხლართულებით. აშია ლურსმული მერმინდელია. ეტყობა ეს ხატი დიდათ დაზიანებულა მიწის ძვრის დროს, ძლიერ დაჭყლეთილა და შემდეგ შეუკეთებიათ, აშია გამოუცვლიათ, მაგრამ ამის შემდეგაც კიდევ დაზიანებულა. დაზიანებულია ნამეტნავად ქვემო ნაწილი; ქვემო აშია აკლია. ორივე მხარეს თავისა უწერია ლამაზი და დიდი ასომთავრულით: „წ-დ გ-დ“. მეორე დიდი წარწერა ასომთავრულით ჩამოგძელებულია ზევიდან ქვემოდ, მარცხნივ სურათისა, 24 სტრიქონად, მაგრამ წარწერა დაზიანებულია. ქვემო მარჯვენა მხარეს ადგილები ამოგლეჯილია, ასოები აკლია; ამას გარდა სიტყვები შემოკლებით არის წარმოდგენილი. აზრით მიმატებულს ასოებს ჩვენ ფრჩხილებში ვათავსებთ:



1. ქ : მე : იე : ვნს : ძენ : სთ : ენ : მჭთ : ჰნ : და : პრო : სტონ: მვჭედე : ხტი : ესე : წისა გის : მთვრ : მწამის ა : და : დავსნე სყდრსა : შს ოჩმ	მე იოანე ვარდენის-ძემან, სუანთ(ა) ერისთავმან, მეჭურჭლეთ(ა) უხუცესმან და პროტოსტრატორმან, მოვჭედე ხატი ესე წმიდისა გიორგის(ა) მთავარ მოწამის- ა, და დავასუნე საყდარსა შენს(ა) ოჩამი
10. სსა: სჯსნზლ დ : სლისა : ჩმსა მშბლთა : ჩმთა და : შვილთა. ჩმთთს [რა]	სასა (?) საჯსენებელა- და სულისა ჩემისა, მშობელთა ჩემთა და შვილთა ჩემთათჯს, [რადთა]
15. : ამით : ხტ [ითა] : მიგჯნდ [ო მს დდ] ეს : მე : [და] : შვილნი [ი ჩ] მნი : და [მ]	ამით ხატ[ით]ა მიგჯნდ[ო მას დდ] – ეს(ა) მე [და] შვილნი ჩე- მნი და [მ]-
20. ოგჯც[ე] თჯს : მდ ეზად . . . ლითა : გლი . . . რბისა და ჩნ ისთს : შნ	ოგუჯც[ე] თავსმდ- ეზად . . . ლითა გლი . . . რბისა (?) და ჩუენისათჯს შენ
24. ქჯლნ : და : მჯნემნ	ქუელმან და მჯნემან.

ეს ფრიად საყურადღებო წარწერა მრავალ მხრივ არის მნიშვნელოვანი. სიტყვები აქ ერთობ შემოკლებულია და იგიც უმეტეს შემთხვევაში უქარაგმოდ არის წარმოდგენილი. ასო უ-ნის მაგიერი იხმარება ჯ (სტრ. 4,24). ეს აიხსნება შემოკლებით, ვინაიდან ასომთავრულში უ გამოიხატება ოჯ, ამიტომ აქ ო გამოტოვებულად უნდა ვიგულისხმოთ. მეორე შემთხვევაში ჯ ნახმარია ო-ნის მაგიერ (სტრ. 5), მაგრამ აქაც გამოტოვებულად ო-ნი უნდა ვიგულისხმოთ (ოჯ) და სიტყვა „სვანურის“ გავლენით უნდა წავიკითხოთ „მუჭედე“, მოვჭედეს მაგიერ. ძნელია თქმა, რომელი გეოგრაფიული სახელი იგულისხმება შემოკლებით გადმოცემულ ჯგუფში „ოჩმსსა“ (სტრ. 11-12). შეიძლება აქ იგულისხმებოდეს „ოჩამჩირისასა“, მარამ ამაში დარწმუნებული არა ვართ და ამიტომ ჯერჯერობით ვტოვებთ „ოჩამისასა“, თუმცა ასეთი ადგილის სახელი ჩვენთვის უცნობია.

სვანთა ერისთავი იოანე აქ ორი თანამდებობის ანუ ხელისუფლების ტერმინით არის მოხსენებული. ერთი ქართული ტერმინი – მეჭურჭლეთ – უხუცესი – ცნობილია, ხოლო მეორე ტერმინი, რომელიც ჩვენს ტექსტში გამოხატულია სიტყვებით „პრო : სტონ“, სრულიად უცნობია. ეს პირველად გვხვდება ქართულ წარწერაში და საზოგადოდ ქართულს ლიტერატურაში. ეჭვს გარეშეა, ეს ტერმინი ბიზანტიურია, აქ შემოკლებით გადმოცემულია და ეტყობა, ცოტა შეცვლილი, თუ არ დამახინჯებული, მაგრამ რომელ ბიზანტიურ ტერმინს უნდა უდრიდეს ის? ერთად

ერთი შესაძლებლობაა, ის უდრიდეს ბიზანტიურს პროტოსტრატორ-ს, რომელზეც ნიჭიერად მიგვითითა პატივცემულმა ცნობილმა მეცნიერმა პოლ პეტერსმა.

წარწერაში მოხსენებულია სვანთა ერისთავი იოანე ვარდანისძე. ცნობილია, ძველ დროს სვანთა ერისთავები ვარდანისძის გვარისა იყვნენ, ხოლო წარწერებში დღემდის ეს უფრო დადასტურებული იყო გურიის წარწერებით (იხ. დ. ბაქრაძის „მოგზაურობა გურია-აჭარაში“, გვ. 109, 111-112, 261, 268, 269); სვანეთის და მის ახლობელ ადგილების წარწერებიდან ეს ნაკლებად იყო ცნობილი. საბედნიეროდ, გარდა ამ წარწერებისა, ჩვენ თვით სვანეთშიაც ვიპოვეთ სწორედ ამავე ივანე ვარდანის ძის წარწერა. ეს აღმოჩნდა ერთ-ერთ მესტიის ეკლესიის უცნობ ხატზე და საჭიროდ ვხდით ამ ხატზე აქ ვიქონიოთ საუბარი.

2 ბის. მესტიის ხატი იოანე ვარდანისძის წარწერით. ეს ყოფილა ხატი აგრეთვე წმიდის გიორგისა, ოქროსი, ნაჭედი 70X40 ს. მშვენიერი ხელობისა, მაგრამ სანახევროდაც არ არის შენახული; ტანი წმიდანისა სრულებით აღარ არის; დარჩენილია მხოლოდ მშვენიერი დიდი ასომთავრული წარწერა სახელისა „წ-დ გ-ი“. ეზო ხატისა ისეთივე ლამაზად არის შემკობილი ვაზის ყლორტების მსგავსი ორნამენტებით, როგორც ლაბეჭინას ხატი; აშია აქაც რომბ-ლურსმულია და დაცულია ნაწილობრვ მარჯვნივ და მარცხნივ: ორივე მხარეს რკინის რგოლებია დარჩენილი, ჯაჭვის გასაყრელი, რომლითაც ხატის მტვირთველი ხატს ატარებდა ჯარის წინ, თუ სხვა შემთხვევაში. სვანეთში კიდევ ჯაჭვებით ხატებს მიაბამდენ კედელზე, ძლიერია, არ გაიქცეს, ჩვენი ეკლესია არ მიატოვოსო. წარწერა, ქვემო ნაწილზე, მარცხნივ, თერთმეტ სტრიქონად, დაზიანებულია, მაგრამ საერთოდ უფრო კარგად შენახული, ვიდრე წინა ხატზე, აზრით მიმატებული ასოები ფრჩხილებშია:

- |                                 |                                       |
|---------------------------------|---------------------------------------|
| : ქ : მე : ინე :                | ქ : მე იოანე                          |
| ვარდა[ნის]                      | ვარდა[ნის]                            |
| ბემნ : ს[ნთ]                    | ბემან, ს[უანთა]                       |
| ერსთმ [ნ და]                    | ერთისთავმა [ნ და]                     |
| მეჭუჭლ                          | მეჭურჭლე-                             |
| ეთა : უხცნ                      | თა უხუცესმან,                         |
| მოვჭედე : ხტი : ესე             | მოვჭედე ხატი ესე                      |
| : გისი : და დავასუნე [ეკსა...]  | გიორგისი და დავასუნე [ეკლესიასა. . .] |
| და : მივანდვე : თე[ს რა]        | და მივანდვე თე[ოდორეს, რ ათა]         |
| 10. ამით : ხატითა : ღ[სა ევდრს] | ამით ხატიღა ღ[მერთსა ევდროს]          |
| დიდისა : სუანეთი [სა თ-ს]       | დიდისა სუანეთისათჳს.                  |

პალეოგრაფიული ხასიათი ამ წარწერისა იგივეა, რაც ხატისა, მხოლოდ აქ სიტყვები არ არის ისე შემკობილი, როგორც პირველზე; აქ ეპიტეტი „პრო-სტონ“ არ არის, მაგრამ სიტყვები „რათა ამით ხატითა“ აქაც გამოვრებულია და აგრეთვე ხარისხი მეჭურჭლეთ უხუცესობისა. ორივე ხატი ერთი და იმავე ოქრომჭედლის ნახელავი უნდა იყოს.

რაც შეეხება ივანე ვარდანის ძეს, ეს ის ივანე ვარდანისძე უნდა იყოს, რომელიც ცხოვრობდა გიორგი მესამის დროს (1154 -1184) და მიიღო მონაწილეობა დემნას ანუ დიმიტრის გამოსვლაში გიორგის წინააღმდეგ 1177 წელს (მარიამ დედოფლის ვარიანტი, გვ. 388); მაგრამ აქ პირველად ვტყობილობთ, რომ ეს მეჭურჭლეთ

უხუცესიც იყო. თამარის დროიდან კი ეს ხელობა მემკვიდრეობით გადადიოდა ამ გვარში. თამარმა ხომ ეს თანამდებობა უბოძა კახაბერ ვარდანისძეს. ამავე დროს სვანეთის ერისთავობა მისცა ვარამ ვარდანისძეს. უნდა ვიფიქროთ, გიორგი მესამემ ივანე ვარდანის ძე, დემნას გამოსვლის შემდეგ, სვანეთში აღარ დააყენა და გაგში გადაიყვანა.

ჩვენ ვიცით, თამარ მეფის დროს, ივანე ვარდანისძე, პატრონი გაგისა, მიემხრო გიორგი რუსს, თამარის წინააღმდეგ (მარიამის ვარ. 438). როცა გიორგი რუსი დამარცხდა, თამარმა გაგი ზაქარია ვარდანისძეს უბოცა. ამის შემდეგ ივანე ვარდანისძე აღარ სჩანს (მარ. ვარ. 442). ის ალბათ ან მოკლულ იქმნა ომში, ან დამარცხების შემდეგ გიორგი რუსთან ერთად გადაიხვეწა ბიზანტიაში.

განხილული ხატები უნდა იყოს გაკეთებული 1177 წლამდის. დემნას მოძრაობამდის. ამგვარად, ეს ორი საყურადღებო წარწერა ჩვენ გვაძლევს ცნობას ერთს უძველეს ვარდანისძეზე, სვანეთის ერისთავზე. ვარდან, სვანთა ერისთავი, პირველად იხსენიება გიორგი მეორის დროს (1072-1089). აქედან უნდა მომდინარეობდენ ვარდანისძენი.

იმერეთის მეფის ბაგრატ მეხუთეს დროს (1360-1395). სვანეთის ერისთავი ვარდანისძე მეფის წინააღმდეგ გამოსვლის გამო გადაყვანილ იყო გურიის ერთისთავად. გურიის ხატების წარწერებში პირველ ხანად გურიელები იცავენ თავის გვარსაც და სვანთა ერისთავის წოდებასაც (იხ. დ. ბაქრაძის „მოგზ“. გ. 109, 111, 261, 269), მაგრამ ჩვენთვის ესეც ცხადია, რომ ზოგიერთი ხატი სვანთა ერისთავის ვარდანისძის წარწერით სვანეთიდან არის გადმოტანილი გურიაში და არა იქ გაკეთებული. ზოგიერთი მათგანი ხელობის თვალსაზრისით, მე-12-13 საუკუნოებს ეკუთვნის, როცა ვარდანის ძენი გურიაში არ ყოფილან.

რაც შეეხება ბიზანტიურ ტიტულს „პროტოსტრატორ“-ს თუ მართლა ეს ჩვენს შემოკლებულს და შეცვლილ ტერმინს „პროტონ“-ს უდრის, უნდა ვიფიქროთ, ეს ტიტული ივანე ვარდანის ძეს ძველის ტრადიციით მიუთვისებია. ეს იმ დროდან, როდესაც სვანეთი მჭიდროდ იყო ბიზანტიის გავლენის ქვეშ, როდესაც ის შედიოდა ჯერ ლაზების სამფლობელოში ავტონომიურად და შემდეგ აფხაზთა სამეფოში. ეტყობა, სვანეთის ერისთავები, ანუ ხელქვეითნი მეფენი, იღებდნენ ბიზანტიიდან საიმპერიო კარის-კაცთა პატივს და ტიტულებს, ისე როგორც ტაო-კლარჯეთის ბაგრატიონები და აფხაზთა მეფენი (მაგალითად, აფხაზეთის მეფეს გურგენს ანუ გიორგი მეორეს (912-957) მაგისტროსის ხარისხი ჰქონდა მინიჭებული კონსტანტინე მეშვიდის პორფიროგენის თანა-მეფის რომან პირველის ლეკაპენისაგან). მაგრამ როდესაც საქართველო გაერთიანდა და საქართველოს მეფე თვითმპყრობელი გახდა დავით აღმაშენებლიდან დაწყებული, მას შემდე დამოკიდებულება ბიზანტიასთან, წინათაც მარტო ზნეობრივი და ნომინალური, სულ მოისპო. ამ დროს საქართველოს ერისთავი პატივს მიიღებდა მხოლოდ საქართველოს მეფის კარიდან და არა ბიზანტიიდან. მეტადრე ეს შეუძლებელი იყო გიორგი მესამის და მისი ასულის თამარ მეფის დროს.

„პროტოსტრატორ“-ის ხარისხი ქართულმა „კარის გარიგებამ“ არ იცის. ის უდრის პირველ ყოვლისა ქართულს „მეჯინიბეთ-უხუცესს“, თუმცა ბიზანტიაში მას სხვა ფუნქციებიც ჰქონდა, სამხედრო და საერო და ის ყოველთვის წარჩინებულ კარისკაცთა პირველ რიგში იყო (იხ. Du Cange, Glossarium. . . II, pp. 1463 -4).

ტრადიციით ტიტულის და ხარისხის მითვისება ხშირია ჩვენს ისტორიაში. საქართველოს რამოდენიმე სახელმწიფოდ და სამთავროდ გაყოფის შემდეგ ქართლის, კახეთის და იმერეთის მეფენი ძველებურად ატარებენ „მეფეთა მეფის“ ტიტულს. მთავრებიც მისდევენ ხშირად ამ ტრადიციას. მაგალითად, შამან-დავლე პირველი დადიანი ერთს ლაფსხალის ეკლესიის ხატის წარწერაში, რომელიც თავის ადგილზე იქნება მოყვანილი, თავის თავს აცხადებს დადიან-გურიელად, სვანთა ერისთავთა ერისთავად და მანდატურთ-უხუცესადაც, მაგრამ შამან-დავლე პირველი მარტო დადიანი იყო (1470-1474) და სხვა საპატრონო და სხვა ხარისხი მას არავითარი არა ჰქონია.

აგრეთვე, ჩვენის აზრით, „პროტო-უპერტიმოსი“-ს ტიტული, რომლითაც, სხვა ტიტულთა შორის, მოხსენებულია ჭყონდიდელი მეცამეტე საუკუნის დასაწყისის ნათარგმნ „სააქიმო წიგნ“-ში (იხ. ჩვენი აღწერა წერაკითხვის საზოგადოების ხელნაწერთა, ტ. 1. გვ. 641), ტრადიციით მომდინარეობს იმ დროდან, როდესაც ჭყონდიდი შედიოდა აფხაზთა სამეფოში და პირველ ხანად კონსტანტინეპოლის საპატრიარხოს ექვემდებარებოდა.

რომ „პროტოსტრატორ“-ის ტიტულს ზემო გარჩეულს პირველ წარწერაში ნამდვილი, იმ დროისათვის რეალური მნიშვნელობა არა ჰქონდა, ეს იქიდანაც სჩანს, რომ მეორე მესტიის ხატის წარწერაში ეს ტიტული განმეორებული არ არის.

შენიშვნა: ამ ორი ხატის აღწერილობა გამოცემულია ჩვენს მიერ Byzantion-ში, t. XII, fascicule I, pp 197-204. სურათები, ჩვენ მიერ წარდგენილნი, რედაქციამ დაჰკარგა.

**3. ხატი ღვთის მშობლისა, ჩჩვილედი, (№16766), მოოქრული ვერცხლისა, ნაჭედი 68X53 ს. ღვთის მშობელი გამობერვით გამოქანდაკებულია, ტახტზე მჯდომარე, თავის წრე შემკობილია ძვირფასი ქვებით; წარწერა სახელისა ლამაზი, მსხვილი ასომთავრულით: დ დ დ ღ ღ. აშია შემკობილი ყოფილა ბროწეულის ყვავილების მსგავსი ორნამენტით, მაგრამ დარჩენილია მარცხენა კუთხე თავში და მარჯვენა კუთხე ბოლოში; მარცხენა კუთხეში, ზემოდ, იოანე ნათლის მცემელია, წელზევითი; მარჯვნივ აშიაზე, შუაში, შემოსილი დიაკონსავით, მთავარ ანგელოზია, ხოლო თავი აღარ შერჩენია; ქვემო აშიაზე წარმოდგენილნი არიან წელს-ზევითნი, ოთხ-კუთხედ მედალიონებში: წ-ა თ-ე (მარცხნივ კუთხეში) წ-ა გ-ი (შუაში) და წ-ა დ-ი (მარჯვნივ კუთხეში). მარცხნივ და მარჯვნივ წმ. გიორგისა, შუაში, ასომთავრული წარწერა არის, ორ სტრიქონად გამოქანდაკებული, მაგრამ მარცხენა ნაწილი ნაკლულია, თუმცა ადგილი ცარიელი არ არის, აშიის ჩუქურთმიანი ნაწილით არის შემდეგ ამოვსებული; მარჯვენა ნაწილი სრულად არის წარმოდგენილი, მაგრამ არაჩვეულებრივი მოვლენა ემჩნევა; წარწერაში ყველა ასოები ხუცური ასომთავრულისა მარტივად და მშვენიერად არიან წარმოდგენილნი: ხოლო ორივე სტრიქონის ბოლოში თავდება მხედრული ე-ნით და ეს ე-ნი ისე არის გამოხატული, როგორც მეთვრამეტე საუკუნეში გვხვდება ჩამოყალიბებული. თუ თავში ნაკლულ ასოებს მიუმატებთ, წარწერას შემდეგი სახე ექნება:**

[ღ]ბლო

შე ე ჯნჯხე

[ღბ]ელო

შე ე ვნდნე

უქარაგმოდ გამოვა:

ღმრთის მშობელი, შეიწყალე ერისთავი ჯინჯიხე.

ღმრთის მშობელო, შეიწყალე ერისთავი ვანდანე.

სახელი ჯინჯიხ ჩვენ შეგვხვდა ერთს მესტიის ეკლესიის წარწერაში. ასე ე-ნის მაგიერ რომ იქ ი ყოფილიყო, კიდევ გასაგები იქნებოდა. საუცხოო კიდევ ის არის, რომ ასომთავრული ე-ნი ნაწერში ხუთს ადგილას მშვენიერად თავის სახით არის წარმოდგენილი, ამიტომ შეუძლებელია, ეს ბოლო მხედრული ე-ნის მსგავს ასო რომ ანგარიშში მივიღოთ, დარჩება ჯინჯიხ და ვანდან; უკანასკნელი, შესაძლოა, ვარდანის მაგიერ იყოს დაწერილი, თუმცა ასო ნ აქ ეჭვს არ იწვევს. ჩვენის აზრით, ეს ხატი მეთოთხმეტე საუკუნეს ეკუთვნის. (ფოტ. N16766).

4. **ხატი კარედი ღვთის მშობლისა**, მოოქრული ვერცხლისა, 55X39 ს. დაკეცილი პირი ხატისა კამარიანია, შეძერწილი ვერცხლის განცალკევებული ფირფიტებით, როგორც კარებზე, ისე კამარის ზემოდანაც (№16770). ამ ფირფიტებზე წარმოდგენილნი არიან სხვა და სხვა წმიდანები, თუ სახარების სცენები. ჩვენ აქ ვხედავთ გარდამოხსნას, მაცხოვარს ტახტზე მჯდომარეს, ვედრებას, წმიდა გიორგის, წმიდა დიმიტრის, ღმერთს საბაოთს, ეკლესიის მამებს და სხვა. თექვსმეტ ოთხკუთხედ ფირფიტაზე გამოსახულია ღვთის მშობელი ჩჩვილეთი, წელს ზევით. გახსნილ კარედში შუაში არის წამლით დახატული ღვთის მშობელი ჩჩვილეთი და კარებზე წამლითვე ნახატავნი მთავარ ანგელოზები (ფ.№16769). ხელობა მდარეა და მასთან ცუდად შენახულია. წრეები ღვთის მშობლისა და მთავარ ანგელოზთა შემკობილი ყოფილა ექვსი მვირფასი ქვით, ეხლა დარჩენილია სამი. ქვემოდ უშნო ასომთავრულით სწერია:

წ : ყოლა წმიდაო : ღმრთის : მშობელო : შეიწყალე : სუ-  
ლი : აბს-ლ ამისა : ინსრძისა :. და :. მეუღლისა :. მის :.  
ანასი : ამინ:.

ხატი უნდა ეკუთვნოდეს მეჩვიდმეტე-მეთვრამეტე საუკუნეს.

შენიშვნა: ზემოთ ჩვენ აღვნიშნეთ ვედრება. ვედრება, ანუ ფრანგულად *déisis* – „დეიზის“, რუსულად „დეისუს“, არის სიმბოლო უკანასკნელი განსჯისა. ეს არის კომპოზიცია, სადაც ქრისტე, უზენაესი მსაჯული, წარმოდგენილია ღვთის მშობლის და იოანე ნათლის მცემლის შუა. ორთავენი, ღვთის მშობელი და იოანე, ევედრებიან მაცხოვარს ცოდვილთა შეწყნარებისათვის.

5. **ხატი მაცხოვრისა**, ვერცხლისა, მოოქრული, 16,5X14,3 ს. მაცხოვარი წარმოდგენილია ტახტზე მჯდომარედ, მარჯვენა ხელით აკურთხებს, მარცხენაში სახარება უჭირავს, წარწერა სახელისა ასომთავრულით წარყვნილია. აშია შემკობილია ვაზოვანი ორნამენტით; ქვემოდ ასომთავრული წარწერა აქვს:

ოფლუ :. იესუ ქრისტე ღმერთუ შეიწყალე სოლ  
ი ინასარიძის გიურგს და თანა მეცხედრის  
ა მათისა ჩხეტიძ ს ქალისა ანასი ამინ.

საკვირველია, რომ წარწერაში გამოხატულობით ო და უ კარგად განირჩევა, მაგრამ უ ნახმარია ო-ნის მაგიერ პირველ, მეორე და მეოთხე სიტყვის ბოლოს პირველი

სტრიქონისა და მეორე სიტყვაში მეორე სტრიქონისა, ხოლო ო ნახმარია უ-ნის მაგიერ პირველი სიტყვის დასაწყისში და უკანასკნელ სიტყვაში პირველი სტრიქონისა (ფ.№ 16771). ხატი მეჩვიდმეტე საუკუნეს უნდა ეკუთვნოდეს.

ინასარიძე გიორგი და მისი მეუღლე ანა, ჩხეტიძის ქალი, როგორც ზემოდ დავინახეთ, აღმაშენებელნი არიან სამხრეთ-დასავლეთის ეკვტერისა ლაბეჭინის ტაძრისა.

6. **ხატი წმიდის გიორგისა, ვერცხლისა, მოოქრული, ნაჭედი, 33X28 სანტ.** წმ. გიორგი წარმოდგენილია ცხენით, შუბით გმირავს მეფე დიოკლეტიანეს, თავის წრის ორივე მხარეს ბერძნულად აწერია: „ჰო აგიოს გეორგოს“, ხოლო ზემო კუთხეებში ასომთავრულით სწერია: წ ო გ ო; აშია არ შენახულა; ხატი კარგი ნახელავია და უნდა ეკუთვნოდეს მეთოთხმეტე საუკუნეს (ფ.№16767).

7. **ხატი მიქელ მთავარ ანგელოზისა, ვერცხლისა, ნაჭედი, 63X46,5 სანტ.** (ფ.№ 16765). მთავარ ანგელოზი წარმოდგენილია ფეხზე მდგომარედ, სრულის ტანით და გამობერვით; მარჯვენა ხელში აქვს ლაბარუმი, მარცხენაში უჭირავს ბურთი; აშია ვაზოვანი ორნამენტისა არის, მაგრამ უმეტესი ნაწილი მომარცულია. უზის ერთი ძვირფასი ქვა, მეორე დაკარგულია; ხელობა მდარეა, მე-17-18 საუკუნისა.

8. **ხატი პატარა მთავარ ანგელოზთა მიქელ და გაბრიელისა, წამლით დახატული;** ზემო მედალიონში მაცხოვარია: წარწერები ასომთავრულით: ი ჯ ქ ე, გაბრიელ, მიქელ. აშია ვერცხლისა აქვს; ხატი შემკობილია 52 ძვირფასი ქვით; ეკუთვნის მეცხრამეტე საუკუნის დასაწყისს (ფ.№16764).

9. **ხატი პატარა ღვთის მშობლისა, წამლით ნახატი, 14,3X11,2 სანტ.** ეკუთვნის მეცხრამეტე საუკ. შემკობილია ქვებით. (№16764).

10. **ჯვარი დიდი, საკურთხევლის წინ დასადგმელი, ერთს საყენზე მეტი სიმაღლით;** შექერწილია ვერცხლის თხელი ფირფიტებით, რომლებზედაც წარმოდგენილნი არიან, გამობერვით, წმიდანები; ქუდი ჯვარისა პირამიდალური სახისა არის; მასზე მოჩანს ზემოდ წმიდა გიორგი ფეხზე მდგომარე; ქვემოდ ღვთის მშობელი ჩჩვილელი. სხვა ფირფიტებზე განმეორებულია სხვა და სხვა ფიგურები; სიგრძეზე ჯვარისა სამ-სამი ღვთისმშობელია ნიშოვანი. ექვსზე კიდევ წმ. გიორგი ცხენოსანი, რომელთა შორის უკანასკნელი, ქვევით, უფრო დიდია და უფრო ლამაზი ნახელავი, ასომთავრული წარწერით წ ო გ ო. ხოლო ორ ფირფიტაზე მთავარ ანგელოზებია. ჯვარის სიგანეზე, შუაში, „უმბო“ მთავარ ანგელოზებით მარჯვნივ და მარცხნივ; შემდეგ ორივე მხარეს წყვილი სურათი ღვთის მშობელისა, ნიშანი, მთავარ ანგელოზებითურთ აქეთ-იქით; ეს ის ჯვარი უნდა იყოს, რომელზედაც გაბრიელ ლაბეჭინელი ამბობს: მოუჭედელი დამრჩაო. ეხლანდელი მოცულობით ჯვარი არ შეიძლება იყოს უადროესი მეთექვსმეტე-მეჩვიდმეტე საუკუნისა (ფ.№16764).

შენიშვნა: უამბო (umbho) ნიშნავს ჯვარის შუა ნაწილს, სადაც ჯვარცმულის მაგიერ ორნამენტებია წარმოდგენილი, ზოგჯერ გამობერვით.

11. **თასი** ვერცხლისა, მხედრულის წარწერით:  
ქ. ერისთავის ასული თ. ედორა.
12. **საცეცხლური**, ძველი ვერცხლისა, ხლართულებით შემკობილი.
13. ვერცხლის **ბალთები** სარტყლისა, ოქროთი დაფერილი.
14. **ფილონი** ძველი ფარჩისა, მდიდრულად ნაკერი, ხელაპყრობილი ქრისტეს სურათით.

### სოფელი საირმე

სოფელ საირმესთან წინეთ საირმის მონასტერი იყო. მონასტრის აშენება იქ დაიწყო ოტია დადიანმა და მისმა მეუღლემ გულქანმა და დაამთავრა მისმა შვილმა კაცია მეორემ 1766 წელს (იხ. დასავლეთ საქართ. საეკლესიო საბუთები, ს. კაკაბაძისა, 1. გვ. 30-33). მონასტერი ღვთის მშობლის მიძინების სახელზე იყო აგებული და არსებობდა ჩვენს დრომდის, მაგრამ ბოლოს დროს მონასტრის მახლობლად, მიწის ძვრის გამო, მიწა გასკდა, ნაპრალი გამოჩნდა, საიდანაც ზოგჯერ ამოდის ორთქლი და გაზი. ამიტომ მონასტერი გააუქმეს და ნივთები გადაიტანეს ჭყონდიდის მონასტერში. რომელზედაც საირმეს მონასტერი მიწერილი იყო. ძველი მონასტრის შენობა ჩვენ არ დაგვითვალისწინებია. თვით სოფელ საირმეში ეხლა ახალი ეკლესია არის ქვისა, სიონური რიგისა, წმიდის გიორგის სახელზე. ეკლესიაში არის რამოდენიმე ხატი და ჯვარი ქართული ადგილობრივი ხელობისა, მაგრამ მე-19 საუკუნისა.

1. თავ ხატად ეკლესიისა მიჩნეულია დიდი ვერცხლის **ჯვარი** 33 სანტ. სიმაღლით, რომელშიაც ხალხის გადმოცემით თითქო ინახებოდეს კბილი წმიდა გიორგისა. ჯვარი დამყარებულია დიდ ვერცხლის ბურთზე და შემკობილია 17 ძვირფასი ქვით; ამათში 4 ლალია და 4 ზურმუხტი: ოთხივე ფრთაზე ჯვარისა წარმოდგენილია წმიდა გიორგი ფეხზე მდგომარე, მარცხენა ხელის აპყრობით და ჯვარიანის და გრძელ ტარიანის ლახვარით მარჯვენა ხელში. ქვემო სურათის ორივე მხარეს გვირგვინია გამოსახული და თარიღი ჩყლც - 1838 წ. ქვემოდ გამკეთებლის მონოგრამა „სმა“. ესევე გვირგვინები, იარაღი და მონოგრამა განმეორებულია მეორე გვერდზე ჯვარისა. ჯვარი ამართულია დიდ ხის კიდობანზე, წმიდის გიორგის გამოქანდაკებული სახეებით, მდარე ხელობისა. ჯვარი გადმოღებული გვაქვს ფოტოგრაფიულად (№16763).

2. **ჯვარი** ათონური რიგისა 14X6 სანტ. ჯვარცმულის სახით შუაში და მახარობლებით ფრთებზე. მეორე გვერდზე, შუაში, წარმოდგენილია ნათლის ღება, ხოლო ფრთებზე მახარობლები და ანგელოზები.

3. **ხატი ღვთის მშობლისა**, 16,5X16,1 სანტ. ტლანქი ხელობისა მე-19 საუკ. შესდგება ოქროთ დაფერილი ვერცხლის ფირფიტებისაგან, რომელნიც მიჭედდნენ არიან

დაფაზე. ამ ფირფიტებზე ჩჩვილელი ღვთის მშობლის გარდა, წარწერით „ღ ა ლ სა“ წარმოდგენილი არიან კიდევ მაცხოვარი, ანგელოზები და ჯვარცმა.

4. ხატი მაცხოვრისა, წამლით დახატული, მე-19 საუკ. წარწერით: ქ ე.

5. დიდი ხატი მაცხოვრისა, წამლით დახატული, წარწერით: ი ჯ ქ ე. მე-19 საუკ.

6. ხატი წმიდა გიორგისა, წამლით დახატული, ბერძნული წარწერებით. წმ. გიორგი წარმოდგენილია თეთრი ცხენით და შუბით გმირავს ვეშაპს; მე-19 საუკ.

7. ხატი ღვთის მშობლისა, ჩჩვილელი, წამლით დახატული, 68X47 სანტ. წარწერით „დედა ღ სა ი ჯ ქ ე“, მე-19 საუკუნისა; ჩასვენებულია კიდობანში, რომელსაც აწერია: „1895 წ. აპრ. 28. პეტრე ნიკოლოზის . ძემ . ალავიძემ შესწირა „კიოტი“. ეს ალავიძე მოხუცებული მნათე არის ამ ეკლესიისა. ამია და თავის წრე (ნიმბი) ღვთის მშობლისა შემკობილია 12 ძვირფასი ქვით, ლალებით, ფირუხებით, ქარვებით და ამეთვისტოებით.

8. კანკელი ახალია, მე-19 საუკ. წმიდანები ტილოზეა დახატული, ხუცურის წარწერებით; ქვემოდ ზოგიერთებს მხედრულად უწერია: „შეიწყალე შემომწირველი როსტომ ალავიძე“.

### სოფელი ლაჯანა.

საირმედან ჩვენ დავბრუნდით ალპანაში და მეორე დღეს გავემგზავრეთ ორბელში. გზა ლაჯანურას მარცხენა ნაპირით მიდის. ალპანის მახლობლად ლაჯანურაზე ქვის ხიდია და აქედან იწყება ძლიერ ვიწრო, მაგრამ თვალწარმტაცი თავის სილამაზით და სინაზით ხევი ლაჯანურისა, რომელიც გრძელდება შვიდი კილომეტრის მანძილზე. ხოლო შემდეგ ორბელის ხიდამდის ხეობა ერთობ ფართოდ იშლება და ესეც ფრიად ლამაზია. ამ ფართო ხეობის ორივე ნაპირს, ფერდობებზე და სერებზე, გაშენებულია უმთავრესი სოფლები. აღნიშნული ვიწრო ხეობა ლაჯანურასი მოგვაგონებს თავის საზოგადო სახით დარიალის ხეობას, მაგრამ, რა თქმა უნდა, მინიატურულად. დარიალის ხეობა თავის მაღალი კლდოვანი მთებით სასტიკია, ეს თავის მწვანე მცენარეობის შემოსილობით ნაზია და კეკლუცი. ამ ხეობის სახეების და პეიზაჟების გადმოღებას დ. ერმაკოვმა მთელი დღე მოანდომა. მრავალი სურათია გადმოღებული, მაგრამ ნომრებს ვერ ვუჩვენებთ, ვინაიდან სურათები ეხლა ხელთ არა გვაქვს.

ჩვენ დავბინავდით ორბელიანის დუქანში, ხიდთან, და აქედან ვხედავდით ექსკურსიებს ლაჯანურის ხეობის სოფლებში. პირველი სოფელი, რომლის ეკლესია ვინახულეთ, ლაჯანა იყო. ამას მიუცია სახელი მდინარისათვის, ლაჯანურა.

სოფელი ლაჯანა გაშენებულია მაღლობზე, ლაჯანურას მარცხენა მხარეზე, მახლობლად ორბელისა. მთავარ ანგელოზის ეკლესია ამ სოფლისა მთაზე მდებარეობს; ჩვეულებრივი სახის არის, ოთხკუთხედი, მაგრამ საკურთხეველი გარედ მომრგვალებული აქვს, ნაშენია უბრალო ქვით, შიგნით შელესილია, მაგრამ ფრესკებით არ არის შემკობილი; შესავალი აქვს დასავლეთით, სამხრეთით და



ჩრდილოეთით და თითო პატარა ფანჯარა ყოველ კედრით. ეკლესიაში ჩვენ ვიპოვეთ ორი ხატი, ერთი მთავარ ანგელოზთა და მეორე ღვთის მშობლისა; ორივე ადგილობრივი, უფრო სვანური ხელობისა, მაგრამ ყოვლად ტლანქი, რაც ცხადი მაჩვენებელია იმისი, თუ როგორ დაცემული ყოფილა კულტურა ამ მხარეში მეთვრამეტე საუკუნის დამლევს და მეცხრამეტეს დასაწყისში.

1. **ხატი მთავარ ანგელოზთა მიქელ და გაბრიელისა**, ვერცხლით ნაჭედი, 40X29 სანტ. (ფ.№17619). მთავარანგელოზნი წარმოდგენილნი არიან მთელის ტანით და ჯვრებით ხელთა, ზემოდ მათ შუა ქერუბიმებია; მარცხნივ და მარჯვნივ აშია შემკობილია წერტილებიდან შემდგარი ხაზებით და ნახევარ რგოლებით; ზემოდ და ქვემოდ წარწერებია ასომთავრულით, მაგრამ ისეთი ვულგარულით, როგორც თვით მთავარანგელოზთა სახეებია; ამიტომ წარწერა ადვილი გასარჩევი არაა. სახელების წარწერები: წ ო მიქე, წ ო გ-ლ. გაბრიელის თავზე სულ ცუდათ გამოყვანილი ასოებით და შემდგომ ზემო აშიაზე ასეთი ხელით:

ამისი ოქრომ	ამისი ოქრომ-
ჭდლი ოსებ[ქა]	ჭედელი ოსებ[ქა]-
ჟბე ო შეუნდს	ჟელაძე შეუნდვეს
ღმეთნ	ღმერთმან
წ ო დაგვიც ო თემს ო თქნის	დაგვიც თემს თქვენის
ს-ლისა ო თ-ს ო სლის ო წ-ის ო შბა	სულისათვის სულის წმიდის შაბა-
თს ო ერთი ო ცხვრი ო ან ო ხბო ო ა	თს ერთი ცხვარი, ან ხბო.
რა ო ოდეს ო ეს ო არ ო მოგიშლოთ ო	არა-ოდეს ეს არ მოგიშალოთ.

ქვემოდ აშიაზე:

1. მო(ვ)ჭედე ო ხ ტი ო ესე ო მთვრანგლზი ო ბაკულდშის ო მე ო მარინემ ო.
2. დადიშქელიანის ო ქ ლმან ო სახსრად ო ს-ლისა ო ჩ- მისა: ქმრის ო ფიცი
3. ას ო და შვილის ო ისლამის ო შესნდობელად ო და საოხად ო სლის
4. ა ო ჩ- ისა ო ვნცა ო ესე ო მოგიშლოს ო მთვრ ო ანგელოზმა
5. კრული (?) ო ამყოფს ო მსი: ს-ლი ო და ნათესავი ო.

2. **ხატი ღვთის მშობლისა, ვედრებისა, ვერცხლისა**, იმავე ზომისა და ხელობისა, როგორც პირველი (ფ. №16772). ღვთის მშობელი წარმოდგენილია მთელი ტანით, ხელებ აპყრობილი სამლოცველოდ; აქეთ იქით აშიებზე მთავარ ანგელოზებია; ზემოდ ქრისტე, წელს ზევითი, წარწერით: ი- ჯ ქ-ე. აქეთ იქით ორი ფიგურა კაცისა, ხელებ გაშვერილნი, თითქო ჯვარზე გაცმულნი, მაგრამ ჯვარი არ ჩანს. მთელი შემოსილობა ხატისა განცალკევებული ფირფიტებისაგან შემდგარია და მიჭედილი ხეზე, მაგრამ ხელობა ერთი დროის და ერთი ოქრომჭედლის არის. ზემოთ მარცხნივ ერთობ უშნო ვულგარული ხუცურით სწერია:

წ ო ამისი ო ოქრო ო მჭედელი ო.  
 იოსელ ო ქაჟელაძე ო შეუ  
 ნდოს ო ღ-ნ ო.

ქვემოდაშიაზე ასეთისავე ხუცურით:

წ ო : ვედრებისა : ლ თის : მშბ ლო : მ ხ : და მფარველ : ექმ ენ : ამის : მომჭედს : გელოანსა : სულას : და თ ა : მეცხედრ ესა : მისსა : დედუდარიანის : ქ ლს : ყაზმის : შვილთა : მათთა : მოწყალე : და შემწე : ექმენ : დლსა : მას : განკითხვისასა :

ამის ქვემოდა კიდევ ვულგარული მხედრულით:

ღმერთო : და : ვედრების : ღმრთის : მშობელო : აც  
ხოვნე : ზეცას : მომგები ფაცია და მისი მეუღლე მარინე.

ჩუკულის წარწერიდან ჩვენ ვტყობილობთ, რომ სულა, გიორგი და ფაცი გელოვანები ძმები ყოფილან; სულას მეუღლე იყო დედუდარიანის ასული ყაზმანი ანუ ყაზმის.

### სოფელი ორბელი

ორბელი თავი სოფელია ლაჯანურის ხეობაში (ფ. №17510), სადაც სახლობენ თავადნი გელოვანები; აქვე მაღალ კლდეზე აშენებულია დიდი, ლამაზი ციხე ორბელის (ფ. №17402). ამ ციხემდის ლაჯანურის კალაპოტი ერთობ ვიწროა, ხოლო ციხის ძირიდან იწყება დიდი ფართო ხეობა; აქ არის ხიდი ლაჯანურზე. ციხეს სამი კოშკი აქვს; მათში ჩრდილოეთის კოშკი ყველაზე მაღალია; შიგ ხის ოთახია გადახურული; შუა კოშკი შესავლის კარის თავზეა ამართული, აღმოსავლეთით; მესამე კოშკი სამხრეთით არის. ციხეში არის ჭა და პატარა ქვის ეკლესია, აწ უკვე დანგრეული. ეკლესია თლილის ქვით არის შეძერწილი შიგნით და გარედ; სიგრძე აქვს 9 არშინი და 4 ვერშოკი, განი 7 არშინი და 4 ვერშოკი; შესავალი აქვს სამხრეთით და დასავლეთით; ფანჯრები აღმოსავლეთით, დასავლეთით და სამხრეთით; საკურთხეველში ორი პატარა უბეა. თალი ჩამონგრეულია. დასავლეთის მხრით ეკლესიას მიშენებული აქვს დიდი ეკვტერი, სიგრძით 9 არშინი და 4 ვერშოკი; ეკლესია მოხატული ყოფილა, ხოლო ეხლა მხატვრობა მოშლილია; კარგად შენახულია მხოლოდ მთავარ ანგელოზი დასავლეთის კარის ზემოდ; თვით კარი რკინით შეჭედილია; საკურთხეველის თაღში ორი პატარა ჭურია, ჩაშენებული ხმისათვის (ფ. №17398).

ახალი ეკლესია ორბელისა ხისა არის პატარა დავაკებაზე, მახლობლად ძველი ეკლესიისა. ეკლესია მომრგვალებით გამოდის აღმოსავლეთით; ირგვლივ უვლის ფანჯატური სვეტებზე; დახურულია ყავრით; ფანჯრები ხისა აქვს, ცხრილოვანი და ლამაზი (ფ. №17400). კანკელი ახალი და გაკეთებულია 1867 წ. 19 აგვისტოს, რაც ჩანს შემდეგის მხედრული წარწერიდან:

აღემართა კანკელი ესე ამა მთავარანგელოზის ეკლესიასა  
შ ა: ამას შინა შემავალთა მრევლთა მიერ. მათდამი  
საკუთრებათა ზ ა ჩყიდზსა წ. აგვისტოს : ით ს

ეკლესიის მახლობლად ხის პატარა ლამაზი სამრეკლოა ორსართულიანი, სვეტებზე, შაქრის თავის მსგავსი სახურავით (ფ. №17399).

ეკლესია ორბელისა, ეტყობა, ბევრჯერ ყოფილა გაძარცვული; აქ სულ ნაძარცვი, ხატები და ჯვრები დარჩენილი და მათ შესახებ მცირე ნაშთებისაგან უნდა ვიქონით წარმოდგენა. აქ ვნახეთ:

1. **ჯვარი რკინისა**, 43 X21 სანტ., რომელიც შეჭედულია ოქროთი, ზედ ნაჭედი ჯვარცმულის სახით და ასომთავრული წარწერით: **ⲁ ⲟ ⲛ ⲉ** : შემკობილი ბალახოვანი ხლართული ორნამენტებით; ძვირფასი თვლები ოთხი მოძარცვულია, მაგრამ მათი ბუდეების ნაშთები მოჩანს; ქვემო ნაწილი ჯვარცმისა მოწყვეტილია (ფ. №16781). მეორე გვერდი ჯვარისა ისეთივე ლამაზი ხლართული ორნამენტით არის შემკობილი, როგორც პირველი (ფ. №16782), მაგრამ ქვემო ნაწილი, სადაც ასომთავრული წარწერა ყოფილა, მოძარცვულია, დარჩენილია მხოლოდ ორი სიტყვა:

ქ : ძელო .:

ჯვარი უნდა ეკუთვნოდეს მე-15 საუკუნეს.

2. **ხატი მთავარანგელოზისა მიქელისა**, წამლით დახატული ძეღზე, 93X56 სანტ. მთავარანგელოზი წარმოდგენილია ლაზარემით ხელში, მაგრამ ფერადები სურათისა სულ გახუნებულია; ვერცხლის შემკობილება ბალახის მსგავსი ხლართულებით შერჩენილია მხოლოდ ნაწილობრივ აშიებზე, თავის წრეზე და ზემოდ თავის წრესთან, სადაც ასომთავრულით უწერია: მთავარ ანგელოზი მიქელ (ფ.№16783). ქვემოდ, ასომთავრული წარწერიდან დარჩენილია შემდეგი:

: ქ : წ ო : მთავარანგელოზო .: მიქაელ .: გაუმარ

ჯუე : მმსავთა შენთა . . . ინაის ძეთა

ჯოდ(ე)დიანსა ვა . . . . . ვახტანგს : . . . .

და მფრველ ექმენ პაპასა . . . . .

ხატი უნდა ეკუთვნოდეს მე-14-15 საუკუნეს.

3. **ხატი მთავარ ანგელოზისა მიქაელისა**, წარწერით: მიქაელ მთნგზი, 89X59 სანტ., წამლით დახატული, მაგრამ გაფუჭებული; აშიები ოქროსი ისეთი ბალახოვანი ხლართული ორნამენტებით ყოფილა შემკობილი, როგორც ზემო აღნიშნული ჯვარი, მაგრამ ორიოდე პატარა ნაწყვეტია დაცული (№16785).

4. **ხატი მთავარანგელოზისა გაბრიელისა**, 58X42 სანტ., ასეთივე ხელობისა, როგორც წინეთ მოხსენებული ხატი, მაგრამ უფრო ცუდათ დაცული, წარწერით: მთანგზი გლ (ფოტ.№16781).

5. **ხატი მაცხოვრისა**, წელს ზევითი; წამლით დახატული, 69X51 სანტ. სახე აქ ცოტა უკეთ შენახულია, მაგრამ ოქროთ დაფერილი ვერცხლის სამოსელიდან ცოტა არის გადარჩენილი, მარჯვნივ და მარცხნივ და ორ ადგილას აშიებზე; მაცხოვარი მარჯვენა ხელით აკურთხებს (ფ. № 16781). უნდა ეკუთვნოდეს მეჩვიდმეტე საუკუნეს.

6. ასეთივე ხატი მაცხოვრისა, მაგრამ უფრო დიდი, 104X72,5 სანტ. (№ 16785). ფერადები გაფუჭებულია; მარჯვნივ მხედრული, არა-ძველი, წარწერა აქვს: მე გიორგი მეიფარიანი დავდევი ეს მაცხოვრის ხატი ჩემი შესანდობელი.

7. ხატი მთავარ ანგელოზთა მიქელისა და გაბრიელისა, ვერცხლის, ოქროთ დაფერილი; ორთავე წარმოდგენილნი არიან სრულის ტანით, ყვავილებით ხელში; მიქელ ამას გარდა რომაული მხედრის ტანისამოში და მარჯვენა ხელში სიმრგვალე უჭირავს ღერძით, გაბრიელის გმელი, თითქო ქალის ტანისამოსი აცვია და მარჯვენა ხელი გაშვერილი აქვს სიმრავლისკენ. აშია მოჩუქურთმებულია. ხატი კარგად არის შენახული და წარმოგვიდგენს ტიპიურ მეგრულ ხელობას მეცხრამეტე საუკუნის პირველ ნახევრისა, რაც დადასტურებულია მხედრულის წარწერით ზემოდ და ქვემოდ (ფ.№ 16780).

1. ჩყლზ-ს წელსა შინა : გამოისახა და შეიმკო მთავარანგელოზის ხატი ესე ორბელის ეკლესიისა.

2. მისივე სახელსა ზედა აღშენებულისა თვით შეწირულებითა მისითა დროსა მთავარსა ს-დ სამენ

3. გრელოსა ლეონ გრიგოლის ძის დადიანისა და მეუღლისა

4. მისისა მთავრინა მართა ზურაბის ასულის წე

5. რეთლისა და მემკვიდრისა მათისა დ-თ ლეონის ძისა რომელიცა იკურ(თხა)

6. ს-დ სამენგრელოს მწყემს მთა

7. ვრის და ჭყონდიდის ეპისკოპოსის და

8. მთავრის დადიანის მოძღვრის გიორგი კუხა

9. ლოვისაგან და მე მზრანებითა მათითა აღვსწერე ხატსა ამას ზ-ა ლე-

10. ჩხუმის სასულიეროს განმგემ

11. ბლალოჩინმა და მთავარ ლეონ დადი

12. ანის კარის მღვდელმა აზნაურმა პავლე გიორგის

13. ძემ დაშნიანმა.

8. სახარება ეტრატზე, 21X16 სანტ., დაწერილია ნუსხა ხუცურით, ორ სვეტად, 25 სტრიქონი სვეტში. სათაურები ნაწერია სინგურით. თავი და ბოლო აკლია. ადგილ-ადგილ ტექსტი აღდგენილია, ნაკლულოვანი ადგილები შემდეგ შევსებულია ქალაღზე; თარიღი არა აქვს; მაგრამ ხელის მიხედვით, სახარება უნდა ეკუთვნოდეს მეთორმეტე საუკუნეს. ტექსტი გიორგი მთაწმინდელის რედაქციის არის; ბოლოში აქვს ვრცელი სარჩევი და შემდეგ არა-ტექსტის ხელის წერილი ნუსხა ხუცურით, რომელიც მოგვითხრობს სახარების განახლების ამბავს 1600 წელს, როდესაც ქართლის მეფე სვიმონ პირველი თათრებს ტყვედ ჩაუვარდათ. ქარაგმებს ვხსნით და ნიშნებს ახლებს ვუსვამთ:

დიდებაჲ ღმერთსა ოთხთავნო სახარებანო, მათე, მარკოზ, ლუკა და იოვანე, შეი-წყალე სული მუხიერ ყიფიანისა და თანამეცხედრისა მისისა ელენესა ყიფიანის ქალისა, იქსენ მათთა ცოდვათაგან, აგრევე შვილთა მათთა პაპუს, ხოსროს და ბესის ცოცხალი აღდგერძელო(ს) ღ ნ, მიცვალებულისა მათისა ცოდვანი და ბრალი მათნი შეუნდოს ღმერთმან. ესე ოთხთავნი ფურცლად დაშლილი იყო და დაოხრებული. მერმე მოვიყვანე მწერალი ყასელაძე მანაველ და შევამკვე ახლად წიგნი ესე მას ჟამსა, როდეს ქართველთა მეფე სვიმონ თათართა დაიჭირეს და წაიყვანეს. ქართლი ააოხრეს

საყდართურთ. აწ ვინცა ჩვენის ცოდვილისა სულისათჳს შენდობა(სა) ბრძანებდეთ, თქვენცა შეგინდოს ღმერთმან თქვენი ცოდვანი. რაცა ამა ჯვარხატსა კელი უნდა, მასამც მოვაჭედინებთ, ოქრომჭედელიცა ის არის.

განმაახლებელი მანაველ ყასელაძე თავის თვს იხსენიებს კიდევ მინაწერებში, მათეს სახარების ბოლოს:

ღბ` ღ` ს` ა` მიზეზსა კეთილისასა სრულ იქმნა წ` ღ` ესე და  
ს` ლთა გ` ნსანათლებელი ოთხთავნი კელითა ფ` დ ცოდვილისა  
მანაველ ქასელაძისა. დედა მამათა მისთა ძმასა მისსა შეუნდოს ღ` ნ.

შემდეგ კიდევ იოანეს სახარების ბოლოს უწერია:

ყ` დ წმიდაო ღ` ის მშობელო შეიწყალე და აცოვნე ს` ლი  
დარიდონ ქარსელაძის ქალისა. ვინცა შენდობა ბრძანოთ  
ს` ლ კურთხეულისა დარიდონისა თვთ თ` ქნცა შეგინდოს  
ღმერთმან ამინ კ` სნ. სულსა მანაველ ქარსელაძესა შეუნდოს.  
სულსა ივანე ქარსელაძესა შეუნდოს, მეუღლესა მისსა (შ)ვენიერსა  
მიდელანის ქალსა შეუნდოს ღ` ნ.  
ამინ კ` სნ.

აღსანიშნავია, რომ მინაწერებში ერთი და იგივე გვარი სამი ფორმით არის მოხსენებული: ყასელაძე, ქასელაძე, ქარსელაძე.

ლუკას სახარების ბოლოს მერმინდელის ხელით:

წ: მთ` ვრ ანგელოზო ორბელისო შ` ნის მოწყლ` ბის მადლსა შ` ე` ნ` კზ. კუჭაისძე. ან  
ო` . ნ` კზ (ხვეულად).

შემდეგ სხვა ხელით:

წ` ო მთავარ ანგელოზო ორბელისო შეიწყალე ამ წიგნის ახლა შემამკობი ადამ  
სლგძე (sic).

შემდეგ მხედრულის ხელით:

ღმერთო და ამ სახარების მადლო: შეიწყალე ადამ სალაგაძე ა` ნ.

ეს სახარება ჩვენ ვნახეთ ორბელის მღვდლის დავით ლემქაშელის სახლში. შემდეგ, როგორც შევიტყვეთ, სახარება გადაუციათ ქუთაისის მუზეუმისათვის.

### გელოვანთა ეკლესია.

ლაჯანურის ნაპირზე, იასონ გელოვანის სახლის ქვემოთ, აგებულია მოზრდილი ეკლესია გელოვანთა, მათი სამარხავი, შექერწილია თლილის ქვით და ეკვტერი ახლავს დასავლეთით; მაგრამ ეს ეკვტერი უფრო ძველია თვით ეკლესიაზე; მისი იატაკი უფრო დაბლა არის, ვიდრე ეკლესიისა; ეტყობა, ძველი ეკლესიის აღმოსავლეთის ნაწილი მოუშლიათ და ახალი ეკლესია მიუშენებიათ ზედ და ამით წინანდელი ეკლესია ახალის ეკვტერად გადაუქცევიათ. თადი ეკლესიისა მომრგვალებულია; შესავალი მოიპოვება სამხრეთით, დასავლეთით და ჩრდილოეთით. საკურთხეველში სამი ფანჯარაა; სხვა მხარეებში თითო; ჩარჩოები ფანჯრებისა მოჩუქურთმებულია. საკურთხეველი გარეთ მომრგვალებით გამოდის. დახურულია ყავრით, ორ ფრთად, და შიგნით შეთეთრებულია კირით. კანკელი ხისაა, ერთობ მაღალი; გაყოფილია ხუთ სართულად. აღსავლის კარი საკურთხეველისა და დანარჩენიც ორი ჩუქურთმით შემკობილნი არიან. სურათები წმიდანებისა კანკელში წამლითაა დახატული 37 განცალკევებულს დაფაზე.

შინაარსით წარმოგვიდგენენ სახარების სცენებს. ამას გარდა არის კიდევ სურათები ღვთის მშობლისა და იოანე ნათლის მცემლისა. მხატვრობა გვარიანია. ორ სტრიქონიანი მხედრული წარწერა კანკელისა გვიჩვენებს, რომ ახალი, აღმოსავლეთის ნაწილი ეკლესიისა აუშენებიათ 1798 წელს:

ქ: შენ ცათა უვრცელეს უმაღლესო დედოფალო მარიამ მე ფ დ ცოდვილმან მონამან მინდობილმან საფარველთა შენ-თამან: მსასოებელმან. სარდალ მოურავმან. გელოანმან. ქაიხოსრო და მეუღლემან ჩემმან დგებუადის ასულმან როდამ

აღვშენეთ ეკლესია ესე შენ მიერთთა წყალობითა სახელსა ზედა შობისა შენისა და შევამკვეთ ყ-ითა სამღვდელოთა და წიგნებითა : და დავახატვინეთ : კანკელი ესე მრჩობლთა ცხოვრებათა ჩვენთა წარსამართებლად : და სულთა ჩვენთა საუკუნოდ მოსახსენებლად

რათა მეოხ იყო ჩვენთვის წინაშე ძისა შენისა დღესა მას განკითხვისასა ღირს გვყვენ ჩვენ მარჯვენით დგომად წინაშე ძისა შენისა. და ძეთა და ასულთა ჩვენთა. მონიჭე კეთილწარმატება და სიმრთელე კეთილ ცხოვრება : მონებასა შინა შენსა ამინ : სრულ იქმნა დეკემბერს. 1798. ქრისტეს აქეთ : ჩ. დ. ჟ. 1798.

უფალო იესო ქრისტე ღ-ო შეიწყალე გლაზაკი და ფ-დ ცოდვილი მონა შენი. დავით ბეჟიაშვილი : ქართველი : ამინ.

ქაიხოსრო გელოვანი ამშენებელი ეკლესიისა მოკლულ იქმნა 1799 წელს (იხ. ჩემი სტატია: ისტორიული მინაწერები კვინკლოსისა და სხვა ქრონოლოგიური ცნობები, რუსულ ენაზე, მზრუნველის კრებული, წიგნი მე-21, გვ. 59). ეკლესიაში დამარხულნი არიან გელოვანთა ოჯახის წევრები. ზოგიერთ მათ სასაფლაოს ქვებზე მხედრული წარწერები არის:

1. მაიორი ლეონ ქაიხოსროს ძე გელოვანი. მოკლული აფხაზეთის ომში 1824 წელს : წელთა უფლისა ჩყკდ, ივლისის ი. წმისაებრ უფლისა მიწა მიწადვე მივიქეც მონა ღ-ისა მაიორ-კავალეროსნი თავადი ლეონ ქაიხოსროს ძე გელოვანი ოდესცა წარვიდენ საბრძოლველად უდიდებულესი მხედრობა როსიის და მათთანა სრულიად სამენგრელოდსა და სხვათა მთავარი ღენერალ ლეიტენანტი ლეონ გრიგოლისძე დადიანი უსჯულოსა ზედა აფხაზეთს. მუნ წარვსდევ რა ბრძოლასა შინა მოვიწყალ მახვილებითა და აღვესრულე წლისა : ლზ : გევედრები ყოველთა აღმომკითხველთა სიყვარულისათვის ღ-ისა შენდობასა მყოფდეთ ჩემ ცოდვილთათვის და რათა არავინ შეძრათ ლოდი ესე და საფლავი გვამისა ჩემისა :

2. პოლკოვნიკი ბერი ქაიხოსროს ძე გელოვანი, გარდაცვლილი 1851 წ. 24 აგვისტოს, მე-95 წელზე ცხოვრებისა:

კდ აგვისტოს ჩყნა წელსა ახალჭალას მიცვალებული პოლკოვნიკი და კავალერი თავადი ბერი ქაიხოსრო ძე გელოვანი, რომელმან მსახურა ღირსად მამულსა.

(ამ წარწერაში შემთხვევით გამოგვრჩა ის ნაწილი ტექსტისა, სადაც ნათქვამია, რომ ბერი გელოვანი გადაიცვალა მე-95 წელს ცხოვრებისა).

3. მარკა მიქელაძის ასული, კნეინა გელოვანისა, გადაცვლილი 1849 წელს. ვგონებ, უნდა ყოფილიყო მეუღლე ბერი გელოვანისა.

4. მდივანბეგი სამეგრელოსი გიორგი ქაიხოსროსძე გელოვანი, გადაცვლილი 1824 წ. 12 ოკტომბერს:

საფლავსა ამას შინა ვმდებარებ თავადის სარდალ-მოურავის ქაიხოსრო გელოვანის ძე სამეგრელოს სამთავროს მდივანბეგი გიორგი გელოვანი, რომელიც აღვესრულე წელსა, ჩყკდ-სა, ოკდომბრის იბ-სა, წლისა. ნგ. ხოლო თქუჴნ მხილველნო და აღმომკითხველნო ჩემზე მდებარისა ამის ლოდისა მომიგონებდეთ. . .

5. კნეინა სალომე გელოვანისა:

გიორგი ერისთავის ასული სალომე კნეინა გელოვანისა ჩყმბ წელსა, კგ წლისა, მეუღლე მისი ნიკო და ძე ნესტორ.

6. ჩყმე წელსა მხლებელი მთავრის დავითისა ნიკო მაიორის ძე გვარათ გელოვანი ოცდა შვიდი წლისა.

### სოფელი ლაცორია.

სოფელი ლაცორია გაშენებულია მაღლობზე, ლაჯანურის მარჯვენა ნაპირზე. ეკლესია სოფლისა პატარაა, ხისა. საკურთხეველი მომრგვალებით გამოდის გარედ. ირგვლივ ფანჯატური უვლის, ხის სვეტებზე დამყარებული; დახურულია ყავრით, ორ ფრთად. კანკელი ხისა აქვს, 1888 წელს, 26 ივნისს დამთავრებული, წმიდანების სურათებით დაბალი ხელობისა და მხედრულის წარწერებით. ამ ეკლესიაზე მოწერილნი არიან კიდევ სოფლები სპატაგორი და ლემქენა. ეკლესია წმ. კვირიკე და ივლიტეს სახელობაზეა აშენებული. ეკლესიაში იპოვება:

1. თავი ხატი ეკლესიისა **კვირიკე და ივლიტასი**, ვერცხლისა, ისეთივე უშნო და ერთობ ტლანქი ხელობისა, როგორც ლაჯანას ხატი იყო, იმავე ოქრომჭედლის გაკეთებული (ფ. №16786). წმიდანები მთელის ტანით არიან წარმოდგენილნი, კვირიკეს მარცხენა ხელში ჯვარი უკავია, მარჯვენით ჩასჭიდებია ივლიტას ხელს, რომლის თავის მორთულობაზე ჯვარი უსვია. ზემო აშიაზე კარიკატურული ფიგურებია ქრისტესი მთავარანგელოზებითურთ, დაბლა კუთხეებში ასეთივე კარიკატურული ფიგურებია წმ. გიორგის და წმ. დიმიტრესი, წარწერები ხუცური კიდევ უფრო ვულგარული და დამახინჯებულია, ვიდრე ლაჯანის ხატზე. ზედა აშიაზე სწერია:

ამის მომჭედ	ვისსა ძესა
სა მოძღუ	ისოებს
არს ქასი	შეუნდს
ლამესა ლი	ღ ნ.

ქვემო აშიაზე:

უქარაგმოდ:

წ ო კ კე წ ო ო ლ ტე [მონა შენი] გელოანი სულა დგი მთის ცოდვისაგან	წმიდაო კვირიკე, წმი- დაო ივლიტე [მონა შენი] გელოანი სულა დგი მათის ცოდვისაგან.
--	--

ფრჩხილებში ჩასმულს სიტყვებს აზრით ვუმატებთ. ხატზე ვერ ვარჩევთ. დამახინჯებულს მხედრულ წარწერაში მარჯვენა აშიაზე ჩვენ გავარჩიეთ მხოლოდ:

ქ წმიდაო . . . ისეობ მჭედელი .

ლაჯანის წარწერაში ოქრომჭედელი წოდებულია იოსებ ქაჭელაძეთ, აქ კი იოსებ ქასილაძეთ. ხელობა კი ერთი და იმავე ოქრომჭედლის არის.

2. ხატი ღვთის მშობლისა, წამლით დახატული, ლამაზი ნახელავი, მაგრამ არის ძველი, 27X21 სანტ., ბერძნული წარწერით სახელისა.

3. მეორე ხატი ღვთის მშობლისა, წამლით დახატული ჩჩვილეთი, ასეთივე ხელობისა, როგორც წინანდელი; სრულის ტანით, გვირგვინით. ეს ორივე ხატი ბერძნული ხელობისა არის.

4. ხატი მთავარანგელოზთა, წამლით დახატული, 54X40 სანტ. სახელების წარწერით დიდრონი ასომთავრულით: „მიქელ მთავარანგელოზი და გაბრიელ“. მიქელ მახვილით არის წარმოდგენილი, გაბრიელ ბზის შტოთი; ამას გარდა ორივეს ბურთები აქვთ ხელში; ხელობა ლამაზია, მაგრამ ახალი.

5. ხატი წმ. ბარბარესი, წამლით დახატული ძელზე, ერთობ უმწოდ გამოყავნილი. წარწერით: წ ო ვარვალა (sic).

6. ბარძიმი კალისა. მხედრული წარწერით:

ქ. გევედრები სამღთოთა მღვდელთა მუშაკი წმიდისა ამის ბარძიმისა დედოფალი გულქან, რათა რაჟამს შესწირავდეთ მსხვერპლსა წმიდასა ლოცვასა და მოხსენებასა ყოფდეთ ჩემთვის და მიცვალებულისა ჩემისა დადიანის ოტიასათვის.

დედოფალი გულქანი იყო რაჭის ერისთავის შოშიტა მესამის ასული, მეუღლე ოტია დადიანისა (1728-1744), ბეჟან პირველის დადიანის შვილისა.



## სოფელი მცხეთა.

დიდი მცხეთის სახელი აღმოსავლეთ საქართველოში არა იშვიათია საქართველოს სხვა კუთხეებშიაც, მაგალითად, სოფელი მცხეთა არსებობს დღემდისაც ოლთისის რაიონში; აქ, ლეჩხუმში, ლაჯანურას ხეობაში და სხვა. მცხეთის ეკლესია ლეჩხუმისა, წმ. გიორგის სახელზე აშენებული, განირჩევა ლეჩხუმის სხვა ეკლესიებისაგან. ეს ერთად ერთი ეკლესია არის ლეჩხუმში გუმბათიანი (ფ. №17395). ეკლესია პატარაა; შიგნით ჯვარის სახისაა, სამნაოსიანია; აქვს სამკვეთლო და სადიაკვნე, რომელნიც კარებით უერთდებიან საკურთხეველს და თვით ეკლესიას. სვეტი ორი აქვს, მრგვალი, ოთხკუთხედი კვარცხლბეკებით. ამ სვეტებიდან თაღები გადიან საკურთხევლის ნახევარ სვეტებზე, პილიასტრებზე, და ამ თაღებზეა დამყარებული გუმბათის ყელი., რომელსაც ექვსი ფანჯარა აქვს; გუმბათი შაქრის თავის მსგავსია. ეკლესია განუახლებიათ 1904 წელს და მაშინ დაუკარგავს თავის ფრესკები, კედლები ხელახლა მოუგლესიათ. კონცხებში აღმოსავლეთის და დასავლეთის ფასადისა ცხვრის თავებია ქვისაგან გამოქანდაკებულნი. მოგმო ფანჯარა დასავლ. მომრგვალებული, გრეხილიან ოთხკუთხედშია მოქცეული. ამ ოთხკუთხედის ზემოდ ჩუქურთმიანი ჯვარია. შიგ ოთხკუთხედში შვიდი ფიგურაა გამოქანდაკებული. მარცხნივ კაცისა, გვირგვინით თავზე და ქართულის ტანისამოსით; ამას ქვემოდ ფარშავანგი, შველი და ვეფხი; მარჯვნივ – წმ. გიორგი ცხენით, კაცს გმირავს შუბით; ამას ქვემოდ – ფრინველი (კაჭკაჭი ?) და ვეფხი (ფ. №17397). აღმოსავლეთის ფანჯარა შემკობილია ჩუქურთმებით, სიმრგვალებით, ჯვართურთ შუაში და ნაძვის ჯალღუზების მსგავსი ორნამენტით. ფანჯრის თავზე ჯვარია; ქვემოდ, ფანჯრის მარჯვნივ, დაუმთავრებელ ორნამენტის ქვეშ, გამოხატულია კაცის ხელი, რომლის ზემოდ აწერია მხედრულად (ფ. №17396):

ქ : ხელი ნასყი

დას : კალატოზის

ქართლელის

კანკელი ეკლესიისა, წამლით ნახატავი წმიდანების სურათებით, ახალია, 1864 წ. შესრულებული, რაც მტკიცდება მხედრულის წარწერით:

ჩყდ-სა წელსა აგვისტოს შვიდსა აღმართა კანკელი ესე

ამავ ეკლესიის საკურთხებისაგან.

შესავალი აქვს ეკლესიას სამხრეთით და დასავლეთით; კარის ჩუქურთმიანი შემკობილობა მხოლოდ სამხრეთის მარჯვნივ არის შენახული; ფანჯარა სულ ოთხი აქვს, თითო აღმოსავლეთით და დასავლეთით, თითო საკურთხეველში და სადიაკვნოში; საკურთხევლის ფანჯრის ქვემოდ, ეკლესიაში, ღრმა უბეა, გარდა ორი პატარა ნიშისა, მარცხნივ და მარჯვნივ ფანჯარისა. ტრაპეზი ქვისაა, ხუთ ქვისავე პატარა სვეტებზე დამყარებული. მახლობლად ეკლესიისა მოიპოვება პაწია ხის სამრეკლო, ოთხს სვეტზე დამყარებული (ფ. № 17395).

როდესაც აკადემიკოსმა ბროსემ ინახულა ეს ეკლესია 1848 წ., მას ადგილობრივ ცნობას მისცეს, რომ ეკლესია აშენებულია ოტია დადიანის მეუღლის გულქანის მიერ; ხოლო შემდეგ აიკლო იმერეთის მეფემო (Rapp. IX, 33-34). ეს ცნობა მართალი უნდა იყოს, ყოველ შემთხვევაში, ეკლესია მეთვრამეტე საუკუნის უნდა იყოს; ოტია

დადიანიც (1728-1744), ბეჟან პირველ დადიანის შვილი იყო, ხოლო მისი მეუღლე რაჭის ერისთავის შოშიტა მესამის ქალი, ცოცხალი იყო ჯერ კიდევ 1761 წ. (იხ. ჩემი „არხ. მოგზ.“, 2, გვ. 116).

### სიმველენი მცხეთის ეკლესიისა.

1. თავი ხატი წმიდა გიორგისა, დიდი, 90,5X55 სანტ. (გ. №16779), ოქროთ დაფერილი ვერცხლისა, ნაჭედი, ქართულის ხელობისა. ერთობ დაზიანებულია; წმ. გიორგი ფეხზე მდგომარე, გმირავს შუბით გვირგვინოსან მეფეს (დეოკლეტიანეს); თავის წრე შემკობილია 12 ძვირფასი ქვით, ლალებით და ქარვებით; წარწერა ხუცურია; მთვრ მწმ : მცხთ[ისა]. ისტორიული წარწერიდან, რომელიც ალბათ ქვემოდ იყო, ეხლა მხოლოდ ნატეხია შუაში მიკრული:

(ე)ქმნ წე ძესა :

: დღესა : მას დ

(დსა) ც<sup>დ</sup>ღვგნკით . . .

აშიები შემკობილი ყოფილა რომბ-ლურსმული ორნამენტით, შიგ დატანებული მედალიონებით და ფირფიტებით წმიდანებისა, ქვემო და ზემო ფირფიტები მერმინდელია; მარჯვენა აშიაზე, სხვათა შორის, მთავარ ანგელოზია წარმოდგენილი, სრული ტანით. ზემო აშიაზე, მარჯვნივ, ყოფილა პატარა სიმრგვალე (როზეტკა), ქვებით შემკობილი; ქვები დაკარგულა.

ხატი უნდა ეკუთვნოდეს მე-15-16 საუკუნეს.

2. ხატი მაცხოვრისა, ვერცხლისა, ნაჭედი, ქართული ხელობისა, 86X28 სანტ. მაცხოვარი მაკურთხეველის ხელით ტახტზე მჯდომარეა, მაგრამ ტანი, წელს ზევით, უმეტეს ნაწილად მოშლილია, აგრეთვე თავის წრეც; წარწერა სახელისა ბერძნულის ასოებით არის. აშია, რომბ-ლურსმული, უშნო ორნამენტით არის დამზადებული და მოყვითლულია. ხელობა მდარეა, მე-17-18 საუკუნისა, (იხ. 16774).

3. ჯვარცმის ხატი, ოქროთი დაფერილი ვერცხლისა, 30,5 X22 სანტ. წინამდგომებით, მარიამით და იოანე მახარობელით, რომელთ წარწერებიდან მოსჩანს მხოლოდ: „და ღთ – მწრბლ“. ჯვარცმის ზემოდ ბერძნული ასოებით ქრისტეს სახელი; მარჯვნივ და მარცხნივ მედალიონებში მთავარ ანგელოზნი, წელსზევითნი; ზემოდ წარწერა : ჯვარცმ : ქრსთსი . აშია რომბ-ლურსმულია. საზოგადოთ ხელობა ისეთია, როგორც წინა ხატისა და ერთი და იმავე ოქრომჭედელის ნახელავი უნდა იყოს. ჯვარის ქვემოდ ადამის თავია. ხატი მე-17-18 საუკ. უნდა იყოს. (№ 16775).

4. ხატი წმ. ბასილისა, ოქროთი დაფერილი ვერცხლისა, 28X13,5 სანტ. მშვენიერი ხელობისა; ბასილი წარმოდგენილია სრულის ტანით, სამღვდელ-მთავრო ტანისამოსით; მარჯვენა ხელით აკურთხებს, მარცხენაში სახარება უჭირავს; წარწერა ლამაზი ბერძნული ასომთავრულით; „ჰო აგიოს ბასილიოს“. აშიები შემკობილია ბროწეულის ყვავილების მსგავსი ორნამენტებით და მედალიონებით წმიდანებისა, ბერძნულის წარწერებით სახელებისა: ზემოდ: ვედრება; ქვემოდ: წა გიორგი წა დიმიტრი და წა თეოდორე; მარჯვნივ; წა ნიკოლოზ და წა იოანე ოქროპირი;

მარცხნივ: გრიგოლ დიდი და იოანე ღვთის მეტყველი (№16776). ხატი არის ბერძნულის ხელობისა, მე-12-13 საუკ.

5. ვეებერთელა ხატი მთავარ ანგელოზ მიქელისა, წამლით ნახატი ხეზე, 135X92 სანტ. ფართო თავის წრე ოქროთი დაფერილის ვერცხლისა, შემკობილი ბროწეულის ყვავილების მსგავსი ორნამენტებით (№16773). მთავარ ანგელოზს მარჯვენა ხელში უჭირავს მახვილი; მარცხენაში - სიმრგვალე, ასომთავრული წარწერით : წა არს, წა არს, წა არს ოფლი. ზემოდ ხლართული ანუ შეწვნილი ასომთავრულით: მთავარანგელოზი მიქელ. აშიები ვერცხლისაა, რომბ-ლურსმული ორნამენტით შემკობილი. ხატი მე-16 საუკუნის უნდა იყოს.

6. ჯვარი საწინამძღვრო, ოქროთი დაფერილი ვერცხლისა, ხეტარზე, რომელიც ვერცხლით არის შეჭედილი და მოჩუქურთმებული. თვით ჯვარის წინა პირზე გამოსახულია მოტლანქოდ ჯვარცმა; ზემოდ და ქვემოდ მედალიონებში – მთავარ ანგელოზები: მქ . გლ:. მარჯვნივ და მარცხნივ ჯვარცმისა: დ-და ღ-თს: წ-დ ი-ვნე მხრბლ. ჯვარცმულის ზემოდ ჯვარისავე წრეში სწერია: ქ მეოფე ორიათა. ამას ზემოდ არის გამოსახული მზე და მთვარე. წარწერები ყველა ასომთავრულია. ქრისტეს სახე დაზიანებულია. დიდი ვერცხლის ბურთი, რომელზედაც ჯვარია დაპყრობილი, შემკობილია წმიდანების სურათებით (გ. № 16778). ჯვარის ზურგზე ასომთავრული წარწერა ლიტერატურაში უცნობია (გ. №16777). წარწერა საზოგადოდ კარგად არის შენახული, მაგრამ ზოგიერთი სიტყვები ერთობ შემოკლებულია და მათი გახსნა არც ისე ადვილია, მაგრამ ცდა მაინც საჭიროა:

ქ შოი : შენ : ყლ  
თა : არსთა :  
: შმქდ : ქტე :  
: ძ : ღსაო : რნ :  
თავს იდ  
ევ : სიკდლ  
თა : სიკლი : დდრ  
გებიე : ჩენებრთა : ც დვილთათვნ  
რმნი : შნითა : ოხითა : შევედრნენ : ჩ

10. ვენ : ცა : ულისნი : დიდითა : სასებითა :

მხ-ბის : შნისა :  
შეხოეწილნ :  
მ-მკბნი : შ-ნი  
ს ხტსნი დნი

15. კლაოზსც მე  
ხდ მმაგებელ  
წე შნს : კხი : და  
რიშ : და : ასლი : ჩ-ნი  
დფი : მმცმთხვთ

20. მოწყბ[თა] შნთ : აქა : დ  
მ-ს : დიდს : დ-ღს : წე : შ-ნს : გ-კვ  
სასსა :.

უქარაგმოდ ტექსტს ჩვენ ასე ვკითხულობთ:

ქ შოი შენ, ყოველთა არსთა შემოქმედ(ო) ქრისტე, ძ(ეო) ღმრთისაო, რომელმან თავს იდვა სიკუდილითა სიკუდილი(ს) დადრგუნებაი(?) ჩუენებრთა ცოდვილთათვინ. რომელნი შენითა ოხითა შეივედრნენ, ჩვენცა უღირსნი, დიდითა სასოებითა მეოხების(ა) შენისა შეხუეწილნი(ი), მამკობნი შენის(ა) ხატისანი და ნიკოლოზისაც(ა), მეოხად მომაგებელ(ნი) წინაშე შენს(ა), კახი დარიშ და ასული ჩუენი დაფი, მიმცაამთხვიეთ მოწყალებითა შენთ(ა) აქა და მას დიდს(ა) დღეს(ა) წინაშე შენს(ა) განკითხვისასა.

ჩვენგან გადმოღებულ სურათზე ამ წარწერისა (ფ. № 16777) თავში პირველი ორი ასო „ქ შ“ არ სჩანს, მაგრამ ნამდვილში მოიპოვება. ამას გარდა, პირველი სიტყვა ზედმეტი ასოებით არის გადმოცემული. საკმარისი იყო მარტო შ, რომ წაგვეკითხა შოი, შემოკლების ნიშნები, პატივი წესიერად არ არის ნახმარი; ზოგი შემოკლება უპატივოდ არის დატოვებული. ბოლო ასოები ზოგიერთი სიტყვისა ხშირად გამოშვებულია; ასო ჯ მაგიერ ვ-ნია ნახმარი სიტყვაში „ცოდვილთათვინ“ (სტრიქონი 8), რომელიც თავის თავად ვულგარიზმს წარმოადგენს; უნდა ყოფილიყო „ცოდვილთათვს“. ასო ო-ნი ნახმარია უ-ს მაგიერ სიტყვაში „შეხუეწილნი“ (სტრ. 12). ჯგუფი: დადრგებიე (სტრ. 7-8) ძნელი ასახსნელია; ჩვენი წაკითხვა სავარაუდოა. სხვა საცილობელ სიტყვებზე აქ აღარ შევჩერდებით; შევნიშნავთ მხოლოდ, რომ კახი, დარიშ და დაფი, შეიძლება არიშიანთა გვარს ეკუთვნოდენ, რომელნიც „ქართლის ცხოვრება“-შიც იხსენიებიან (არიშიანი ბარამ და ქავთარ, (H.G.I.pp.356). ჯვარი მე-16 საუკ. უნდა ეკუთვნოდეს.

დასასრულ უნდა შევნიშნოთ, რომ აკად. ბროსე არც ამ ჯვარს და არც ერთს ჩვენ მიერ განხილულ ხატებს, გარდა პირველისა, არ იხსენიებს (Rapp. IX, 33-34).

ლეჩხუმის მცხეთის ეკლესიის შესახებ ჩვენ ხელთ არის: გარდა ნაჩვენები ფოტოგრაფიებისა, გეგმა ეკლესიისა, განის განაკვეთი და დასავლეთის ფასადი.

## ცაგერი (1)

ცაგერის საკათედრო ტაძარი, საჯდომი ცაგერელი ეპისკოპოსისა, განუახლებიათ მეცხრამეტე საუკუნის მეორე ნახევარში და ამით მას დაუკარგავს თავისი ძველი სახე. ეკლესია ყოფილა სიონური ანუ ბაზილიკური რიგისა, სამ ნაოსად დაყოფილი, ოთხი ოთხკუთხედი ქვის სვეტებით და მათი მრგვალი კვარცხლბეკებით. საკურთხეველი ეხლა შიგნით ერთია, მომრგვალებული, მაგრამ გარედ გამოდის სამი მომრგვალებული სახით. წინეთ ალბათ სადიაკვნე და სამკვეთლო შიგნით გამოყოფილი იყო. შესავალი აქვს ეხლა დასავლეთით, სამხრეთით და ჩრდილოეთით. ერთად ერთი საუკეთესო სიძველის ნაშთი შერჩენია სამხრეთის კარს, რომლის ჩუქურთმიანი ჩარჩო ერთობ საუცხოვო ნახელავია (ფ. №17383, წარწერა ერმაკოვის ფოტოგრაფიაზე ამ კარს შეცდომით ლაბეჭინის კარად ხადის). აღმოსავლეთით და დასავლეთით ეკლესიას აქვს სამ-სამი ფანჯარა, ჩრდილოეთით

1 ლიტერატურა ცაგერის შესახებ: M. Brosset, Voyage arch. Rapp. IX, pp 35-88. დ. ბაქრაძე: კავკაზ ვ დრევნის პამიატნიკას ხრისტიანსტვა. გრ. უვაროვა: მატერიალი პო არხ. კავკაზა, X, გვ. 49, 90, 112, 182. ა. ხახანოვ, იქვე: პრილოჟენიე, გვ. 32-33, თ. ჟორდანია: ქრონიკები, II, გვ. 465, 475

და დასაველთით ორ-ორი. ამას გარდა კიდევ კარების თავში პატარა ფანჯრებია. დასაველთის შუა ფანჯარაზე სამი შეერთებული ქვის ჯვარია გამოსახული. ტაძარი მოქცეულია მაღალს ქვის გალავანში, რომელიც შემდეგ დროში შეუკეთებიათ. გალავანს გარეთ მოიპოვება ნანგრევი ორ-სართულიანი ქვის საეპისკოპოსო სახლისა. როდესაც დ. ბაქრაძემ 1867 წ. ინახულა ტაძარი, შიგნით კიდევ მოჩანდა დაზიანებული ფრესკები და მათ შორის სახე თამარ დედოფლისა და მისი შვილის გიორგისა. წარწერები: „თამარ“, „გიორგი“, მაშინ ჯერ კიდევ იკითხებოდა. ეხლა ფრესკების ნაშთი სულ აღარ სჩანს. ეკლესიის განახლება იმ თავითვე დაწყებულა და დამთავრებულა 1871 წ. ამის შესახებ მოიპოვება მხედრული ვრცელი წარწერა ჩრდილოეთის კედელზე, საკურთხევლის მახლობლად:

ტაძარი ესე ცაგ. მონასტრისა, რომელიც 1823 წ. იყო  
სამიტროპოლიტო და ამა წ-გნ ეკლ. არის საარხიმანდრიტო  
მონასტერი განახლებულ არს სიძველისაგან 1866 წლ-დ.  
1871 წ-მდე დიდ ძალის შემწეობითა უგანათლებულესისა  
მენგრელიის კნიაზის ნიკოლოზ დავითის ძისა და დედისა  
მისისა უგანათლებულესისა მთავრინა ეკატერინა ალექსანდრეს  
ასულისა წარსამართებელად მათდა, მეუღლისა მისისა და ძეთა  
და ასულთა მათდა, ეგრეთვე სხვათაგანცა ლეჩხუმის ვეზდის სამღვდლოთა  
თავად-აზნაურთა უმეტესად თ-დთა ჩიქოანებთაგან. და გლეხთა და მრევლთა  
ცაგერ-გვეროს სოფლისათა, მზრუნველობითა მყოფის ილუმნად აწ მყოფისა  
არხიმანდრიტისა ამა მონასტრისა ბესარიონ გრიგოლის ძისა  
ახვლედიანისა და დეკანოზის ლავრენტი პავლეს ძის ნემსაძისათა და  
თანამშრომლობითა მღვდელ-მონაზვნებთა იოანე, ანტონ და ლუკასითა და ა-ზის  
ბესარიონ ნემსაძისათა. წარვაწერე არხიმანდრიტმა ბესარიონმა 1880 წ.

კანკელის ეკლესიისა 1786 წ. აგებული, შემდეგ დროში განუახლებიათ, მაგრამ  
მხედრული წარწერა, რომელიც უნახავს ბროსეს და არ გამოუცია (Rapp. IX, 37),  
დაცულია და ჩვენ აქ მოგვყავს:

ეჰა შენ ცათა უმაღლესო სერაბიმთა და ქერაბინთა უადმატებულესო.  
უწმინდესო დედოფალო ცაგერის ღის მშობელო მეცვა-ფარვათა შენთა  
მონდობილმან სასოებისა ჩემისა შენ ზ ა დამდებმან ფ დ ცოდვილმან  
ყ დ სამღუდელომ ცაგ. მიტ. სოფრომ გიძღვნე მცირე ესე მწვლილი  
შესაწირავი გაგიკეთებინე კანკელი ცოდვილისა სულისა ჩემისა საოხად  
და ხელმწიფისა ჩ-ნისა დადიანის კაცისა დედოფლის ანნას სადღეგრძელოდ  
ძეთა და ასულთა მისთა აღსაზრდელად ვინ ნახოთ ღის სიყარულისათჳს  
შენდობას ბრძანებდეთ ჩ-ნთჳს. ქრისტეს აქეთ ჩღჳ-სა წელსა – 786.

შემდეგ მიმატებულია:

განახლებულ არს კანკელი ესე საშუალობითა კეთილმნებელობითის შესაწი-  
რავისათა მართლმადიდებელთა ქრისტიანეთაგან წინამძღვრის ამა მონასტრის  
ილუმნის ბესარიონისიგან 1875 წელსა შ-ა.

ბროსეს დროს სამხრეთის საუცხოვო ნახელავ ურთხმელის კარზე ყოფილა ხუცური  
წარწერა, რომელიც განგებ ამოუფხეკიათ და დარჩენილა მხოლოდ შემდეგი:

... ვინცა შენდობასა ბრძანებდეთ, თქვენცა შეგინდოს ღმერთმან.

ალბათ ამ წარწერას უჩვენებს დ. ბაქრაძე, როდესაც ამბობს, რომ ცაგერის ეკლესიის შესავალთან, ურთხმელის კოჭხე, დაცულია ბოლო წარწერისა, რომლის დასაწყისი განგებ წაშლილია, ამბობენ დავით დადიანის ბრძანებით, ისე როგორც მარტვილის მონასტერში, ვინაიდან წარწერა უჩვენებდა მის შთამომავლობას ღარიბი გორდელი აზნაურის ჩიქოვანისაგან. მარტო ამის გახსენება, როგორც ირწმუნებიან, მას სიწითლეს გვრიდაო.

### სიძველენი ცაგერის ტაძრისა.

1. თავ განძს ცაგერის ეკლესიისა შეადგენდა დიდი საწინამძღვრო ჯვარი იშხანის ტაძრისა, 973 წელს გაჭედილი. ჯვარის წარწერები ცნობილია ბროსეს დროდან და მას თარიღი ჯვარისა ჯეროვნად აქვს ნაჩვენები (Rapp .IX,p. 35-36). წარწერებს იმეორებენ თ. ჟორდანიას (ქრონიკები, 1, გვ. 91-92) და ა. ხახანაშვილი (მატერ. X, დამატება, გვ. 32-33). უკანასკნელი წარწერის თარიღს „რუგ“ შეცდომით უფარდებს 1033 წელს და არა 973 წელს, როგორც ნამდვილშია. გრაფინია უვაროვისა იმავე გამოცემაში (გვ. 90) იმავე ქრონიკონს მე-14 მოქცევისად ხადის და ჯვარის გაჭედას 1505 წელს მიაწერს. ჩვენ ჯვარის ორივე მხარე გადმოვიღეთ ფოტოგრაფიულად, დიდის ფორმატით, (№ 16787-16788). ეს ახლა განსაკუთრებით ბედნიერებად უნდა ჩაითვალოს, ვინაიდან ჯვარი პირვანდელი სახით ამჟამად აღარ არსებობს; ის განადგურებულია. აი რას სწერს პროფესორი გ. ჩუბინაშვილი ამის შესახებ თავის სტატიაში: „973 წლის ჯვარი იშხანიდან“: „1930 წ. 10 ივლისს, ღამით გასტეხეს და გაძარცვეს ძველი ქართული ხელოვნების მუზეუმი, დაარსებული ამ რამოდენიმე წლის წინათ ტფილისის სახელმწიფო უნივერსიტეტის ხელოვნების მეცნიერების კაბინეტთან. ჩვენი ძველი ხელოვნების დაზარალებულ სხვა ძეგლთა შორის, როგორც ჩანს, სამუდამოდ დაიღუპა ამ წერილის სათაურში დასახელებული, 973 წლით დათარიღებული, განსაცვივრებელი ძეგლი ოქრომჭედური ხელოვნებისა. ვამბობ: „როგორც ჩანს სამუდამოდ დაიღუპა“, რადგან გაძარცვის შემდეგ – მიუხედავად ენერგიული გამოძიებისა – აღმოჩენილ იქნა მხოლოდ ძეგლის საცოდავი ნამტკრევეები, რომელთა სურათები ქვემოთ იქნება მოყვანილი“ (იხ. „საქართველოს მუზეუმის მოამბე“, VI, გვ. 297). გ. ჩუბინაშვილის საყურადღებო სტატიაში ჯეროვნად და ამოწურვით გაშუქებულია დიდი მნიშვნელობა და მხატვრული და ტექნიკური მხარე ამ ჯვარისა; აგრეთვე სრულიად მოყვანილია წარწერებიც. ამიტომ ჩვენ ჩვენი სტატიის სისრულისათვის, მცირედ შევეხებით აღწერას და უჩვენებთ წარწერებს.

ჯვარი შესდგება ორი ნაწილისაგან, თვით ჯვარისაგან და ხეტარისაგან, რომელზედაც თავის სახელურით ჯვარი გამაგრებულია. ხეტარი შევერცხლილია და შემკობილი სამი ბურთით და ცილინდრული რგოლით. ბურთები მოჩუქურთმებულია. ხეტარი გაუკეთებია ცაგერელ მიტროპოლიტს სოფრომს, რაც მტკიცდება მხედრულის წარწერით:

ქ. ამ ჯვარის მადლო შეწიე სოფრ მს  
ცაგერელ მიტროპოლიტს.

ეს ის მიტროპოლიტია, რომელსაც გაუკეთებია 1786 წელს ცაგერის ტაძრის კანკელი, როგორც ეს ჩანს ჩვენ მიერ ზემოდ მოყვანილ კანკელის წარწერისაგან.

თვით ჯვარი ვერცხლისა, ოქროთ დაფერილი, 51X36,5 სანტ., ნაჭედი, ერთობ მდიდრულად შემკობილია პალმეტებით, როზეტებით ანუ მედალიონებით,

მვირფასი ქვებითურთ შიგნით, და გამშვენებულა ოქროთი დაფერვით, სევადით, გრავიურით და ჭედვით და სხვა და სხვა სახეებით. წინა პირზე, შუაში, განსაკუთრებულ უბრალო ჯვარზე ჯვარცმულია გამოსახული სულ სადათ, საზოგადო კონტურით, უმოძრაოდ; თავზე ჯვარცმულისა ჯვარის მსგავსი ფიცარია ასომთავრული წარწერით:

ესე / ივ/ მფჳ/ ჰრ თჲ.

ჯვარის ჰორიზონტალური მკლავის ქემოდ აგრეთვე ასომთავრულით:

იშხნ-სთს ი-ლნ შ-ქმნა ვინ გმ- ჳს შ-მცაჩ-ნბ-ლ არს –

იშხნისთჳს ილარიონ შექმნა. ვინ გამოაჳუას, შემცაჩვენებულ არს.

ბოლოში გაფართოებული ჯვარის მკლავები თავდება წვეტებით და წვეტებზე ლამაზ ნახელავი პალმეტებია. პალმეტები ცალკეა დამზადებული და შემდეგ შეერთებული წვეტებთან. ოთხი მათგანი მოცილებულია ჯვარს და შეკვეთების დროს ტლანქად მიუკრავთ, რაც აშკარად სჩანს სურათზედაც. ჯვარის ქვემო მკლავს პალმეტები არ ჰქონია; ყველა მკლავები ჯვარისა შემკობილი ყოფილა საუცხოვო ნახელავი როზეტებით სხვა და სხვა ფორმისა. როზეტები შემკობილია მვირფასი ქვებით და მარგალიტის მძივებით შიგნით და გარედ, ზოგჯერ ორმაგით. სულ ეხლა 13 როზეტი მოსჩანს: ხუთი ზემო მკლავზე და ოთხ-ოთხი მარჯვენა და მარცხენა მკლავებზე; მვირფას ქვებთა შორის ერთი დიდი ჯვარცმულის წარწერის ზემოდ ამეთვისტოა; სხვები საფირონებია და ზურმუხტები, ბუდეებში ჩასმულნი. ჯვარცმულის ფიცრის ქვემოდ როზეტი არ შენახულა და აქ შემდეგ, ალბად შეკვეთების დროს, უშნოდ ჩაუსვამთ სამი ქვა, ორი ზურმუხტი და ერთი ლალი. ამ ადგილას ჯვარი გატეხილი ყოფილა და შეკვეთების დროს გაუმაგრებიათ ორი ვერტიკალური ლითონის ზოლით და ამას ქვემოდ მოთავსებულია ასომთავრული წარწერა შემკვეთებლისა (ნიშნებად ვტოვებთ მარტო ორ-ორ წერტილს):

ჩ-ნ : მე	ჩუენ მე-
ფეთ მეფ	ფეთ მეფე-
ემნ : პატრონმ-ნ :	ემან, პატრონმან
გ-ი : მეორედ : გვკ	გიორგი, მეორედ გავაკ-
ეთედ : ჯ-რი : ესე : წ-რ	ეთედ ჯუარი ესე წარ-
სმრთებელდ: მეფო	სამართებლად მეფო-
ბისა : ჩენისათვის : დ	ბისა ჩუენისათვის და
ც-დვთა : ჩნთ	ცოდვათა ჩუენტ-
ა : შესნდო	ა შესანდო-
ბელად :	ბელად.
ან.	ამინ.

ამ წარწერაში მოხსენებული მეფე გიორგი უნდა იყოს იმერეთის მეფე გიორგი მესამე (1605-1633).

ზურგს ჯვარისა ამშვენებს ჩამოსხმული ლითონის ჯვარი, რომელიც ერთ და იმავე დროს ამაგრებს მთელს ჯვარს და მასთან მის დამაშვენებელ სამკაულსაც შეადგენს თავის სილამაზით და წვეტებიანის ბოლოებით. თავისუფალი არეს მორთულობა აქაც იმ სახის და ფორმის არის, როგორც წინა პირზე. ჰორიზონტალურ ნაწილზე ჯვარისა მოიპოვება ასომთავრული წარწერა.

ზემოდ:

ქ. ძელო ცხორბსო წინმძღუარ და მფარველ ექმენ ილენ ებკჳსა

ქვემოდ:

ქე აღენ მფენ ჩენი და ერი მთი დაიფარე .:  
კიდევებში ამავე ნაწილისა ვერტიკალურად სწერია:

მარცხნივ:

ქრ /ონ /იკ /ო /ნი .:

მარჯვნივ:

ი /ყო /რ: /ჟ: / გ:

უქარაგმოდ:

ქ. ძელო ცხორებისაო, წინამძღუარ და მფარველ ექმენ  
ილარიონ ებისკოპოსსა.  
ქრისტე, ადიდენ მეფენი ჩუენნი და ერი მთი დაიფარე.  
ქორონიკონი იყო რჳბ (=973).

თ. ჟორდანია აქცევს ყურადღებას, რომ მეორე წარწერაში არც ერთი მეფის სახელი არ არის მოხსენებული, არამედ საზოგადოთ ნათქვამია „ქრისტე ადიდენ მეფენი ჩვენნი და ერი მთი დაიფარე“. ამის მიზეზად თ. ჟორდანია იმას ხდის, რომ იმ დროს (973წ.) არეულობა იყო (აბხაზეთის სამეფოში) ტახტის მამიებელთა შორის დემეტრე და თეოდოსისა და არც ერთი მათგანი ყველასაგან მეფედ აღიარებული არ ყოფილა („ქრონიკები“, 1, გვ. 91). ეს მსჯელობა მცდარია. ჩვენი ჯვარი იშხანის ეკლესიისათვის არის გაკეთებული ტაო-კლარჯეთში და წარწერა იხსენიებს ტაო-კლარჯეთის ბაგრატიონებს და არა აფხაზეთის მეფეებს. აფხაზეთი მაშინ ცალკე სახელწიფოს შეადგენდა. ტაო-კლარჯეთი საერთო მფლობელობას წარმოადგენდა ბაგრატიონებისა და სხვა წარწერებშიაც საერთოდ იხსენიებიან „მეფენი ჩვენნი“, როგორც მაგალითად ოშკის წარწერებში.

შუა ნაწილი მთელი ჯვარის მკლავისა დაფარული იყო ჩემს დროს, როგორც ეს ფოტო-სურათზე სჩანს, ფირფიტით, გატეხილი ჯვარის გასამაგრებლად და ამ ფირფიტას დაფარული ჰქონდა სხვა ასომთავრული წარწერები, რომელთა მხოლოდ კიდური ასოები მოჩანდა. ეხლა ჯვარის განადგურების შემდეგ, ნატეხებიდან ფირფიტა აუძვრიათ და გამოჩენილა ორი მერმინდელი წარწერა (მოგვეყას ქარაგმების გახსნით):

პირველი: „სერაპიონ ცაგერელსა, აბაშიძესა, შეუნდოს ღმერთმან, ამინ“.

მეორე: „ნიკოლოზ ცაგერელსა, კუჭიძესა, შეუნდოს ღმერთმან, ამინ“.



როგორც ირკვევა, ეს პირნი მე-17 საუკ. მოღვაწენი არიან (იხ. იგივე გ. ჩუბინაშვილის სტატია, გვ. 290; ს. კაკაბაძე, საცაგერელოს გამოსავალის დავთარი, თბილისი, 1914, გვ. 9-10; მისივე, დასავლეთ საქართველოს საბუთები, №1, გვ. 73).

ბოლოს უნდა შევნიშნოთ, რომ ჯვარი უნდა გამოიცეს იმ სახით, როგორც ჩვენ გვაქვს გადმოღებული. შემოკლებული სურათები ჩვენი ფოტოგრაფიებიდან, გ. ჩუბინაშვილის სტატიაში, არ არის დამაკმაყოფილებელი.

**2. თავი დიდი ხატი ღვთის მშობლისა** ჩჩვილელი. მშვენიერი, ოქროთ დაფერილი ვერცხლისა, ნაჭედი, 105X85,5 სანტ., ქართულის ხელობისა, ასომთავრული წარწერით ზემოდ: დ-დ-დ ლ-ს-დ (ფ. №16789). ღვთის მშობლის სურათი ქართველი ქალის სახეს მოგვაგონებს. ის ტახტზე მჯდომარეა მუთაქით; ტახტი მდიდრულად შემკობილია, მაგრამ სახელურები არა აქვს. სკამიც, რომელზედაც ფეხები უდევს, შემკობილია. თავის წრე, როგორც ღვთის მშობლისა, ისე ქრისტესი გამშვენიერებულია ძვირფასი ქვებით. ქრისტე ყრმა მარჯვენა ხელით ჯვარს სწერს, მარცხენაში გრავნილი უჭირავს. ნაოჭები ტანისამოსისა მოსხოა; აშიები მდიდრულად შემკობილია ბროწეულის ყვავილების მსგავსი ორნამენტით, წმიდათა მედალიონებით და ძვირფასი ქვებით. ზემო აშიაზე ვედრებაა (დეიზის) წარწერებით: ი-ჯ ქ-ე, დ-დ ლ-ს-დ წ-ი ი-ე ნ-თლი, კუთხეებში მთავარ ანგელოზებია: მ-ქლ, გ-ლ, ქვემო არშიაზე: წ-დ კ-ზ (კოზმან); წ-დ დანიელ, წ-დ ფ-ლპე; მარჯვენა აშიაზე : წ-დ პ-ლ (პავლე ?), წ-დ მ-თე, წ- - მ-რ, წ-დ ბ-რთ; მარცხენა აშიაზე : წ-დ პ-ე, წ-დ ი-ნე, წ-დ ლ-კა, წ-დ ანდრია. კიდევ უფრო ძველი და ლამაზი ფირფიტები წმიდანებისა ყოფილა ზემო კუთხეში ხატისა, მარჯვნივ და მარცხნივ; ესენი ეხლა ერთობ დაზიანებულია და მოსჩანან ზოგიერთ ლამაზ სახეებთან შარავანდედები და წარწერები: მიქაელ, გაბრიელ, პავლე, მატთეოზ, (სი)მონ (მარჯვნივ); მარცხნივ: მათე, მარკოზ. წმინდა სიმეონის ფირფიტა და ერთი სხვა წმიდანისა უადგილო ადგილს მიმატებულია, როგორც მარცხენა, ისე მარჯვენა აშიებზე, შუაში. ქვემოდ, მარჯვენა კუთხეში არიან წარმოდგენილნი: დამიანე და [კო]ზმან. მიუხედავად მცირედი დაზიანებისა ხატი საზოგადოთ კარგად არის დაცული. ჩვენი აზრით, უძველესი საერთო ნაწილი ხატისა უნდა ეკუთვნოდეს მე-13 საუკუნეს, მაგრამ შემდეგ შეკეთებულია მე-15 საუკუნეში.

**3. ხატი დიდი მაცხოვრისა,** (№ 16794), წელსხევითი, თავი წამლით არის დახატული, შემოსილია ოქროთი დაფერილი ვერცხლით, ნაჭედი, ქართული ხელობისა, მე-11 საუკუნისა. ქრისტე მარჯვენა ხელით აკურთხებს, მარცხენაში სახარება უჭირავს, ლამაზი ყდით. ტანისამოსის ნაოჭები მოსხოა; ეზო ხატისა და აშიები შემკობილია ყვავილოვანი ორნამენტებით, რგვალ წრეებში, ორ-რიგად; ზემო აშიაზე სამი პატარა მედალიონი მოსჩანს მთავარ-ანგელოზთა, უწარწეროდ; მარჯვნივ და მარცხნივ ფენგებზე თითო. შიგნით, ხატის ეზოს და აშიას შუა დატანებულ ვერცხლის ზოლზე, ვერტიკალურად, ჩამოგრძელებულია ასომთავრული წარწერა (ფოტოზე არა სჩანს):

ქ. მცხრო ყლთა დბლთო ადდე შნ მიერთა დბთა ღვთივ  
გვრგვოსანი ძლიერი და უძლეველი ბგრტ აფხზთა მეფე  
და ყოვლისა აღმოსავლეთისა კურაპალატი და ა-ნ ეყავნ.

შეუმოკლებულად:

ქ. მაცხოვარო ყოველთა დაბადებულთაო, ადიდე შენ მიერთა დიდებითა ღვთივ გზრგვზოსანი, ძლიერი და უძლეველი ბაგრატ აფხაზთა მეფე და ყოვლისა აღმოსავლეთისა კურაპალატი და ამინ ეყავნ.

აქ მოხსენებული ბაგრატ არის ბაგრატ მეოთხე (1027-1072) და არა ბაგრატ მესამე, როგორც ფიქრობს ა. ხახანაშვილი, (გვ. 32). აქ კიდევ უნდა შევნიშნოთ, რომ პირის სახე მაცხოვრისა შემდეგ დროშია გაცხოველებული.

4. **ხატი მაცხოვრისა**, 53X39,5 სანტ. სახე წამლით არის დახატული, მაგრამ შემოსილია ოქროთ დაფერილი ვერცხლით, ნაჭედი (№ 16790). ეს ხატი გაჭედილი უნდა იყოს წინა ხატის მიხედვით; იგივე მორთულობა აქვს ნაჭედს, როგორც პირველს, ხოლო მე-14 საუკუნეს უნდა ეკუთვნოდეს. ორი აშია აქვს; ერთი უფრო ძველი, მეორე სულ ახალი, რომელიც გაკეთებულია ლავრენტი ნემსაძის მიერ 1875 წ. რასაც მოგვითხრობს მისი წარწერა, მხედრულად, ქვემო აშიაზე:

მაცხოვრის ხატი ესე განვაახლე ირგვლივ აშიეებით და თვლების ჩამატებით აზნაურთაგანმა ცაგერის სობოროს დეკანოზმა და ბლალოჩინმა ლავრენტი პავლე დეკანოზის ბემ ნემსაძემ ჩყოე-სა წელსა.

5. **ხატი იაკობისი**, მაცხოვრის ძმისა, ოქროთი დაფერილის ვერცხლისა, ნაჭედი (№ 16796); წმიდანი წარმოდგენილი ყოფილა სრულის ტანით, მაგრამ ქვემო ნაწილი აღარ შენახულა; მარჯვენა ხელით აკურთხებს, მარცხენაში ჯვარი უჭირავს; წარწერა ზემოდ მედალიონებში, ჯვარის სახედ, ასომთავრულით: წ-დ ი-კბ ძმ-ოფ, ე-ი. წმინდა-იაკობ, ძმა უფლისა. ეზო და აშიეები შემკობილია მშვენიერის წნულის ხლართულებით, არაბულის რიგისა. ეს შემკობილება სრულიად ისეთია, რომელსაც ვპოულობთ შემოქმედის მონასტრის მიძინების ხატის კიდობანზე (იხ. კონდაკოვის და ბაქრამის „ოპისანიე“, გვ. 125, სურ. 62). ჩვენ სხვა ადგილას გამოვარკვეით, რომ ეს კიდობანი გაკეთებულია, ოქრომჭედლის მამნეს მიერ მე-15 საუკუნეში. ამიტომ ეს ხატიც მე-15 საუკუნის უნდა იყოს. კონდაკოვის აზრით, შემოქმედის კიდობანი მე-12-13 საუკუნის არის (იქვე, გვ. 123).

6. **ღვთის მშობლის ხატი**, ჩვილედი, 47X35,5 სანტ., ვერცხლისა, ნაჭედი (№ 15791), ასომთავრული წარწერით: დ-დ ღ-დ. ღვთის მშობელი ტახტზე მჯდომარეა; ტახტი შემკობილია, მაგრამ ზურგი არა აქვს; ეზო ხატისა სადაა. ხატი უნდა ეკუთვნოდეს მე-15-16 საუკუნეს. აშია ახალია, 1865 წ. გაკეთებული მღვდელ მონაზონ ლუკას მიერ; გამოხატულია მხედრულ წარწერაში, ზემო აშიაზე; წარწერა სურათზე არ გამოსულა:

[მე] ფ-დ ცოდვილმან და ღვთივ მონამან ცაგერის მონასტრის იკონომოსმა მღვდელ-მონაზონმა ლუკამ განვაახლე ხატი ესე ღვთის მშობლისა რომელსაც არა აქვნდა გარშემო აშია და ჩემი საკუთრების ფულითა გავაკეთებინე სულისა ჩემისა საოხად ჩყდე-სა წელსა აგვისტოს კდ დღესა.

7. ხატი წარმლით დახატული მთავარ დიაკონის სტეფანესი. ქართული ხელობისა. მე-18 საუკუნისა.

8. ხატი დიდი ღვთის მშობლის მიძინებისა, 106X78 სანტ., ვერცხლისა, ნაჭედი; შემოწირულია 1849 წ. დავით დადიანის და მისი მეუღლის ეკატერინეს მიერ, როგორც მოგვითხრობს მხედრული წარწერა:

მე მთავარმა დავით დადიანმა და მეუღლემან ჩემმან  
ეკატერინა ალექსანდრეს ასულმან შევამკეთ ხატი ესე  
და დავასვენეთ ჩვენს მონასტერში ცაგერს 1849-სა წელსა:

9. ჯვარი ათონურის რიგისა, ხისა, ვერცხლით შემოსილი 22X8,2 სანტ. ტარი მინანქრიანია და ზედ ბერძნულად აწერია: მაკარიუ იერო მონახუ კაი აგიუ ტაფი ტუ... (იხ. ფოტო. №16792 -16793).

10. ასეთივე ჯვარი, უფრო პატარა; ქვემოდ ტარზე უწერია ბერძნულად: გრიგორიუ იერეო... მეორე გვერდზე ეტყობა წარწერა, რომელიც ვერ გავარჩიეთ (იქვე, ფ. № 16792-16793).

11. ჯვარი ათონური რიგისა, ქართულის ხელობისა; შეძერწილია ფილიგრანული (წნული) ვერცხლის შემკობილობით; წარწერა არა აქვს (სამივე წინა პირი №16792, მეორე პირი - № 16793).

12. სამწერლობელნი წყვილი, ვერცხლისა; ერთზე მხედრულად აწერია:  
სერაფიმ ბარძიმი ჩყიდ ცაგერის ეკლესიის.  
მეორეზე:  
ხერუვიმი ფეშუმის ცაგერის ეკლესიისა (იხ. ფ № 16795).

13. საცეცხლური ვერცხლისა, ლამაზი ქართული ხელობისა.

14. ორი დიდი სანთელი (შანდალი), სპილენძისა; ერთზე აწერია:  
ბატონიშვილი ნინოსია.

15. საიაზმე ვერცხლისა, მხედრულის წარწერით:  
საიაზმო ესე გჰდნე ცაგ. მტრსთვის თავსახურავიანათ  
ძველთა ხმარებისაგან გასრულთა ვერცხლებთაგან ამავე  
მონასტრის და ეკვდრისთა 1872 წ. ილნი ბესარიონ ახვ-  
ლედიანი.

16. წურწუმა (ხელსაბანი) ყვითელი სპილენძისა, შემკობილი სპარსული რიგის მინანქრიანი სიმრგვალებით (დროზნიცებით).

17. ასეთივე მასალის და მორთულობის „ტაშტი“.

18. ორი ლომი; ერთი ტყვიისა, მეორე „ცინკისა“. ერთზე აწერია მხედრულად: წინამძღვარი ნიკოლოზ.

19. სარტყელი ოქროს და ვერცხლის ძაფით მოქარგული; ბალთები შემკობილია ზურმუხტებით და ლალებით.

20. საფლავის გადასაფარებელი წითელი ფარჩისა, მოქარგული ოქრო და ვერცხლის ძაფებით (ფ. №16801). შუაში სურათი ელისაბედისა, კაცია მეორე დადიანის ცოლისა, რომელიც იყო ასული მეფე თეიმურაზ მეორისა და გადაიცვალა 1770 წელს. წარმოდგენილია ქართული შესამოსელით და გვირგვინით, თავის გასწვრივ ყვავილებია ვაზებით. აშია შემკობილია ფოთლოვანი მოკაზმულობით და მხედრულის რიტორიულის წარწერით. გადასაფარებელი გაუკეთებია მის დედას, დედოფალ ანახანუმს. მოგვყავს წარწერა:

ქ : იგურდივ მორთხმული სიცოცხლის აღმწობის საკმილითა.  
საქართველოს მეფის ცხეზულის თეიმურაზის  
თანამემცხედრე დედოფალი ანახანუმ : ვიწყებ მსმენელნო  
მოთხრობად თქვენდა. რომელ მცა საწუთრომა. ურიცხვი  
ბედკეთილობა. სიმდიდრე და დიდებანი. ზე-გარდამმატა  
უფროს ნილოსისა. მასხა მაშენა ედემსა მაუკვდებრივსა.  
ველსა მას საწადილოსა. მიორმა ნერგი მულაზრით ვარჯოვანი.  
აღმწყაზრებით ნაწვართი. ჩემდა სიცოცხლედ სულად ქონებული,  
და მჭვრეტთა განსაკვირვოი. ოდიშ ლეჩხუმთ დედფალი. თანამემცხედ-  
რე კაცია დადიანისა. სახელმზიანი ელისაბედ. დედისა  
გულთა გამცხრომი : მაგრა იჩქითად შემახო ბრჭალი საწუთრომა.  
თვისი თვისადვე უკუნ-ზღვად. მიმილო დიდება და სიმდიდრე  
ჩემი, განმიღამა გუგათა თვალთა ნათელი, და ესდენტა სიხარულთა  
და ძვირფასთა უნჯთაგან. ცალიერად მიტევა მწყდარი უსულო:  
დედა მტყებარე შვილსა ზედა სასურველსა, რომელი ესე ძნელ ბედმან  
მშობელმან მისმან მზისა ჩემისა სახისა წილ. აზრდილი  
ესე მის უებროსა სახისა ვიმუშაკე. მის კიპაროზისა ტანისა  
მარღვის სამარისა ლოდისა საბურველად და შვენირებად,  
მხილველნო და მსმენელნო ვაებითა და სიწყალულით  
მოგვიგონებდეთ მშობელსა შობლითურთ :  
თვესა აგვისტოს ქკს უნწ : ქეს აქეთ ჩლო : 1770.

### ეპიტაფიები:

1. ცაგერელ მიტროპოლიტის იოანესი, კაცია დადიანის ძისა :  
საფლავსა ამას შინა მდებარე ძე დადიანისა კაციასა ცაგერელ  
მიტროპოლიტი და კავალერი იოანე რომელიცა ვმწყესობდა  
კეთილთა
2. მწყესობითა სრულიად ლეჩხუმსა და რომელსამე ნაწილსა  
სვანეთისა წელსა  
კგ და აღვესრულე წლისა მვ წელსა ჩყკბ თვესა დეკემბერ

3. სა ზ დღესა შაბათსა ხოლო მყვენ ჩვენ ორთა ძმათა მთავრისა და მწყემს მთავრისა ამის ჩვენისა იბიტაფისა მხედველნო და აღმომკითხვე
4. ლნო ჩვენზედა მდებარისა ამის ლოდისა მოგვიგონებდეთ რათა თქვენცა მო მოგიგონებდენ დღესა მას შენდობას ბრძანებდეთ ჩვენთვის რათა
5. თქვენცა შეგინდოს და მეოხ გექმნასთ მაღლი ყოვლად წმინდისა სულისა დღესა მას განკითხვისასა.

2. გრიგოლ დადიანისა, ბროსეს გადმოღებული (გვ. 36-37). ეხლა უფრო ნაკლებად განირჩევა.

1. საფლავსა ამას შინა მდებარე მთავარი . . .
2. ლანტი დადიანი გრიგოლ, რომელმანცა აღმოვიღე . . .
3. თა კელმწიფისა ჩემისა დიდისა როსიის იმპერატორის ალექსანდრე. . .
4. ვინადგან შევავედრე თავი ჩემი საფარველსა მისსა, წარვედ . . . ხორგად
5. მხედრობა როსიისა მცველად ჩემდა და სამთავროთა ჩემთა. ხოლო ვინადგან სიკვდილი მპარავი არს
6. მეკვეთა სნეულება რადმე და აღვესრულე ლ წლისა. ყოველთა აღმომკითხველთა შენდობასა
7. ვევედრებით, რათა თქვენცა მოკვდავნი შენდობით იქმნეთ უფლისა მიერ. თვესა ოკდონბერსა კვ. ქრისტეს აქეთ ჩყდ.

### ხელნაწერები:

1. სახარება ქალაღდზე, 18,6X25 სანტ., მოოქრული ვერცხლის ყდით, რომელსაც სარჩულად ხავერდი უდევს. პირზე ყდისა, შუაში, იესო ქრისტეა წარმოდგენილი; კუთხეეში მახარობლები.

ტექსტი ნაწერია ნუსხა ხუცურით, წითლურის სათაურებით, ორ სვეტად; თითოეულ სვეტზე 20 სტრიქონია; აქა-იქ წამლით შესრულებული უბრალო სათაურის მხატვრობაც არის (ზასტავკები). თავში აქვს წამლითვე შესრულებული სურათი მათე მახარობელისა (№16805, ფოტოგრაფიაზე შეცდომით ლაბეჰინა აწერია), წარწერით: მ-თე. თითოეული სახარების წინ სათაურებია მოყვანილი. იოანეს სახარების ბოლოს არის ანდერძი გიორგი მთაწმინდელისა. თარიღი არა აქვს. სახარება მე-17 საუკ. უნდა იყოს.

2. ჟამის წირვა იოანე ოქროპირისა, ბასილი დიდისა და გრიგოლ ღვთის მეტყველისა, მათის ფერადებიანი სურათებით საკმაოდ ლამაზი ხელობისა, 22,3X17 სანტ., ხის ყდის, რომელზედაც გადაკრულია აბრეშუმის მატერია. ნაწერია ქალაღდზე ორ სვეტად ნუსხა ხუცურით; თითო სვეტში 18 სტრიქონია; თავში იოანე ოქროპირის ფერადებიანი სურათია, რომელსაც ქვემოდ უწერია (№16798. სურათზე შეცდომით ბასილ დიდი აწერია):

ცაგერისა ღვთის მშობელო მეოხ ექმენ დადიანის კაცისა  
 მეს ცაგერელ მიტროპოლიტს იოანეს რომელმან შამოგწირა  
 ესე წელსა ქს აქეთ 1798 ჩღჟჳ.

გრიგოლ ღვთის მეტყველის ჟამის წირვას წინ მიუძღვის გრიგოლის სურათი (იხ. ფოტ. №16803. ფოტოგრაფიაზე შეცდომით აწერია: ლაბეჭინა, მარკოზ მახარობელი).

ბასილი დიდის ჟამის წირვას წინ მიუძღვის ბასილის სურათი (№16804. ფოტოგრაფიას შეცდომით აწერია: ლაბეჭინა, ლუკა მახარობელი). აშიებზე რუსული ლოცვებია დაწერილი ქართულის ანბანით. ხოლო ბოლოს ხელნაწერს დართული აქვს სია წირვის დროს მოსახსენებელ პირთა მე-18 საუკ. დამღევის და მე-19 საუკ. დამღევისა. ეგევე სია ცალკე ამოწერილი მწვანე ქაღალდზე კედელზეა მიკრული ტაძარში. სია არ არის ისტორიულ მნიშვნელობას მოკლებული და ამიტომ მოგყავს აქ:

### **ცოცხალნი:**

1. ჩიქოანის ასული ევა
2. ბატონის სძალი აბაშიძისა ასული მარიამ
3. წერეთლის ასული ელისაბედ
4. მხევალ ღ-თისა თინათინ
5. მღვდელი დავით ჩიხლაძე
6. მონა ღთისა ფრიდონ
7. მხევალი ღთისა ელისაბედ  
და ბაქრაძის ქალი ირინე

### **მიცვალებულნი სამღვდელონი:**

8. ცაგერელი მიტროპოლიტი იოანე
9. მიტროპოლიტი ანტონი
10. ხინოწმინდელი იოანე
11. არხიმანდრიტი ნიკოლოზ
12. მღვდელ-მონაზონი ამბროსი
13. მღვდელ-მონაზონი ვასილ
14. მღვდელ-მონაზონი ბესარიონ
15. წინამძღვარი თეოდოსი
16. წინამძღვარი სიმონ
17. წინამძღვარი იოანე
18. მღვდელი დავით და მეუღლე მისი
19. ბერი სერაპიონ
20. მონა ღვთისა გაიოზ
21. წინამძღვარი სერაპიონ
22. წინამძღვარი ნიკოლოზ

### **მიცვალებულნი საერონი**

23. მეფე სოლომონ
24. დადიანი კაცია
25. დედუფალი ანნა
26. დადიანი გრიგოლ

27. დადიანი გიორგი
  28. დადიანის ასული ხვარამზე
  29. ერისთავის ასული ანასტასია
  - 30 დადიანის ასული მზე-ხათუნ
  31. მიქელამის ასული მარიამ
  32. ყრუაშვილი ხოსია
  33. ახვლედიანი სეხნია.
  34. მხევალი მღვთისა ასტანდარ
  35. მხევალი მღვთისა მაგიჯასპი
  36. მხევალი მღვთისა ელენე
  37. მხევალი მღვთისა ელისაბედ
  38. მხევალი მღვთისა შაქრისახარ
  39. წერეთლის ასული ქეთევან
  40. ასათიანი სპირიდონ
  41. წერეთელი ზურაბ
  42. დადიანის ასული თამარ
  43. წერეთელი გიორგი
  44. წერეთელი დიმიტრი
- და სამსონ

შენიშვნა: პირველი სტრიქონი და მე-39 მერმინდელი ხელითაა დაწერილი. მე-10 სტრიქონში იხსენიება ხინოწმინდელი ესე იგი ხინოწმინდის ეპისკოპოსი. ხინოწმინდა არის ქობულეთის მახლობლად, ბათუმს ოლქში.

3. **თთვენი**, 19X14,5 სანტ., გატეხილი ხის ტყავ გადაკრული ყდით, დაწერილია ქალაქდზე ნუსხა ხუცურით, ორ სვეტად, წითლურის სათაურებით. ხელი მე-17 საუკ. არის. ერთ მინაწერში ვკითხულობთ: ღო შე ამის მწერალი ლზარე. მეორე, მერმინდელი ხელით მინაწერში ვკითხულობთ: ესე თვენი ჭყონდიდელის ანტონის არის, ღმერთმან ახმაროს სიცოცხლეში და დღეგრძელობაში ამინ. ეს ის ანტონია, რომელიც მე-19 საუკ. პირველ ნახევარში ცხოვრობდა.

4. მეორე ნაწილი **იმავე თთვენისა**, მარტიდან აგვისტოს ბოლომდის; იმავე ზომის და იმავე ხელით ნაწერი, როგორც პირველი. გადამწერი ლაზარე აქაც მოხსენებულია.

5. **ლავსაიკონი** ანუ მეტაფრასი, in folio, დიდი ფორმატისა. 30X21,5 სანტ., ქალაქდზე, ნუსხა ხუცურით, ორ სვეტად, 40 სტრიქონი სვეტზე. სულ შეიცავს 382 გვერდს, შავ ტყავ გადაკრულ ხის ყდაში. ხელი მე-17-18 საუკ. არის.

დასაწყისი:

: თა სეკდენბერსა ზ საკითხავი თქმული წისა და ნეტარისა  
 მამისა ჩნისა თე აღმსარებელისა სტიდიელთა  
 წინამძღვარისა შობისათ ს ყდ წისა და დფლისა ჩნისათს  
 მშობელისა მდის ქლწულისა მრმისა.

6. კლემაქსი, 62X17 სანტ., დაწერილია ქალაქდზე მხედრულის ხელით, წითლურის სათაურებით, ტყავ გადაკრული ხის ყდაში, დასაწყისი:

: : ქ : ესე საცნაურ იყავნ ყთა რნი იკითხვდეთ ანუ

სწერდეთ წ-სა ამას წიგნსა წ-ნო ღთისანო . . .

ბოლოში ხელნაწერს უზის ბეჭედი წარწერით: ბესარიონ. ხელნაწერი მე-18 საუკუნის ბოლოს ეკუთვნის.

7. ტიბიკონი იერუსალიმის ეკლესიისა, 21,5X17 სანტ., მხედრულის ხელით, ხუცურის ნარევით, ტყავ გადაკრული ხის ყდით; გადაწერილია 1766 წ. ტექსტი თავებად დაუყვია რომელიმე თომას; ბოლოს უწერია:

აღიწერა ტვიბიკონი ესე : თა სეკდემბერსა რიცხვსა :

კა : ქეს აქეთ ჩდგვ : : ღ-თო შ-ე მმუხვლი (მმუხვლეელი) ამისი თომა ქკს უნდ.

შემდეგ მერმინდელის ხელით:

ცაგერისა ღვთის მშობელო მეოხ მექმენ მონასა შენსა

ცაგერელს დადიანის ძეს და კავალერს იოანეს ქეს აქეთ

ჩყა 1801 ქრონიკონს ჳპთ.

დასაწყისი:

ტიბიკონი რომელ არს ქცევა და წესი ეკლესიათა განგებისა

წი-სა იერუსალიმისა ლავრისა ღირსისა და ღ-თივ შემოსილისა

მამისა ჩვენისა საბასი.

შემდეგ ლექსია მოყვანილი:

ზღვაში მსხდომნი მენავენი ნაპირს განსვლას მოელიან,

ჭირში მყოფნი ლხინს შესულნი წყენას აღარ მოელიან,

კაცნი შორს გზას მიმავალნი, რა შინ მივლენ, არ ელმიან,

დამწყებელნი წიგნისანი განსრულებას მოელიან.

### სოფელი ზუბი

სოფელი ზუბი გაშენებულია ასხის მთის კალთაზე, მდინარე ცხენისწყლის მარჯვენა ნაპირზე. ამ სოფელში ორი ციხის ნანგრევია, ერთი პატარა ცხენისწყლის ფრიალო ნაპირზე, რომლის ქვემოდ ხის ხიდი არის. ამ ხიდს მიჰყვებხართ სოფელ ოყურეშში. ციხის ნანგრევების სურათი ხიდითურთ, იხ. ფ №17403 და 17404. მეორე ზემოდ არის მთაზე და სანახევროდ დანგრეულია; ეკლესია ზუბისა ახალია, ხისა, ხისავე კანკელით, რომელიც აგებულია 1866 წელს, როგორც მოგვითხრობს მისი მხედრული წარწერა:

აღმართა კანკელი ესე ამაჳ წ-ის გ-ის ეკლესიასა შ-ა

ერთბამ ამას შ-ა შემავალთა მრევლთა მრევლთაგან მათ-

დამი საკუთრებითა ზ-ა ჩყდვსა წელსა ოკდონბრის იესა

ეკლესიაში მარტო ერთი წმ. გიორგის ხატია, ოქროთი დაფერილი ვერცხლით, ნაჭედი, ტლანქი სვანური ხელობისა, მე-18 საუკუნის ბოლოსა ანუ მე-19-ს დასაწყისისა (ფ. №16809). წმიდა გიორგი ცხენით არის წარმოდგენილი, ვეშაპს გმირავს. ზემოდ ასომთავრულით აწერია: წ-დ გ-ი. და შემდეგ იმავე ვულგარული ასომთავრულით:

იოანე ლატალისა შეიწყალე



ლატალის საზოგადოება თავისუფალ სვანეთშია. მდინარე ენგურის პირად, მესტიის ქვემოდ.

### სოფელი ოყურეში.

სოფელი ოყურეში გაშენებულია ცხენისწყლის მარცხენა ნაპირზე, 20 კილომეტრით ცაგერიდან. სახლები მცხოვრებთა გაფანტულია ხვამლის მთის ფერდობზე. ხვამლი წყალგამყოფი ქედია რიონის და ცხენისწყლისა. შუა სოფელში მდებარეობს პატარა ეკლესია წმიდის გიორგისა. ეკლესია აშენებულია შირიმის თლილის ქვისაგან. ის ჩვეულებრივი ერთნაოსიანი ბაზილიკაა, მაგრამ მისი საკურთხეველი გარედ გამოდის ხუთ-წახნაგოვნად. სამი ვიწრო სარკმელი აღმოსავლეთით და თითო ყველა სხვა მხრიდან ანათებენ ეკლესიას. ზეპირკველი ეკლესიისა შესდგება სამი საფეხურისაგან. ეკლესიას ირგვლივ უვლის ღია დერეფანი ხის სვეტებზე დამყარებული; ეს შემდეგ არის მიმატებული; დახურულია ყავრით. ეზოს შემოვლებული აქვს ქვის გალავანი, რომელშიაც დიდრონი ხეები მოიპოვება. სამრეკლო სულ ახალია, სამსართულიანი; აშენებულია ქართულს რიგზე მშვენიერის თეთრის თლილის ქვით და შემკობილი ბარელიეფებით ხარის თავებისა (ფ. №17405).

ეკლესიის დასავლეთის კარის ზემოდ, შიგნით, მოიპოვება მხედრული წარწერა, რომლიდანაც სჩანს, რომ ეკლესია აუშენებია დადიანის ოტიას ძეს გიორგის 1788 წელს.

მხნეო მხედარო შვიდწილ უძლეველ  
ო წმიდაო გიორგი მე უღირსი მცირედ ღვაწლი  
სა დამდები ეკლესისა შენისა აღშენებისათვის დადიანი  
ოტიას ძე ბატონისშვილი გიორგი გვედრები რათა  
მეოხ მექმნე მეუღლით ძით და ასულით აქაცა და  
მერმესა მას საუკუნესაცა წელსა ქრისტეს. აქეთ ჩღპჭ  
: ქკს უოვ : ივნის ივ :

სოფ. ოყურეშის ეკლესია მრავალჯერ დაუძარცვიათ, ამიტომ ზოგიერთი მისი სამკაული სრულიად გამქრალა; უკანასკნელად იგი გაუძარცვავთ 1910 წელს, ესე იგი რამოდენიმე თვით ადრე, ვიდრე ჩვენ ვინახულებდით. ამ დროს სულ გაუნადგურებიათ დიდი ხატი წმიდა გიორგისა, ხოლო მეორე დიდი წმიდის გიორგის ხატის მთელად გაცარცვა ველარ მოუსწრიათ, მხოლოდ მოუძარცავთ დიდი თავის წრე, შემკობილი ძვირფასი ქვებით და ამ დროს დაუზარალებიათ პირისახე და ყელი წმიდა გიორგისა, რომელნიც მიხაკის ფერის მინის მინანქრით ყოფილა მოცული: ხოლო ასეთივე მინანქარი შერჩენილა ხელებზე. ეს ხვამლის ხატი ამ დაზარალების შემდეგაც ერთ საუკეთესო ნივთად ჩაითვლება ქართულის სიძველეთა. ამ ხატის სიმაღლეა 176 სანტ. ხოლო განი 90. ხატი ოქროთი დაფერილი ვერცხლითაა ნაჭედი და განიყოფება ორ ნაწილად (ფ. №16810). ზემო ნაწილი უფრო ძველია, არა უგვიანეს მე-14 საუკუნისა, და წარმოგვიდგენს ვედრების კომპოზიციას (დეიზის); მორგვალელების კამარის ქვეშ, შუაში მოქცეულია იესო ქრისტე, ტახტზე მჯდომარე, მაკურთხეველის მარჯვნივ და სახარებით მარცხენა ხელში; აქეთ-იქით ღვთის მშობელი და იოანე ნათლის-მცემელი, გაწვდილი ხელებით, როგორც მთხოვნელნი ცოდვილთა შევედრებისა. ამათ სახელების წარწერა ბერძნულად აქვთ.

კამარის გარედ, გასწვრივ, მარჯვენა და მარცხენა კედრით პეტრე და პავლე მთელის ტანით, ასომთავრული წარწერებით: წმ პე, წმ პლე; პირველი კლიტით ხელში, მეორე – გრაგნილით, რომელზედაც ბერძნული წარწერაა. კამარის ზემოდ, შუაში, ქრისტეა, წელსზევითი, მიძინების სახით, ოთხკუთხედ მედალიონში და მის აქეთ-იქით მახარობელნი მრგვალ მედალიონებში: წმ მთე, წმ მკოზ; ხოლო მათ მოშორებით, კუთხეებისაკენ მთავარ ანგელოზნი მთელის ტანით, ფრთებით და გაწვდენილ ხელებით და წარწერებით: მიქელ, გაბრ-ლ. მთელი ეს რთული კომპოზიცია ერთს ვერცხლის ნაჭერ ფურცელზე არის მოქცეული და ეზო მისი სადაა. ამ ნაწილზე ხატისა შემდეგ მიკრული ყოფილა სულ პატარა გულსაკიდი ჯვარცმის ხატი ოქროსი, ბიზანტიურის მილანქრიანი ხელობისა, წინამდგომთაგან ნაკვთი ღვთისმშობლისა მოძარცულია და დარჩენილია, გარდა ჯვარცმულისა, იოანეს სურათი. ეს პატარა ხატი, სამწუხაროდ, დაზიანებული და გამავეული, უფრო ძველია, ვიდრე ზემოდ ნაჩვენები რთული კომპოზიცია.

მეორე ქვემო ნაწილი ხვამლის ხატისა წარმოგვიდგენს წმინდა გიორგის, ფეხზე მდგომარეს, რომაულს საომარ ტანისამოსით; მარჯვენა ხელში შუბი უჭირავს, მარცხენა დადებული აქვს ფარზე; წელზე უკანიდან დიდი მახვილი ჰკიდია. თავი, როგორც მოვიხსენიეთ, დაზიანებულია, მაგრამ მაინც ემჩნევა ხუჭუჭად განწყობილი თმა; მარჯვენა კუთხიდან, მომრგვალებულ წრიდან, მოსჩანს იესოს მაკურთხეველი მარჯვენა. წარწერა გრძელი ასომთავრულით: წმ გი. ეზო სადაა, მაგრამ აშია ამ ნაწილისა მრგვალი წრეებით არის შემკობილი და ბალახ-ბულახის მსგავსი ხლართულებით მათში.

ქვემო აშიაზე მოიპოვება ვრცელი წარწერა ორ სტრიქონად, სანახევროდ წნულის ასომთავრულით:

1. წ : ჩნ : ღთივ : გვრგვნოსნმნ : მფეთ : მეფემნ :  
 ბგრტ : და : თა მეცხდრმნ : ჩემნ : დფლოთ  
 დფლმნ : ელნე : ხტი : ესე : წის : გის :  
 ხოლმისა : მოჰედილ : იყო : პლთა :  
 მეფეთგნ : მერმე : ქურდთ : ეძევს : მოვიკითხავთ :  
 და : რაც ვპ
2. ოვეთ : მისი : ნლეწი : სხა : ჩნითა : ვერცხლითა :  
 და : ოქროთა : და : საფასითა : მოვჰედეთ :  
 წრსმრთბლდ : მფბისა : ჩნისა : და ძთა : ჩნთა :  
 და : ძეთა : ჩნთ : დ : საოხოდ : სლთა ჩნთ : და :  
 დავსუწნეთ : წისა : გის : ტძრსა : შა : ქრნკსა :  
 სკდ : ინდიკტიონსა : მფბსა : ჩმისსა : კვ :  
 უქარაგმოდ :

წ. ჩუენ ღმრთივ გვრგვნოსანმან, მეფეთ მეფემან ბაგრატ, და თანამეცხედრემან ჩუენმან დედოფალთ დედოფალმან ელენე, ხატი ესე წმიდის გიორგის ხოლმისა მოჰედილ იყო პირველთა მეფეთაგან. მერმე ქურდთ ეძარცვეს. მოვიკითხეთ და რაც ვპოვეთ მისი ნალეწი, სხუა ჩუენითა ვერცხლითა და ოქროთა და საფასითა მოვჰედეთ წარსამართებლად მეფობისა ჩუენისა და ძმათა<sup>1</sup> ჩუენთა და ძეთა ჩუენთა და საოხად სულთა ჩუენ-

თა და დავასუჭნეთ წმიდისა გიორგის ტაძარსა შინა,  
ქრონიკონსა სკდ, ინდიკტიონსა მეფობისა ჩემისასა კვ. <sup>2</sup>.

ამ წარწერებში მოხსენებული ბაგრატ მეფე არის იმერეთის მეფე ბაგრატ მესამე (1510-1548), როგორც სწორედ განმარტა ბროსემ (გვ. 36-37) და არა აფხაზ-ქართველთა მეფე ბაგრატ მესამე (978-1014), როგორც ფიქრობს ალ. ხახანაშვილი, რომელსაც შეცდომებით მოჰყავს ეს წარწერა, ზღალოჩინის გერსამიას მიერ გადმოღებული (გვ. 32). გერსამიას ასლში ბევრად მეტი შეცდომებია, ვიდრე ბროსეს ტექსტში. ქრონიკონი უდრის 1536 წელს და ამ წელსვე უდრის 26 ინდიკტიონი ბაგრატის მეფობისა.

ჩვენის აზრით, ზემო ნაწილი ხატისა უნდა ეკუთვნოდეს მე-13-14 საუკუნეს, ხოლო ქვემო ნაწილი წმიდის გიორგის ხატისა არის გაკეთებული იმერეთის მეფის ბაგრატ მესამეს დროს; მაშასადამე მე-16 საუკუნეში. ამას მოწმობს, როგორც სტილი ხატისა, ისე მისი აშის შემკობილობა.

2. მეორე გამარცვული წმიდის გიორგის ხატისაგან დარჩენილია ფიცარი თავის ვერცხლის აშით და აგრეთვე ნამტვრევები მიხაკის ფერი გიჰსის გრუნტისა, რომელიც სარჩულად სდებია ვერცხლის ხატს. სიმაღლე ამ ხატისა ყოფილა 144 სანტიმეტრი, განი -90. ეჭვს გარეშეა, რომ ჩვენ აქ საქმე გვექონია ისეთ წმიდა გიორგის გამოხატულობასთან, როგორსაც წარმოადგენს წინა აღწერილი წმიდა გიორგის ხატი, რასაკვირველია, ზემო ნაწილის გამოკლებით.

ადგილობრივ მცხოვრებთა გადმოცემით, ეს ხატიც ხვამლის ეკლესიიდან ყოფილა მოტანილი. დარჩენილი ვერცხლის აშია ხატისა ახალია, 1814 წლისა, რასაც მოწმობს მისი მხედრული წარწერა ქვემოდ და აგრეთვე მისი შემკობილობა ხლართული რგოლებით ზემოდ, და ბალახ-ბულახებით მარჯვნივ და მარცხნივ, ორ მწკრივად, ფართო ნაწილში მალტის ყაიდის ჯვრებიც არის რგოლებში, ოთხ-ოთხი თითო მხარეს (ფ. № 16811). წარწერა:

1. იგვრდივ . განმაახლებელი : წისა . ამის . ხატისა . ც
2. აგერელ . მიტროპოლიტი . იოანე . დადიანისძე . მოიხსენე უფალო
3. ქესით ; ჩყიდ. 1814 . იანვარ. კწ. 28.

იოანე ცაგერელ-ჰყონდიდელი იყო დადიანის კაცია მეორეს ძე; დაიბადა 1777 წელს; ჰყონდიდელად ეკურთხა 1792 წელს; ხოლო მიტროპოლიტად - 1800 წელს; გადაიცვალა 1823 წ. 23 მარტს, 46 წლისა (Rapp, IX, გვ. 27. ჩემი „არხ. მოგზაურობანი და შენიშვნანი“, 2. გვ. 96, 98).

ბროსეს დროს ეს ხატი გაუძარცვავი იყო და მას ქვემო ნაწილზე ხატისა და არა

1 ალ. ხახანაშვილის გამოცემაში სწერია: ერთა. ბროსეს გამოცემაში ეს და შემდეგი სიტყვა გამოშვებულია.

2 ბროსე ამბობს, ეს გადაბმული ასოები მე კზ-ად წავიკითხეო, მაგრამ ჩემმა თანამოგზაურმა მუსლოვმა, რომელსაც უკეთესი მხედველობა აქვს, შენიშნა და გადმოიღო: კვს, – უკანასკნელ ასოს ს დაბოლების მნიშვნელობა აქვსო.

აშიაზე ამოუკითხავს (გვ. 27):

წმინდაო გიორგი შეიწყალე ბასილი ცგ : (=ცაგარელი).

3. მესამე წმიდის გიორგის ხატი ამ ეკლესიისა, რომლითაც გადმოცემით დაცული ყოფილა ლურსმანი, რომლითაც ვითომ წმიდანი მილურსმული ყოფილა ურმის თვალზე, წამების დროს, წაუღიათ ჯერ კიდევ 1910 წლის წინანდელი გაცარცვის დროს ეკლესიისა. ნაწილები ვერცხლის შესამოსელისა და ხატის მორთულობისა ამ ბოლო დროს უნახავთ ტყეში და დაუბრუნებიათ ეკლესიისათვის. ამათ მიხედვით, ხატი ყოფილა კარედი. ზემოდ გამოსახულია ჯვარი, კარებზე ანგელოზნი; ხელობა მე-18 საუკუნის არის, 1794 წლისა, რაც სჩანს მხედრულის წარწერისაგან:

ქ : ეჰა :. შენ :. წისა :. და :. ერთ არსისა :. სამებისა :.  
მხნეო : ახოვანო :. შვიდწილ :. უძლეველო :. მხედარო :.  
წ-ო : გიორგი : ოყურეშისაო. ჩვენ ცვა ფარვათა თქვენთ  
მონდობილმან და მოსავმან :. სიწმიდისა თქვენისამან  
ძემან ხელმწიფისა დადიანის კაცისამან და მპყრობელ-  
მან ს-დ ოდიშ აფხაზ ლეჩხუ  
მ სვანეთისამან დადიანმა გრიგოლ და თანა მეცხედრე-  
მან ჩვენ(ნმა)ნ საქართველოსა და კახეთის მეფის ასულ-  
მა დედოფალმან ანნამ (?) და პირმშომან ძემან ჩვენმან  
ლევან შევამკვეთ და მოვაჭედინეთ სამ  
ჭვალი და რკინა . იგი. რომელითაც . ურემსა . ზედა .  
დამსჭვალულ . იყავ : სახსრად  
და საოხად სულთა ჩვენთათვის და ამა სოფელსა წარსა-  
მართებლად და შე  
იწირე მცირე ესე წვლილი . ქრისტეს აქეთ . ათას შვი-  
დას ოთხმოცდა ოთხმეტს მარტის : ოცდა ათს .

ამ წარწერაში შეცდომა უნდა იყოს: გრიგოლ დადიანის, კაცია მეორეს ძის, მეუღლე ნინო იყო, ქართლ-კახეთის მეფის გიორგი მეთორმეტის ასული, და არა ანნა. ანნა გრიგოლის დედა იყო.

4. პატარა ვერცხლის ხატი წმ. პეტრესი, ნაჭედი, 19X14 სანტ., (№ 16812), შუაში, ოთხკუთხედში წარმოდგენილია წმ. პეტრე, წელს ზევითი, რომელსაც მარცხენა ხელში გრაგნილი აქვს, მარჯვენით აკურთხებს. ასომთავრულით აწერია: წ-ი პეტრე. ირგვლივ სამი წელს-ზევითი გამოხატულობაა ჩჩვილეთი ღვთის მშობლისა (მარცხნივ) და ოთხი გამოხატულობა ჯვარცმისა წინამდგომებითურთ (ზემოდ და მარჯვნივ); ქვემოდ, შუაში ვულგარული მხედრულით უწერია:

ქ : ღმერთო : შეიწყა/ლე : იანი და რანდ/ლიანი : უც-  
უც/ხლ[ე] ძენი : მისნი.

ხელობა სვანურია, მდარე, მე-18 საუკუნისა; ხატზე გამკეთებელს თავის ბეჭედი (შტემპელი) დაუსვამს, წარწერით: დათუჩა.

5. სრულიად ასეთივე მდარე ხელობის პატარა ვერცხლის ხატი წმიდის გიორგისა, ნაჭედი, 19X14 სანტ., (გ. №16812). წმიდანი წარმოდგენილია ფეხზე მდგომარედ, ლახვარით და ფარით; აშიებზე სამი გამოხატულობა ჯვარცმისა, სრულიად ისეთი რიგისა, როგორც წინა ხატზე; მარცხენა აშია ნაკლულად არის წარმოდგენილი, მაგრამ აქაც მოსჩანს ნაწილი ჩჩვილეთი ღვთის მშობლის სახისა, დარჩენილი ასოებით: ...

თ-სა (დედა ღ-თისა). წარწერა ისეთივე ჰქონია როგორც წინა ხატს, რაც სჩანს დარჩენილი ასოებიდან, მარცხენა კუთხეში: . . . ცხ . . . (უცოცხლე) მი . . . (მისნი).

6. **საცეცხლური ვერცხლისა, ქართულის ხელობისა.**

7. **თასი ვერცხლისა, მხედრულის წარწერით:**

დადიანი გრიგოლ. დედოფალი ნინა.

აქ მოხსენებული გრიგოლ არის დადიანი კაცია მეორის ძე, რომელიც გადაიცვალა 23 ოქტომბერს 1804 წ. მან შეირთო ცოლად ნინო, გიორგი მეთორმეტის ასული, 1791 წელს. ნინო გადაიცვალა პეტერბურგს 1847 წ.

8. **სიწმიდის შესანახი, ვერცხლისა, მხედრულის წარწერით:**

წო გ-ი ოყურეშისა შ-ყლე მოურავი ყრუაშვილი ხოსია

9. **სანაწილე ვერცხლისა, მხედრულის წარწერით:**

მთავარ მოწამეო გ-ი შეიწყალე მოურავი ყრუაშვილი ხოსია.

10. აღმოსავლეთის კარებზე ჰკიდია წამლით დახატული ორი ხატი სრულის ტანით, მარჯვნივ არხიდაკონი სტეფანესი, მარცხნივ ფილიპესი, ორივე ახალი ხელობის არის.

11. წამლით ნახატავი **ხატი მაცხოვრისა**, ახალი ხელობისა, წარწერით: ი-ჯ ქ-ე.

12. ეკლესიაში დაცულია აგრეთვე ჩვეულებრივი სვანეთის და ლეჩუმის წმიდის გიორგის ეკლესიებისათვის დიდი შვილდი რკინისა.

### **ეპიტაფიები ეზოში ეკლესიისა.**

13. დადიანის მოურავის ხოსია ყრუაშვილისა, რომელიც გარდაიცვალა 1816 წელს, 37 წლისა. მისი საფლავის ქვაზე, მახლობლად ეკლესიის სამხრეთის კარისა, მხედრულად სწერია:

საფლავსა ამას შინა მდებარე მოურავი ყრუაშვილი  
ხოსია ბეჟანის ძე რომელ აღვესრულე წლისა კიზ (sic)  
ყ-ლთა აღმომკითხველთა ამისთა შენდობას გევ  
ედრები რათა თქვენცა შენდობილ იქმნეთ ქეს  
მიერ და აწ ვევედრები მოწყალეებასა თქვენსა რათა  
არა შესძრათ ლოდი ესე და საფლავი რომელსა შინა  
მდება რე არს საწყალობელი და უწყამოდ აღსრულებული<sup>1</sup>  
გვამი ჩემი ვიდრე სოფლისა დასასრულამდე<sup>2</sup> და უკეთუ  
არა ისმინოთ ვედრე ბა ჩემი და ინებოთ შეძვრად  
ლოდისა ანუ საფლავისა ამის ჩემისა იქმნეს კაცი იგი  
შეჩვენებულ და წყეულ წ-ისა სამებისაგან სულით და  
ხორციით და მეორედ მოსვლასა მას საშინელსა გ-სნი<sup>3</sup>

---

1 ეს სამი სიტყვა გამოშვებულია ბროსეს ტექსტში.

2 ბროსე : აღსრულებამდე.

3 გახსნანი (?), ბროსე: კურთხევანი.

ქესი და მეოხება ყდ წისა ღთის მშობელისა მათ ზა  
წყევად და შეჩვენებულ ყავნ. ხრომელმან დაამ  
ტკიცოს ჩემი ესე ვედრება კურთხეულ იყავნ უფ  
ლისა მიერ ქეს აქეთ (ჩყივ) 1816<sup>4</sup>.

ქვემოდ:

საფლავი ესე და თავით ამისა<sup>5</sup> აკობადის საზღვარიანათ  
მოვიციდე მამარდაშვილის<sup>6</sup> გაბილასაგან და აკობა-  
ბის გიტოლიასაგან<sup>7</sup> და არვის აქვს ცილობა  
ჩემდა მომართ.

14. მეორე დიდი ეპიტაფია არის მეორე ლევან დადიანის მოურავის, გრიგოლ  
მანდარიასი, რომელიც მოკლულ ყოფილა აფხაზებთან ბრძოლაში 1833 წ. როდესაც ის  
შესრულდა 50 წლისა:

1. ქ. ეჰა. მხილველნო . და . აღმომკითხველნო . ლოდსა .  
ამას. ზედა<sup>8</sup>. მე<sup>9</sup> მა

თის უგანათლებულესობის . დადიანის . ლეონის . სამფლობელოს. ყმა.  
მოურავი. მანდარია . გრიგოლი . მათის . ბრძანებით .  
წარვლენილ . ვიქმენ . ორ

გულთა . აფხაზთა . ზედა . და . თოფთა . მიერ . მოვი-  
კალ . ორმოცდა . ათისა .

5. წლისა . განმლეველმან . დაუტევე . სწუთრო . ესე და .  
საყვარელი .

მეულლე . და . თვისი . ჩემი . და . დავეფალ . იწროსა .  
საფლავსა . შინა .

მინდობილი . და . მავედრებელი . ყოვლად . უძლეველი-  
სა . დიდის მოწ

ამის . გიორგის . ტაძრისა . გარე . რათა . მეოხ . მექმ-  
ნას . წინაშე .

ქრისტესა . გვედრები . ყოველთა . მხილველთა . და აღ-  
მომკითხველთა . შე

10. ნდობას . მიბრძანებდეთ . და . აწ . ვევედრები . მოწყა-  
ლებასა . თქვენსა . ვიდრე .

სოფლისა . აღსასრულამდე . არა . შესძრათ . ლოდი .  
ესე . მდებარე .

გუამსა . ჩემსა . და . უკეთუ . ვინმე (sic). ხელყოს .  
შეძვრად. ამისა. სიტ

ყვა . მიგოს . წინაშე . ქრისტესა . და ჩემდა . ნაცვლად .

---

4 ბროსე თარიღს ასე კითხულობს: ქრისტესით ჩყივ, ივნის 29. უკანასკნელი ორი სიტყვა ჩემს  
დღიურში არ არის.

5 ბროსე კითხულობს: ამირა, მაგრამ ამბობს: სიტყვები : „და თავით ამირა“ ანუ „ამისა“ ჩემთვის ნათელი არ არისო.

6 ბროსე: მამარიდაშვილის, მაგრამ შენიშნავს: მამარიდაშვილი მე კიდევ მეტად არ მაკმაყოფილებსო.

7 ბროსე: გიტოლისაგნ.

8 ბროსე კითხულობს: ქვეშე.

9 ბროსეს ეს სიტყვა არ მოჰყას.

14. განიკითხოს . და . სასჯელი . მიეხადოს<sup>1</sup> წელს . ქრის-  
ტეს . აქეთ . ჩყლგ. 1833 . თვესა . ფებერვალს . კე .

### სოფელი ნაყურალეში.

სოფელი ნაყურალეში გაშენებულია ხვამლის მთის წინა ნაწილების მადლობზე. მდებარეობა სოფლისა ერთობ ლამაზია. სოფლის მახლობლად, ეგრეთ წოდებულს დიდ-გორაზე, არის ნანგრევები ძველი ეკლესიისა და მისი სამრეკლოსი. შენობები სულ განადგურებულია; დარჩენილა მხოლოდ პატარა ზარი, ეხლა ხეზე ჩამოკიდებული, რომელზედაც გამოქანდაკებულია ჯვარცმა, ღვთის მშობელი და წმ. გიორგი, ლათინურის წარწერით, რომელიც გადმოვიღეთ, მაგრამ ამჟამად ხელთ არა გვაქვს.

თარიღი, როგორც მახსოვს, იყო აღნიშნული ლათინურის ასოებით: MDL XXXIX - (1589).

მეორე სამრევლო ეკლესია უბრალო ქვისაა, ჩვეულებრივი, ერთ ნაოსანი ბაზილიკა ოთხკუთხედი, მომრგვალებული საკურთხეველით შიგნით; ყავრით დახურული; შესავალი აქვს დასავლეთით და სამხრეთით; ფანჯრები ვიწრო, თითო აღმოსავლეთით და დასავლეთით. დასავლეთის მხრიდან ეხლა მიშენებული აქვს უშნოდ ხის ოთახი. კანკელი ერთობ მაღალია, ხისა; ქვემო ნაწილი სულ სადათაა დატოვებული; აქ არც მხატვრობაა და არც ხატები; მხოლოდ სულ მაღლა არის მთელი რიგი წამლით დახატული დიდრონი ხატებისა. შუაში ვედრება (დეიზის), ესე იგი, მაცხოვარი ღვთის მშობლით და იოანე ნათლისმცემელით და მათ მარცხნივ და მარჯვნივ ოთხ-ოთხი მახარობელნი. ამათ ზემოდ, შუაში, კანკელზე დამყარებულია დიდი ხის ჯვარი, რომელსაც შუაში დაკრული აქვს რკინის ჯვარი, ოქროს ფურცლებით შექერწილი (ფ. №16816).

ეზოში ეკლესიისა დასავლეთის მხარეს დიდი ცაცხვის ხეა, რომელზედაც მიშენებულია ხის სამრეკლო, ასე რომ კაცს ეგონება, სამრეკლო ხის ტოტზეა ჩამოკიდებულიო (ფ. №17407).

კედლები ეკლესიისა დახეთქილია და ამიტომ გასამაგრებლად მიყენებული აქვს ხის ბოძები ყოველ მხრივ. შიგნით იატაკი ქვითაა მოგებული და კედლები სულ მოხატული ფრესკებით. ეკლესია აშენებულია მე-17 საუკუნეში და ამ დროს ეკუთვნის მისივე მხატვრობაც. ჩვენთვის განსაკუთრებით საყურადღებოა ამ ეკლესიის კედლეზე წარმოდგენილი ნაციონალური ტანისამოსებით მთელი სახლობა ჩიქოანთა გვარისა, რომლიდგანაც მომდინარეობს უკანასკნელნი სამეგრელოს დადიანები.

ექსპედიციიდან დაბრუნების შემდეგ ჩვენ გავაგზავნეთ ნაყურალეშში მხატვარი დავით კაკაბაძე და გადმოვადებინეთ ყველა ფრესკები ჩიქოვანთა გვარისა, რომელნიც საისტორიო და საეთნოგრაფიო საზოგადოების მუზეუმში ინახება. სხვა ფრესკებთან გადმოღებულია კიდევ წმ. გიორგის ფრესკა.

ჩრდილოეთის კედელზე, ქვემო რიგში, ოთხი სურათია (ფოტ. №16815). მარჯვნივ ორი მღვდელთ მთავარია, ერთი მოხუცი, გრძელი თეთრი წვერით და ეკლესიის გეგმით ხელში; მეორე ახალგაზრდა. წარწერები მხედრულია:

პირველისა:

ქ :: ქრისტიანე :: და :: ღვთის :: მოყუარე :: საყდრისა

---

1 მე-7 სტრიქონიდან აქამდე ბროსეს წარწერა არ მოჰყავს.

ამის : აღმაშენებელი :: ჭყონდელი :: ჩიქოანი :: გაბრიელი ::

მეორეზე:

ცაგარელი

ჩიქუანი

სვიმონ

მარჯვნივ წარმოდგენილნი არიან, როგორც ეტყობა, ცოლ-ქმარნი; მამა კაცს ხელი აქვს გაშვებული ეკლესიის გეგმისაკენ; მის გვერდით ქალია. წარწერები:

მამაკაცისა:

ქალისა:

ქ :: ჩიქოანი : ბაკა :

ქ : ჩარკვიანის

ქალი :: ხვარამზე

სამხრეთის კედელზე, ქვემო რიგში, აგრეთვე ოთხი სურათია (№16819).

მარჯვნივ, სამთავრო ტანისამოსით არის მამაკაცი, რომელსაც მარჯვენა ხელში ამოწვდილი ხმალი უკავია. მარცხენა გულზე აქვს მიღებული. მის მარჯვნივ მისი მეუღლეა, ლამაზი და კეკლუცად გამოწყობილი ქართული ტანისამოსით. წარწერები:

მამაკაცისა:

ქ :: ლეჩხუმისა და : სალიპარტია[ნოს]

პატრონი :: ოდიშისა :: თა[ვი (ანუ თავადი) და]

იმერეთისა :: და :: ოდის (უნდა იყოს : ოდიშის)

სარ-ლ[ი]

ჩიქუანი :: ბატონი :: კაცია ::

ქალისა:

ქ :: ქართლისა ::

:: ერისთავთ :: ერის

:: თვის :: ქალი ::

:: ბატონი :: თამარ ::

მარცხნივ აგრეთვე ცოლ-ქმარნი; მამაკაცი შესავალი კარის მარცხნივ; დედაკაცი – კარის მარჯვნივ (ესენი ხელებს უწვდიან ერთმანეთს, კარის ზემოდ). წარწერები:

მამაკაცისა:

ქალისა:

ქ :: ჩიქუანი

ქ :: ლაშხის ::

ქაიხოსრო :

შვილის . ქალ

ი :: ქეთევან:



ხუთნივე ამ სურათებში წარმოდგენილნი მამაკაცი ძმები უნდა იყვნენ. ამათში კარგად ცნობილია გაბრიელ ჭყონდიდელი და კაცია ჩიქოანი, ნაკლებად ვიცნობთ სვიმონ ცაგერელს, ბააკა და ქაიხოსრო ჩიქოანებს.

უკანასკნელი ალბად ის ქაიხოსროა, რომელიც იხსენიება მაცხოვრის ხატის წარწერაში ლატალის ეკლესიისა, სვანეთში; იმავე ეკლესიის ვერცხლის ჯამის წარწერაში მოხსენებულია ბააკა ჩიქოანი<sup>1</sup>. ცნობილია კიდევ მეორე ბააკა ჩიქოანი, რომელიც იყო გიორგი პირველის ლიპარტიანის შვილი, ესე იგი, შვილის შვილი კაცია ჩიქოანისა; ის არის მოღვაწე მე-18 საუკ. დასაწყისისა<sup>2</sup>. სვიმონ ცაგარელი სრულიად ცნობილი არ არის. რაც შეეხება გაბრიელ ჭყონდიდელს, ის დიდ როლს თამაშობდა სამეგრელოში მე-17 საუკ. ნახევარში<sup>3</sup>. ეს უწყობდა ხელს, რომ პირველი

1 წარწერები გადმოვიღეთ ჩვენ სვანეთში მოგზაურობის დროს.

2. H.G. III, 648.

3 ბროსეს ჰგონია, რომ ეს გაბრიელი გიორგი (ლიპარტიანის), კაციას ძმის შვილია, მაგრამ ეს შეცდომაა (Rapp. IX, p.32).

ადგილი დაეჭირა სამეგრელოში მის ძმას კაციას. კაცია იყო ახოვანი, გაბედული და ჭკვიანი, მაგრამ ისეთი ცბიერი და მკაცრი, როგორც თვით გაბრიელი. 1661 წელს ქართლის მეფემ, ვახტანგ მეხუთემ, როდესაც მან მოილაშქრა დასავლეთი საქართველო, შეიპყრო გაბრიელ ჭყონდიდელი და წაიყვანა ქართლში. ამით მას უნდოდა გადაერჩინა მის ინტრიგებისაგან ლევან მესამე, დადიანი, რომელიც მან დასვა დადიანად და შერთო თავის ძმის ქალი<sup>1</sup> მაგრამ რამოდენიმე წლის შემდეგ გაბრიელი გაიპარა შულავერიდან, სადაც პრყობილად იყო, მითთვისა ხელმეორედ ჭყონდიდლობა და გახდა მრჩეველი ლევან მესამისა. მან დაუახლოვა მას თავისი ძმა კაცია და აიძულა ის მისთვის მიეცა სალიპარტიანო<sup>2</sup>. სახელი კაციას მამისა ჩვენ არ ვიცოდით, მაგრამ ცნობილია, რომ ის იყო ფრიად ღარიბი გორდელი აზნაური, რომელსაც თავის ზურგით მიჰქონდა თაფლი სვანეთში გასაყიდათ, რომ მით ერჩინა თავის ცოლშვილი. ცხადია, ასეთ კაცს, როგორც კაცია იყო, სამეგრელოს დიდებულები ვერ შეურიგდებოდნენ; ამიტომ მან დაიწყო ჟლეტა და განადგურება სამეგრელოს თავადებისა, თავისივე ძმის ჩაგონებით. ლევან მესამის სიკვდილის შემდეგ, 1681 წელს კაცია გახდა სრული გამგებელი სამეგრელოსი.<sup>3</sup>

და აი ამ კაციასაგან შთამომავლობენ მის შემდეგი დროის დადიანები. კაცია სამჯერ იყო ცოლ-შერთული და მისი ცოლების ვინაობა ჩვენს ლიტერატურაში გამორკვეული არ არის: ამიტომ საჭიროდ მიგვაჩნია ამაზე შევჩერდეთ. კაცია ჩიქოანს თავის სამარხად აურჩევია ჩრდილოეთის სამხრო მარტვილის მონასტრისა, რომელიც მოუხატვინებია და შეუმკვია სამკაულებით<sup>4</sup>. აქ ფრესკებში წარმოდგენილი ყოფილა მთელი მისი სახლობა, სახელების წარწერებით, მაგრამ სახელები და პირის სახეები სამივე ცოლისა განგებ ამოფხევილია, როგორც ამბობენ, დავით დადიანის მიერ.

პირველ რიგში აქ წარმოდგენილია თვით კაცია თავის მესამე ცოლით და ამ ცოლიდან ნაყოლი შვილით, იესეთი ან იოსებით. რომ ეს მესამე ცოლია, იქიდან სჩანს, რომ მეორე ფრესკას აწერია: პირველი ცოლი . . . , ხოლო მესამე ქალის ფრესკას . . . [ხუარა]მზე : გ-ი ლიპარტიანის დედა. გიორგი ლიპარტიანი, კაციას მემკვიდრე, აქვეა დახატული თავისი ცოლით, მიქელაძის ქალით სევდიათი და შვილით ოტიათი. ჩვენ ვიცით, რომ გიორგი ლიპარტიანი კაციას მეორე ცოლიდან ჰყავდა და ცოლი იყო ხვარამზე, ლორთქიფანიძის ქალი. ეს მტკიცდება წალენჯიხის ეკლესიის ვერცხლის

თეფშის წარწერიდან, რომელზედაც, სხვათა შორის, სწერია: . . . . გვედრებით ჩუენ ლიპარტიანი გიორგი. . . შეიწირე მცირე ესე შესაწირავი. . . კურთხეულის **დედა ჩემის ხვარამზე ლორთქიფანიძის ქალის** სულის სახსრად<sup>5</sup>. ეჭვს გარეშეა, რომ მარტვილის ფრესკები კაცია ჩიქოვანის ოჯახის მაშინ არის შესრულებული, როდესაც კაციას მესამე ცოლი ჰყავდა და როდესაც ის სრული ბატონ-პატრონი იყო სამეგრელოსი, ესე იგი 1681 წელს. ამას გვიმტკიცებს როგორც წარწერაში მოყვანილი მისი თანამდებობანი, ისე ჩამოთვლა მისი ყველა შვილებისა; აქ სხვათა შორის ვკითხულობთ:

. . . . ჩვენ . . . ლეჩხუმის და საინასარიძოს და სალიპარტიანოს პატრონმან, დიდისა ხელმწიფისა მეფისა და დადიანისა ვაზირმან, იმერეთისა-ოდიშისა თაჟმან და სარდალმან ჩიქვანმან კაციამ, და თანამეცხედრემ ჩვენმან

1 ქართლის ცხოვ. II, გვ. 203

2 იქვე, გვ. 206.

3 იქვე, გვ. 209.

4 იხ. ჩემი „არხეოლოგიური მოგზაურობანი“, II, გვ. 120-21.

5 იქვე, გვ. 235

დიდისა . . . და ძემან ჩვენმან გიორგიმ, იოსებ, ოტიამ დავახატვინეთ სამხრო ესე . . . <sup>1</sup>

ცხადია, ნაყურალეშის ფრესკები წინ უსწრობს მარტვილის ფრესკებს და მაშინ არის დახატული, როდესაც კაციას პირველი ცოლი ჰყავდა და ეს ცოლი ყოფილა ქართლის ერისთავთ ერისთავის ქალი თამარ. სამწუხაროდ, არ არის ნაჩვენები, რომელ ერისთავის ქალი იყო. მესამე ცოლის სახელი არ ვიცით. ვიცით მხოლოდ, რომ ის იყო რაჭის ერისთავის, შოშიტა მესამის დის წული. კაცია ჩიქვანის გადაცვალების შემდეგ ის გაჰყვა გიორგი გურიელს, ხოლო მესამე-ჯერ ის მისთხოვდა გიორგი აბაშიძეს, რომელიც წინედ ბერად იყო მალაქიას სახელით და დიდ როლს თამაშობდა იმერეთში<sup>2</sup>. კაცია ჩიქოვანი გადაიცვალა 1781 წელს. კაციას შვილმა გიორგი ლიპარტიანმა, ლევან მესამის უკანონო შვილი, ლევან მეოთხე, დასვა დადიანად. ამით მან იხსნა სამეგრელო გიორგი გურიელის პრეტენზიებისაგან, ხოლო ლევან მეოთხე მარტო სახელით იყო დადიანი; სამეგრელოს განაგებდა გიორგი ლიპარტიანი, რომელიც სივერაგით და სისასტიკით არ ჩამოუვარდებოდა თავის მამას<sup>3</sup> ბოლოს მან გააძევა სამეგრელოდან ლევან მეოთხე, რომელიც წავიდა სტამბოლში და იქ გადაიცვალა. გიორგი მართავდა სამეგრელოს ლიპარტიანის სახელით. დადიანობის მიღება ვერ გაბედა, რომ დიდი წიანაღმდეგობა არ გამოეწვია დიდებულებისა<sup>4</sup>. დადიანად გახდა მხოლოდ მისი შვილი კაცია პირველი თავისი მამის რჩევით და ნებისყოფით. ამ კაციას ცოლი ცნობილი არ არის, მაგრამ ჩვენის აზრით, ის ყოფილა დადიანის ასული მარიამი. ეს მტკიცდება ცაიშის გულანის ერთი მინაწერიდან, რომელიც ჩვენ არხეოლოგიურ მოგზაურობაშია მოყვანილი (წიგნი 2., გვ. 190-191. მე-191 გვერდის 1 შენიშვნა უნდა მიეკუთვნოს ამ კაცია პირველს, დადიანს და არა მის პაპას, კაცია ჩიქოვანს, როგორც ჩვენ წინეთ გვეგონა).

აღვნიშნოთ ეხლა სხვა ფრესკები ნაყურალეშის ეკლესიისა. კონქში საკურთხეველისა წარმოდგენილია ღვთის მშობელი ნიშოვანი (ზნამენია) მთავარ ანგელოზებით აქეთ-იქით, მიქელით და გაბრიელით (ფ. №16816); მის ქვემოდ

ზიარება არის წარმოდგენილი; ორი ქრისტეა დახატული; ერთი აზიარებს მოციქულებს პურით, მეორე ღვინით; ამას ქვემოთ არის მთელი რიგი ეკლესიის მამებისა გრაგნილებით ხელში, რომლებზედაც ბერძნული წარწერებია. მარცხნივ არიან: წ-დ ბსლი :: წ-დ ნიკოლაოზ :: წ-დ : ი-ე :: ოქრ-პირი :: - მარჯვნივ სამი მამაა დახატული, მაგრამ წარწერები არა აქვთ არც სახელებისა და არც გრაგნილებზე (№16820); კამარაზე საკურთხევლისა მთელი რიგი წინასწარმეტყველთა მედალიონებში (№16816). თვით ეკლესიის თაღის ცაში იესო ქრისტეა წელს ზევით; მის ქვემოთ, მარცხენა კედელზე, იოანე ნათლის მცემელი; ამას ქვემოთ ხარება და შობა; მათ დაბლა წელ ზევითნი მხატვრობანი, წარწერებით: წ-დ გ-ი, წ-დ ნესტორ, წ-დ ესტატე, წ-დ პროკოპი. ამათ ქვემოთ: ჯვარცმა ქრისტესი და აღდგომა: მარჯვენა მხარეს ეკლესიისა, ზევიდან დაწყებული, მოჰყვებიან: მირქმა, ნათლისღება (ორივეს

1 იქვე, გვ. 121.

2 ქართლ. ცხ. II. გვ. 209-210.

ჩვენს „არხეოლოგიურ მოგზ.“-ში წ. 2. გვ. 120. ციფრებით აღნიშნულ მე-4 სტრიქონში, ფრჩხილში სწერია: „ჩარკვიანის ქალი“. უნდა იყოს: „ლორთქიფანიძის ქალი“. მე-121 გვ. ციფრებით აღნიშნულ მე-5 სტრიქონში, ფრჩხილებში მოყვანილი სიტყვები: „ქართლის ერისთავთ ერისთავის ქალმან თამარ“ გამოშვებულ უნდა იქმნას. ვინაიდან ეს ეკუთვნის პირველ ცოლს და არა მესამეს. აგრეთვე მე-123 გვერდზე, სტრიქონი მე-18 ზემოდან, სწერია: „ჩარკვიანის“; უნდა იყოს: „ლორთქიფანიძის“.

3 იქვე, გვ. 215.

4 იქვე, გვ. 221.

ბერძნული წარწერები ახლავს (ფ. №16817); ეს ორი სურათი გაყოფილია ვერტიკალური წრით, რომელშიაც სამი წელზევითი წმიდანების სურათებია მედალიონებში. მათ ქვემოთ არის ჰორიზონტალური წრე ოთხი მედალიონის სურათით, რომელთაც ჯვრები აქვთ ხელში. ესენი არიან: წ-დ პეტრე, მერკური, დიმიტრი, თეოდორე (თე). ამათ ქვემოთ დიდი სურათებია: იერუსალიმში შესვლა და ფერისცვალება (ფ. №16815 და 16817). დასავლეთის კედელზე, კარის ზემოდ, მაცხოვარი წელს-ზევითი, მაკურთხეველი ხელით; მარცხნივ კარისა წმიდა გიორგი თეთრ ცხენზე, ვეშაპს გმირავს; მას ცხენზე შემოჯენილი ჰყავს მის მიერ გადარჩენილი ყმაწვილი, მარჯვნივ კარისა – წმიდა გიორგის შეპყრობა დიოკლეთიანეს მიერ წარწერით: აქა: წ-დ : გ-ი : /დეოკლეთიანე: / მეფემ შეიპყრა (ფ. №16818). წარმოდგენილია მეფე გვირგვინით; მის უკან დედოფალი, მის წინ წმ. გიორგი, რომის ჯარისკაცითურთ უკან. ზემოდ დასავლეთ კედელზე: გარდამოხსნა, ამალღება და ღვთის მშობლის მიძინება.

### სიძველენი ნაყურალეშის ეკლესიისა.

1. ღვთის მშობლის ხატი, წამლით ნახატი, ლამაზი ხელობისა. 18,5X14,5 სანტ., ოქროს შემკობილობით, მაგრამ დაზიანებული; უზის 12 ძვირფასი ქვა. სურათი შემოვლებული ყოფილა მარგალიტის მძივით, რომელიც სანახევროდ დაცულია. ნიშბი დიდი ოქროსი შემკობილია ხუცური ასო კ-ის მსგავსი ფიგურებით და ტაღის მსგავსი წრით და აგრეთვე ოქროს აშიები ყვავილოსანი შემკობილობით ერთობ ლამაზია. ქვემო აშიაზე არის დაზიანებული ასომთავრული წარწერა (ფ. №16814):

ქ. წო : [ლთს მშბლო] მხ : ეყვ : წე : ძესა (sic)

შნსა [მოსავსა] შნსა : ნიკლას

ეს წარწერა, როგორც ეტყობა, ბროსეს დროს დაუზარალებული ყოფილა (Rapp.IX. გვ. 33). ამას გარდა, შესაძლებელია უკანასკნელი სიტყვა „ნიკლას“ შემოკლებით იყოს მოყვანილი უქარაგმოდ და ნიშნავდეს: „ნიკოლაოზს“. ხატი მე-12 საუკუნეს უნდა ეკუთვნოდეს.

2. **ხატი წმიდა გიორგისა**, ოქროთ დაფერილი ვერცხლით ნაჭედი, ქართული მე-18 საუკუნის მდარე ხელობისა, 37X29 სანტ., წმიდანი წარმოდგენილია ცხენით, რომაულ საომარ ტანისამოსით და წელზე მოგრძოდ ჩამოკიდებული მახვილით; ლახვარით გმირავს კაცს, რომელსაც ხმალი აქვს ხელში; ზემოდ ასომთავრულით უწერია: წმ გ.ი. აშიეზი ლურსმის თავის მსგავსი, ბაწრულად დაწყობილის ულაზათო შემკობილობით, ზემოდ მარჯვნივ და მარცხნივ შეწყვეტილია ფრიად ტლანქი მთავარანგელოზთა სახეებით, ჯვრებით ხელთა (ფ. №16813). ზემო აშია, ნაჭრად დაცული, სხვა ხატიდან არის და მასზე მოსჩანან ნაშთები ხუცური წარწერებისა, მარცხენა კუთხეში: „აგ“; ამას ქვეშ: „ორლ“. მარჯვენა კუთხეში: „ზმ“ და ამას ქვეშ: „აუ“; შუაში : „ხოა“. ქვემო აშიაზე უშნო ასომთავრულით სწერია:

ქ : ზ : მოწმთა : მთავრო : და : შვიდ : წილ ოძლველო :

ღვაწლისა : მძლეო : გიგი : ხვმლისაო : მოგაჭედინე

მე მოსავმან და მადიდებელმან თქვენმან მონაზონმან

მარიამ შეწევნითა ცაგერელისა ჩიქოანის გაბრიელისათა

სადღეგრძელოდ : მსად ; და საოხად და სახსრად სულისა

ჩმსა დღეს მს დიდსა განკითხვისასა.

უქარაგმოდ:

ქ.ჰი მოწამეთა მთავარო და შვიდ წილ უძლეველო,

ღვაწლისა მძლეო გიორგი ხვამლისაო, მოგაჭედინე

მე მოსავმან და მადიდებელმან თქვენმან მონაზონმან

მარიამ შეწევნითა ცაგერელისა ჩიქოანის გაბრიელისათა,

სადღეგრძელოდ მისდა და საოხად და სახსრად სულისა

ჩემისა დღე(ა) მას დიდსა განკითხვისასა.

აქ მოხსენებული გაბრიელ ჭყონდიდელი არის გიორგი ლიპარტიანის შვილი; ის ჭყონდიდლად გახდა 1701 წელს, მაგრამ 1714 წ. მისმა ძმამ ბეჟანმა ის გადააყენა ჭყონდიდლობისაგან.

3. ბროსეს აქ უნახავს პატარა ხელნაწერი გრიგოლ ღვთის მეტყველისა (Rapp.IX. გვ. 32), რომელზედაც ყოფილა მინაწერი: ეს წიგნი წმიდა გიორგი დიდმისა არის.

4. **წმიდა გიორგის ხატი**, წამლით დახატული, წმიდანი ვეშაპს გმირავს შუბით, 32X27 სანტ., მომრგვალო წრიდან მოსჩანს ანგელოზი, წინ სასახლეა, რომლიდანაც გამოიყურებიან დედოფალი და დიდებულები. ზემოდ ასომთავრულით უწერია: წმ გ.ი. ხატი ახალი ხელობის არის.

5. ასეთივე ხელობის **მაცხოვრის ხატი** 20X20 სანტ., წარწერით: იჰ ქე.

6. ღვთის მშობლის ხატი, წამლით ნახატი; ღვთის მშობელი შვილს დასტირის; 51,5X41 სანტ., ბერძნული ხელობის არის. მე-17-18 საუკ.

7. ასეთივე ხატი ჯვარცმისა; იმავე ზომისა და ხელობისა.

8. ასეთივე ნახატი ხატი მაცხოვრისა, ტლანქი ხელობისა, მე-19 საუკუნე.

9. ასეთივე ხატი ღვთის მშობლისა.

10. ვერცხლის მედალიონი, ქართული ხელობის, მე-19 საუკ. მხედრულის წარწერით: ქ. დ-დაო ღვთისაო მეოხ ეყავ მხევალსა შენსა მანდრიას ელისაბედს.

11. წამლით დახატული ხატი წმიდა საბასი, მე-19 საუკუნისა, 37X29 სანტ., წარწერით: ღირსი მამა საბა განწმენდილი.

12. იოანე მახარობელის ხატი, ქალაღზე დახატული, წარწერით: წმ ი-ნე და ქვემოდ უწერია: შე ვხტნგ (ვახტანგ).

13. სასანთლე ვერცხლისა, მხედრულის წარწერით: ჩყნგ-სა წელსა მანისის ესა ნაკურალეშის (sic) წმიდაო გიორგი შემოგწირე ხუკმა თინია ჩაკვეტაძის ასულმან სასანთლე ესე სულისა ჩემისა საოხოთ.

სიტყვა ხუკი, როგორც ადგილობრივ განმიმარტეს, ნიშნავს : დაკუნტებულს, საპყარს, კუნტს.

### სოფელი ქვემო აღვი.

ამ სოფელში სულ ახალი ეკლესია არის ღვთის მშობლისა, გუმბათიანი.

თავი ხატი ამ ეკლესიისა, ღვთის მშობლისა, პატარაა, 14,2X11,5 სანტ. სახე ფერადით არის დახატული, შემერწილია ოქროთ დაფერილი ვერცლით და შემკობილი ყოფილა 10 ძვირფასი ქვით. ერთი ეხლა დაკარგულია. წარწერა სახელისა მხედრულით: დ-და ღვთისა. ზურგზე მხედრულითვე სწერია: ქ. ეჰა : შენ :. შვიდი ცა უმაღლესო და ქერაბინთა უწმიდესო ცათა მეუფისა მშობელო ჩვენ ცვა ფარვათა შენთა მონდობილმან ჯიაჯაძემ დათუმ და მეუღლემ ჩემა მალრიანის ქალმა ქეთიამ აღვაშენე საჯვარე დავასვენე ხატი ესე ყოვლა წმიდისა ნაწილიანი ჩვენგან მოჭედილი ჩვენდა სასულიეროდ მოსახსენებელი.

საჯვარე, რომელიც მოხსენებულია ამ წარწერაში, ყოფილა სოფლის ზემოდ, მაგრამ ეხლა ის ჩვენ დანგრეული დაგვხვდა. ხატი გადაუტანიათ იქიდან ამ ახალ ეკლესიაში. ხატი მე-19 საუკ. დასაწყისის არის.

2. პატარა ზარზე ამ ეკლესიისა მხედრულად აწერია:

ქ: შემოგწირე კენაშის ჯვარის ცხოველის რატისშვილმა დავითელამა საოხად სულისა ჩემისათჳნ წელსა ჩყკბ.

კენაშის ეკლესია არის აღვის ზემოდ.

### სოფელი ნასპერი.

ნასპერში ახალი ეკლესია არის ქვისა და არქიმანდრიტი ბესარიონ ახვლედიანის მეოხებით მშენიერად მოწყობილი ყოფილა. ჩვენ იქ არ შეგვივლია, მაგრამ მისი ორი ხატი მოასვენეს ცაგერში და ჩვენ იქ გავშინჯეთ და ფოტოგრაფიულად გადმოვიღეთ.

1. ხატი ღვთის მშობლისა ჩვილელი, ოქროთ დაფერილი ვერცხლისა, ნაჭედი, ქართული ხელობისა, 42X31 სანტიმენტ. (ფ. №16822). ღვთის მშობელი წარმოდგენილია სრულის ტანით, კამარას ქვეშ; ხელში უკავია ძე, რომელსაც მარცხენა ხელში გრაგნილი აქვს, მარჯვენით აკურთხებს. ნიშნები ღვთის მშობლისა და მისი ძისა, წნულის ვერცხლისა, შემკობილია თერთმეტი ძვირფასი ქვით. ამას გარდა, ზემო ნაწილში კიდევ ათი ქვა არის. წარწერა ასომთავრულით: დეა ღსა . ძე ღსა . აშიები მოჩუქურთმებულია ვაზოვანი ორნამენტით. ხატი ნაჭედია ცნობილის სამეგრელოს ოქრომჭედელის პეპუ მეუნარგის მიერ, მე-19 საუკუნის პირველ ნახევარში და წარმოადგენს მიზამვას ძველი ქართული კლასიკური პერიოდის ნაწარმოებისას. ზუგრზე მხედრულად აწერია:

ქ. სული იგი მაცხოვარებისა რ ლ მიუდგა გულითა შა პირველთა წინასწარმეტყველთა და მამათასა რომელნი წინათვე შეთვის მოასწავებდენ და ქადაგებდენ საკვირველებითა მას შობასა შენსა მარიამ ქალწულო ღის მშობელო ნასპერისაო მე მსასოელი შენი ცათა მზამავისა ეკლესიისა შენისა წალეჯიხისა წინამძღვარი დავით ახვლედიანი მცირესა ამას ძღვენსა ვრთმულოზ შენდა ამისთვის რ ლ ეკლესია შენი ძღვთის მშობლისა ნასპერს მდგომარე იყო თვით მამა პაპათა ჩემთა სალოცველი და იყო ხელთა ჩვეთა რომელნიცა სახლსა შა ჩემსა გამოიზრდებოდენ სამღელონი და როლითამე ეშმაკთ მოქმედებითა ხატი წმიდისა სახისა შენისა ქმნილი ფიცარსა ზა ხისასა ეკლესია შა სანთლის დანარჩენითა დამწვარიყო ძველად და მე ოდეს ვსცან ესე ამისთვის მადლმა შენმან აღმძრა მე მცირისა ამის ძღვნისა მორთმად შენდა და მოვაჭედინე ხატი ესე წმინდა სახისა შენისა ვერცხლითა ოქროს ცურვებულთა და შევამკვე თვლებითა და დავასვენე ზემოხსენებულსა ეკლესიასა შა შენსა ნასპერს ღს მშობელო მარიამ შეიწირე მცირე ესე მწილილი ვითარცა ძემან შენმან და ღთნ ჩვენმან : და მიოხე წინაშე ძისა შენისა, რა თა დღესა მას გაკითხასა(sic) მასმინოს ხმა იგი სანეტარო მოვედ კურთხეულო მამისა ჩემისაო და დაიმკვიდრე

სასუფეველი გამზადებული მართათ  
ვის (sic) და დაიცევ ორთავე შინა ცხოვრებათა ძმა ჩემი  
ყოვლად ღირსი  
მღვდელი გიორგი მეუღლით ძითა და ასულით რლი და-  
ასხა მარჯვენამან მღან . ხ-სახიერო ღო შეიწყალე შენ-  
სა სასუფეველსა მშო  
ბელნი ჩემნი ყოვლად ღირსი მღვდელი ლაზარე და იაშვ-  
ვილის ქალი ელენე . წეს : 1822 : თვესა დეკენბერსა : 20 :

**2. ხატი მაცხოვრის მიძინებისა,** ოქროთ დაფერილი ვერცხლისა, 31,5X21,5 სანტ. (ფ. №16821). ნიშნი შემკობილია ხუთი ძვირფასი ქვით; ეზო და აშიები ვაზოიანის ორნამენტით; წარწერა ასომთავრულით იწყება ზემო აშიაზე და გაგრძელებულია ქვემოზე:

- 1 წ . ივ : ქე : მფო : დიბსო : და მცხრო : პირო : ღო : ადიე . ორთ
2. ვე . შა : ცხრ ბთა : მონა . და მდდბლი : წ-სა . ამის ხტისა
3. შნისა . ცშლ მ-მა . მთვრი . მაქსიმე . რლისა . ბრძნთა . მოჭედა
4. და შეიმკო : ხტი . ესე . მიძინბსა : სფლისა . ჭლისა . ან .

უქარაგმოდ:

იესო ქრისტე, მეუფეო დიდებისაო და მაცხოვარო პირო  
ღმრთისაო, ადიდე ორთავე შინა ცხოვრებათა მონა და მა-  
დიდებელი წმიდისა ამის ხატისა შენისა ცაიშელ მამა-  
მთავარი მაქსიმე, რომლისა ბრძანებითა მოიჭედა და შე-  
იმკო ხატი ესე მიძინებისა სოფლისა ჭალისა (თუ ჭელიშისა ?).

ცაიშელი მაქსიმე ცხოვრობდა მე-17 საუკ. მეორე ნახევარში. ამის ბრძანებით გადაწერილია ცაიშის გულანი (იხ. ჩემი „არხ. მოგზაურობანი“, 2., გვ. 188-189).

**3. ჯვარი ხისა;** წინა პირზე გადაკრული აქვს სადაფი, რომელზედაც გამოხატულია ჯვარცმა სული-წმიდით ზემოდ, მტრედის მსგავსად და ღვთის მშობლით და იოანეთი ქვემოდ, 25X12,5 სანტ. ხელობა რუსულია, რუსულის წარწერით ჯვარცმულისა. უზის ოთხი ლალი.

### **წარწერა ხვამლის ეკლესიისა.**

უძველესი ხატები ოყურეშის ეკლესიისა, როგორც დავინახეთ, ადგილობრივი არ არის, არამედ გადმოტანილია ერთობ ძველის, მაგრამ ეხლა დანგრეული ხვამლის ეკლესიიდან, წმიდა გიორგისა. ხვამლის ქედზე გაშენებული ეკლესია დიდათ განთქმული ყოფილა ძველად: ამას მოწმობს დღესასწაული „ხვამლობა“. როგორც გადმომცეს, ხვამლობას დღესასწაულობენ აღდგომის მეორე კვირას. დღესასწაულს დღესაც დიდ-ძალი ხალხი ესწრება ლეჩხუმიდან და სვანეთიდან. ძველი ეკლესია ქვისა სულ დანგრეული ყოფილა. იმავე 1910 წელს, როდესაც ჩვენ ვმოგზაურობდით, აქ დაუწყიათ ახალი ეკლესიის აშენება და უნახავთ ქვა ასომთავრული წარწერით. ეს

ამბავი მე ოყურეშში მაცნობეს და ვინაიდან ჩვენ დრო არა გვქონდა წავსულიყავით, გავგზავნეთ იქ ოყურეშის მთავარ დიაკონი და დავავალეთ ქვა ჩამოეტანა ჩვენთვის სოფელ ნაყურალეშში, სადაც ჩვენ მივემგზავრებოდით. მთავარ დიაკონმა პირნათლად შეასრულა ჩვენი დავალება. ორი პატარა წარწერიანი ქვა მოგვიტანა ნაყურალეშში და ჩვენ საშუალება მოგვეცა გადმოგვეწერა და ფოტოგრაფიულად გადმოგვეღო წარწერა.

წარწერა სამ-სტრიქონიანი მოთავსებული ყოფილა ერთ შირიმის ქვაზე, რომელიც ეხლა ორად არის გატეხილი; მეორე ნახევრის ქვემო ნაწილი მომტვრეულია და დაკარგული, ამიტომ მეორე ნახევრის მესამე სტრიქონისა აღარ არის; რამოდენიმე ასო დაზიანებულია შენახულ ნაწილშიაც (იხ. ფოტოგრაფია).

წარწერა ჩვენ ასე გვაქვს წარმოდგენილი:

წო : გ-ი : მეოხ : და მფრველ : ექ

ნ : ე-ე : ენს : სჯთა : და : შვილთ

ა : მისთა : მ . . .

ამ წარწერაში სიტყვა **ენს** უნდა იყოს ნახმარი ჩვეულებრივი **იწეს** მაგიერ. შემდეგი სიტყვა **სჯთა** უნდა ნიშნავდეს სჯანთა (სუანთა). ამიტომ შესაძლოა წარწერა ასე წავიკითხოთ:

წმიდაო გიორგი, მეოხ და მფარველ ექ-

მენ ერისთავთ ერისთავსა ეოანეს სუანთა და შვილთ-

ა მისთა მ[ას დღესა განკითხვისასა, ამინ].

რასაკვირველია, სიტყვების დალაგებაც ფრაზაში ამ წაკითხვით არა ჩვეულებრივია: უნდა იყოს: „სუანთა ერისთავერისთავსა იოანეს“, მაგრამ ქართული ენის ნორმების შეცვლა სვანურ წარწერებში ჩვეულებრივია და ლექსუმი ძველად ქვემო სვანეთის ანუ ცხენისწყლის სვანეთის ნაწილად გვევლინება. ლექსუმელები გაქართველებული (გაიმერელებული) სვანებია.

ეს იოანე უნდა იყოს უძველესი სუანთა ერისთავი და არა ის იოანე ვარდანისძე, რომელიც ლაბეჭინის და მესტიის წმიდა გიორგის ხატების წარწერებშია მოხსენებული. ამას მოწმობს პალეოგრაფიული ხასიათი წარწერისა.

ქვები, პირობებისამებრ, უკან დაფუბრუნეთ ხვამლის ეკლესიას, ვინაიდან ხალხი ამას მოითხოვდა.

შენიშვნა: ხვამლის წარწერა გამოცემულია ჩვენ მიერ Byzantion-ში, tome XII, fascicul 1, pp. 204. . 206.

წარდგენილი იყო ფოტოგრაფიაც, მაგრამ სამწუხაროდ ფოტოგრაფია Byzantion-ის რედაქციამ დაჰკარგა. (ნომერი არ გვახსოვს).

## ნაწილი II

### ქვემო სვანეთი

სვანეთი იყოფა ორ ნაწილად, ზემო სვანეთად და ქვემო სვანეთად. მათ ჰყოფს მაღალი სვანეთის ქედი ლათპარის ზეკარით (უღელტეხილით). ზემო სვანეთს



შეადგენს მდინარე ენგურის ხეობა, ქვემო სვანეთს მდინარე ცხენისწყლისა; დაწყებული ამ მდინარის სათავიდან მურის ხიდანდე, რომელიც შორავს ქალაქ ცაგერს ერთი კილომეტრის მანძილით. ქვემო სვანეთი ლეჩხუმითურთ მე-19 საუკუნის დასაწყისიდან შედიოდა სამეგრელოს დადიანების მფლობელობაში, ამიტომ ის სადადიანო სვანეთადაც არის ცნობილი.

ქვემო სვანეთი შეიცავს სულ სამ დიდ თემს: ლენტეხისა, ჩოლურისა და ლაშხეთისა. ცნობები ქვემო სვანეთის ანუ სადადიანო სვანეთის ძეგლების შესახებ იხ. ბროსსე, Rapp.X. pp. 44-64, და გრაფიანია უვაროვისა: მატერიალი პო არხეოლოგიი კავკაზა, ტ. X. ქვემოდ, სადაც ამ ავტორებს ვიხსენებთ, ეს მათი წიგნები იგულისხმება.

## ლენტეხის თემი

### სოფელი ლენტეხი.

სოფელი ლენტეხი გაშენებული არის იქ, სადაც ხელედურა და ლასკადურა შეერთვიან ცხენისწყალს. მდებარეობა სოფლისა ერთობ ლამაზია, გადაღებულია ფოტოგრაფიულად (№17410), კიდევ უფრო ლამაზია ხელედურას ნაპირები (№17408) და აგრეთვე ციხე ლარაში, გაშენებული მთის ცხვირზე ხელედურას და ლასკადურას შუა. ეს ციხე ეხლა უკვე დანგრეულია, იცავდა შესავალს და გამოსავალს, როგორც ხელედურას, ისე ლასკადურას ხევებისა და აგრეთვე ზემოდ მიმავალ გზას ცხენისწყლის პირისა (№17488 და განცალკევებული მაღალი კოშკი, №17409).

ლენტეხის საზოგადოების მამასახლისმა ივანე კაცოს ძე მეშველიანმა ჩვენ გვაჩვენა რამოდენიმე სიგელი უკანასკნელი დადიანების მიერ ბოძებულნი. ზოგი მათგანი სათარხნო სიგელია; ზოგი წყალობისა. მოგვყავს სანიმუშოდ ჯანყვათურ ბენდელიანის სიგელი, ქალაქდზე დაწერილი:

ჩვენ ღვთისა მიერ ამალღებულმან და დამყარებულმან ს-დ ოდიშის, ლეჩხუმისა და სვანეთის ბატონმა, დადიან-მა გრიგოლ, და თანა მეცხედრემან ჩემან, დედოფალმან, საქართველოს მეფის ასულმან ნინომ, და ძემან ჩვენმან ლევან და გიორგიმ ესე წყალობის წიგნი დაგიწერინე და გიბოძე შენ ჩვენს ყმას **ბენდელიანს ჯაყვანს** და შენს ძმებს სვიმონს, გეგილას და მიქეს და სადოლაყს და ნულს, მოსავითს და ჭიტის და სხვათა ძეთა და მომავლ-თა თქვენთა ყოველთავე ასე და ამას პირსაზედა, რომე ჩვენზე დიდი ერთგულობა გამოიჩინეთ და ქრთამიც მო-გვართვი, ბეგრის მეტი არც საური, არც საუდიერო და არც ტვირთობა და არც ნდობა ჩვენგან თქვენგან თქვენს ძესა და მომავალს არ ეთხოვბოდეს, ისე გაგვითარხნე-ბიხარ შენის მამის მიქელის შვილები. (გ)ქონდეს და გი-ბედნიეროს ღმერთმან. . . მოწმენი კაცთაგან: ასათიანი ვახტანგ და ფალავა ხალ და გარსვიანი ხოსია და სხვანი ჩვენი დარბაზის ერნი, მეციხოვანი დანუჩა და ხელოსანი აბრამულა. . . აღიწერა ქრისტეს აქეთ ათას რვაას ორს,

ხელითა მღვდელისა პეტრესითა. ბეჭედი: დადიანი გრი-  
გოლ.

### სოფელი ფაყი.

სოფელი ფაყის ძველი ეკლესია ღვთის მშობლისა აშენებულია ქვისაგან; უბრალო ერთ-ნაოსიანი ბაზილიკა არის, სიგრძით 13 არშინი და 5 ვერშოკი, განით 1 არშინი და 14 ვერშოკი. საკურთხეველი მომრგვალებულად გამოდის გარედ. თალი ეკლესიის დამყარებულია სამ სარტყელზე თლილის ქვისა. ფანჯრები ვიწროა, თითო ყოველ მხრით; შესავალი აქვს დასავლეთით და სამხრეთით; დასავლეთით კიდევ ეკლესიას მიშენებული აქვს ხის ღია ფანჯატური. კანკელი ეხლა ხისაა, ახალი; ძველი ქვის კანკელი, რომელიც ბროსეს დროს თავის ადგილზე იყო, აულიათ და მისი ქვები აწყვია ეკლესიის კუთხეებში. ფაყის ეკლესიაში ინახება:

1. ხატი დიდი ვედრებისა, 87X56 სანტ. სპილენძისა, ნაჭედი, წელს ზევითნი სურათებით, შუაში ქრისტე, მარჯვენა ხელით აკურთხებს, მარცხენაში სახარება აქვს ჯვართურთ ყდაზე; მარჯვნივ ღვთის მშობელი არის (ეს არა ჩვეულებრივია ვედრების კომპოზიციაში, ის უნდა იყოს მარცხნივ); მარცხნივ იოანე ნათლის მცემელი, წარწერები: იო ქე, დ-დ ღთ, ნთ-ლმც. ნიმბი ქრისტესი ჯვარის სახედ არის შიგნით განწყობილი. სხვების უბრალოა. ნიმბების ორივე მხრით ყველა წმინდანების „დრობნიცებია“. ხელობა არა უადროეს მე-16 საუკუნისა. ამია ფართო აქვს, რომბის მსგავსი შემკობილობით ქსელში. აშიებზე უზის მედალიონები წმიდათა სახეებით:

ზემოდ შუაში ვედრება, და კუთხეებში მთავარ ანგელოზები; ქვემოდ: წმ. გიორგი, წმ. დიმიტრი, წმ. თეოდორე; მარცხნივ და მარჯვნივ ორ-ორი მედალიონი. ქვემოდ: სამ-სტრიქონიანი დიდი ასომთავრული წარწერაა, ეხლა დაზიანებული; შუაში მესამე სტრიქონის ფირფიტა ამოტეხილია და დაკარგული (№16832).

1. ქ მეოხბთ-დ შეწვნი წ-მთა მთვრაგელ-თისა კლდსთ ვინ ბე მე მნამ-თმნ ვ-რ

2. დან სულკეთილისა ეეს ა ბაკურის ძემნ შექნდ ამ ს ხატის და წნო მთვრ  
აგელზნო მეოხ ექმნ მწრდ ცდვლ

3. ს : ს-ლსა ჩემს და წამართე ბედ [ეს შასიბ]<sup>1</sup>. . ყვ. ქ.

შექმნ ჳელ-თ გი დვლს ძ სთ და გი მობარქის ძი[სა].

ამ წარწერაში, რომელიც ფოტოგრაფიაზე კარგად მოსჩანს, სიტყვების ბოლოში ასო ა უმეტს შემთხვევაში გამოშვებულია, სიტყვა და-ს მაგიერ ყოველთვის მარტო დ-ნია, ასო ო და უ ერთსახედ არის წარმოდგენილი ო-ნის სახით და ამიტომ ძნელი სათქმელია, „მობარქის ძე“ უნდა წავიკითხოთ, თუ „მუბარქის ძე“. ფრჩხილებში მიმატებული ასოები ბროსეს ტექსტიდან არის ამოღებული, მაგრამ ეს ეხლა დაკარგული ტექსტების გაგებას არ შველის. უკანასკნელ სტრიქონში ბროსე ასო ქ-ს

---

(1) აქ რაც ფრჩხილებშია ბროსეს დროს ყოფილა და მისი ტექსტიდან ვუმატებთ, ბროსე თვით ფაყში არ ყოფილა; მუსლოვი გაუგზავნია და მას გადმოუღია წარწერა (---X, ---47)

უმატებს ე, რომ გამოვიდეს „ქრისტე“. მაგრამ აქ ასო ქ იმავე მნიშვნელობით არის, როგორც ჩვეულებრივ ყოველი წარწერის დასაწყისში. ამით აქ აღნიშნულია განცალკევებული ხასიათი მეორე წარწერისა, რომელშიაც ოქრომჭედელნი იხსენიებიან.

შემოკლებულად წარწერა ასე უნდა იკითხებოდეს:

1. ქ. მეოხებითა და შეწევნითა მწიდათა მთავარ ანგელოზთაისა (?) კლდისათა ვინებ მე მონა(მან) მათმან ვარ-
2. დან, სულკეთილისა ერისთავთ ერისთავისა ბაკურის ძემან, შექმნად ამისა ხატისა და, წმიდანო მთავარ ანგელოზნო, მეოხ ექმენ(ით) მწარედ ცოდვილ-
3. სა სულსა ჩემსა და წარუმართე ბედ. . . ქ. შეიქმნა ჰელითა გიორგი დვალისძისათა და გიორგი მოზარქის (ანუ მუზარქის) ძი(სათა).

ხატი წინად ჰკუთვნებია კლდის მთავარ ანგელოზთა ეკლესიას, რომელიც ფაყის მახლობლად მაღალ მთაზეა გაშენებული. ვარდან, ძე ერისთავთ ერისთავისა ბაკურისა, ცნობილი არაა.

**2. ხატი მაცხოვრისა,** მთავარ ანგელოზებითურთ ოქროთი დაფერილი ვერცხლისა, ნაჭედი, 69X32 სანტ. სრულიად ისეთივე ხელობისა, როგორც წინა ხატი. სურათები წელს ზევითნია; შუაში ქრისტე, მაკურთხეველი მარჯვენით და სახარებით მარცხენა ხელში; მთავარ ანგელოზთ საზომები აქვთ ხელში. წარწერები სახელებისა ასომთავრულებით: დ ჰ ქ ე , რ ფ მ ქ ლ , წ ფ გ ბ რ ლ , ა შ ი ა და წარწერა ხატისა არ შენახულა. ეს ხატი იმავე ოქრო მჭედელთა ნახელავი უნდა იყოს, რომელთაც განუჭედიათ წინა ხატი. (იხ. ფოტ. №16830).

**3. ხატი დიდი ღვთის მშობლისა,** კარედი, ოქროთ დაფერილი ვერცხლისა, ერთობ ტლანქი ხელობისა (№16831). შუაში წარმოდგენილია ღვთის მშობელი ჩჩვილედ, ფრიად მახინჯი; სხვათა შორის ხელზე ექვსი თითი აქვს; მარჯვნივ მისა ასეთივე მახინჯი მთავარ ანგელოზია; მარცხნივ მეორე მთავარ ანგელოზია უფრო პატარა ტანისა. ღვთის მშობლის ქვეშ სამი მედალიონია წმიდანებისა; მარცხენა კარზე წარმოდგენილია ფეხზე მდგომარე წმ. გიორგი; მის ზემოდ ორი მედალიონია მთავარ ანგელოზებითურთ. მარჯვენა ფრთაზე წმ. თეოდორეა; წარწერა გადმოზრუნებული ასომთავრულით არის: თ - ზ წ - მი. მის ზემოდ ქრისტე უნდა იყოს ტლანქ მინიატურად წარმოდგენილი, ხელებ გაშვებით მარჯვნივ; ქვემოდ ასეთივე დამახინჯებულად ჯვარცმაა წარმოდგენილი.

ამ ხატზე მოიპოვება ზოგიერთი ნაჭრები სხვა კარგი ხელობის ხატებისა. მაგალითად, ნახევარი წრეები, ნიმბები ღვთის მშობლისა და მთავარ ანგელოზისა საუცხოო ხელობისა არის და აგრეთვე მათ შორის ჩანაკერებ ფირფიტას ლამაზი ბერძნული ასოებით ჯვარედინად უწერია სახელი მთავარ ანგელოზისა; კარგია აგრეთვე შუა ნაწილის ზემოდ დაცული ყვავილოვანი ორნამენტით შემკობილი ფირფიტა მთავარ ანგელოზითურთ მედალიონში.

აშიები შესდგება სულ სხვა და სხვა დროის ხელობის ნაჭრებისაგან. ამათში საუკეთესოა ქვემოდ დაცული ნაჭერი კლასიკური ხანისა, ასომთავრული წარწერა ნაწყვეტით, რომელიც, ეტყობა, ბროსეს დროს უკეთ ყოფილა დაცული. ეხლა

სტრიქონებიც არეულია და სიტყვებიც აკლია. რასაც ბროსედან ვუმატებთ, ფრჩხილებშია ჩასმული:

[მე ძღრმნ]. მეფემან . გ . [ხატი . ესე] . წ-თა . მთავარ-  
ანგელზ. . . მცველად და მფარველა. . .

ფაყის ეკლესიაში ამას გარდა ჩვენ ვნახეთ შვილდ-ისარი რკინისა, სპილენძის დიდი საყვირი, რომლითაც ეხლაც იწვევენ ხალხს. სპილენძის ჯამი მოჩუქურთმებული, სასანთლის ძირი, საცეცხლური, რკინის ლაგამი, შემკობილი ვერცხლით (ყველა ამათ სურათი იხ. №16824). ლაგამი ჩვენ მოგვცეს და ეხლა ინახება საისტორიო და საეთნოგრაფიო საზ. მუზეუმში. იმ ერისთავს, რომელსაც ეს ლაგამი ჰკუთვნებია, ასეთივე არა ჩვეულებრივი სიგრძის თოფი ჰქონია, სამი არშინი სიგრძით, და შემკობილი ვერცხლის სალტებით. ეს თოფი წაუღია ქუთაისის გუბერნატორს მამა ვაწადის ბლალოჩინის დროს და ეკლესიისათვის გამოუგზავნია 15 მანეთი.

4. **ხატი მაცხოვრისა**, ვერცხლის ფირფიტაზე, 24X14 სანტიმ. მაცხოვარი ტახტზე ზის, სახარებით ხელში; ტლანქი ხელობისაა (№16223, შუაში).

5. **ხატი მაცხოვრისა**, ვერცხლისა, ნაჭედი, 18X15,5 სანტ. მაცხოვარი ტახტზე მჯდომარეა. ხელობა ცოტა უფრო უკეთესია, ვიდრე წინა ხატისა.

6. **ხატი ორ წმიდა ეკლესიის მამათა**, ვერცხლისა, უბრალო; წარწერა ვულგარული ხუცურით:

ო ო შეონდენ შეცოდებანი ჯოდიმელს.

უკანასკნელი სამი ხატი ერთად არის გადმოღებული (იხილ. №16223).

ფაყის ზემოდ შიშველ მთაზე, რომლის მახლობლად საზაფხულო სამოვრებია, ყოფილა კიდევ პატარა ქვის ეკლესია მთავარ ანგელოზთა. აქ უქმობენ სულიწმიდის მოფენას და ეს დღესასწაული იწვევს ბევრ ხალხს. ეკლესია ჩვენ არ გვინახავს, ვინაიდან მღვდელმა დოროთეოზ ასათიანმა დაგვარწმუნა, რომ იქ არის მხოლოდ წამლით ნახატი ერთი ხატი მთავარ ანგელოზთა. ალბად აქ დაცული ეკლესია არის ის კლდის მთავარ ანგელოზთა ეკლესია, რომელიც იხსენიება ფაყის პირველი ხატის წარწერაში. ამ ეკლესიის გარდა ფაყის ეკლესიაზე მიწერილია კიდევ ახალი პატარა წმიდის გიორგის ხის ეკლესია ხელედისა, ხელედურას პირზე; აქ ძველი ნივთები არ არის; სოფელში 22 კომლი სცხოვრობს.

## სოფელი ლექსურა

სოფელ ლექსურის ეკლესია ღვთის მშობლისა ახალია, ხისა, მაგრამ მისი საკურთხეველი გარედ ხუთ-წახნაგოვნად გამოდის. აქ ჩვენ ვნახეთ:

1. **თავი-ხატი ღვთის მშობლისა**, ჩჩვილედი, 76X56,5 სანტ., წამლით დახატულია ხეზე, არა ძველია, მაგრამ ლამაზი, ბერძნულის წარწერით სახელისა.

2. **ხატი წმ. გიორგისა და წმ. დიმიტრისა**, ვერცხლისა, 9,5X7,5 სანტ. წმიდანები ფეხზე მდგომარენი არიან ფარით და შუბით ხელში და ხუცური წარწერით:

წმ გი წმ დე /იორისა შე იოვან/ ნა.

ესე იგი: წმინდად გიორგი, წმიდად დემეტრე იორისა, შეიწყალე იოვანნა (შეიძლება უკანასკლენი ორი ასო შეცდომით გადასმული არის და უნდა ყოფილიყო ან (- ამინ).

3. პატარა გულსაკიდი ხატი ღვთის მშობლისა, ჩჩვილედის, 4X3,5 სანტ. ვერცხლისა.

4. წამლით დახატული ხატი მაცხოვრისა. ახალი.

### სოფელი გულიდა.

გულიდა პატარა სოფელია. მისი ეკლესია მაცხოვრისა ახალია, მაგრამ აშენებულია ძველი ქვის პატარა ეკლესიის ნანგრევებზე. ეს უკანსკნელი ბროსეს დროს მთელი ყოფილა და მისი აზრით, ძლიერ ძველი, კარგი თლილის ქვით ნაშენი. მისი ხუთი ხატი დაცულია ამ ახალ ეკლესიაში.

1. ყველაზე საყურადღებო ამათში არის ვერცხლის ხატი წმიდის გიორგისა, 23X19 სანტ. საუცხოო ლამაზი ხელობისა (№16828, აგრეთვე უვაროვისა, გვ. 118, სურათი 36). ეს ხატი სრულებით არა ჰგავს ჩვეულებრივ სხვა ქართულ წმიდა გიორგის ხატებს. აქ წმიდა გიორგი ცხენით არის წარმოდგენილი და შუბით, მაგრამ ის არც ვეშაპს გმირავს და არც გვირგვინოსან მეფეს. სახე მისი სულ ახალგაზრდაა, ნაზი და ლამაზი, უფრო ქალის სახეს მოგვაგონებს, ვიდრე მამაკაცისას; ის საომარი ტანისამოსით არის წარმოდგენილი და მისი მოსასხამი ლამაზად ფრიალობს მის ზურგს უკან. მოსასხამს ქვეშ კიდევ ქვემოთ ჩამოშვებული გრძელი კაბის მსგავსი სამოსელია; მხარზე გადაგდებული აქვს თასმა, რომლითაც ქვემოდ ჩამოშვებული დიდი ხმალი არტყია; ფეხზე მაღალი, რბილი წაღები აცვია; ფეხი უზანგში აქვს გაყრილი; თავი ხუჭუჭი თმით და უბრალო ნიშბით არის შემკობილი; ლამაზი, კარგი ჯიშის ცხენი თითქო მის ქვეშ თამაშობს. წარწერა სახელისა ასომთავრულით: წმ გი. აშია პირველი, ძველი, შესდგება ერთმანეთში გადახლართული ნახევარი წრეებისაგან, მაგრამ ამას ზემოდ და მარჯვნივ მიმატებული აქვს მერმინდელი უფრო პრტყელი და ტლანქი აშია: მარჯვნივ ამ აშიაზე წარმოდგენილია სრულის ტანის წმ თე და ზემოდ მედალიონებში წელსზევითნი: წმ კვპე და ინე ნცმ (ნათლის მცემელი). გრაფინია უვაროვისა (გვ. 118) აღტაცებაშია ამ ხატის გამო და სამართლიანად შენიშნავს, რომ ჩვენს წინ არის არა ჩვეულებრივი ქართული წმ. გიორგის ხატი, არამედ უფრო ჟანნად'არკი სამხედრო სამოსელით. ამას გარდა მისი აზრით, ეს ხატი წინეთ წიგნის ყდის სამკაულს შეადგენდა. ეს შესაძლებელია.

2. ხატი მაცხოვრისა, 38,5X34 სანტ., ვერცხლისა, ნაჭედი, წელსზევითი, დიდი ჯვარის სახის ნიშბით და ბერძნულის წარწერით სახელისა, ჯვარის სახის მედალიონებში. ქრისტე მარჯვენა ხელით აკურთხებს; მარცხენაში სახარება უჭირავს ყდით, რომელიც შუაში შემკობილია დიდის ქვით და ირგვლივ მარგალიტებით. ეზო შემკობილია რომბებით ქსელში. აშიები ბალახოვანი ორნამენტით. ხატი მე-14 საუკუნის უნდა იყოს (№16825).

3. ხატი მაცხოვრისა, 22X17 სანტ., ვერცხლისა, ნაჭედი, ფრიად მახინჯი; მე-18 ანუ მე-19 საუკუნისა. მაცხოვარი ტახტზე მჯდომარეა, სახარებით და მაკურთხეველის მარჯვნივ. აშიებზე მარჯვნივ და მარცხნივ ტლანქი სურათები წმ. გიორგისა და წმ. დიმიტრისა (?). დამახინჯებული სამი მედალიონი ზემოდაც ემჩნევა (№16827).

4. ხატი მთავარ ანგელოზთა, 36,2X27,5 სანტ., ვერცხლისა, ნაჭედი, ერთობ ტლანქი ხელობისა; მთავარ ანგელოზნი წარმოდგენილნი არიან სრულის ტანით და ლაზარუმებით; მათ ქრისტეს მედალიონი მოაქვთ. ხელობა უნდა იყოს მე-18-19 საუკ. (№ 16826). აშია არა აქვს.

5. ხატი მთავარ ანგელოზისა, ვერცხლისა, ნაჭედი, შუბით და ბურთით. აშია ერთმანეთზე გადაბმული რგოლების და რომბ-ლურსმულის ორნამენტით არის შემკობილი. მე-18-19 საუკ. (№16829).

6. კანკელის საწინაო ჯვარი, დიდი, ხისა, სიმაღლით 4 არშინი და 5 ვერშოკი, განით ორი არშინი; ვერცხლის ფირფიტები, რომლითაც შექმნილი ყოფილა ჯვარი, სულ მოძარცულია. დარჩენილია მხოლოდ ერთი ფირფიტა მთავარ ანგელოზის მიქაელის ფიგურით და მეორე ფირფიტა ნაწყვეტი, ასომთავრულის წარწერით და ლამაზი სიმრგვალით (№16829).

: ქ : ძელო /ცხრებ/ ისო : მ/ ეობ : ე / ქმნ : მ . . .

სოფელ გულიდას ზემოდ, ნახევარი კილომეტრის მანძილზე, მოიპოვება პატარა ქვის ეკლესია წმ. გიორგისა; მასში მხოლოდ ნამტვრევებია ხატებისა და ეტყობა, ზოგი კარგის ხელობის ყოფილა.

### ჩოლურის თემი

ამ საზოგადოებაში შედიან, გარდა ქვემო ჩოლურისა, (№17412) შემდეგი სოფლები: საყდარი, შტვილი, ბულეში, მუცთი, ქვემო ჭველიერი, ზემო ჭველიერი, ზედა ჩოლური, თეკალი, ლევშიერი, მამი, უკულეში, ზაგალოთი, ტვიბი. მთელს საზოგადოებაში 185 მოსახლე ითვლება. აქ არის კარგი სასოფლო სკოლა, რომელშიაც ჩვენ დავბინავდით თავაზიან სკოლის მასწავლებელთან პეტრე ბაგრატიის ძე კოპლატაძესთან (იხ. №17411).

### სოფელი საყდარი.

საყდარი თავი სოფელია თემისა. ამის ეკლესია წმ. გიორგის სახელობისა მოზრდილია, ქვისა, მაღალი; წარმოადგენს ოთხკუთხედ ერთ ნაოსიან ბაზილიკას, და გაშენებულია მაღლობზე წყლის პირად. თალი დამყარებულია ორ სარტყელზე; დახურულია ყავრით. ქვის კანკელი, რომელიც ბროსეს დროს იყო, სამწუხაროდ, მოუშლიათ და ახალი ხის კანკელი გაუმართავთ. აღსავლის კარი ძველი კანკელისა, ხისა, ლამაზად მოჩუქურთმებული, რომელიც ბროსეს უნახას, ეხლა აღარ არსებობს.

შესავალი აქვს დასავლეთით და სამხრეთით. ფანჯარა ოთხი აქვს; ორი სამხრეთით და თითო აღმოსავლეთით და დასავლეთით. იატაკი ეხლა ხისაა. კედლები ამ ეკლესიისა სულ მოხატული ყოფილა ფრესკებით, რომელნიც ეხლაც ნაწილობრივ გვარიაანად არის შენახული, ნაწილობრივ გაფუჭებულია.

საკურთხევლის ცაში არის ვედრება (№16849); შუაში ქრისტე სრულის ტანით და ღვთის მშობლით და იოანე ნათლის მცემლით. ქრისტეს სახარება უკავია ხელში, რომლის გაშლილ ფურცლებზე იკითხება: „მე ვარ ნათელი სოფლისა და რომელი მომიდგეს მე“. . . ქვემოდ, საკურთხეველში მოსჩანან ეკლესიის მამები. სხვა ფრესკებთა შორის ეკლესიაში უკეთ დაცულია: შობა, ხარება, იერუსალიმში შესვლა, ნათლის ღება. ჩრდილოეთის კედელზე ორი წმიდა გიორგია, ერთი ცხენით, ვეშაპს გმირავს, მეორე ფეხზე მდგომარე, დასავლეთის კედელზე იესო ქრისტეს გოლგოთაზე წაყვანა. დასავლეთის კარის ზემოდ მთავარ ანგელოზნი მიქელ და გაბრიელ. კამარებზე კარგად დაცულნი არიან მეფენი და წინასწარმეტყველნი. ამას გარდა დასავლეთის კედელზე დახატულნი ყოფილან ამ საყდრის მღვდელ მსახურნი, შემომწირველნი და დიდებულნი, სულ ხუთი კაცი. შუაში არის სამღვდლო პირი. (№ 16850). წარწერა არა სჩანდა, მაგრამ როდესაც კარგად გავრეცხეთ, გამოჩნდა ასომთავრული:

ამ საღტრი/ სა დეგანო / სა ზოსიმეს/ შნს ღმთნ.

ეს ასე სწერია, როგორც აქ მოგვყავს, ესე იგი საღტრისა, საყდრის მაგიერ, დეგანოსა დეკანოზის მაგიერ.

მეორე პორტრეტი საერო კაცის არის, ჭრელ ქართულ ტანისამოსით; თავზედ სკუფიის ქუდი ახურავს, წვერი და უღვაში შავი აქვს; მარცხენა ხელი გულზე უდევს; მარჯვენა გაშვერილი აქვს მის წინ მოქცეულს კაცისაკენ, რომლის ფრესკა ეხლა გაფუჭებულია. საერო კაცების სურათებს დასავლეთის კარის მარცხენა წარწერები ჰქონია; მათი გარეცხვის შემდეგ ჩვენ გავარჩიეთ:

. . . გრიგოლს / და ფარდი / ლას / ღმთნ. . . ამა საღდარსა/  
ზედა დია მი / ჭირავეს/ და ვცა/ ბმა : შენ/ დობა / მსცა  
შე / უდნს. . .

აქაც გამეორებულია სვანური მართწერა ქართული სიტყვებისა, როგორც წინა წარწერაში: საღდარსა, მიჭირავეს მოიჭირვეს მაგიერ და სხვა. წარწერა შეუმოკლებლად ასე უნდა იყოს:

. . . გრიგოლს და ფარდილას ღმერთმან [შეუნდვეს] . ამა  
საყდარსა ზედა დია მოიჭირვეს. და ვინცა ბრძა(ნოს) შენ-  
დობა. მასაც შეუნდვენეს [ღმერთმან].

ჩრდილოეთის კედელზე, საკურთხევლის მარცხნივ არის ფრესკა სამღვდლო პირისა, რომელსაც ქარტა აქვს ხელში; მას აკურთხებს მაცხოვრის მარჯვენა სფროდან (№ 16848). ქარტაზე აწერია ასომთავრულით: „დაი / დვა / ტამ / არი“. ამის უკან საერო პირია წარმოდგენილი, ქართული ტანისამოსით და ბატონის ქუდით. ხელები გაშვერილი აქვს წინა ფრესკისაკენ ვედრების სახით (№16848). ასომთავრულ წარწერაში გარეცხვის შემდეგ ჩვენ გავარჩიეთ:

სულოჩო / ნის ძესა / ჩარდა / ნას შეუნდნეს / ღმერთმან.

აქ უნდა შევნიშნოთ, რომ ამ ისტორიულ ფრესკებს არც ერთი მკვლევარი არ იხსენიებს.

როგორც მოვიხსენიეთ, საყდარში ძველი ქვის კანკელი მოუშლიათ და მის მაგიერ აუმართავთ მაღალი ხის კანკელი. ამ კანკელში ჩაუტანებიათ მარჯვნივ და მარცხნივ აღსავალის კარებისა ორი დიდი ხის ჯვარი ვერცხლის ფირფიტებით შემოსილი ჩვეულებრივად და ეს გარემოება ეხლა ფრიად აძნელებს მათ შესწავლას და ჯეროვნად გადმოღებას ფოტოგრაფიის საშვალეებით. ამას გარდა იმ დღეს, როდესაც ჩვენ იქ ვიყავით, წვიმდა და ისედაც ბნელ ეკლესიაში უფრო ბნელოდა. ყველა ამ გარემოებათა მიზეზით ჯვრების და ფრესკების ფოტოგრაფიული სურათები საკმაოდ ნათელნი არ არიან.

1. **ჯვარი ხისა**, რომელიც მარცხნივ არის ჩაშენებული კანკელში, უკეთესია; მისი სიმაღლე 5 არშინი და 2 ვერშოკი; განი 1 არშინი და 11 ვერშოკი (№16834 და უვაროვისა, ტაბ. X).

ჯვარი შექმნილია ვერცხლის ფირფიტებით, რომელთა ზედა წარმოდგენილნი არიან გამოხერვით განჭედილნი სურათები წმიდა გიორგისა, რიცხვით 12. სხვა ფირფიტებზე შემკობილებანი მოიპოვება და წარწერანი ასომთავრულით. გვერდებზე ჯვარისა არის სურათები მთავარ ანგელოზთა, წმიდა დიმიტრისა და წმ. გიორგისა. მეორე მხარე ჯვარისა აგრეთვე შექმნილია ვერცხლის ფირფიტებით და მათზე მხოლოდ ხლართული შემკობილებანია და არა წმიდათა სახეები.

შუა ნაწილში ჯვარისა არის ლამაზად შემკობილი უმბო, ცალკე ფირფიტაზე გაკეთებული და ოთხი ლურსმნის საშვალეებით მიჭედილი. ძირი მისი წნულის ვერცხლის მავთულებით არის გაკეთებული. უმბო შემკობილია ოთხი ჯვარის სახედ დალაგებულის ქვებით და კუთხეებში ლამაზი წარწერა არის ხუთ სტრიქონად (№ 16846):

წო გ-ღ შე არ-შე	წმიდაო გიორგი, შეიწყალე არ-შე
კევდსა	კევისა
აზნაურნდ	აზნაურნი,
ყ-ლდ შემომწფდ	ყოველნი შემომწი-
რველნდ	რველნი.

ბროსეს აზრი წარწერისა ვერ გაუგია და ჰგონია წარწერა ნაკლულია (გვ. 51). შესაძლოა წინეთ იმ ადგილს, სადაც ეხლა საყდარია, არ-შე-კევი ანუ არა-შეს კევი ერქვა. საყდრის მახლობლად ეხლა ერთი ადგილი მოიპოვება, ტყით მოცული, რომელსაც აშარეში ჰქვია, ამიტომ შესაძლოა წავიკითხოთ: „აშარეშე კევისა“.

როგორც მოვიხსენიეთ, წინა პირი ჯვარისა შემკობილია 12 წმიდა გიორგის ფირფიტით. ამათში 11 წმიდა გიორგი ცხენოსანია, ერთი ფეხოსანი. ცხენოსანნი გამოხატულებით სამ რიგად შეიძლება გაიყოს. პირველ რიგს შეადგენს ოთხი დიდი ფირფიტა ოთხივე მხარეს უმბოსა. ამათზე მოთავსებულნი სურათები უფრო დიდი რელიეფით არიან წარმოდგენილნი. წმიდანი რომაულ საომარ ტანისამოშია; მისი მოსასხამი ლამაზად იშლება ჰაერში მის უკან; ცხენის ფეხ ქვეშ გვირგვინოსანი მეფეა გამხვართული, რომელსაც გიორგი ეხება თავის ჯვარის ხეტარით; ეს ჯვარი ლამაზად უჭერია ხელში ლაბარუმის მსგავსად; ცხენი კარგი ჯიშისა ყალყზე სდგას; ის მდიდრულად არის შეკაზმული, ლამაზად ნაკერი ყაჯარით და მკერდ საკიდით. ფაფარი და ძუა ლამაზად გამოსკვნილი აქვს. ერთი სიტყვით, როგორც სამართლიანად შენიშნავს გრაფინია უვაროვისა, ჩვენ წინ არის წარმოდგენილი არა მხედარი, რომელიც მტერს გმირავს, არამედ რომის ტრიუმფატორი, ოთხივე ფირფიტა



ერთნაირია, როგორც აღვნიშნეთ, მხოლოდ ერთი განსხვავებაა, სამი ცხენის თავი მიმართულია მარჯვნივ, ხოლო ერთის მარცხნივ. და ეს იმიტომ, რომ ცხენის თავი ყოველთვის უმბოსკენ იყოს მიქცეული; თუ მარჯვნივ მოექცია, მაშინ მარცხენა ფრთის წმიდა გიორგი უმბოს ზურგს შეაქცევდა, სიმეტრია დაირღვეოდა და უშნო იქნებოდა.

დანარჩენი ექვსი წმიდა გიორგი, აგრეთვე ცხენით, უფრო დაბალი რელიეფით არის წარმოდგენილი ჩვეულებრივად და გვირგვინოსან მეფეს გმირავენ შუბით.

ამათში სამი წარმოდგენილი არის ქვემო ფრთაზე ჯვარისა და თითო სხვებზე (№ 16845 და 16846). ესენი არეს შემკობილებით ცოტა განირჩევიან.

მესამე რიგის წმიდა გიორგი, რომელიც ზემო ფრთის თავშია, განირჩევა სხვებისაგან. წმიდანი ახალგაზრდა არის, ნიშნით, მიიჭენებს ცხენს მარჯვნივ და გმირავს ვეშაპს, როგორც ჩვეულებრივად მიღებულია (№16834). ფეხოსანი წმიდა გიორგი ყოფილა ლამაზი, დიდ ფირფიტაზე, მდიდრულ რომაულ საომარ ტანისამოსით და შუბით ხელში, მაგრამ ეს ფირფიტა გაფუჭებულია და დაკერებული ზემოდ ახალი ნაჭერით (№16834 და 16844). გრაფინია უვაროვისას ეს მიუღია მთავარ ანგელოზის სურათად; წარწერა აქვს, მაგრამ არ განირჩევაო. ნამდვილად კი წარწერა კარგად განირჩევა და ბროსესაც გარჩეული აქვს. აქ ვკითხულობთ: „წ-ღ გ-ი ლე-ნჩსა“. სოფელი ლენჩა თავისუფალ სვანეთშია. ამ სურათის ქვემოდ ლამაზი, მაგრამ ეხლა დაზიანებული ასომთავრული წარწერაა (№16844). ნიშნებად ზოგჯერ სამ-სამი ვერტიკალურად დასმული წერტილია. ჩვენ ორ-ორს ვტოვებთ:

1. წ-ღ გ-ი ლენჩს-ო აღაშენე მაშენებელი
2. შენი ჰევი ჩოლურისა და ყოველნი
3. მადიდებელ-ნი: შენნი . ამინ :
4. ოქრომჭედელი ლაშხი
5. შვ-ლმნ : ზიადმ-ნ : მოიყვ-ნა
6. და დიდათ : მოიჭირვა შეუნდვ-ნ
7. ღმერთმნ. შემდეგ უფრო წვრილი ასოებით:
8. მოიჭედა დეკანოზობასა რუბემისა.

შეუმოკლებლად:

წმინდაო გიორგი ლენჩისაო, აღაშენე მაშენებელი შენი ჰევი ჩოლურისა და ყოველნი მადიდებელნი შენნი, ამინ. ოქრომჭედელი ლაშხიშვილმან ზვიადმან მოიყვანა და დიდათ მოიჭირვა, შეუნდვნენ ღმერთმან. მოიჭედა დეკანოზობასა რუბემისა.

სხვა სამი ფირფიტა ჯვარისა ვარსკვლავის მსგავსი შემკობილობით არის მორთული. ერთი ამათგანი ზემო მკლავზეა და თითო მარჯვენა და მარცხენა მკლავებზე (№16846. იხ. აგრეთვე უვაროვისა, ტაბ. XXI).

ამას ქვემოდ კუთხეში იკითხება:

ამისა მომჭედსა ოქრომჭედელსა / მიქელს შეუნდვნეს ღმერთმან.

ჯვარი მე-14-15 საუკუნის უნდა იყოს.

2. მეორე დიდი ჯვარი, რომელიც ახალ კანკელშია მარჯვნივ ჩაშენებული, უფრო პატარაა და უფრო დაბალი ხელობისა (№16833). ესეც შეპერწილია ვერცხლის

ფირფიტებით და მათზე წარმოდგენილი წმიდათა სახეებით და სხვა შემკობილებანით, ხოლო ზემო და შუა ნაწილის ფირფიტები დაბალი ხელობისაა და მათზე ძლივს ემჩნევა გამოსახულებანი მაცხოვრისა, ღვთის მშობლისა და მთავარანგელოზთა. უმბო შემკობილია ვარსკვლავის მსგავსად გაშლილი შტოებით და ფოლაქის მსგავსი წერტილებით შუა წრეში. უკეთესი ხელობის და უფრო ლამაზი ფირფიტები მოთავსებულია ქვემო მკლავზე, სადაც დაცულია ორი ერთგვარი გამონახულობის ფირფიტა წმ. თეოდორესი: წ-ფ თ-ე. ეს ორი ფირფიტა ოქროთი დაფერილია; ერთი ფირფიტა მთ. -ანგ. მიქელ და გაბრიელისა: წ-დი მიქელ, წ-დი გბ-რლ, და ერთიც წმ. თეოდორესი, ზემოდ, შემკობილი წნული წრეებით, რომლებშიაც ძვირფასი ქვებია. წმიდა თეოდორე ცხენით არის წარმოდგენილი, საომარი ტანისამოსით, გმირავს შუბით იქედნესს; შუბი ჯვრით თავდება ზემოდ. ორთავე ფირფიტას ერთგვარი ასომთავრული წარწერა აქვს:

წო თე შე /არშე მქელ; ესე იგი: წმინდაო თეოდორე,  
 შეიწყალე აშარეშე(ლი?) მიქელ.

არშე ანუ აშარეშე იხსენიება პირველი ჯვრის წარწერაშიაც და ამიტომ ვკითხულობთ: „აშარეშე(ლი)“. ეტყობა იგივე ოქრომჭედელი მიქელი ყოფილა გამჭედელი საუკეთესო ფირფიტებისა. თუმცა ორთავე სახეს წმიდა თეოდორესა ერთგვარობა უჩანს, მაგრამ კარგის დაკვირვებით მაინც განირჩევიან: ჩაცმულობით და ცხენის მოკაზმულობით. მეორე სურათზე მოსასახამი ფრიალებს ჰაერში წმიდანის ზურგს უკან; პირველზე წმიდანს მოსასახამი არა აქვს. აგრეთვე შემკობილება მეორე ცხენისა უფრო მდიდრულია, ვიდრე პირველისა (№16833 და 16847). გრაფინია უვაროვისა პირველს და მეორე ჯვარს ერთმანეთში ურევს. წმიდა თეოდორეს სრულიად არ იხსენიებს და წმიდა გიორგის წარწერას პირველი ჯვარისა, ბროსეს მიერ გარჩეულს, ამ ჯვარს აკუთვნებს (გვ. 83-84). მისივე სიტყვით, ამ ორ ჯვარს ჰქონია ისეთივე ქუდი, როგორიც აქვს კალის ჯვარს, ჩუკულის ჯვარს და სხვას (გვ. 84), მაგრამ ჩვენ ეს არ გვინახავს, არც ჯვრების თავებზე დაცმულნი, არც ცალკე შენახულნი, თუმცა ყველაფერი დაწვრილებით მოვიკითხეთ და გავშინჯეთ.

3. **გაბრიელ მთავარ ანგელოზის ხატი**, ოქროთ დაფერილი ვერცხლისა, ნაჭედი, 37X31 სანტ. ასომთავრული წარწერით: წ-ა ანგლზი გაბიელ. მთავარ ანგელოზი ფთოსანია, ბიზანტიური ტანისამოსით, შუბით მარჯვენა ხელში და ბურთით მარცხენაში (№16840). ნიშბი შემკობილი ყოფილა ექვსი ქვით. ეხლა დაცულია მხოლოდ ერთი ზურმუხტი. აშიები ფართოა რომბ-ლურსმული ორნამენტით; მარჯვნივ და ზემოდ აშიას აკლია; ეზო შემკულია ფოთლების მსგავსი ორნამენტით; მარცხნივ კუთხეში ასომთავრული წარწერაა; ნიშნებად მრავალ ვერტიკალურ წერტილების მაგიერ ვტოვებთ ორ-ორ წერტილს:

ქ. წმიდაო : მთ	წმიდაო მთა-
ავარ ანგელ	ვარანგელოზ-
ოზნო : მწე : ეყა	ნო, მწე ეყავ(თ)
ვ : ორსავე : შინა	ორსავე შინა
ცხორებასა : დ	ცხორებასა დ-
ევანასა : თაკუერ	ევანასა (?) თაკუერ-
ელიანსა : ძითუ	ლიანსა ძი-
რთ : მთავარ ანგელოზო	თურთ, მთავარ ანგელოზო

კუათისაო : ან

კუათისაო, ამინ.

ხატი მე-16 საუკ. უნდა იყოს.

4. **ხატი წმ. გიორგისა**, ოქროთ დაფერილი ვერცხლისა, ნაჭედი, 41X34,5 სანტ. წმიდანი წარმოდგენილია ფეხზე მდგომარედ. რომაულ საომარ ტანისამოსით; მარჯვენა ხელში შუბი უნდა სჭეროდეს, მაგრამ ეს ნაწილი მორღვეულია; მარცხენა ხელი დადებული აქვს ფარზედ, რომლის კიდეები შემკობილია ორნამენტით; შუაში ჯვარი აქვს. თავის და ნიშის მარტო მარჯვენა ნაწილია შენახული; სახელის წარწერიდან დარჩენილია ასომთავრულით: გ·ი. ეზო ყვავილოვანი ორნამენტით არის შემკობილი. აშიები მშვენიერი ხელობისა ყვავილებით და ფოთლებით სიმრგვალებებში დაცულია მარჯვნივ და მარცხნივ, ზემოდ და ქვემოდ მოძარცულია. ყველაფერი მოწმობს, რომ ხატი კლასიკური პერიოდისა ყოფილა, მე-11-12 საუკ. (№ 16836).

5. **ხატი წმიდა გიორგისა**, ოქროთი დაფერილი ვერცხლისა, ნაჭედი, 37X33 სანტ. აშიები რომბებით შემკობილი ქსელისაა. წმიდა გიორგი ცხენითურთ დიდი რელიეფით არის წარმოდგენილი; ის გმირავს გვირგვინოსან მეფეს შუბით, რომლის თავი ჯვარის სახისა არის. მოსასხამი მხედრისა ფრიალებს ზურგს უკან. ნიშნი ნაწილობრივ დაფარულია აშიით, სახელი ასომთავრულით: წ·დ გ·ი (№16835).

ქვემოდ კიდევ ერთ-სტრიქონიანი წარწერა არის მსხვილის ასომთავრულით, მაგრამ უკანასკნელი ორი ასო ნუსხა ხუცურით სწერია:

შე დ·ე გეგილი, ესე იგი: შეიწყალე იოანე გეგილი<sup>1</sup>, ხატი მე-15 საუკ. უნდა ეკუთვნოდეს, ზემოდ ხატს მეწვეი აქვს.

6. **ხატი ღვთის მშობლისა**. ჩრვილედი, ოქროთ დაფერილი ვერცხლისა, 40,5X43 სანტ. ღვთის მშობელი ნიშნიანი ტახტზე მჯდომარეა, მუთაქით; ტახტს მაღალი ზურგი აქვს; წარწერა სახელისა ასომთავრულით: დ·დ დ·დ. აშიები მოლამაზოა ყვავილებით შემკობილი სიმრგვალებებში, და შიგ ორი წმიდანის მედალიონია, ერთი მარჯვნივ, მეორე მარცხნივ, ზემო და ქვემო აშია დაცული არ არის. ხატი მე-16 საუკ. უნდა იყოს (№16837). ზურგი ამ ხატისა გადაკრულია ლამაზი მატერიით (№16843), მაგრამ ფოტოგრაფიაზე ის სილამაზე ნაკლებად გამოდის.

7. **ხატი დიდი**, წამლით ნახატი, **ვედრებისა** 127X87 სანტ. წამლით დახატული სახეები თითქმის სულ გადასულია, გარდა ღვთის მშობლის პირის სახისა და ნაწილობრივ იოანე წინამორბედისა. ასომთავრული წარწერა ამათი სახელების დამახინჯებულია: დ·დ ღ·ზა: ივ ქბ, წ·ი იოვა (sic). ნიშნები და რომბებით შემკობილი ქსელი აშიებისა დაცულია და ესენი მოწმობენ, რომ ხატი კარგი ხელობისა ყოფილა; ქვემო აშია არ არის შენახული; სხვებზე შვიდი მედალიონია წელსზევითი წმიდანებისა: წ·დ პეტრესი, წ·ა პავლესი, წ·ა გიორგისა და წ·ა თეოდორესი მარჯვნივ და მარცხნივ, ზემო კუთხეებში მთავარ ანგელოზნი და შუაში გამზადებული ტახტი (№16842). ხატი მე-14-15 საუკ. უნდა იყოს.

8. წამლით დახატული ხატი წმიდა გიორგისა, 90X63 სანტ. ტანი სულ გადასულია, ნიშბი მშვენიერად შემკობილი და აშიები ბროწეულის ყვავილების მსგავსი ორნამენტით მოკაზმული დაცულია; აგრეთვე ნაწილობრივ ეზოც ზემოდ და მარცხნივ, ლამაზად შემკობილი. წმიდა გიორგი ფეხზე მდგომარე ყოფილა, შუბით მარჯვენა ხელში; მარცხენა ფარზე ჰქონებია დადობილი (№16841). ქვემოდ ნაწყვეტად დაცულია ასომთავრული წარწერა:

1. . . . ა : მიერ : მამკობი შენი ოი მთვრ მწმეო მეფე გი სა : ხელს : ეხნ

2. . . . ნ მიერ : იოხო : ჩემითუი[ს] წინაშე მეუფისა.

ბროსე მუსლოვის მიერ გადმოღებულ წარწერაში (გვ. 50) ოი-ს მაგიერ კითხულობს: „გიორგი“. ეს შეცდომაა, მაგრამ იმავე სტრიქონის უკანასკნელ ოთხ სიტყვას ასე კითხულობს: „მეფე გიორგი სახელ სეხნ(ია შენი)“. და ეს დაახლოებით ასე უნდა იყოს, თუმცა ორ-ორი წერტილით დაყოფა სიტყვებისა ამას არ ეგუება.

---

(1) ბროსეს გამოცემაში ეს წარწერა მოყვანილია, როგორც დიდი ჯვარის წმიდის გიორგის წარწერა (გვ. 50).

მაგრამ ამგვარი უმართლო დაყოფა ნიშნებით სიტყვებისა არა იშვიათია, ამიტომ დაახლოვებით, დარჩენილი წარწერა ასე უნდა იკითხებოდეს: . . . . ა მიერ მამკობი შენი, ოი მთავარ მოწამეო, მეფე გიორგი, სახელ სეხნ(ია ქმნილი შენ მიერ, იოხო ჩემითუი(ს) წინაშე მეუფისა. . .

ხატი მე-12-13 საუკუნის უნდა იყოს.

9. ხატი, ასეთივე წამლით ნახატი, ვგონებ, წმ. გიორგისა, 66X46 სანტ. სახე და ტანი სულ წაშლილია; დარჩენილია მშვენიერი აშიები, ორმაგად ბროწეულის ყვავილების მსგავსი ორნამენტით შემკობილი; ასეთივე შემკობილი ნიშბი და ზედ დასმული ათი ძვირფასი ქვა (№16838). ქვემო აშია, სადაც წარწერა უნდა ყოფილიყო, არ შენახულა. ხატი მე-12-13 საუკ. უნდა იყოს.

10. ჯვარი სატრაპეზო, ვერცხლისა, ვერცხლისავე ტარით, 33X19 სანტ. აშიები შემკობილია ლურსმის თავების მსგავსად. შუაში ჯვარცმაა წარმოდგენილი, ანგელოზებით მედალიონებში. მარცხენა და მარჯვენა ფრთებზე მედალიონები წმ. გიორგისა. ზემოდ ღვთის მშობელი და ანგელოზები (№16839). რუსული ხელობის არის.

11. ცალი კარი კარედი ხატისა, ვერცხლისა, 36X28 სანტ. ზედ ტლანქად წარმოდგენილია მთავარანგელოზი.

12. ნატეხი წარწერისა, ასომთავრულით, რომელიმე ხატისა:

. . . სა მმ/სხლს / ობს მ / ჰდა შ / უნდვნ ღთ/ მან, ესე იგი:

. . . სა მამასახლისობასა მოიჰქედა, შეუნდვენ ღმერთმან.

13. **ბარძიმ-ფეშხუმი**, ვერცხლისა მხედრულის წარწერით: მინგრელიის სამფლობელოდსა სვანეთის ჩოლულის (sic) სოფლის საყდრის წი-ს გიორგის ეკლესიის ბარძიმ-ფეშ-ხუმი გაკეთებულ არს მენგრელიის ეპისკოპოსის გიორგის მიერ ჩყლწ წელსა.

14. **ორი ლახტი** რკინისა, ექვს-ექვს-ფრთიანი.

### სოფელი ზემო ჭველიერი.

სოფელი ზემო ჭველიერის ეკლესია მთავარ ანგელოზის არის სულ მახლობლად ჩოლოურის სოფლისა, მის მარჯვნივ. ეკლესია სულ პატარაა, ქვისა, ოთხკუთხედი; დასავლეთის კედელში ორი ცხვრის თავის ქანდაკება მოიპოვება. შესავალი აქვს დასავლეთით და სამხრეთით. ხატები ბევრი ყოფილა ეკლესიაში, მაგრამ ეხლა ყველას ვერცხლის სამოსელი და შემკობილობა მოძარცული აქვს. ცოტა შერჩენია ფირფიტები მთავარ ანგელოზის ხატს და ისიც ტლანქი ხელობისა სჩანს; ამას გარდა არის კიდევ ორი, წამლით დახატული ხატი, ღვთის მშობლისა და მაცხოვრისა, ორივე ქართული ხელობისა, არა უადროეს მე-18 საუკ. დასასრულისა.

ჩვენ აქ ვნახეთ კიდევ ძველი სირიული ტიპის საცეცხლური.

### სოფელი მამი.

პატარა სოფელია. ამ სოფელში ლამაზი ოთხკუთხედი კოშკია (№17413); სოფლის ბოლოს კლდესთან, დიდი ხეების ჩრდილს ქვეშ, პატარა ქვის ეკლესია არის წმიდის გიორგისა. დახურულია ყავრით; შესავალი აქვს დასავლეთით და თითო ფანჯარა აღმოსავლეთით და დასავლეთით. დასავლეთის კედელზე ქვიდან გამოქანდაკებული ცხვრის თავია. კარი ხისა ლამაზია. კანკელი ახალი ხისა. ტრაპეზი მიშენებულია კედელზე საკურთხევლისა. ეკლესიაში მხოლოდ ორი ხატი მოიპოვება:

1. ერთი **წმიდა გიორგისა**, ვერცხლისა, ნაჭედი, 66X43 სანტ. ნაწილობრივ დაშლილია. წმინდა გიორგი ფეხზე მდგომარეა, მარცხენა ხელი ფარზე უდევს. მარჯვენა ხელში ალბად ჯვარი ეჭირა. ვინაიდან ლახვარი არა სჩანს; თავი დაზიანებულია; ნიშბი დიდია; წარწერა ასომთავრულით ჯვარისებურ მედალიონებში: წ-დ გ-ი. ეზო შემკობილი ყოფილა ხლართულებით. აშია დაცულია მარჯვნივ და მარცხნივ; ჩვეულებრივი რომბებითურთ ქსელში და ორივე მხარეს შუაში აშიებს აქვს ოთხკუთხედი მედალიონები, რომლებზედაც ერთგვარი ხელობის ორი წმიდა მხედარია სრულის ტანით და შუბებით; ესენი უნდა იყვნენ წმ. დიმიტრი და წმ. თეოდორე. წარწერები არა აქვთ. ხატზე ძეწკვია მომბული (№16851).

ხატი მე-15 საუკუნის უნდა იყოს.

2. აქვე არის პატარა ხატი ღვთის მშობლისა, უბრალო ფირფიტა, უხეოდ, 9,5X8,5 სანტ. წარწერით: დ-დ ღ-ი. ხელობა დაბალია (იხ. ქვემოდ №16851).

### სოფელი თეკალი.

სოფელი დიდი არაა, მაგრამ ლამაზია, ცხენის წყლის მარჯვენა ნაპირზე (№17415). სოფლის ზემოდ ტყით მოცულ გორაზე ამართულია ქვის ეკლესია მაცხოვრისა. ეს ეკლესია აშენებულია შირიმის თლილის ქვისაგან და განირჩევა სხვა სადადიანო სვანეთის ეკლესიებისაგან, როგორც თავის სიმაღლით, ისე მორთულობით და სილამაზით. აქ საკურთხეველიც არის, სამკვეთლოც და სადიაკვნეც. შესავალი აქვს დასავლეთით და ჩრდილოეთით. ეს უკანასკნელი შეიძლება მერმინდელი იყოს, ფანჯრები თითო დასავლეთით და სამხრეთით; სამი აღმოსავლეთით; სადიაკვნეში მრგვალი სარკმელია; ასეთი ყოფილა სამკვეთლოშიც, მაგრამ შემდეგ გაუფართოებიათ. ეკლესიის კედლები გარედან აღმოსავლეთით, დასავლეთით და სამხრეთით შემკობილია კუთხოვანი პილასტრებით და პატარა წვრილი ორმაგი სვეტებით, რომელთა ზემოთ კამარები გადადიან და ეს კამარები დიდათ ამშვენებენ კედლებს; დასავლეთით ხუთი კამარაა, სამხრეთით – ექვსი და აღმოსავლეთით – 3. საზოგადო სახე ეკლესიისა დასავლეთიდან იხ. ფოტ. № 17414. იატაკი ქვისაა.

კედლები შიგნით სულ მოხატული ყოფილა, მაგრამ მხატვრობა ცუდათ არის დაცული. საკურთხეველის კონქში მოსჩანს მაცხოვარი სრულით ტანით, სახარებით და მკურთხეველის მარჯვენით. იმის ირგვლივ თორმეტი მოციქულია, ჩრდილოეთის კედელზე უკეთ დაცულია ნათლისღება. ნაწილები ფრესკებისა კიდევ მოსჩანან დასავლეთის კედელზე და საყდრის ცაში.

ჩრდილოეთის სარტყელზე, შიგნით, არის გვიან ამოჭრილი ხუცური წარწერა:

ქე : შე : ზი : ნე/ლი.

ეკლესიაში მოიპოვება:

1. კანკელის საწინაო ვეებერთელა ჯვარი, თავის ადგილზეა დაცული, შეძერწილი ვერცხლის ფირფიტები, მაგრამ უწარწეროდ.

2. მაცხოვრის ხატი, ვერცხლისა, ნაჭედი, 71X50 სანტ. ტლანქი ხელობისა, დაზარალებული, ადგილ-ადგილ აკერია ახალი ფირფიტები (№16854). ნიშბი და სახე ნაწილობრივ გაფუჭებულია. ქრისტე ტახტზე მჯდომარეა, მაგრამ ტახტი არა სჩანს; ფეხები ნოხზე უწყვია, მარჯვენა ხელით ჯვარს სწერს, მარცხენაში სახარება აქვს. სახელის წარწერა ასომთავრულით: (იესო ყველა ასო შებრუნებულია) ქ-ე. ქვემოდ კუთხეში ასომთავრული წარწერა:

1. [ქც] ხო :<sup>1</sup> ლაშრსო :

აშენე

მაცხოვარო<sup>2</sup> ლაშარისაო,

აშენე

2. მაშენებელი შენი ძსე რ-ნ<sup>3</sup>
3. მოჭედა წი ესე ხ-ტი მმს
4. ახლისობსა გელძსა დე
5. კანოზისა ქ: მცხოვ
6. რო ლ-შრსა
7. ო შე ინე
8. დეკნზო

მაშენებელი შენი ძსე, რომელმან მოჭედა წმიდაი ესე ხატი მამასახლისობასა გელძსა დეკანოზისა . ქ. მაცხოვარო ლაშარისა-ო, შეიწყალე იოანე დეკანოზი.

ჩვენ არ ვიცით დანამდვილებით, როგორ წავიკითხოთ ჯგუფი „ლაშრსა“, ლაშერისა თუ ლაშარისა. ლაშერი ჩვენ არ ვიცით, ლაშარი (ლაშარის ჯვარი) ხევსურეთშია. შეიძლება იქიდან იყოს მოტანილი ეს ხატი. წარწერაში ძ ნახმარია ი-ს მაგიერ და იქ, სადაც ძ უნდა იყოს, არის ი. ეს წარწერა მუსლოვის მიერ გადმოღებული ბროსეს განსხვავებულად მოჰყავს, ვიდრე ჩვენ ვკითხულობთ (გვ. 52).

**3. ხატი მაცხოვრისა,** ოქროთ დაფერილი ვერცლისა, ნაჭედი, 69,5X50,5 სანტ. ქრისტე წელზევითია, მარჯვენა ხელით აკურთხებს, მარცხენაში სახარება უჭირავს, მოჩუქურთმებული ყდით შემკობილი, ნიშნში ჯვარის სახეა. სამოსელი ერთობ დასერილია. წარწერა ასომთავრულით: ძჴ ქწ. აშია ლამაზია, ქართული ხლართულებით, მაგრამ მარტო ქვემოდ არის დაცული და ზედ ორი მედალიონია იოანე და ლუკა მახარობელთა სურათებით (N<sup>o</sup>16853). ხატი მე-15-16 საუკ. უნდა იყოს.

**4. ხატი მაცხოვრისა,** ვერცხლისა, ნაჭედი, 48,5X36,5 სანტ. ტლანქი ხელობისა. წარწერა სახელისა ბერძნულის ასოებით აქვს. ქრისტე ტახტზე მჯდომარეა, სახარებით და მაკურთხეველის მარჯვენით. აშია მარჯვნივ და მარცხნივ რომბებით ქსელში მთლად არ არის დაცული. ზემო აშიაზე, ოთხის ქვით შემკობილზე, წელს ზევითნი სახეებია: წ-ძ ბრბ-რე, წ-ძ მრინე და წ-ძ ირინე (ი-ნე?). მარცხნივ და მარჯვნივ აშიებში წმიდა გიორგი და წმიდა დიმიტრია. ქვემოდ ასომთავრული წარწერის ნაწყვეტია (N<sup>o</sup>16855):

- 
- 1) აქ რაც ფრჩხილებშია, ბროსედან მოგვყავს, ეხლა არ სჩანს.
  - 2) ანუ შეიძლება: ხატო,
  - 3) ამ ორი სიტყვის მაგიერ ბროსე კითხულობს: ესე: ჳვი:

. . . [მაცხოვა]რო :: მეოხ :: და მფარველ ექმენ მან. . . ა  
 ძესა :: დღსა :: მას განკითხვისასა.  
 ნაწყვეტები ასომთავრულისა მოსჩანან კიდევ ზემო აშიაზე:  
 „რსთინა“. ხატს ძეწკვი აქვს.

**5. ხატი ღვთის მშობლისა** ჩვილედი, ოქროთი დაფერილი ვერცხლისა, ნაჭედი, 69X52 სანტ. ქართულის ხელობისა, ასომთავრული წარწერით: დ-დღ ღ-სღ, ძჴ ქ-ე. პირის სახეები ღვთის მშობლისა და მისი ძისა სანახევროდ მოშლილია. აშიები ბროწეულის ყვავილების მსგავსი ორნამენტით არის შემკობილი. ზემო აშიაზე წარმოდგენილია ოთხკუთხედ მედალიონებში ვედრება, ხოლო გვერდებზე პეტრე და

პავლე; ქვემო აშია არ არის დაცული (№16852). იესო ქრისტეს ნიშნში მოსჩანს ერთი ქვა, მეორე დაკარგულია. ხატი მე-13-14 საუკ. უნდა იყოს.

6. ხატი ნაკერი წმ. გიორგისა, 26X22 სანტ. მხედარი ცხენით არის წარმოდგენილი, რომელსაც საომარ ტანისამოსით, ვეშაპს გმირავს; მის წინ დედოფალია. რუსული ხელობისა არის (№16856).

7. პატარა ვერცხლის ხატი ღვთის მშობლისა, 9,1X10 სანტ. ნახევრად მოშლილია; წარწერა ხუცური: დ-დ დ-დ.

8. პატარა ვერცხლის ფირფიტა, 10X7 სანტ. ხელეზ-აპყრობილი წმიდანის სახით, რომელსაც ხუცურად აწერია: წ-დ ანა და შემდეგ კიდევ ასოები: მდდ. ფირფიტა ფიცარზეა მიჭედული.

9. წამლით დახატული წმიდა გიორგის ხატი, ახალი.

### ლაშხეთის თემი

ლაშხეთის თემი შესდგება სოფლებისაგან: სასაში, მებეცი, ლეკოსანდი, ჯახუნდერი, ჩუკული, ლემზაგორი, ხერია, ჩიხარეში, მელე, მახაში, შგედი, მარგვიში, ნაცული, ღობი: ამას ზემოდ ცანა ანუ ცენა; იქვე არის ნასოფლარები ზეკარზე (ულელტეხილზე) ზესხვა და ლაფური.

### სოფელი სასაში.

სოფელი სასაში მოზრდილი სოფელია. სასაშის ეკლესია ახალია, ხისა, გუმბათით. ღვთის მშობლის სახელზე. ამ ეკლესიაში ინახება:

1. თავი ხატი ღვთის მშობლისა, ჩჩვილედი, ვერცხლისა, ნაჭედი, ქართული ხელობისა, 46X33,5 სანტ. დედა ღვთისა მაღალ შემკობილ ტახტზე ზის ძითურთ. წარწერა ასომთავრულით: დ-დ დ-სა. ხელობა დაბალია, აშიები ერთმანეთში გადაბმული ნახევარი წრეებისაგან არის შემკობილი. მე-16-17 საუკ. უნდა იყოს (№16906).

2. ხატი წმ. გიორგისა, ვერცხლისა, ნაჭედი, 20,5X13,5 სანტ. წმ. გიორგი სრულის ტანით არის წარმოდგენილი, შუბით და ფარით. ქსელის მსგავსი აშიები შემკობილია 9 დიდის ვერცხლის ფოლაქით. ხელობა ერთობ ტლანქია (№16907). მე-18-19 საუკ.

3. ხატი სხვა და სხვა ნაჭრებისაგან შემდგარი, 14,5X15 სანტ. ზემოდ პატარა ჯვარცმის ხატია ვერცხლისა, ტლანქი ხელობისა. ქვემოდ სპილენძის პატარა ხატია წმ. გიორგისა, გვარიანი ხელობისა არის. ეზო მორთულია სიმრგვალებით და შიგ დატანებული ჯვრებით; აშიები ფოლაქების მსგავს ორნამენტით არის მორთული.



#### 4. ჯვარი ხისა, ვერცხლით შექედილი, ტლანქი ხელობისა.

##### სოფელი ჯახუნდერი.

ჯახუნდერი ლამაზი სოფელია, ნამეტნავად ლამაზი ზემო გორაზე გაშენებული ერთი სახლი თავის კომპიუტურთ. (№166. ეს წინანდელი გადაღებულია). ეკლესია წმიდა გიორგისა აშენებულია კარგის თლილის ქვით ას-წლოვან მუხებს შუა; ჩვეულებრივი ერთ ნაოსიანი ბაზილიკა, სიგძით 13 არშინი და 14 ვერშოკი, განით 9 არშინი და 15 ვერშოკი; დახურულია ყავრით; შესავალი აქვს დასავლით და სამხრით; ფანჯარა ხუთი აქვს, ორი სამხრეთით, თითო სხვა მხარეებზე. აღმოსავლეთის ფანჯარა მოჩუქურთმებულ ოთხკუთხედშია (№17422). მარჯვნივ კუთხეში ამ მხარეს კიდევ ამშვენებს შემკობილი პრტყელი ქვის პილასტრი (№16872). ზემოდ კიდევ ქვის ჩარჩოებში ყოფილა წმიდათა ქანდაკებანი, მაგრამ ეხლა ყველა მოშლილია; ერთს შეუნახავს ქანდაკება მთავარ ანგელოზისა, მაგრამ იგიც გაფუჭებულია. საზოგადოთ ჯახუნდერის ეკლესია ერთ საუკეთესოდ უნდა ჩაითვალოს სადადიანო სვანეთში. წინანდელი ქვის კანკელი ეხლა შეცვლილია ხის კანკელით. აღმოსავლეთის კედელზე ყოფილა ხუცური წარწერა, რაც ასე იშვიათია სვანეთში (№16872), მაგრამ ნაწილობრივ წარწერა მოშლილია და მასთან შირიმის ამობურცულ ქვაზეა და სრულად ჩვენ ვერ წავიკითხეთ, მხოლოდ გავარჩიეთ:

წო გ ი ჯ ა ნ დ ლ ო შ ე ა ხ ნ ა უ რ ნ ი . . .

ა ლ ა შ ე ნ ა ს ა ლ ტ ა რ ი და . . .

უ ქ ა რ ა გ მ ო დ :

წ მ ი დ ა ო გ ი ო რ გ ი ჯ ა ჯ უ ნ დ ლ ი ს ა ო , შ ე ი წ ყ ა ლ ე ა ხ ნ ა უ რ ნ ი . . .

ა ლ ა შ ე ნ ა ს ა ლ ტ ა რ ი (sic) და . . .

როგორც სჩანს წარწერიდან, წინეთ სოფლის სახელი ჯახუნდელი ყოფილა.

ეკლესიას ჰქონია ხის ჩუქურთმიანი კარი (№2197), რომელიც ეხლა ტფილისის მუზეუმში ინახება და გამოცემულია გრაფინია უვაროვის მიერ. ტაბულა XXXIX, 68.

ეკლესიაში ჩვენ ვნახეთ და გადმოვიღეთ:

1. ხ ა ტ ი წ მ . გ ი ო რ გ ი ს ა , ო ქ რ ო თ ი და ფ ე რ ი ლ ი ვ ე რ ც ხ ლ ი ს ა , ნ ა ქ ე დ ი , 89X56 ს ა ნ ტ . მ ლ ი ე რ ის რ ე ლ ი ე ფ ი თ გა მ ო ყ ვ ა ნ ი ლ ი , მა გ რ ა მ ე რ თ ო ბ და ზ ი ა ნ ე ბ უ ლ ი ა . მ თ ა ვ ა რ მო წ ა მ ე ც ხ ე ნ ი თ ა რ ის წ ა რ მო დ გ ე ნ ი ლ ი და ნ ი მ ბ ი თ , შ უ ბ ი თ მ ა რ ჯ ვ ე ნ ა ხ ე ლ შ ი , ფ ა რ ი მ ა რ ც ხ ე ნ ა მ ხ ა რ ზ ე ა ქ ვ ს მო გ დ ე ბ უ ლ ი ; თ მ ა ბ უ ლ უ ლ ე ბ ა დ ა რ ის გა კ ე თ ე ბ უ ლ ი . გა ფ უ ჭ ე ბ ის გა მ ო ა რ ა ს ჩ ა ნ ს , ვ ე შ ა პ ს გ მ ი რ ა ვ და თ უ გ ვ ი რ გ ვ ი ნ ო ს ა ნ მე ფ ე ს . წ ა რ წ ე რ ა სა ხ ე ლ ის ა ს ო მ თ ა ვ რ უ ლ ი თ : წ ო გ ო . ა შ ი ე ბ ი შე მ კ ო ბ ი ლ ი ა რო მ ბ ე ბ ი თ ქ ს ე ლ შ ი და მე და ლ ი ო ნ ე ბ ი თ წ მ ი დ ა თ ა . ქ ვ ე მ ო დ წ მ . დ ი მ ი ტ რ ი და წ მ . თ ე ო დ ო რ ე ა , ზ ე მ ო დ ი ო ა ნ ე ნ ა თ ლ ის მ ც ე მ ე ლ ი , ს ხ ვ ე ბ ი გა ფ უ ჭ ე ბ უ ლ ი ა (№17874), მ ა რ ც ხ ნ ი ვ , ზ უ რ გ ს ზ ე მ ო დ , ა ს ო მ თ ა ვ რ უ ლ ი წ ა რ წ ე რ ა :

1. ქ : მო ჭ ე და : წ ო : ეს ე : ხ ა ტ ი : მ ა მ ა ს ა ხ ლ ის ო ბ ა ს ა :

ვ ა ხ ტ ო გ : ლ ო მ ი ნ

2. ა ის მ ის ს ა : და გა მო ი ლ ო : ო ც ის ა : დ რ ა ჰ კ ნ ის ა : ს ა ქ ო ნ ე ლ ი

3. მ ის ა : ჯ ე ლ ო ვ ა ნ თ ა : მ ის ა ც ე მ ე ლ ა დ : და გ ვ ე დ რ ი ა ნ : ს უ ლ ი თ ა

და ჯ ო რ ფ ი თ ა : მო წ ო : გ ო :

შეუმოკლებულად:

მოიჭედა წმიდად ესე ხატი მამასახლისობასა ვახტანგ ლომინაის ძისასა და გამოიღო ოცისა დრაჰუნისა საქონელი მისა ჰელოვანთა მისაცემად და გვედრიან სულითა და ჯორცითა, მოწამეო გიორგი.

ზურგის ძელზე ხატისა მეორე ხუცური წარწერაა, მაგრამ უფრო გვიანი დროისა:

1. ქ: წო გი ცცხლ	წმიდაო გიორგი, ცოცხლო-
2. ობით გაუმარჯვ	ბით გაუმარჯვე
3. ე სულს გელოან	სულას გელოან
4. სა და გის ცოდვან	სა და გიორგის, ცოდვანი
5. ი მათნი შეს ღნ და	მათნი შეუნდვნეს ღმერთმან
6. მეულლესა მათსა	და მეულლესა მათსა
7. შენდს ღნ ძენი გან	შეუნდვნეს ღმერთმან, ძენი
8. ძლიეროს ღნ.	განაძლიეროს ღმერთმან.

ხატი მე-14 საუკ. უნდა იყოს. ამ ხატის ვერცხლის პერანგის ქვეშ ყოფილა მისი თაფლის სანთლის სარჩული, რომელიც გამოცემულია გრაფინია უვაროვის მიერ (ტაბ. XXXIV, 58, 59).

2. **ხატი ღვთის მშობლისა** კარედი, ოქროთი დაფერილი ვერცხლისა, ნაჭედი, 63X50 სანტ. (№187). შუა ნაწილში წარმოდგენილია ღვთის მშობელი ჩვილი, ტახტზე მჯდომარე, წარწერით: წ-ა მ-მ. ი-ჰ ქ-ე. მის ზემოდ კამარას ქვეშ, მფრინავი მთავარ ანგელოზნი არიან, ბურთებით და წარწერით: წ-ა მ-ქლ, წ-ა გ-ბ; ღვთის მშობლის მარცხნივ სრულის ტანით: წ-ა პეტრე; მარჯვნივ; წ-ა პვ-ლე. აშია ბროწეულის ყვავილების მსგავსი ორნამენტით არის შემკობილი (№16876), ქვემოდ წარწერა:

წო მღვთას მშობელო ადე აზნაურნი შე სფლდ ჯკდლი, ესე იგი: წმიდაო მღვთის მშობელო, ადიდე აზნაურნი, შეიწყალე სოფელი ჯაჯუნდელი.

თვით ეს ხატი, ჩვენის აზრით, ეკუთვნის მე-16 საუკ., ხოლო მისი კარები, რომელნიც ეხლა მოცილებულია და ცალკე ინახება, უფრო გვიანი დროის არის. იგი შემკობილია ზერელედ, მსუბუქად გამოსახული მთავარ ანგელოზებით, რვა-რვათი თითოზე, რომელნიც დაყოფილნი არიან ორ-ორ მწკრივად ვერტიკალური და ჰორიზონტალური შემკობილი სიმრგვალებით (№№16877, 187).

3. **ხატი მაცხოვრისა**, ვერცხლისა, ნაჭედი, 54X42,5 სანტ. მაცხოვარი ტახტზე მჯდომარეა, მაკურთხეველი მარჯვენით და გაშლილი სახარებით მარცხენა ხელში; სახარების ფურცელზე სწერია: მე ვარ ნათელი სოფლისა... სახელის წარწერა არის შემკობილი. აშიები შემკობილია რომბებით ქსელში და წმიდათა მედალიონებით, ზემოდ: წ-ა გ-ი, სამჯერ არის წარმოდგენილი, მარცხენა აშიაზე: წ-ი კ-რ(კვირიკე), მარჯვენაზე – წ-ი თ-ე, ქვემოდ იესო ქრისტე და ორი წმიდა გიორგი (№16875 და უვაროვისა, გვ. 116, სურ. 34), ხატი მე-16 საუკ. უნდა იყოს.

4. **ხატი მთავარ ანგელოზ გაბრიელისა**, ოქროთი დაფერილი ვერცხლისა, ნაჭედი, 21X12 სანტ. (№16878). კარგი ქართული ხელობისა. ანგელოზი სრულის ტანით არის

წარმოდგენილი ბიზანტიურის ტანისამოსით, შუბით და ბურთით ხელთა. წარწერა სახელისა: წ-დ გ-ბრლ. აშია მერმინდელია ქვემოდ მარცხნივ უწერია:

აღეშენა ხ	აღეშენა ხა-
ატი ესე ჳე	ტი ესე ჳე
ლითა მხა	ლითა მხატ-
ტვრის ძი	ვრის ძი-
სა მ-ქლა	სა მიქელისა.

ხატი არის არა უგვიანეს მე-15 საუკუნისა. (წინეთ გადაღებული №186).

5. ხატი წმიდა გიორგისა, ვერცხლისა, 22X19 სანტ. წარწერით, დიდი ასომთავრულით: წ-დ გ-დ; წმიდანი ცხენით არის წარმოდგენილი, გმირავს კაცს. ქვემოდ ვულგარული ხუცურიით:

წო გ-ი შე სალი და ანდანი.

ხატი ტლანქი ხელობის არის (№16878). ეს ხატი სულ გაფუჭებულია (№16878), მაგრამ ჩემს კოლექციაში წინეთ გადაღებული (№186) უფრო კარგად არის შენახული.

6. პატარა ხატი წმ. გიორგისა, ხეზე ამოჭრილი, ათონური რიგისა. წმიდანი წარმოდგენილია ცხენით, ვეშაპს გმირავს. ფრიად ლამაზი ნახელავია (№16873).

7. პატარა ოქროს ხატიდან წმიდა დიმიტრისა, წმ. თეოდორესი და წმ. პროკოპისა დარჩენილია მხოლოდ აშიები, ნიშნები და წარწერანი: წ-ა დიმიტრი: თ-ე : წ-ა პროკოპი. სახეები წამლით ყოფილა დახატული და სულ გამქრალა (№16873).

8. ერთი ხატის შესამოსლის ნაჭერზე, რომელიც ტლანქი ხელობისა ყოფილა, დარჩენილია ვულგარული ხუცური წარწერა:

მნაველს :. ქასივაძესა :. შენდვს [ღნ],

ესე იგი: მანაველს ქასივა-ძესა შეუნდვნეს (ღმერთმან) (№16873).

ამ წარწერაში „ქასივაძესა“ შეცდომით უნდა იყოს „ქასილაძესა“ მაგიერ. ეს არის განმანახლებელი ორბელის სახარებისა (იხ. ზემოდ. გვ. 44).

9. წამლით დახატული ხატი წმ. გიორგისა, სრულის ტანით, შუბით და ფარით; ლამაზი ხელობისა, 29X23 სანტ. წარწერით: წ-დ გ-დ; ქმ-უთისა : –

### სოფელი ჩუკული.

სოფელი ჩუკული დიდი და ლამაზი სოფელია; სახლები ამ სოფლისა უფრო ტიპიურია და ამიტომ უფრო საყურადღებო. ჩვენ გადმოვიღეთ ფოტოგრაფიულად. იხილე №17418, 17419, 17417, 17416, 17420.

ეკლესია ჩუკულისა ქვისა პატარაა, მაგრამ დასავლეთის კედრით სტოა აქვს. საკურთხეველი გამოდის გარედ მრავალწახნაგოვანად და აქვს სამი ფანჯარა. შესავალი აქვს დასავლეთით და სამხრეთით. ამ უკანასკნელის კარი ხისა მშენიერის

ჩუქურთმებით არის დამუშავებული (№190); მათზე წარმოდგენილია 24 წმიდათა გამონახატულება, მათ შორის, რვა სრულის ტანით არის გამოსახული, დანარჩენები წელსზევითანია. (გრ. უვაროვისა, გვ. 129, ტაბ. XXXIX,67). ბერნოვილი ამ კარს შეცდომით სხვა ეკლესიას აკუთვნებს, ვგონებ ჯახუნდერისა (იხ. გვ. 72, ფიგ. 4). ეს მოტანილი ყოფილა მეორე, გაუქმებულ ძველი ეკლესიიდან. შიგნით ეკლესიის კედლები მოხატულია; მხატვრობა დაბალია და გვიანი, წარწერები მხედრულია, არა სწორი ქართულით. საკურთხეველის კონქში ვედრებაა. ჩრდილოეთის კედელზე მოსჩანან: ჯვარცმა წარწერით: ჯვარისა მა(sic), წმ. გიორგი: წიმთ (sic) გიორგი (უვაროვის ტაბ. XX) და წმ. ესტატე: წი ესტათე, რომელიც შველს ნადირობს. სხვა ადგილებში წარმოდგენილნი არიან წა ბარბარე: წით ბრბლე, და წა მარინე: წით მარინე. ბერნოვილის დროს ფრესკები უკეთ ყოფილა დაცული (იხ. გვ. 83). კანკელი ქვისაა ერთის აღსავლის კარით და სულ მოცულია ხატებით. საკურთხეველის წინ საგანგებო კვარცხლბეკით ამართულია ჩვეულებრივი დიდი ჯვარი.

1. ეს **ჯვარი** და მთელი კანკელი ეკლესიისა თავის ხატებით გადმოღებულია ფოტოგრაფიის საშვალეებით №16862, ამაზედ მოსჩანს ნაწილობრივ საკურთხეველის კონქი, ფრესკებით. უფრო კარგად საკურთხეველი და კანკელი წარმოდგენილია ბერნოვილის სურათზე (გვ. 83, ფიგ. 9). ჯვარი დამყარებულია ოთხკუთხედ ქვის კვარცხლბეკზე, რომელიც ლამაზად შემკობილია ორმაგი სვეტებით, კამარებით და სხვა ჩუქურთმებით (იხ. უვაროვისა, გვ. 82, სურ. 17. თვით ჯვარის სურათი ავტორს არ მოჰყავს). სხვა სვანეთის ეკლესიებში ამის მსგავსი კვარცხლბეკი არ გვხვდება. ჩრდილოეთის მხარეზე ამ კვარცხლბეკისა არის წარწერა:

წ ო მ ქლ ადიდე ჯანზურ და სოფელი ესე და გ ი (გიორგი) გვარი ჯანზურიძე ეხლაც გვხვდება სვანეთში.

სამხრეთის კედრით სწერია:

სახელითა ღთ შეიქმნა ხათლუმი ესე ჳელითა გ ი[სთა].

ბროსე ხათლუმის მაგიერ კითხულობს ტოლომი, და

თარგმანის calvaire(გვ. 55).

თვით ჯვარი შეპერწილია ვერცხლის ფირფიტებით, ზოგჯერ მოოქრულით, რომლებზედაც სუსტი რელიეფით წარმოდგენილნი არიან ფიგურები წა გიორგის, ანგელოზთა, ღვთის მშობლისა, მოციქულთა და მთავარ ანგელოზთა. ხელობა საზოგადოთ დაბალია. გამონაკლისს შეადგენს მხოლოდ რამოდენიმე ფირფიტა მშვენიერის სურათებით. ასეთებია სურათები იესო ქრისტესი: ი ჳ ქე, მოციქული მარკოზ და ლუკასი: მარკოზ მახარებელი, ლუკა მახარებელი, და მთავარ ანგელოზ გაბრიელისა: გზრლ ანგელოზი. ამას შემდეგი წარწერა მოსდევს:

წ ო გზრლ მთავარანგელოზო ევედრე წ ე ი ჳ ქ ე და

მეოხ ეყ ვ ი ეს და ნინოს.

ჯვარს თავზე ჩამოცმული აქვს ცილინდრული ფირფიტებით შემდგარი ქუდი, რომელიც თავდება ზემოდ ჯვარით და სამი ბურთით (№16862). ქუდის სურათი ცალკე იხ. უვაროვისა, გვ. 81, სურათი 16.

2. დიდი **ხატი**, ლამაზი, მთავარ ანგელოზის მიქელისა, ვერცხლისა, ნაჭედი, 59X41 სანტ. მთავარ ანგელოზი წარმოდგენილია სრულის ტანით, ფეხზე მდგომარე, ბიზანტიურ საკარისკაცო ტანისამოსით, მარჯვენა ხელში ლაბარუმი აქვს, მარცხენაში ბურთი ჯვრითურთ, ზემოდ წარწერა სახელისა: წი მქლ. თმა კულულეებად

დაწნული აქვს. მოხაზულობა ნაკვთისა, ფრთები და მდიდრული ტანისამოსი კარგია. აშიები ფართო და ორმაგად შემკობილი ბროწეულის ყვავილების მსგავსი ორნამენტით მშვენიერია. ზემო და ქვემო აშიები შესდგება ერთმანეთში გადაბმული წრეებისაგან ყვავილებითურთ და მათში სამ-სამი მედალიონია წმიდანებისა (№16861 და უვაროვისა, ტაბ. XXX, 50). ხატი მე-14 საუკ. უნდა იყოს.

**3. ხატი მთავარ ანგელოზთა მიქელ და გაბრიელისა,** ოქროთი დაფერილი ვერცხლისა, 44X42 სანტ. ნაჭედი მშვენიერი ხელობისა (№16860). მთავარ ანგელოზნი ფეხზე მდგომარენი არიან წყვილად, ფრთებით და ახალგაზდათ გამოიყურებიან. თვითვეულს ხელთ აქვს ლაბარუმი და ბურთი ჯვრითურთ. ბურთები მათ გაწვდილი ხელებით ერთი ერთმანეთზე მიუდვიათ. მათი სამოსელი მდიდრულია და ლამაზი, ტუნიკები მოქარგულია, მოსასხამები ლამაზი ნაოჭებით არიან უკან ჩამოგრძელებულნი, შარვარები სახეებით შემკობილნი, წაღები მაღალი, მოქარგულნი, წარწერები სახელებისა ბერძნულია, მაგრამ ქვემოთ ფრთებში ქართულია: მ<sup>ე</sup> ქლ, გ<sup>ე</sup> ბლ. ირგვლივ ვიწრო აშია არის ბროწეულის ყვავილების მსგავსი ორნამენტებით შემკობილი; შემდეგ ფართო აშიები ფართო ყვავილებით ხლართულებში. ამათზე წარმოდგენილნი არიან მარცხნივ დედა ღვთისა, მარჯვნივ იოანე ღვთის მეტყველი; ორთავე სრულის ტანით. ზემოდ, შუაში, ტახტის გამზადებაა და კუთხეებში მთავარ ანგელოზნი, წელსზევითნი. ყველა ამათი წარწერები ბერძნულია.

აქ მკითხველის ყურადღება უნდა მივაქციოთ ერთ გარემოებას. ეს ხატი კარგად აქვს აწერილი გრაფ. უვაროვისას (გვ. 104) და მისი სურათიც გამოცემული აქვს (ტაბ. XXX, 49). მაგრამ აქ გარეგანი დიდი აშია ხატისა სულ სხვაა, ვიდრე ჩვენს სურათზე. ის სწერს: აშია ლურსმულია დრობნიცებით მაცხოვრისა და ალბად მთავარანგელოზთათ. ეს ასეც არის მის გამოცემულ სურათზე, მხოლოდ, ჩვენის აზრით, მთავარ ანგელოზის სურათები იქ არ არის, არამედ ორი მხედრისა, ალბათ წმ. გიორგისა და წმ. დიმიტრისა. საზოგადოთ შენიშნულია, რომ ზოგ ძველ ხატს უფრო ახალი დროის აშია აქვს, ზოგ ძველ ნახელავ ჩარჩოში მერმინდელი დროის ხატია მოქცეული და ეს მოვლენა უფრო ხშირია სვანეთში. ამ ხატისათვის უფრო ის ჩარჩოა შესაფერი, რომელშიაც ის ეხლა არის. ალბათ ეს სცოდნიათ ადგილობრივ და მისთვის მისივე ჩარჩო, დაუბრუნებიათ. ეს ხატი მე-12 საუკ. უნდა იყოს.

**4. ხატი ღვთის მშობლისა** ჩჩვილედი, ოქროთი დაფერილი ვერცხლისა, ნაჭედი, 73X58 სანტ. ქართული ხელობისა მე-13 საუკ. (№188). ღვთის მშობელი მდიდრულად მორთულ ტახტზე ზის მუთაქით, ორივე ხელით ძე ქრისტე მიუკრავს გულზე; ქრისტე მარჯვენა ხელით აკურთხებს, მარცხენაში გრაგნილი აქვს. ტახტის ზურგი მაღალია. ფეხები ღვთის მშობელს სკამზე უწყვია. წარწერა სახელისა: დ<sup>ე</sup> დ<sup>ე</sup> ღ<sup>ე</sup> ს<sup>ე</sup> და შემდეგ სახელი ბერძნულად არის განმეორებული. პირის სახე ღვთის მშობლისა სრული და სანდომიერი ქართველი ქალის სახეს მოგვაგონებს; კაბა წვრილ ნაოჭებად არის დასერილი. აშია ორი აქვს; ერთი შინაგანი ვიწრო აკანთის ფოთლებით შემკობილი, მეორე გარეგანი უფრო ფართო, ლამაზი, ბროწეულის ყვავილებით მორთული. ამათში 19 მედალიონია წმიდათა სურათებით. წარწერები ქართულია. გრაფინია უვაროვისა მართალია, როდესაც ამბობს, რომ ეს ხატი ამოღებულია თავის დიდ ჩარჩოდან და მოთავსებული სხვა უფრო პატარა ჩარჩოში, რომელშიაც ვერ

ეტევა. რომ ეს ასეა, ეს, ჩვენის აზრით, იქიდანაც სჩანს, რომ ამ ახალ ჩარჩოს დაუფარავს ნაწილი ბერძნული სახელის ასოებისა; მასვე დაუფარავს ქვემოდ კიდევში ქართული წარწერები, რომელნიც ამის გამო აღარ იკითხებიან, მოსჩანან მხოლოდ:

მარცხნივ:	მარჯვნივ:
.. გ <sup>-</sup>	ქე შ <sup>-</sup> . . .
.. ე <sup>-</sup>	მიქა . . .
.. ე <sup>-</sup>	ნა . . .
.. ან	

მარცხენა ნაწილში ალბათ იკითხებოდა სახელი ერისთავთ ერისთავისა, შეიძლება გიორგისა; მარჯვენაში: ქრისტე შეიწყალე მიქაელ. . .

გრაფინია უვაროვისა ხატს აკუთვნებს მე-14-15 საუკ. (გვ. 110, 112, ტაბ. XXXV, 61), ხოლო კონდაკოვი მე-13 საუკ. (იხ. მისი „იკონოგრაფია ბოლომატერი“, II, 150). ჩვენ კონდაკოვის აზრს ვუჭერთ მხარს, ხოლო მეორე აშია მე-12 საუკუნეს უნდა ეკუთვნოდეს.

5. ხატი მაცხოვრისა, ოქროთი დაფერილი ვერცხლისა, ნაჭედი, 63X48 სანტ. მე-15-16 საუკუნისა; ტლანქი ხელობისა არის და დიდათ დაზიანებულია (№16858), მაცხოვარი ტახტზე მჯდომარეა მაკურთხეველ მარჯვნივ და სახარებით მარცხენა ხელში. აშია ფართო რომბებით შემკობილი, რვა მედალიონით წმიდათა, ხატზე სამი წარწერაა; პირველი მოთავსებულია მარცხნივ მაცხოვრისა:

წო : მაცხო	წმიდაო მაცხო-
[ვ]არო:.. [შ]ე :ლონ	ვარო, შეიწყალე ლონ-
გუ :. ს[ული]	გუ სული-
თა :. და [ვო]	თა და ვორ-
რცითა	რცითა.

ამ წარწერაში ასო ო და უ ერთგვარად არის გამოხატული, ამიტომ შეიძლება წავიკითხოთ: ლონგუ, ლუნგუ, ლონგო.

მეორე წარწერა მოიპოვება მარჯვნივ მაცხოვრისა:

წო: მ-ც	წმიდაო მაც-
ხოვარო	ხოვარო,
შე : გაბი	შეიწყალე გაბი-
საჯიანი :	საჯიანი <sup>1</sup> .
მისა :. მმსხ[ლ]	მისა მამსახლი-
ბასა : მოიჭედ	სობასა მოიჭედ-
ა: ოთხი : ხ[ა]	და ოთხი ხა-
ტი.....	ტი.....

მესამე წარწერა ხატის ზურგზეა და უფრო გვიანი დროის არის:

1. ქ : ი ზ ქ ეო : პტიოსანო ცცხლობით
  2. და დღეგრძელობით გაუმარჯ
  3. ვე სულას გელოანსა გის
  4. ორთავე ძმანთა (sic) და ცოდვანი მათ
  5. ნი შეუნდს ღ-ნ და მეუღლესა მ-თსა
  6. შეუნდს ძენი მთნი გნძლიერო
  7. ს ღ-ნ
- უქარაგმოდ:

იესო ქრისტეო პატიოსანო, ცოცხლობით და დღეგრძელობით გაუმარჯ-ვე სულას გელოანსა, გიორგის. ორთავე ძმათა, ცოდვანი მათ-ნი შეუნდვნეს ღმერთმან, და მეუღლესა მათსა შეუნდვნეს, ძენი მათნი განაძლიეროს ღმერთმან.

6. ხატი მაცხოვრისა, ვერცხლისა. ოქროთი დაფერილი, ნაჭედი, 55, 5X46 სანტ. (№ 16859). მაცხოვარი წარმოდგენილია წელს ზევით; მარჯვენა ხელით აკურთხებს; მარცხენაში სახარება უჭირავს; ნიშბი დიდი აქვს ჯვარის სახით შიგნით; ტანისამოსი მსხვილი ნაოჭებით დასერილი, წარწერა დიდრონი ლამაზის ასომთავრულით: ძ ზ ქ ზ. აშია ლამაზია, შემკობილი მოსხო ბროწეულის ყვავილებით (?) და მედალიონებით წმიდათა. ზემოდ შუაში: ტახტის გამზადება და მთავარ ანგელოზნი;

(1) ანუ: გაბისა ჯაიანი (?)

მარცხნივ და მარჯვნივ – პეტრე და პავლე; ქვემოდ – წა გიორგი, წა დიმიტრი და წა არხიპოს. წარწერები ხუცურია. ქვემოდ აშიაზე ვულგარული ხუცურით სწერია:

ა-ღ-ნ ღ-თო	ა-ღ-ი-ღ-ენ ღმერთო
გ-გი მახუა (?)	გიორგი მახუა (?)
ხ-ტი შქმნ	ხ-ა-ტი შექმნა
მცხორისსა.	მაცხოვრისა.

ხატი მე-14-15 საუკ. უნდა იყოს.

7. ხატი ღვთის მშობლისა, კარედი, 10,5X12 ვერშოკი, მოოქრული ვერცხლისა, ნაჭედი, (№№189, 16857). შუაში წარმოდგენილია ღვთის მშობელი ჩვილიედი, ტახტზე მჯდომარე; მის მარჯვნივ და მარცხნივ: წი პ-ტრე და წი მ-პ-ლე; ამათ ზემოდ მფრინავი მთავარ ანგელოზებია: წი მ-ქლ, წი გ-ზლ. ქვემოდ შუაში ქრისტეა სრულის ტანით; მის ორივე მხარეს ჯვარცმა და კუთხეებისაკენ პატარა წრეში წმიდა გიორგი ცხენით ვეშაპის მგმირავი. ხატს ზემოდ აწერია:

- |                        |                        |
|------------------------|------------------------|
| 1. წო ღოსშობელო (sic)  | წმიდაო ღმრთის მშობელო, |
| 2. შე : ესე : სოფელი . | შეიწყალე ესე სოფელი,   |
| 3. აზრნი დი და         | აზნაურნი დიდი და       |
| 4. მცირე               | მცირე.                 |

ამ შუა ნაწილის ზემოდ სამ-კუთხედია ჯვართ შუაში და შემკობილი აშიებით. კარებზე ხატისა წარმოდგენილნი არიან წმ. გიორგი და წმ. თეოდორე (და არა მთავარ ანგელოზნი, როგორც უვაროვისა სწერს, გვ. 114). წარწერებით: წ-ი გ-ი, წ-ი თ-ე. ორთავე სრულის ტანით, საომარი რომაული ტანსაცმლით, შუბით და ფართი, წელზე დიდი მახვილი, ნიშნები ყველასი შესდგება პატარა წრეებისაგან. ხატი მე-16-17 საუკუნის უნდა იყოს.

**8. ხატი მაცხოვრისა, ვერცხლისა, მოოქრული, ნაჭედი, 52X27 სანტ.** შუაში ქრისტეა წელს ზევით, მაკურთხეველი მარჯვენით და სახარებით, რომელიც ჯვართ შემკობილია. ნიშნს ჯვარის სახე აქვს. წარწერა სახელისა ბერძნულადაც არის და ქართულადაც: იჴ ქე. ორივე მხარით მაცხოვრისა მთავარ ანგელოზებია შუბებით ხელში, ბერძნულის და ქართულის წარწერებით სახელებისა, მარცხნივ: მ-ქლ; მარჯვნივ: გ-ზლ. მთავარ ანგელოზთა სახეები არაჩვეულებრივია, მოტლანქო. (№16866). ხატი მე-16 საუკ. უნდა იყოს.

**9. ხატი მიქაელ მთავარ ანგელოზისა, ვერცხლისა, ნაჭედი, 59X47 სანტ.** მთავარ ანგელოზი ფეხზე დგას, საომარი რომაული ტანისამოსით; მარჯვენა კედრით ხმალი ჰკიდია და ზედ ხელი აქვს დადებული; მარცხენა ხელით გულზე მიდებული ბურთი უჭირავს. პირის სახე მოგრძოა, თვალები თითქო წამოვარდნილი; ხუჭუჭი თმა ფარავს შუბლს; ყელი გრძელი აქვს; ფრთები ულაზათოდ აქვს მიკრული. აშიები რომბ-ლურსმულია და შიგ მედალიონებია, მაგრამ წ-თა სახეები არა აქვთ. ხატი დაზარალებულია, ხელობა დაბალია, მე-17 საუკ. (№16863). ქვემოდ, მარცხნივ, შუა ნაწილში ხუცური უშნო ასოებით წარწერა მოსჩანს:

არიან წ-ნი / წ-ო . . დმლ / დან . . .

**10. ხატი მთავარ ანგელოზის მიქაელისა, ვერცხლისა, ნაჭედი, 48X34 სანტ.** მთავარ ანგელოზი ფეხზე მდგომარე, ბიზანტიური საკარისკაცო ტანისამოსით და ნიშნით. წარწერა სახელისა ხუცური: წ-ა მ-ქლ. ხატი ერთობ დაზიანებულია. აშიები რომბ-ლურსმული, ორი მედალიონით. მარცხენაში ღვთის მშობელია ჩჩვილედ, ბერძნულის წარწერით სახელისა; მეორეში, ვგონებ, მირქმა (№16864); ქვემოდ, მარჯვნივ, წარწერა:

მთავარანგ	მთავარანგე-
ზო შემა[რ]	ლოზო, შეიწყალე მა[რუ]-
შიანი გამ	შიანი (?) გამ-
რეკ-ლი ა ნ	რეკელი, ამინ.
მისა მმსა	მისა მამასა



შნსლ-ნ შეუნდენეს ღმერთმან.

ხატი მე-15 საუკ. უნდა იყოს.

11. ხატი მთავარ ანგელოზის მიქაელისა, ოქროსი, ნაჭედი, 29,5X23 სანტ. მთავარ ანგელოზი სრულის ტანით არის წარმოდგენილი, შუბით და ბურთით; ფრთები გრძელი აქვს, დასერილი. აშიები შედგენილია სხვა და სხვა დროის და ხელობის ნაჭრებისაგან. ზემოდ ლამაზი ბროწეულის ყვავილებისაგან შემკობილი; ქვემოდ რომბ-ლურსმული; მარცხნივ წვრილი ბროწეულის ყვავილებისა. აქ შუაში სრულის ტანით წარმოდგენილია: წ-ღ კვლე, მაგრამ თავი ეხლა აღარ აქვს. მარჯვნივ სხვა ნაჭრებია. უნდა იყოს არა უგვიანეს მე-14 საუკუნ. ზემოდ წარწერაა:

წ-ღ მ-ქლ : მთავარანგელოზი. (№16865).

ორივე მხრით მთავარ ანგელოზისა წარწერაა:

ქ. წო : მქლ	წმიდაო მიქელ
მთვრ	მთავარ-
ანგე	ანგელ-
ლოზო	ლოზო,
შე : ი	შეიწყალე
ვნე	ივანე
ლორი	ლორი-
ანი .:	ანი.
წო მთვ	წმიდაო მთა-
არ : ანგე	ვარანგე-
ლოზო	ლოზო,
მწე და ფარვე	მწე და ფარ-
ლ ექმენ	ველ ექმენ
ივანე	ივანეს
ს : ლორიან	ლორიან-
სა : ივანეს	სა, ივანეს
დოღვანა :	დოღვ(ა) ნსა.
იჭედა	იჭედა
საჯელო	საჯელო
ბასა შენსა	ბასა შენსა

12. ხატი მთავარ ანგელოზისა, ვერცხლისა, ნაჭედი, 8X15 სანტ. სვანური ტლანქი ხელობისა, მე-18 საუკ. დასასრულისა თუ მე-19 დასაწყისისა (№ არ მახსოვს). მთავარ ანგელოზი ფრთოსანი სახარებით ხელში, სრულის ტანით არის წარმოდგენილი. ეზო და აშიები ხლართულებით არის შემკობილი. ზემოდ მხედრულის წარწერაა:

1. მთავარ .: ანგელოზო .: იხსენ ფაცი
2. გელოანი .: სულა .: და გიორგი .: მა
3. თა .: ცოდვისაგან .: სამთავე .: ძმანთა(sic) .: შე-

4. უნდოს :. ღმერთმან ამინ :. კირილისნ.

13. **ბოყერი**, რომელიც შესდგება გრძელი ხეტარისაგან და მასზე დასმული ვერცხლის ბურთისაგან; ბურთზე დამყარებულია პატარა ხატი ღვთის მშობლისა ჩჩვილადი, წარწერით: დ-დ ღ-თ. ღვთის მშობელი ტახტზე ზის; აშია შემკობილია; მეორე გვერდზე წარმოდგენილია ჯვარცმა. ბურთზე არის წარწერა ხუცური, რომელიც წინა ხატთან არის გადაღებული:

მოჰშელსა გურეის :. გუმმრ/ ჯე: დ : აცხ-ვნე,

ესე იგი: მოჰაშელსა გურეის გაუმარჯვე და აცხოვნე.

მოაში ის ადგილია, სასაშის მახლობლად, სადაც მინერალური წყლებია.

14. **ხატი ღვთის მშობლისა**, ჩჩვილადი, ვერცხლისა, ნაჭედი, ღვთის მშობელი წელს ზევითია ძითურთ; სრულიად ტლანქი ხელობისა. ზემოდ აშიაზე არის ჯვარცმა მთავარ ანგელოზებით კუთხეებში. აშია მარცხნივ შემკობილია ერთმანეთში გადაბმულის ნახევარ რგოლებით. ქვემოდ ერთობ ვულგარული ხუცური წარწერაა (№ 16867). მე-18 საუკუნის დასასრულისა, ან მე-19 საუკუნის დასაწყისისა უნდა იყოს.

15. **ხატი მაცხოვრისა და ღვთის მშობლისა**, ვერცხლისა, 25X21,5 სანტ. შესდგება ორი რომბ-ლურსმულის მოხატულობის ფირფიტებისაგან; ერთზე მაცხოვარია წარმოდგენილი, ერთობ ტლანქი ხელობისა; მეორეზე უფრო ლამაზი ნახელავი ღვთის მშობელი წელს ზევითი (№16867).

16. **ხატი მაცხოვრისა**, ვერცხლისა ნაჭედი, ტლანქი სვანური ხელობისა მე-18-19 საუკ. მაცხოვარი ტახტზე ზის, მარჯვენა ხელით აკურთხებს, მარცხენაში სახარება უჭირავს. წარწერა სახელისა ხუცურია: ი-ჯ ქე. აშია რომბ-ლურსმული ფართო (№17618).

17. პატარა **ღვთის მშობლის ხატი**, ჩჩვილადი, ვერცხლისა, მოოქრული; ნიმბები და აშია დაცულია, სხვა გაფუჭებულია.

18. ასეთივე პატარა **ხატი წმ. გიორგისა**, ვერცხლისა, წარწერით: წ-დ გ-ი. 9,5X7,5 სანტ. დაზიანებულია.

19. ასეთივე მეორე პატარ **ხატი წმ. გიორგისა**, ვერცხლისა, 7,5X6 სანტ. წარწერით: წ-დ გ-ი. დაზიანებულია.

სამივე ხატი გადაღებულია ერთ ფირფიტაზე №16868. ამავე ფირფიტაზე მოთავსებულია ათი ნაჭერი სხვა და სხვა ხატებისა. სხვა და სხვა დროის და ხელოვნების ნაშთებისა, მათ შორის განირჩევა ზემოდ და ქვემოდ ხატების აშიების შემკობილობანი კლასიკური პერიოდისა; ხატის ნიმბი მშვენიერი ნახელავი იმავე დროისა და იქვე ლამაზი წარწერა: გ-ბლ. რომბ-ლურსმულ აშიებზე მარჯვნივ და მარცხნივ წარმოდგენილნი არიან წმ. გიორგი და წმ. დიმიტრი სრულის ტანით.

20. პატარა ხატი მაცხოვრისა, ვერცხლისა, ნაჭედი, 14X11 სანტ. მაცხოვარი სრულის ტანით არის წარმოდგენილი, მაგრამ ერთობ ტლანქი ნახელავია. წარწერა მხედრული ვულგარულია და განირჩევა მხოლოდ: მაცხოვარო მოიხსენე...

21. ორი პატარა გულსაკიდი ხატი ღვთის მშობლისა, ჩვილედი.

22. ზემო ნაწილი აწ დაკარგული ხატისა ლამაზი ხელობისაა. ამაზედ დარჩენილია ნაწილი სახელის წარწერისა: ლშევეშისა (?). ეს სამი ნივთი მოთავსებულია ფოტოგრაფიაზე №16869. აქვე არის კიდევ გადმოღებული ფრაგმენტი ძველი ხატის ამისა, ლამაზად შემკობილი ბროწეულის ყვავილების მსგავსი ორნამენტით კლასიკური დროისა. კიდევ შემკულობა ერთი სპილენძის ჭურჭელის გარეგანი ბოლოსი, აგრეთვე თოფის წამლის შესანახი (საწამლე) ხის მრგვალი ჭურჭელი, ორი მანგალის მსგავსი ნივთი სპილენძის სახელურით. საპირისწამლე მოხარატებული, ხოლო სახელურები სპარსულ-ქართული მინანქრით არის შემკობილი.

23. ლაგამი ცხენისა, რკინისა, ვერცხლით შემკობილი, ზოგიერთის გადმოცემით, ეს თამარ მეფის ცხენის ლაგამია (№16871).

24. ლახტი რკინისა, რომელიც თავდება თორმეტის წვეტით და ტარიც შემკობილი აქვს (№16871).

25. ერთი კარი კარედი ხატისა, ვერცხლით შეძერწილი, გაყოფილია ჩუქურთმიანი გრებილით ორ ნაწილად; ქვემო ნაწილში ქრისტეა წარმოდგენილი სრულის ტანით; ზემო ნაწილში მოსჩანს ფრთოსანი ანგელოზი. ხელობა ტლანქია (№16870).

26. სამირონე ვერცხლისა, რომელზედაც გამოხატულია ღვთის მშობელი.

27. ნარჩენი კარედი ხატისა, რომლის ზომა ყოფილა 123X73 სანტ. ზემოდ დარჩენილია ვერცხლის შემკობილობის ფრაგმენტები და აგრეთვე კარებზედაც. ამათზე გამოსახული ყოფილა მთავარ ანგელოზები.

28. ლახტი სპილენძისა, ექვსი ფრთით.

29. ჩუკულის ეკლესიაში წინად დაცული ყოფილა ქოლგის პირი აბრეშუმის მატერიისა, გამშვენებული სხვა და სხვა სახეებით, მათ შორის ოთხი მზის სახეა, ამას თამარის ქოლგას უწოდებენ თურმე. ეხლა ეს ქოლგა ჩუკულის ეკლესიაში აღარ მოიპოვება, მაგრამ მისი სურათი წინეთ გადაუღია ერმაკოვს (№184).

ძველი ეკლესია ჩუკულისა.

პატარა ფიშხორის პირად ყოფილა გაშენებული ძველი ეკლესია, რომელიც დღესაც მთელად არის შენახული, მაგრამ ხალხი იძულებული ყოფილა დაეტოვებინა იგი, ვინაიდან მოშორებით არის სოფელზე და ამას გარდა, რაც თავი მიზეზია, წყალს მოუნგრევია კიდეები და მიახლოვებულა ეკლესიის კედლებთან, ასე რომ ამ ძველ ეკლესიას დიდი საშიშროება მოელის. ხალხი აქ დღესაც დადის სალოცავად და დიდის ამბვით იხდიან მთავარ ანგელოზთა დღესასწაულს. განსაკუთრებით აქ დადიან მონადირენი და მოაქვთ თავის ნანადირევის რქები. ეკლესია უფრო დიდია, ვიდრე ეხლანდელი ჩუკულის ეკლესია, რომელშიაც ძლივს ეტევა ხატები. ეკლესია ქვისაა. ყავრით დახურული და ვინაიდან ის ჯურღმულის პირზეა აშენებული, ამიტომ მისი საფუძველი ერთ საჟენ ნახევრით არის ამადლებული. შესავალი ერთი აქვს სამხრეთით. აღმოსავლეთის ფანჯარა მოგრძოა და შემკობილი ჯვარის სახედ გამოწეული ქვებით და ქვის ჩარჩოც აქვს პილიასტრებზე დამყარებული. თითო ფანჯარა მოიპოვება კიდევ დასავლეთით და სამხრეთით. კანკელი ძველია, ქვისა, ერთის აღსავლის კარით. ის შესდგება ორი ნაწილისაგან. ქვემო ნაწილი ორი არშინის სიმაღლისა წარმოადგენს უბრალო ქვის კედელს, რომელზედაც დამყარებულია ლამაზი ქვის გათლილი სვეტები კამარებითურთ. ტრაპეზი კედელზეა მიშენებული. კედლები ფრესკებით ყოფილა დაფარული, მაგრამ ეხლა სულ მოშლილია და აქა-იქ ეტყობა მხოლოდ. ეკლესიაში მოიპოვება აუარებელი მოძარცული ხატების და ჯვრების ფიცრები, მათ შორის სამი დიდი, საჟენ-ნახევრიანი ხის ჯვარი. არც ერთ მათგანზე ვერცხლის ფირფიტები არ შენახულა. ბევრია აგრეთვე ირმის და შველის რქები. როგორც ეტყობა, ეს ეკლესია უკვე მე-18 საუკ. დაუტოვებიათ და მათი ნივთები გადაუტანიათ და მით გაუმიდრებიათ ეხლანდელი პატარა ჩუკულის ეკლესია. ის მოჩუქურთმებული კარიც, რომელსაც დღეს იქ ვპოულობთ, აქედან არის წადებული.

### სოფელი ჩიხარეში.

სოფელი ჩიხარეშის ეკლესია ღვთის მშობლის მიძინებისა ერთობ სულ ახალია, ქვისა, გუმბათიანი, მასში დაცულია ორი ძველი ხატი:

1. **ხატი ღვთის მშობლისა** კარედი, ვერცხლისა, ნაჭედი; შუა ნაწილი ზომით 45X41 სანტ. კარები, თითო 50X20 სანტ. №16879, აგრეთვე უვაროვისა, ტაბ. XXXV, სურ. 60). შუა ნაწილში წარმოდგენილია ღვთის მშობელი ჩჩვილელი, მაღალ ტახტზე მჯდომარე, წარწერით ზემოდ, კამარას ქვეშ:

დ-დ ო-ისა : ი-წ- ქე : ს-ი.

ღვთის მშობლის ფეხის ქვემოდ წარწერა:

ქრისტე შეიწყალე გაბრიელ.

ორივე მხარეს ღვთის მშობლისა სრულის ტანით წარმოდგენილნი არიან პეტრე და პავლე, წარწერებით: პ-ტრე, პავლე. მარჯვნივ პეტრეა, მარცხით – პავლე. ამათ თავზე ღვთის მშობლისკენ მიქცეულნი ფრინავი მთავარ ანგელოზნი. ამათი წარწერა მოქცეულია ზემოდ, პატარა კამარებში: წ-დ მ-ქლ, წ-დი გ-ბლ. ამიაზე ქვემოდ ამ ხატის შუა ნაწილისა სწერია:

წო : ღ-თის მშობლო : შ-ე : ესე : ჰევად : და : ჰევსა :

აზნაური.

კარებზე, კამარების ქვეშ, წარმოდგენილი არიან სრულის ტანით, საომარი ტანისამოსით, შუბით და ფარით და მახვილით წელზე: წი გ-ი (მარცხნივ) და წი თ-ე (მარჯვნივ).

წ. გიორგის ზემოდ აშიაზე წარმოდგენილ არიან წელსზევითი ფიგურები ვედრებისა და მთავარ ანგელოზებისა. ასეთი კომპოზიცია წ-ა თეოდორესი ზემოდ არ შენახულა. ყველა ფიგურები ამ ხატისა მოქცეულნი არიან ორ სვეტზე დამყარებულ კამარებს ქვეშ და სვეტებს აქვთ თავისი ბაზები და სვეტის თავები მოჩუქურთმებულნი. ხელობა ამ ხატისა და ხასიათი ასომთავრული წარწერებისა მოგვაგონებენ ჩუკულის ღვთის მშობლის კარედის ხატს, ჩვენ მიერ ზემოდ აღწერილს მე-7 ნომერს ქვეშ. და ერთის და იმავე ოქრომჭედლის ნახელავი უნდა იყოს.

**2. ხატი მაცხოვრისა, ნაჭედი, 36,5X27 სანტ. (ფოტოგრ. №16880) მაცხოვარი ტახტზე მჯდომარეა სახარებით და მაკურთხევლის მარჯვენით. სახე ერთობ დაღვრემილი აქვს, თითქო სტირისო. წარწერა: აფ ქე. პირველ სიტყვაში, საკვირველია ც-ს ხმარება მიღებულ ჯ ანუ ო-ს მაგიერ. აშია ორი აქვს; ერთი უფრო ფართო დაცულია მხოლოდ მარჯვნივ ორის მედალიონით, ვგონებ, მთავარ ანგელოზებით; მეორე, ვიწრო ტალღისებური. მოგვაგონებს ლევან დადიანის ხატებს მე-17 საუკუნისა. ხელობა ხატისა ტლანქია და უნდა ეკუთვნოდეს მე-17-18 საუკ. ამ ფოტოგრაფიაზე ზემოდ მარცხენა კუთხეში მოთავსებული პატარა ხატი განცალკევებული ხატია იმავე ეკლესიისა.**

### **სოფელი მახაში.**

სოფელი მახაში პატარაა და გაშენებულია მთაზე, ცხენისწყლის მარჯვენა ნაპირზე, პირისპირ ჭითხარის მწვერვალისა, რომელიც ეკუთვნის შკეთის მთებს და რომელზედაც 30 ივლისს ჯერ კიდევ თოვლი იდვა (№17423) მწვერვალზე ტბა ყოფილა ხუთი საჟენი სიგრძით. სოფელი ლამაზია. მისი პეიზაჟი იხ. №№1725 და 17424.

ძველი მიქელ მთავარ ანგელოზის ეკლესია სოფლისა პატარაა, ქვისა. ეხლა განუახლებიათ შიგნით და გარედაც. კანკელი ახალი აქვს ლამაზად მოხატული. ეკლესიაში ჩვენ ვნახეთ:

**1. ხატი მთავარ ანგელოზისა მიქელისა, ვერცხლისა, ნაჭედი, 65X53 სანტ. წარწერით: წ-დ მ-ქლ (№17626). წარმოდგენილია მთელის ტანით, ხმლით და გრაგნილით. აშია რომბ-ლურსმულია სამი მედალიონით, რომელზედაც გამოხატულნი არიან: წ-დ ბ-სლ, წ-დ დოვანე, ი-ჯ ქ-ე. ხატი მე-16 საუკ. უნდა იყოს.**

**2. ხატი ღვთის მშობლისა ჩჩვილეთი, ვერცხლისა, ნაჭედი, 45X36 სანტ. ფიგურა წელს ზევითია წარწერით: დედაი ღმრთისა, ი-ჯ ქ-ე. აშიები რომბ-ლურსმულია ხუთის მედალიონით წმიდანებისა. ქვემო აშია უფრო ძველია. ხატი მე-16 საუკ. უნდა იყოს (№16884).**

3. **ჯვარი ხისა**, შუა ტანისა, შეპერწილი ვერცხლის ფირფიტებით, ტლანქი გამონატულობით ჯვარცმულისა, 27X17 სანტ.

### სოფელი დაბიში.

სოფელ დაბიშში სულ პატარა ძველი ქვის ეკლესია არის, მიწერილი ჩიხარეშის ეკლესიაზე. გარეგნიდან ეკლესია არ განირჩევა უბრალო სახლიდან. შიგნით მისი სიგრძე არის ხუთი არშინი, განი სამი არშინი, სიმაღლე 5 არშინი. საკურთხევლის განი არის 1 არშინი და 5 ვერშოკი, კანკელი ორის კამარით და ერთი აღსავლის კარით შუაში; ტრაპეზი კედელზეა მიდგმული.

ეკლესია სულ მოხატულია; მაგრამ უმთავრესად აქ ფრესკებია ადგილობრივ პირთა ნაციონალურ ტანისამოსებში. მათი წარწერა, არა სწორი ქართულით, მხედრულია. ამათ შორის ჩრდილოეთის კედელზე წარმოდგენილნი არიან ქართულ-კახური ტანისამოსით და მაღალის ქუდებით თავზე:

„კველ ჯალიბიანი“. შემდეგ ქალია, ალბათ მისი ცოლი, ქართულის გულის-პირიანი კაბით, კავებით და სარტყელით, კაბაზე ლურჯი ქათიბი აქვს გადაცმული, თავზე რაღაც გვირგვინის მსგავსი ქუდი ახურავს და უწერია სახელი:

ლ(ა) შიშვილის ქალი თუტრუა.

ამათ ქვემოდ უფრო ახალგაზრდა ქალია ასეთივე ტანისამოსით, როგორც თუტრუა, ხოლო მისი მოსასხამი ჭრელის მატერიის არის და უწერია: „მარეხ“.

„მარეხ“ უნდა იყოს წინა ცოლ-ქმრის ასული.

დასავლეთის კედელზე წარმოდგენილნი არიან ქართულ-კახური ტანისამოსებით:

ნანბა ლადლიბიანი (მარცხნივ კარისა) და მერაბ ღიბიანი (მარჯვნივ კარისა).

სამხრეთის კედელზე დახატულნი არიან:

„ღიბიანი ტაიბუხ და იაშვილის ქალი კუთია და მათი ძე ბაწია“.

ბავშვსაც ქართულ-კახური ტანისამოსი აცვია.

საკურთხევლის კონქში მოსჩანან ღვთის მშობელი ჩჩვილედ და მათ ორივე მხარეს მთავარ ანგელოზნი, ქვემოდ „ქერუბინები“ და „სერაფინები“; ტრაპეზის ზემოთ კედელზე ჯვარცმაა წარწერით: „მეძინუბის ჯათი“; აქეთ-იქით: იოანე ოქროპირი და ბასილი დიდი, წარწერით: „იოვანე, ბასილი“; აქვე ერთი ფიგურა სამღვდელო ტანისამოსით და სახარებით; წარწერა აქვს: „სდუბანუ“. ვგონებ, არხიდაკონი სტეფანე იგულისხმება.

ჩრდილოეთის კედელზე არის ამაღლება და წა გიორგი. სამხრეთის კედელზე ყოვლად წმიდის მიძინება, წარწერით: „ლოლა წმიდის მიძოლობა“. შემდეგ ჯვარცმა წარწერით: „იო ჯრისმა“; შემდეგ სვიმონი წარწერით: „სუმონ“. დასავლეთის კედელზე: ნათლის ღება და აღდგომა ქრისტესი. თაღებზე საკურთხევლისა: პეტრე და პავლე წარწერებით: პეტრე, პავლე, წმიდა ნინო და კიდევ წა ეკატერინე და წა ბარბარე. ქვემოდ მარჯვნივ, იოანეს თავის კვეთა წარწერით: „ივანუს თავის ქოთა“; მარცხნივ მსხვერპლი აბრაამისა წარწერით: „სამხდო აბრაამის“. კარების მახლობლად მესვეტენია. ფრესკები ტლანქი ხელობის არის მე-17-18 საუკუნისა. თვით ეკლესიაში დიდი ჭურია ჩამარხული იატაკში; დასახურავი ხისა აქვს. ნივთებით ეკლესია ღარიბია. მასში ჩვენ ვნახეთ:

1. ხატი პატარა მთავარ ანგელოზის გაბრიელისა, ვერცხლისა, ნაჭედი, 8X6,5 სანტ. მთავარ ანგელოზი წარმოდგენილია სრულის ტანით, ლაბარუმით და ბურთით (იხ. №16882, ქვემოდ, მარცხნივ). ხელობა გვარიანია.

2. ორი ხის ჯვარი, შუათანა ზომისა, შემერწილი ვერცხლის ფირფიტებით, ტლანქი ხელობისა.

3. რკინის უბრალო ჯვარი.

### სოფელი ახაშენი.

ეს სოფელი დაბიშის ზემოდ მდებარეობს. ხოლო ახაშენის ზემოდ, მთის დაქანებულ კალთაზე, არის ადგილი, რომელსაც ჰქვია მაშენა (ესე იგი უფალი) და აქ არის ხის ეკლესია, მაგრამ ეხლა იქ წირვა აღარ არის. მასში ინახება:

1. ფრიად თავისებური სქელი სპილენძის ხატი მთავარ ანგელოზის გაბრიელისა, ანუ უკეთ რომ ვსთქვათ, ორი ხატი იმავე მთავარ ანგელოზისა, ერთი ზემოთი მფრინავის სახით წარმოდგენილი და მეორე ქვემოდ, ფეხზე მდგომარე, შუბით მარჯვენა ხელში და გრაგნილით მარცხენაში. წარწერა ორთავეს ასომთავრულით: წი გბრ-ლ. ორთავე მთავარ ანგელოზი ერთ სქელ წითელი სპილენძის ფიცარზეა წარმოდგენილი ძლიერის რელიეფით. მაგრამ თითოეული მათგანი გარედან შემკობილ ოთხკუთხედშია. ოთხკუთხედების სვეტები მარჯვნივ და მარცხნივ ორმაგია თავისი ბაზებით და სვეტის თავებით (№16881); ხატი ჩამოსხმული უნდა იყოს. ასეთი ხატი ჩვენ პირველად გვხვდება არა თუ სვანეთში, არამედ საქართველოს სხვა კუთხეებშიც. ფიგურები მოკლეა და მოტლანქო.

2. ხატი წმიდა გიორგისა, ვერცხლისა, ნაჭედი, 40X32 სანტ. ძლიერ დაზიანებული და გაფუჭებული, წარწერით: წ-მ გ-მ. წმიდანი წარმოდგენილია მთელის ტანით, ფარით და შუბით. აშიები მოცილებული აქვს. ხელობა ერთობ ტლანქია. იხ. №16882, შუაში უმთავრესი ნაწილი.

3. პატარა ხატი წმიდა გიორგისა, დაცულია მხოლოდ ვერცხლის პერანგი; წმიდანი წარმოდგენილია მთელის ტანით, ფარით და შუბით. ხელობა ტლანქია, იხ. №16882, მარჯვენა მხარე, ქვემოდ.

4. ხატი უცნობი წმიდანისა, სრულის ტანით, ხეზე ამოჭრილი ღრმად, ოთხკუთხედში, ლამაზი ხელობისა, უწარწეროდ. იხ. №16882, მარცხენა მხარე. ეს უნდა იყოს სარჩული ვერცხლის ხატისა, შემოსილობა მოძარცვული.

5. დიდი ვერცხლის ჯამი საკმეველისათვის, სასაკმეველე.

6. ბევრი სხვა ვერცხლის თასები და კათხები ხისა არაყისათვის.

სოფელ ახაშენის მცხოვრების ტიპი, ჯაბა ნემსაძე, იხ. ფოტ. №17518.

### სოფელი მელე.

ამ სოფლის ეკლესია წმიდის გიორგისა ახალია, ხისა, ახალი ხის კანკელით. მასში ჩვენ ვნახეთ:

თავი ხატი წი გიორგისა, ვერცხლისა, ნაჭედი, 35X25 სანტ. წმიდანი წარმოდგენილია ცხენით, შუბით გმირავს გვირგვინოსანს, რომელსაც გრძელი ამოღებული ხმალი უჭირავს ხელში. აშიები შესდგება ერთმანეთში გადახლართული ნახევარი წრეებისაგან, წერტილებისაგან შემდგარი ხაზებით შუაში. ხელობა ტლანქია (№ 16883). წარწერა სახელისა: წი გ. ი. ზემოდ უშნო ხუცურით:

ქ<sup>1</sup> :: ამისა :: ოქრო :: მჭე / დელსა :: იოსეს :: შნდს :: ღწ.

ქვემოდ მეორე წარწერა:

1. ქ. მოჭედინე :: ხტი :: ესე წისა :: გის :: მლს :: მე ::

დევდანის :: ქლმნ ::

2. ყზმის :: სხსრდ :: სლსა :: ჩმთს :: და ქრმისა :: სხად.

ესე იგი: მოვაჭედინე ხატი ესე წისა გიორგის მელეს მე დევდარიანის ქალმან ყაზმის სახსრად სულისა ჩემისათვის და ქმრისა საოხად. ხატი მე-18 საუკუნის უნდა იყოს.

2. პატარა ხატი ღვთის მშობლისა ჩჩვილედი, 5,5X5,5 სანტ. ბერძნულის წარწერით სახელისა. ფიგურა ძლიერის რელიეფით არის წარმოდგენილი (იქვე, №16883, ზემოდ, მარცხენა კუთხეთში).

3. ხატი ღვთის მშობლისა, ვერცხლისა, ნაჭედი, 12,5X11 სანტ. ღვთის მშობელი წარმოდგენილია მთელის ტანით ორ სვეტზე დამყარებულის კამარის ქვეშ, ჯვარით ხელში. აშია მოჩუქურთმებულია (№16888), მე-17-18 საუკუნის უნდა იყოს.

4. პატარა ხატი წმ. ბართლომე და მიტროფანესი, განცალკევებულ ვერცხლის ფირფიტაზე, სრულის ტანით და უბრალო შემკობილობით (იგივე ფოტო №16888).

5. პატარა, დარღვეული ხატი ღვთის მშობლისა, ვერცხლისა.

### სოფელი ნაცული.

სოფელ ნაცულის ეკლესია მთავარ ანგელოზისა პატარა, ქვისა, განახლებულია და ქვის ძველი კანკელი ახალის ქვის კანკელით შეცვლილი. ეკლესიაში მოიპოვება:

1. ხატი მთავარ ანგელოზ მიქაელისა, ვერცხლისა, მოოქროული, ნაჭედი, 55X42 სანტ.

---



1 დედანში წილ-ქანია.

მთავარ ანგელოზი წარმოდგენილია სრულის ტანით, ბიზანტიური სამეფო ტანისამოსით. ლაბარუმით და ბურთით. წარწერა: მთვრგზძი (sic) მ-ქლ (№16887). ეზო ზეომოდ ვაზოვანი ორნამენტით არის მოკაზმული; ქვემოდ რობმ-ლურსმული შემკობილობით; თვით ხატი მე-16საუკ. უნდა ეკუთვნოდეს. აშიები სხვა და სხვა დროის ფრაგმენტებისაგან შესდგება წმიდათა მედალიონებით. ზემოდ და მარცხნივ შვიდი მედალიონია ტლანქი ხელობისა. შუაში ვედრებაა; მარცხნივ და მარჯვნივ – ღვთის მშობელია მთელის ტანით. მარცხენაზე აწერია: დი ღთ. ქვემოდ, მარჯვნივ კიდევ ოთხი მედალიონია; მათ შორის ორი ღვთის მშობლისა და ერთიც მთავარ ანგელოზისა. ორივე მხრით მთავარი ხატისა წარწერაა ვერტიკალურად,

მარცხნივ:	მარჯვნივ:
ქ . მთ	.. ა ამესღ
ვრ	განმ
ნ აგ	ეტი : ნ
ლძი :	ჯვრ
შევე	ირრს
დრა	სჯვ
ნღ : ივნ	ი : ღთი
ესუ	საღ :
ლთა : ამ .	

პირველი წარწერა უნდა იკითხებოდეს: მთავარანგელოზი (sic). შეიწყალე ვედრანდ ივანე სულითა, ამინ.

მარცხენა წარწერას, როგორც ეტყობა, თავი აკლია და გაუგებარია; შეიძლება ასე იკითხებოდეს: ..(დ)ა ამესაღგან (=ამისაგან) მეტი. ნაჯევარი რარასის (ანუ რარესის) ჯევი ღვთისა.

2. **ხატი ღვთის მშობლისა** ჩჩვილედი, ვერცხლისა, ნაჭედი, 23X16 სანტ. ღვთის მშობელი წელ ზევით არის წარმოდგენილი რელიეფით. წარწერები: დი ღს, ივ ქწ. ეზო სადაა; აშიები ტალღისებურ შტოებით შემკობილი, ჩვეულებრივი მე-17 საუკუნისათვის; ხატი ამ მე-17 საუკ. ეკუთვნის (№16885).

3. **ხატი მთავარ ანგელოზისა**, ვერცხლისა, ნაჭედი, 21X18 სანტ. შუაში წარმოდგენილია, როგორც მედალიონში, მთავარ ანგელოზი წელზევითი საზომავით ხელში. ხატის ოთხივე კუთხეში მაცხოვარია ტახტზე მჯდომარე; ხელობა ტლანქია (იქვე, №16883). წარწერები ზემოდ, მარჯვნივ და ქვემოდ მთავარ ანგელოზისა ერთობ ვულგარული ხუცურ-მხედრული ასოებით. ზემოდ:  
წო სამეზაო / შე ესტატე.

4. **პატარა ხატი ღვთის მშობლისა** ჩჩვილედი, ვერცხლისა, ტლანქი ხელობისა (№ 16885, მარცხენა კუთხეში ღვთის მშობლის ხატისა.).

5. ხატი ღვთის მშობლისა ჩჩვილელი, ვერცხლისა, ნაჭედი, 26X22 სანტ. რომბ-ლურსმული ამით, სანახევროდ მოშლილია, ფრიად ტლანქი ხელობისა (№16886).

6. ხატი ორი წმიდა გიორგისა, ვერცხლისა, ნაჭედი. ზემოდ და ქვემოდ ექვსი მედალიონი წმიდანებისა. ორთავე წმიდა გიორგი წარმოდგენილნი არიან პირის-პირ ცხენებით, გვირგვინოსან კაცს გმირავენ შუბებით. ტლანქი ხელობისა (იქვე №16886). ქვემოდ გაფუჭებული ხუცური ასოებით მოსჩანს:  
ო(უფალო) სამებაო / შეგვიწყალე.

### სოფელი ხერია.

სოფელი ხერია გაშენებულია მდინარე ტვიბერის წყლის პირად. ამ სოფლის სახე იხილეთ ფოტოგრაფია №17426, ხოლო სოფლის წისქვილის ხის შენობა №17427. პატარა ეკლესია ამ სოფლისა წმიდა გიორგისა ქვისაა, ერთი კარით სამხრეთით. ის განუახლებიათ ამ ხანად და ძველი ქვის კანკელი შეუცვლიათ ხის კანკელით, რომელიც ჯერ მოხატული არ არის. ამ ეკლესიაში ინახება:

1. თავი ხატი წმ. გიორგისა, ოქროსი, ნაჭედი, 40X31 სანტ. მთავარ მოწამე ცხენით არის წარმოდგენილი, გვირგვინოსანს გმირავს, შუბი მისი თავდება ჯვართ, მოსასხამი ზურგს უკან ფრიალებს ჰაერში, წელზე ჰკიდია დიდი ხმალი. წარწერა სახელისა: წი გი. ნიმბი და ქვემო ნაწილი ხატისა დაზარალებულია. ეზო ლამაზი ვაზოვანი ორნამენტით არის შემკობილი. აშიები ზემოდ და ქვემოდ მერმინდელია, ტლანქი ჯვრებით და წერტილების სახეებით. ხოლო მარცხნივ და მარჯვნივ აშიები კლასიკური დროის არის, ბროწეულის ყვავილების მსგავსი ორნამენტით შემკობილი. თვით ხატი, ჩვენის აზრით, არის არა უგვიანეს მე-13-14 საუკ. (№16889). ზემოდ ხატს მიბმული აქვს ძეწკვი.

2. ხატი მაცხოვრისა, ვერცხლისა, ნაჭედი, 38,5X25 სანტ. მაცხოვარი ზის მაღალ ტახტზე, სახარებით ხელში. ნიმბი დიდია ჯვარის სახედ. წარწერა ასომთავრული ჯვარის მსგავს მედალიონებში: იო Xე (sic). საკვირველი ის არის, რომ ქრისტეს სახელში პირველი ასო ბერძნულია და მეორე ქართული. ხატი ტლანქი ხელობის არის მე-18-19 საუკუნისა. (№16890).

3. წამლით ხეზე დახატული ხატი წმ. გიორგისა, 29X19 ვერშოკი, წარწერით: წმიდა გიორგი. ლამაზია.

4. ასეთივე ხელობის ხატი მაცხოვრისა, 20X15 ვერშოკი.

5. ასეთივე ხელობის ხატი მთავარ ანგელოზთა, 24X19 ვერშოკი.

სამი უკანასკნელი ხატი კანკელშია და ეკუთვნის მე-19 საუკ. დასაწყისს.

## სოფელი შგედი.

სოფელი შგედი ახალის ქვის ეკლესია არის, ხის გუმბათით და ახალი ხის კანკელით; ეკლესიას ახალი სამრევლოც აქვს (ამათი სახე იხ. №17428). ეკლესიაში ბლომად არის ძველი ნივთები:

1. **ხატი მაცხოვრისა**, ვერცხლისა, ნაჭედი, 46X31 სანტ. ტლანქი ხელობისა, მე-17-18 საუკუნის. მაცხოვარი ტახტზე მჯდომარეა, სახარებით და მაკურთხეველის მარჯვენით. სახარება ორი ჯვარით არის შემკობილი. ნიშნი ჯვარის სახით არის. წარწერა სახელისა ივ ქე. აშიები შემკობილია ერთმანეთში ჩახლართული რგოლებით და წერტილებით. მარცხენა და მარჯვენა აშიებზე მთავარ ანგელოზებია ისეთივე ტლანქი, როგორც მაცხოვარი (№16892). ქვემოდ ვულგარული ხუცურით სწერია:

მაცხოვარო : მეხ და მფარველ :. ექმენ :.

ნასყიდასა :. ჯაფარიძესა :. და თანა :. მეცხედრესა

მისსა :. ყიფიანის :. ქალსა :. სათუთსა :. დღსა :. მს:.

განკითხვსსა :.

ზემოდ ერთ-სტრიქონიანი წარწერა:

ჯაფარიძეს :. ნასყიდას :. ცოლსა :. მისსა ს-თთ-ს შ-ნდ-ს დ-ნ.

2. **ხატი მაცხოვრისა** (№17891). ეს ხატი სრული განმეორებაა ხერიის მაცხოვრის ხატისა, ზემოდ მე-2 ნომრით აღწერილისა (გვ. 118).

3. **ხატი წა თეოდორესი**, ვერცხლისა, ოქროთი დაფერილი, ნაჭედი, 40X27,5 სანტ. წმიდანი წარმოდგენილია რომაულ საომარ ტანისამოსით, სრულის ტანით, შუბით მარჯვენა ხელში, მარცხენა ხელი ფარზე უდევს. სახე მისი ხანშესრულია; ნიშნის გარშემო წარწერა: წი თე. ეზო ბალახ-ბულახის ორნამენტით არის შემკობილი. აშიები რომბ-ლურსმულია, ხუთი მედალიონით წმიდათა; ამათ შორის ზემოდ მაცხოვარია და ორი მთავარ ანგელოზი, თითო მარჯვენა და მარცხენა აშიაზე, უწარწეროდ სახელებისა. ეს ხატი ისეთივე ტლანქი ხელობის და დროს არის, როგორც №16892, იმავე პირის შეკვეთილი, ქვემოდ ვულგარული ხუცურით სწერია: (№16893):

წო :. თე :. მეოხ :. და მფრვე

ლ :. ექმენ :. ჯაფარიძეს :. ნასყიდ

ას :. ცოლსა :. მისსა :. სათუთსა :. დღ

სა :. მს :. გ-კითხვსისსა :

შნდოს :. ღ-ნ :.

4. **ჯვარი** ოქროსი, 33X29 სანტ. ზემო ნაწილი და მარჯვენა ფრთა მოშლილია. შუაში ჯვარცმულია ორიგინალური კომპოზიციისა. ქრისტეს თავი დაუდვია მარჯვენა მხარზე, მარცხენა ხელი მიკრული არ არის ჯვარზე, როგორც მარჯვენა, არამედ მოხრილია და თითქოს ყელზედ აქვს მიკრული. მარცხენა ფრთის ბოლოში,

მრგვალ მედალიონში, ღვთის მშობელია; მარჯვენაში ალბათ იყო ასეთივე გამოსახულება იოანესი, მაგრამ არ შენახულა, ეხლა დაკერებული აქვს ვერცხლის ფირფიტა ორი მთავარ ანგელოზის გამოხატულებით. ქრისტეს ფეხს ქვეშ ადამის თავი მოსჩანს (№16894). ხეტარი არ შენახულა. ჯვარი მე-16-17 საუკ. უნდა იყოს.

5. **ჯვარი**, 40X20 სანტ. ვერცხლით შემოსილი, ყოველ ფრთაზე წარმოდგენილია სრულის ტანით მაცხოვარი ერთნაირი გამოსახულებისა, მაკურთხეველის მარჯვენით და სახარებით მარცხენა ხელში. შუაში უმბო მოშლილია. ხელობა დაბალია, მე -18 საუკ. (№16897).

6. **ხატი მაცხოვრისა**, ვერცხლისა, ნაჭედი, 23X18 სანტ. მაცხოვარი წელს ზევითია; მარჯვენა ხელით აკურთხებს, მარცხენაში სახარება უჭირავს, შემკობილი ყდით. ნიმბი ჯვარისებური აქვს. სამოსელი ღრმად დანაოჭებულია; წარწერა დიდის ასომთავრულით: ა ჯ ქ ზ, აშია სადა ვერცხლისა აქვს. (№16903).

7. **ხატი ღვთის მშობლისა** ჩჩვილედი, ვერცხლისა, ნაჭედი, 33X27 სანტ. ღვთის მშობელი წარმოდგენილია წელს ზევით, წარწერით: დ და ლ ს. აშია ორგვარი აქვს, ერთი შინაგანი რომბ-ლურსმული მორთულობით და მედალიონებით წმიდათა, ეხლა ექვსი მოსჩანს; მარცხენა მხარე დაფარულია მერმინდელი ფირფიტით, რომელზედაც სამი მთავარ ანგელოზია სრულის ტანით; დანარჩენი აშიები სხვანაირია (№16899). ხატი მე-17-18 საუკ. უნდა იყოს.

8. **ხატი წმიდის თეოდორესი**, ვერცხლისა, ნაჭედი, 28,5X25,5 სანტ. წმიდანი წარმოდგენილია ცხენით, საომარის ლამაზის ტანისამოსით და ხმლით წელზე. გმირავს კაცს, რომელსაც ხელი ჩაუტანებია ლახვრის წვერისათვის. ცხენი ლამაზად შეკაზმულია. ეზო ხატისა სადაა, აშია რომბ-ლურსმული, ფართო ოთხი მედალიონით კუთხეებში; ზემოდ ღვთის მშობელი და იოანე; ქვემოდ ორი წმ. გიორგი; წარწერა სახელისა არ არის, ამიტომ გადაწყვეტით თქმა არ შეიძლება, აქ წმ. გიორგია წარმოდგენილი, თუ წმ. თეოდორე (№16900). ხატი მე-16 საუკ. უნდა იყოს.

9. **ხატი წმიდისა იონაძისა**, ვერცხლისა, ნაჭედი, რელიეფით, სახე წმიდანისა ნამდვილი სვანის ტიპია, სრულის ტანით წარმოდგენილი; ხელები ჩაუდვია წელის სარტყელში; ჩაცმულობაც და ქუდიც სვანურია. შინაგანი აშია ორმაგი წერტილებიდან შემდგარის ხაზებისა; გარეგანი სხვა და სხვა ფრაგმენტებისგან შესდგება და უმეტეს ნაწილად გაფუჭებულია. ამათში მედალიონებიც ყოფილა, ზემოდ ქრისტესი; ქვემოდ წმ. გიორგისა; მარცხნივ, ვგონებ, მთავარ ანგელოზისა. წარწერა ვულგარული ხუცურით: წმ მნაძ (№16898). ხელობა მდარეა, სვანური, მე-18-19 საუკ. მარცხნივ და ქვემოდ ძლივს გასარჩევი ვულგარული ხუცურით სწერია:

1. ს ლს	2. ჩმ. ს ლ	3. მხ მე
მ ხ მ	ს შ ნ	კ დ ვ ე
კ და	დ ს ღ ნ	ხ ა ტ ი
ნ ს		

შ-ნ

ღ-ნ

წარწერები შეიძლება ასე იკითხებოდეს: 1) სულას (ან სულის) მეოხ, მაკდანას შეუნდვენ ღმერთმან. 2) ჩემს სულს შეუნდნეს ღმერთმან. 3). მიოხე მე კვლადვე ხატი (ხატო).

10. **ხატი წმ. ბასილისა**, ვერცხლისა, ნაჭედი, 22X15 სანტ. ხუცური წარწერით: წ-ღ ბ-სლი. წმიდანი წარმოდგენილია წელს ზევით, ჯვართ ხელში. ხელობა ტლანქია, სვანური, მე-18-19 საუკ. აშიები თეთრი პატარ რგოლების ხაზებისაგან შემდგარი დაზარალებულია (№16902).

11. ვერცხლის **ფირფიტები**, ერთი დიდი, 38X26 სანტ. რომელზედაც წარმოდგენილნი არიან მსუბუქის ჩაჭრით ექვსი მთავარ ანგელოზი ფრთებით და ზემოდ სავედრებლად აპყრობილის ორივე ხელებით. შემკობილება მათი წერტილებით, წერტილთა ხაზებით და სიმრგვალებით, ზოგჯერ ორმაგის ტლანქი ხელობისაა. მეორე ფირფიტაზე, რომელსაც ზემოდ რომბ-ლურსმული აშია აქვს, წარმოდგენილია სრულის ტანით, წერტილებისაგან შემოხაზულ ოთხკუთხედებში, ორი ერთ გვარი რიგის ღვთის მშობელი ჩჩვილეთი, სრულის ტანით. ეს უფრო ლამაზი ხელობისაა (№16901).

12. **ოთხი ვერცხლის ფირფიტა** წმიდათა სახეებით, №16904. პირველზე მარცხნივ, ქვემოდ, წარმოდგენილია წ-ა გიორგი ფეხით და ხმლით წელზე. ის შუბით გმირავს გვირგვინოსანს. ზემოდ უწერია ხუცურად წ-ღ გ-ი. ხელობა მდარე, სვანური, მე-18 საუკ. მეორე ფირფიტაზე, ქვემოდ, მარჯვნივ გამოხატულია წ-ა თეოდორე. წარწერა არა აქვს. მხედარი ცხენით არის წარმოდგენილი, შუბით გმირავს ადამიანს. შუბის თავი ვარსკვლავის მსგავსად არის შემკობილი. ზემოდ ამ ფირფიტაზე მთავარ ანგელოზია შემკობილ რგოლში წარმოდგენილი. ხელობა სვანურია მე-17-18 საუკუნისა. ეს ხატი რამოდენიმეთ წააგავს ზემოდ მე-8 ნომრის ქვეშ აღწერილ ხატს. ორი სხვა და სხვა ფირფიტა ზემოდ ატარებს მთავარ ანგელოზთა სახეებს სრულის ტანით. ტლანქი სვანური ხელობისაა.

13 **ხატი** წამლით დახატული ხეზედ, მირქმისა, 81X53 სანტ. ახალი დროისა; ზემოდ მხედრულის წარწერით სახელისა: მირქმა ი-ჯ ქ-ე. ქვემოდ მხედრულითვე უწერია:

სიძველისაგან განვაახლე მირქმის ხატი ესე და შევსწირე  
მე მღუდელმა სვიმონ გაბია(ნ)მან საოხად სულისა ჩემისა  
სამების ეკლესიას.

14. ორი ხის **ჯვარი** შუათანა ზომისა, რომელნიც უნდა მდგარიყვნენ კანკელის წინ, მაგრამ ეხლა კანკელზე არიან ამართულნი კუთხეებში. ორივე ჯვარი შეპერწილია ვერცხლის ფირფიტებით მხოლოდ პირველ გვერდზე; ჯვარს, რომელიც მარცხნივ არის ამართული, აქვს შუაში უმბო, ქვით შემკობილი. ფირფიტებზე წარმოდგენილია უმეტესად წმ. გიორგის სახე, ცხენით; მხედარი გმირავს გვირგვინოსანს. იმ ჯვარზე,

რომელიც მარჯვნივ არის, გამოსახულნი არიან ორ-ორი წმიდანი სუსტის რელიეფით, უფრო ხშირად აქაც წმ. გიორგია წარმოდგენილი.

### სოფელი მარგვიში.

სოფელ მარგვიში ყოფილა პატარა ქვის ეკლესია, რომელიც ეხლა დანგრეულია და მიტოვებული; კანკელი ქვისა არის. სახურავი ფილაქნის ქვებისა აქვს. ყველა კედლები ეკლესიისა, გარდა სამხრეთის კედლისა, შემკობილია პილასტრებით. კედლებზე აქა-იქ ემჩნევა წარწერები ხუცური. აღმოსავლეთის კედელზე:

ქ. ამისა აღმშენებელსა. . . შნს ღნ ან.

ჩრდილოეთის კედელზე: ... შეცოდებანი ... ერთი ქვა წარწერის ნაშთით თავუკუღმა არის მოქცეული ჩრდილოეთის კედელში. აქედან სჩანს, რომ ეკლესია უჯეროდ შეკეთებული ყოფილა წინა დროში. კანკელს ერთი აღსავლის კარი აქვს მხოლოდ. ამ კარის მრგვალი სვეტებიდან გადადის ორი კამარა, მარჯვნივ და მარცხნივ ხატებისათვის. სვეტების ბაზები შემკობილია სიმრგვალებით. კანკელზე და ეკლესიის კედლებზე შიგნით ემჩნევა ფრესკების ნაშთები მხედრულის წარწერებით, რომელნიც მოგვაგონებენ სოფ. დაბიშის ეკლესიის ფრესკებს და წარწერებს. დასავლეთის კედელზე ჯერ კიდევ კარგად დაცულია სცენა, როგორ ართმევს ეშმაკი, სატანა, ანგელოზს პატარა ბავშვს. ეშმაკი კუროს თავით არის წარმოდგენილი, რქებით და ფრთებით. ამის გვერდით წ ა გიორგი ვეშაპს გმირავს შუბით. საკურთხეველში ემჩნევა ფრესკები მაცხოვრისა, წ ა ნიკოლოზისა და ბასილი დიდისა. ამ მიტოვებულს ეკლესიაში ჩვენ ვნახეთ მარტო ერთი ხატი წმ. გიორგისა, 23X18 სანტ. ვერცხლისა, ნაჭედი; მხედარი ცხენით არის წარმოდგენილი და გმირავს გვირგვინოსანს. ქვემოდ, გაფუჭებულ მხედრულ წარწერაში იკითხება: წ ო მთავარ მოწამეო შე ...

ხელობა ტლანქია, სვანური, მე-19 საუკ. (№16905).

### სოფელი ღობი.

სოფელი ღობი გაშენებულია ღობის წყლის პირზე, რომელიც არის შენაკადი ცხენის წყლისა, მარცხნივ. პატარა ქვის ეკლესია ამ სოფლისა ზედ წყლის პირად არის ამართული და წყალდიდობის დროს ეკლესიაში წყალი შედის; ამიტომ აქ დიდი ნოტიობა არის. აღმოსავლეთის ნაწილი ეკლესიისა შემკობილია სამი კამარით, რომელნიც ეპყრობიან პილიასტრებს; შუა კამარაში ფანჯარაა ჯვართ. აღმოსავლეთის კედლის ფრონტონის წვერში არის ქვიდან გამოქანდაკებული ცხვრის თავი; მის ქვემოდ სამი ლამაზი პასკა (შიშვი). საკურთხეველის კედელში ორი უბეა.

კანკელი ქვისაა ერთის აღსავალის კარით. შესავალი მარტო დასავლეთიდან არის. ფანჯარა არის, გარდა აღმოსავლეთისა, დასავლეთიდან და სამხრეთიდან. კედლები შიგნით მოხატული ყოფილა ლამაზი ფრესკებით; ყველაზე უკეთესით სადადიანო სვანეთში, ხუცური წარწერებით; საკურთხეველში კარგად ყოფილა დაცული ფრესკები იოანე ოქროპირისა, წარწერით: იე ოქროპირი; ბასილი დიდისა: წმ ბასილი. ამათ ეტრატები აქვთ ხელთა ხუცური ტექსტებით. ტრაპეზი კედელზეა მიშენებული; მასზე ჯვარია დახატული, წარწერით: ჯი ქე სი. ეკლესია დახურულია ყავრით. ეკლესიაში ინახება მხოლოდ ორი ხატი:

1. **ხატი ღვთის მშობლისა** ჩჩვილეთი, ვერცხლისა, მოოქრული, ნაჭედი, 49X43 სანტ. ღვთის მშობელი ტახტზე მჯდომარეა ძითურთ; მის ზემოდ ორივეს მხრით მთავარანგელოზებია, მფრინავი პოხით და წარწერებით: წმ მქლ, გბლ. აქეთ-იქით ტახტისა პეტრე და პავლეა. აშია მოჩუქურთმებული დაცულია მთელად მხოლოდ მარცხნივ, ზემოდ მარტო ორი მედალიონია შენახული, და მარჯვნივ ერთი. მარცხენა აშიაზე, შუაში, მედალიონში წარმოდგენილია პავლე მთელის ტანით და ღვთის მშობელი ზემოდ. მარჯვენა აშიაზე წმ. გიორგია (№16896). ქვემოდ ხატისა ხუცური წარწერა:

წო ღვთის მშობელო შე იწას სფლი დაშშთ ილოცეთ.

ესე იგი: წმიდაო ღვთის მშობელო, შეიწყალე იწას სოფელი და შიშით ილოცევით.

სოფელი იწა გაშენებული ყოფილა ღობის ზემო მთაზე, მაგრამ ეხლა მიტოვებულია.

ეს ხატი ფრიად ემსგავსება კარედიან ხატებს ჩუკულისა, რომელიც ზემოდ იყო აღწერილი მე-7 ნომრით, და ჩიხარემის პირველი ნომრით აღწერილს (შეადარე ფოტოგრაფიები №№189,16857,16879), მაგრამ ეს გაცილებით მეტად ტლანქი ხელობისა არის, უშნო, მახინჯი ფიგურები, ულაზათო, ტლანქი ტანისამოსი მათი უფრო მოგვაგონებენ ესკიმოსებს, ვიდრე წმიდათა სახეებს. ხატი მე-18 საუკ. უნდა იყოს. განხილული ხატი დარჩობილია ხეტარზე ფართო პირით და ასრულებს ბოყერის მაგიერობას.

2. **ხატი მთავარ ანგელოზ მიქელისა**, მოოქრული, ვერცხლისა, ნაჭედი, 31X21 სანტ. ლამაზი ხელობის არის. წარწერები სახელისა ბერძნულია. მთავარ ანგელოზი ლამაზი ქალის სახითაა წარმოდგენილი, სრულის ტანით, მარჯვენა ხელში ლაბარუმი აქვს, მარცხენაში ბურთი; ტანისამოსი სამეფო ბიზანტიური; სურათი წერტილებით შემდგარ ოთხკუთხედშია. აშია მერმინდელი უნდა იყოს, სხვა და სხვა; ზემოდ და ქვემოდ პრტყელი ლურსმულ-რომბური, მარჯვენა არ შენახულა; მარცხენა ოვალური წრეებით არის შემდგარი (№16895).

3. სპილენძის **დოქი**, შემკობილი ლამაზად აღმოსავლეთის ხლართულებით, გატეხილი. ეხლა საქ. საისტ. და საეთნ. მუზეუმშია.

**სოფელი ლამზაგორი.**

სოფელი ლამზაგორი გელოვანების სოფელია, ლამაზი და აქ არის გელოვანების კოშკიც (№17624).

ლაშხეთის საზოგადოებიდან გზა გადადის ლათფარის უღელტეხილით ზემო სვანეთში ანუ ენგურის სვანეთში. მანამ ამ გზას შეუდგებოდეთ, უნდა გაუაროთ ტყიან მთას ლუდჟის მდინარის პირად. ამ მთაზე არის გაშენებული ფრიად ლამაზი ლუჯის ციხე (№№100,160,162). თვით უღელტეხილის დასაწყისი გარდაფხაძეების სოფლიდან იხ. №17623.

## ნაწილი მესამე

### თავისუფალი სვანეთი

თავისუფალი სვანეთი შეადგენს ერთს ნაწილს ზემო სვანეთისა. გეოგრაფიულად ზემო სვანეთი შეიცავს მდინარე ენგურის ხეობას სათავიდან სამეგრელოს საზღვრამდის, ისტორიულად ზემო სვანეთი იყოფა ორ ნაწილად: თავისუფალ სვანეთად, სადაც განსაზღვრულ დროიდან მოსპობილ იქმნა ხელისუფლება სვანთა ერისთავისა და თავად-აზნაურთა, და სათავადო ანუ სადადეშკელიანო სვანეთად, სადაც დადიშკელიანებმა შეინარჩუნეს ბატონობა უკანასკნელ დრომდის.

თავისუფალ სვანეთს შეადგენენ თემები: უშკულისა, კალასი, იფარისა, წვირმისა, ადიშისა, მუჟალისა, მულაყისა, მესტიისა, ლენჯერისა და ლატალისა.

### უშკულის თემი

უშკულის თემის სოფლები გაშენებულია ენგურის სათავეში, იქ სადაც ჩამოდის დიდი საყინულე, ანუ, უკეთ ვთქვათ, გეოლოგ ფავრის განმარტებით, უშკულის თემები მოთავსებულია საყინულეს ძველ მარენაზე. ამ თემს შეადგენენ სოფლები: ჟიბიანი, ჩვიბიანი (ჩვბიანი), ჩაჟაში და მურყმერი (სვანურად: მურყმერ).

სოფლებში ყოველგან ქვის სახლებია, უმეტეს შემთხვევაში, ორსართულიანი, ფილაქნის ქვებით დახურული. სახლებს ხშირად ახლავს მაღალი კოშკები. ამიტომ მთლი უშკულის თემი, ერთი ერთმანეთზე მიბმული სოფლებისაგან შემდგარი, თავისი მაღალი კოშკებით, შორიდან მოგეჩვენებათ ქალაქად, რომელშიაც მრავალი ქარხნებია მრავლის მაღალის კვამლ-სადენებით.

პეიზაჟები სოფლებისა ჩვენ საკმაოდ გადმოვიღეთ ფოტოგრაფიის საშუალებით: №174 წარმოგვიდგენს სახეს სამი სოფლისას ერთად, ჟიბიანისა, ჩვიბიანისა და მურყმერისა; №17494 არის სახე ჩაჟაშის სოფლისა და მის თავში მდგარი კოშკებისა;



გადმოღებულია სიუფის მაღლობიდან, სადაც თამარ მეფის კომპეზია; №17493-ზე ჩვენ გვაქვს სოფ. ჩვიბიანის სახე, გადაღებული სოფელ ჩაჟაშიდან; №17495 გვიჩვენებს დასაწყისს სოფ. ჩაჟაშისა მურყმერიდან რომ გამოხვალთ; №17491 გვიჩვენებს სამ ეკლესიას ჟიბიანის სოფლისა: ერთი არის „უფალ“ მარჯვენით ხევენარში; მეორე, ღვთის მშობლისა, შტატის დიდი ეკლესია, და მესამე, წმ. გიორგისა; №17492 არის სახე ეგრეთ წოდებული თამარ მეფის ციხე-კომპეზიისა აღმოსავლეთის მხრიდან. აქ სამი კომპია აშენებული მაღალ გორაზე, სიუფ-ზე და ერთ დროს მტკიცედ მოზღუდული ყოფილა; ზღუდე ეხლა ნაწილობრივ არის დაცული. აქ, ადგილობრივ გადმოცემით, ცხოვრობდა თამარ მეფე; სხვა გადმოცემით, მისი ქალი რუსუდან დედოფალი. ამ ციხის ფორპოსტად ჩაითვლება მის ქვემოთ, უფრო დაბალ გორაზე აშენებული ოთხი კომპი სოფელ ჩაჟაშის თავზე (№17494). №17480-90 წარმოდგენილია პეიზაჟები ციხე-კომპეზიისა ლენკვრი-მუყმოლარ მთაზე, საიდანაც გადადის გზა ლაშხეთის საზოგადოებაში, სადადიანო სვანეთში. №17540-ზე არის გუნდი ჩაჟაშის მცხოვრებთა მაცხოვრის ეკლესიასთან გადაღებული.

### სოფელი ჟიბიანი.

სოფელი ჟიბიანი ენგურის სათავეში ძვეს და ამიტომ ყველაზე მაღალი სოფელია მთელ სვანეთში. სოფელში სამი ეკლესია არის. პირველი დიდი, შტატის ეკლესია ღვთის მშობლისა. ეს ეკლესია სოფლის გარედ არის მაღლობზე აშენებული, ირგვლივ ზღუდით მოვლილი და გამაგრებული კომპით. ამ ზღუდეს ორი შესავალი კარი აქვს, ერთი მათგანი რკინით არის შეჭედილი; ეზოში ბოძზე ჰკიდია ორი ზარი. თვით ეკლესია ქვისაგან აშენებული არის ბაზილიკანური ანუ სიონური რიგისა და აქვს გაერთიანებული ეკვტერები სამხრეთით და დასავლეთით. ეკვტერები მერმე უნდა იყოს მიშენებული. საკურთხეველი გამოდის გარედ სამწახნაგოვნად. ეკლესიის სიგრძე დასავლეთით ეკვტერითურთ არის 11 არშინი და 10 ვერშოკი; განი სამხრეთის ეკვტერითურთ 9 არშინი და 2 ვერშოკი. სისქე კედლისა 1 არშინი და 3 ვერშოკი. შესავალი ეკვტერში არის სამხრეთ-დასავლეთით, ხოლო ეკლესიაში მხოლოდ დასავლეთით. კანკელი ქვისაა, სამ-კამარიანი; კამარები იატაკიდან იწყება, დამყარებულია ქვის სვეტებზე, მცირედ შემკობილი სვეტის თავებით (იხ. უვაროვისა, ტ. XXa, სურ. 21 b). კამარებში ეხლა მოთავსებულია ხატები.

კედლები მოხატული ყოფილა, მაგრამ ეხლა მხატვრობა გაფუჭებულია. დ. ბაქრაძის დროს უკეთ ყოფილა დაცული (გვ. 124). ეხლა კარგად მოსჩანან მხოლოდ საკურთხეველის კონქში ვედრება მთავარ ანგელოზებითურთ. მაცხოვარი გაშლილი სახარებით არის წარმოდგენილი, სადაც იკითხება: მე ვარ ნათელი სოფლისა და სხვა, საკურთხეველის კედელზე ეკლესიის მამებია; შიგ ეკლესიის ცაში შობა და ფერისცვალება; დასავლეთის კედელზე წმ. გიორგი და წა თეოდორე. ეკლესიაში მოიპოვება:

1. დიდი კანკელის საწინავე **ჯვარი ხისა**, დამყარებული ქვის კვარცხლბეკზე საკურთხეველის წინ, მარჯვნივ; შემერწილია ვერცხლის ფირფიტებით და ტლანქი

ფიგურებით მაცხოვრისა, მთავარ ანგელოზთა და წმიდა გიორგისა. ზემოდ ორი დრობნიცაა.

2. მეორე ასეთი **ჯვარი**, დამყარებული კვარცხლბეკზე, არის მარცხნივ საკურთხეველისა; შედერწილია ვერცხლის ნაჭრებით, რომლებზედაც მოსჩანან უკეთესი წთა სახეები, ვიდრე პირველ ჯვარზე, მაგრამ საერთოდ მაინც ტლანქია. ზემოდ გამოსახულია მთავარ ანგელოზი და ღვთის მშობელი.

3. კიდევ ორი ასეთივე **ჯვარი**, ეხლა კანკელზე მიჭედდის როგორც ეტყობა, ყოფილა შედერწილი ოქროთი დაფერილი ვერცხლის ფირფიტებით, მაგრამ ეხლა სულ გაფუჭებულია ან მოძარცული; ხოლო ერთზე დაცულია ჯვარის ქუდი მოციქულთა მედალიონებით.

4. **ჯვარი** შუა ტანისა, ხისა, შედერწილი ვერცხლის ნაჭრებით ტლანქი ხელობისა, 5741 სანტ. უმბოს ზემოდ ემჩნევა წმიდა გიორგი სრულის ტანით გამოხატული; ქვემოდ დედა ღვთისა ჩხვილედით, აგრეთვე სრულის ტანით. ბოლოში წმ. გიორგი ცხენით, გმირავს ადამიანს. სხვა მრავალ მედალიონებში, უმბოს ირგვლივ, წარმოდგენილი არიან დედა ღვთისა, იოანე და სხვა წმიდანნი (№17329).

5. მეორე ასეთივე **ჯვარი**, 70X36 სანტ. ნაწილობრივ მოძარცულია; ზემოდ და ქვემოდ უმბოსა და აგრეთვე სულ ქვემოდ მედალიონებში წარმოდგენილია დედა ღვთისა ჩხვილედით. მარჯვნივ და მარცხნივ უმბოსა არის ფიგურა სრულის ტანით და წარწერით: წა კე (კვირიკე). ქვემო ფრთაზე ჯვარისა ორი წმიდანია სრულის ტანით; წარწერა არა აქვთ (№17330).

6. **ხატი მაცხოვრისა**, ვერცხლისა, ნაჭედი, 49X41 სანტ. (№7315). მაცხოვარი მაღალ ტახტზე მჯდომარეა სახარებით და მკურთხეველის მარჯვენით. ფეხები შიშველი აქვს, სკამზე დადებული. ნიშბი ჯვარის სახედ არის. წარწერა ჯერ ბერძნულად, შემდეგ ქართულად, ხუცური ასოებით: წი სა-მე-ბა. ეზო სადაა; შინაგანი აშია ბაწრული სახისა ვიწროა და უბრალო; გარეგანი უფრო ფართო, ბროწეულის ყვავილების მსგავსი ორნამენტით შემკობილი და მედალიონებით წთა. ზემოდ, შუაში „იჟ ქე“, კუთხეებში: „წ-ა იონმცლ(ი)“ და „წ-ა პე“, მარჯვნივ და მარცხნივ მთავარ ანგელოზნი; ქვემოდ წა გ-ი, წა დ-ი და წა თ-ე. ხატი მე-14 საუკ. უნდა იყოს. გრაფინია უვაროვისა მას აკუთვნებს მე-11-12 საუკუნეს და ფიქრობს, გარეგანი აშია სხვა ხატიდან არისო (გვ. 103, ტაბ. XXVIII), მაგრამ ეს ასე არ უნდა იყოს, ვინაიდან კუთხეებში აშიები გაყოფილია ისეთისავე ბაწრულის შემკობილებით, როგორც შინაგანი აშია ხატისა.

7. **ხატი მაცხოვრისა**, ვერცხლისა, ნაჭედი, 50X35,5 სანტ. მრავალ წმიდათა ვერცხლის ფირფიტებით შევსებული, სხვა და სხვა დროისა, საზოგადოთ დაბალი ხელობისა. (№17318). მაცხოვარი ტახტზე ზის ჩვეულებრივი პოზით, წარწერა ბერძნულია; მარცხნივ მისა მთავარ ანგელოზი გაბრიელი სრულის ტანით და ლაბარუმით, თუმცა წარწერა სახელისა უჩვენებს წმიდა გიორგის: წ-ა გ-ა. მარჯვნივ მეორე მაცხოვარია, უფრო პატარა, აგრეთვე ტახტზე მჯდომარე; მის ქვემოდ, სრულის

ტანით, რომელიმე წმიდანი, სახელი არ უწერია, ხელში ჯვარი უჭირავს. ქვემოდ მედალიონში ღვთის მშობელი ჩჩვილედ, წელსზევითი, ბერძნულის წარწერით სახელისა. ორივე მხრით ამ მედალიონისა დრობნიცებია წმიდათა ფიგურებით. აშია ფართოა რომბ-ლურსმული, მედალიონებით. მარჯვნივ და მარცხნივ აშიებზე დედა ღვთისა და იოანე სრულის ტანით. ზემოდ და ქვემოდ სამ-სამი მედალიონი წელსზევით ფიგურებით. მე-16-17 საუკუნის უნდა იყოს.

8. ხატი მაცხოვრისა, ვერცხლისა, ნაჭედი, 43X34 სანტ. ისეთივე კომპოზიციისა და ხელობისა, როგორც წინა ხატი, ხოლო უფრო ცუდათ დაცული (№17317).

9. ხატი მაცხოვრისა, 108X73 სანტ. წამლით დახატული ყოფილა, მაგრამ ეხლა ფერადები გადასულია, დარჩენილია ვერცხლის დიდი ნიშბი ჯვარის სახით და ბალახოვანი შემკობილობით. დარჩენილია აგრეთვე სრულად რომბ-ლურსმულის აშიები მედალიონებით წმიდათა (№17319). მე-16 საუკ. უნდა იყოს.

10. ხატი მაცხოვრისა, 51,5X37 სანტ. ყოფილა წამლით დახატული; ფერადები გადასულია; დარჩენილია მხოლოდ საუცხოო ხელობის ვერცხლის ნიშბი ჯვარის სახედ, ბროწეულის ყვავილების მსგავსი ორნამენტით შემკობილი და ასეთივე ხელობის აშიები წმიდათა მედალიონებით. მოსჩანს აგრეთვე სახრების სახე, ჯვარით შემკობილი, რომელიც ქრისტეს სჭერია ხელში (№17321). მე-13-14 საუკ. უნდა იყოს.

11. ხატი იოანე ნათლის მცემელისა, 44X30 სანტ. ყოფილა ფერადებით დახატული, მაგრამ ფერადები სულ გადასულია; ნიშბი ფართო, სადა, ოქროსია. აშიები ვერცხლისა ოთხკუთხედებათ დაყოფილი, შემკობილია სევდიანის ბალახის მსგავსი ორნამენტით. წარწერა ზემოდ სხვილის ასომთავრულით: წ-დ ოვანე ნთლმს მცემელო (№17316). ქვემოდ სევადით უწერია (ფოტოგრაფიაზე არ არის გამოსული):

წო ნათლმს მცემელო მეოხ მეყავ მე ვამეყს ვრდნ.

უკანასკნელი სიტყვა წარწერისა დამთავრებული არ არის, ამიტომ ორნაირად შეიძლება მისი წაკითხვა: ვარდან(ს), ანუ: ვარდან(ისძეს). ჩვენის აზრით, მეორე წაკითხვა უფრო სწორი იქნება, ვინაიდან ეს სიტყვა გვარს უნდა შეიცავდეს ვამეყსას და არა სხვა პირის სახელს. ამიტომ ჩვენ წარწერას ასე ვკითხულობთ:

„წმიდაო ნათლის-მცემელო, მეოხ მეყავ მე ვამეყს ვარდან(ის ძეს)“.

ვამეყ ვარდანის ძე ისტორიაში უცნობია, მაგრამ ის უნდა ეკუთვნოდეს სვანთა ერისთავების ვარდანის ძეთა გვარეულობას. ა. ხახანაშვილს სიტყვები „ვამეყს, ვარდან“ ვერ ამოუკითხავს (გვ. 34). ხატი მე-12-13 საუკ. უნდა ეკუთვნოდეს.

12. ხატი ღვთის მშობლისა, ფერადებით დახატული, ჩჩვილედ, 65X51 სანტ. კარგის ხელობისა; ფერადები დაზიანებულია (№17312). აშიები შემკობილია ბალახოვანი ორნამენტით და წ-თა მედალიონებით. ზემოდ: წ-დ გ-ი და მთავარ ანგელოზნი; მარცხნივ: წ-დ ბ-სლი; მარჯვნივ: წ-დ ლუკა; ქვემოდ: წ-დ კ-ე (კვირიკე), წ-დ დ-ი და წ-დ თ-ე. ხატი მე-14-15 საუკ. უნდა იყოს.

13. ხატი ღვთის მშობლისა ჩჩვილედ, 69X52,2 სანტ. დახატული ყოფილა ფერადებით; ფერადები გადასულია. დარჩენილია ვერცხლით შემკობილი ზემო

ნაწილი ნიმუშებითურთ და აშიები წ-თა მედალიონებით, ბროწეულის ყვავილების მსგავსი ორნამენტით შემკობილნი. აშიებზე წარმოდგენილნი არიან, მარცხნივ: წ-მ ბასილი; მარჯვნივ: წი გ-გ (გრიგორ); ზემოდ: ვედრება; ქვემოდ: წი დ-ტი, წი გ-ი და წი თ-ე. ხატი მე-12-13 საუკ. უნდა იყოს (№17313).

14. ხატი ღვთის მშობლისა ჩვილადი, დიდის ზომისა, წამლით დახატული ხეზედ. ახალი ხელობის არის. ღვთის მშობელი ტახტზე ზის. ნიმუშები შემკობილია ძვირფასი ქვებით. აშია ვიწროა, ტალღისებური შემკობილობით; ზემოდ დიდრონის ასომთავრულით წარწერა: დედა ღისა. ი-ჯ ქე (№17324).

15. ხატი ღვთის მშობლისა ჩვილადი, ვერცხლისა, ნაჭედი, 34X27 სანტ. ღვთის მშობელი წელსზევითია, რელიეფით წარმოდგენილი. ნიმუში უბრალოა, წერტილებით მოცული; მისა ნიმუში ჯვრის სახედ არის. ნაოჭები ჩაცმულობისა ხშირია. წარწერა სახელისა ბერძნული. აშიები ფოთლის სახეებით არის შემკობილი, ლამაზი; ზემოდ და ქვემოდ სულ დაკარგულია; მარჯვნივ ცოტაა დარჩენილი. ხელობა მე-14 საუკ. უნდა იყოს. (№185).

16. ხატი გარდამოხსნისა კარედი. სახეები ფერადებით დახატული ყოფილა და მერმე ოქროთ შემოსილი; ფერადები ზოგი სულ გადასულია. ეზო ოქროს ბასმისაა. შუა ნაწილში კარედისა იესო ქრისტეს ჯვარიდან ჩამოღებაა წარმოდგენილი კამარას ქვეშ. კამარას ზემოდ, კუთხეებში მთავარ ანგელოზებია; ქვემოდ ასომთავრული წარწერის ნაწყვეტია დარჩენილი: ... ღისა ... / ... ბელო .... მარჯვენა კარი სულ შიშველია; შემკობილება მოძარცულია (№17326), მაგრამ რამოდენიმე წლის წინეთ გადაღებულ ფოტოზე ცოტა ზემო და ქვემო ნაწილები ოქროს ბასმებისა კიდევ მოსჩანან (№185). მეორე დაცულ კარზე წარმოდგენილია ჯვარის ტვირთვა და წაღება იესოს მიერ (№17326 და 185). ზურგზე ხატისა ასომთავრული წარწერაა (იხ. №17306):

ქ . რომელი ; ჯრს ეცვ	რომელი ჯუარსა ეცვი
ჩენთის : ქრისტე	ჩვენთვის ქრისტე,
ე ღმერთო : ჩენო მეოხ	ღმერთო ჩვენო, მეოხ
დ : მფრველ გექმენ : მოს	და მფარველ გვექმენ მო-
ა	სავ -
ვ	თა და მამკობთა ხატისა
თა : დ მმკობთა : ხატისა	შენისა : მე მეჩაბალახ-
შენისა : მე : მეჩაბალახ	ძესა ესონას,
ძესა : ესონას	და მეუღლესა ჩემსა
და : მეუღლესა : ჩემსა	ბარბალეს შეუნდევ
ბარბალეს : შ-ვ : ღ-ნ : ამ-ნ.	ღმერთმან, ამინ.

შეადარე დ. ბაქრაძის წაკითხული (გვ. 124-125). გრ. უვაროვისა ხედავს ამ ხატში თუ არა ნახელავს დასავლეთ ევროპის მასტერისა, ყოველ შემთხვევაში ევროპის მხატვრობის გავლენას (გვ. 124), ხატი მე-12-13 საუკ. უნდა იყოს.

17. ხატი მთავარ ანგელოზ მიქაელისა, ვერცხლისა, მოოქრული, ნაჭედი, 49X41 სანტ. (№185 და 17314). მთავარ ანგელოზი წარმოდგენილია სრულის ტანით. მარჯვენა ხელში ლაბარუმი აქვს, მარცხენაში ბურთი. ტანი მისი მოკლეა, თავი დიდი, დიდის ნიშნით, შემკობილი ორი ლალით; ქვემოდ ორი ადამიანია დაჩოქილი, ვედრების ნიშნით და სვანურის ტანისამოსით; ეზო ხატისა ვაზოვანი ორნამენტით არის შემკობილი; აშიები რომბ-ლურსმული, ექვსი მედალიონით წმიდანებისა; რვას სურათები არ ჰქონია. ხელობა დაბალია, სვანური, მე-15-16 საუკუნისა უნდა იყოს. წარწერა სახელისა ზემოდ: ქ მქელ მთგედ. წარწერა დაჩოქილ პირთა ძნელი გასარჩევია:

მარცხნივ:  
ქ წმომ მ

მარჯვნივ:  
ო შევეედ  
ვბსმდნ

ესე იგი: „წმიდაო მთავარ ანგელოზო, შეივედრე ერისთავი დავბასმინ (ანუ დევბასმინ)“.

თქმა არ უნდა, ეს წაკითხვა საექვოა, მაგრამ ცდა ყოველთვის საჭიროა. ეხლა ეს ხატი ცოტა დაზიანებულია აშიებზე. (№17314), ხოლო წინა გადაღებულზე უფრო შენახული მოსჩანს (№185).

18. ხატი მთავარ ანგელოზის მიქაელისა, ვერცხლისა, ნაჭედი, 101X61 სანტ. თავი ოქროთ დაფერილი აქვს (№189 და 17320). მთავარ ანგელოზი სრულის ტანით არის წარმოდგენილი, ლაბარუმიტ მარჯვენა ხელში და ბურთით მარცხენაში. ეს სვანური მიბაძვავა კარგი ორიგინალისა, მაგრამ ჯეროვანად ვერ გამოსვლია ოქრომჭედელს. ტანი ანგელოზისა ერთობ გრძელია; თავი შედარებით პატარა. ტანისამოსი სამეფო ბიზანტიური დამახინჯებულია. ეზო და მაღალი ფეხის დასადგამი შემკობილია ძლივს შესამჩნევი ბალახოვანი მოხატულობით. აშია გაყოფილია ოთხკუთხედებად და მოცულია კვადრატული ნაჭედი შემკობილობით. სადა ოთხკუთხედებში ჩატანებულია სიმრგვალები წერტილების შემკობილობით. სიმრგვალებებში მინიატურული სახეები წმიდანებისა, ზემოდ: ვედრება, ქვემოდ, მარცხნივ და მარჯვნივ, მთავარ ანგელოზი და წმ. გიორგი ცხენით. ზემოდ წარწერა ასომთავრული: ქ. წ-მ მთვრნგელოზმ მძქელ. მარცხნივ ქვემოდ მეორე წარწერა, რომელიც არც დ. ბაგრაძის (გვ. 124) და არც ა. ხახანაშვილის მიერ (გვ. 34) ჯეროვანად არ არის გარჩეული. წარწერას ჩვენ ვკითხულობთ ასე:

1. ქ. წ-ო მთვრნგლ  
ოო :შედწყლე : მა  
შენებელა შენა : სო  
ფელდ ესე : ცენა : დე
5. დნა და მამანა ყვლ  
კსნა (sic) და : მეოხ : ექმენ :
- წმშენ ქრდთეს დღ
8. ეს მას : განკდთხვსს

- ქ. წმიდაო მთავარანგელ-  
ოზო, შეიწყალე მა-  
შენებელი შენი სო-  
ფელი ესე ცენა, დე-  
დანი და მამანი, ყოველ(ნი)  
კაცნი, და მეოხ ექმენ  
წინაშე ქრისტეს(ა) დღ-  
ეს(ა) მას განკითხვისას(ა).

მე-6 სტრიქონში აშკარად სწერია კსნდ(=კასნი, კაცნის მაგიერ); იმავე სტრიქონში, სიტყვაში: მეოხ, უკანასკნელი ასო წააგავს ბ-ს, მაგრამ ეს უკუღმა დაწერილი ხ-ნი უნდა იყოს. რომ აქ „მეოხ“ იგულისხმება, ამას მისი მიმყოლი სიტყვები ამტკიცებენ აზრის მიხედვით. ამას გარდა წარწერაში ი-ს მაგიერ ყოველგან იხმარება დ. სიტყვა „ქრისტე“ გადმოცემულია ჩვეულებრივ სვანური წარწერებისა, როგორც „ქრისტე“, აგრეთვე ნ-მეტია სიტყვაში „წინაშენ“. გრაფინია უვაროვისა ემყარება დ. ბაქრაძის და ა. ხახანაშვილის წაკითხვას და სოფელ „ცენას“ არც ის იხსენიებს (გვ. 111, სურათი XXVIII).

სოფელი ცენა მდებარეობს ზეკარზე ანუ უღელტეხილზე, რომელიც არის გადასავალი უშკულიდან ენგურის ანუ სადადიანო სვანეთში. ეხლა იქ ცხოვრობს მხოლოდ ექვსი კომლი სვანი, რომელნიც უშკულის საზოგადოებაზე არიან მიწერილნი, ვინაიდან ეს სოფელი ცხენის წყლის სათავეშია, ამიტომ ხშირად იყო გამოთქმული აზრი, რომ მდინარეს ცხენის წყალი კი არ უნდა ერქვას, არამედ **ცენის წყალი**, და მდინარის სახელი ამით დაუმახინჯებიათო, მაგრამ ეს აზრი მიუღებელია, ვინაიდან უძველესი დროიდან ბერძნები ამ წყალს „ლიპპოს“ ეძახდნენ, რაც ცხენს ნიშნავს, და მათ ეს სახელი ქართულიდან უთარგმნიათ. ექვს გარეშეა, რომ ჩვენი ხატი ადგილობრივ სვანის ოქრომჭედელის მიერ არის გვეთებული, კარგი კლასიკური დროის ხატის მიბაძვით, მაგრამ სუსტად შესრულებული დაცემის ხანაში. მიუხედავად ამისა ის ორიგინალურია და არც სილამაზეს მოკლებული. და ის თვით სოფელ ცენის საზოგადოების საფასით არის შეკვეთილი. ხატი მე-15-16 საუკ. უნდა ეკუთვნოდეს.

19. **ხატი ღვთის მშობლისა** ჩჩვილეთი, ოქროთ დაფერილი ვერცხლისა, ნაჭედი, 11X9 სანტ. ღვთის მშობელი წელზევითია ერთის ძვირფასი ქვით და წარწერით: დ<sup>-</sup> და ლ<sup>-</sup> თისა. ზემოდ აშიაზე მთავარ ანგელოზებია; მარჯვნივ მთელის ტანით; მარცხნივ – წელზევითი, მედალიონში. ირგვლივ ვულგარული წარწერა აქვს:

ყო / ლა / [დ] წ-ო :: შ-ე : სლისა : მართ-ი.

ესე იგი უნდა იყოს: ყოვლად წმიდაო, შეიწყალე სული მართასი.

ფრიად ტლანქი სვანური ხელობაა მე-18-19 საუკ. (№ 17307).

20. **ხატი ღვთის მშობლისა** ჩჩვილეთი, 26,5X15 სანტ. ფერადებით ყოფილა დახატული, ხოლო ნიმბები და აშიები ოქროსია. ფერადები სულ გამქრალა, აშიის მარტო მარჯვენა მხარეა დარჩენილი, ბროწეულის ყვავილის მსგავსი შემკობილობით; დარჩენილია აგრეთვე ნიმბები. მე-12-13 საუკ. უნდა იყოს. (№17323).

21. **ვერცხლის ფირფიტა**, 26X24 სანტ. რომელზედაც წარმოდგენილია ორი ერთგვარი და ერთი ზომის ფიგურა მთავარ ანგელოზის მიქელისა: წ-დ მ-ქ. აშიებზეც ფიგურები ყოფილა, მაგრამ ეხლა გაფუჭებულია. ხელობა ტლანქია, მე-18 საუკ. (№17323).

22 **ხატი მთავარ ანგელოზ მიქელისა**, ვერცხლისა, ნაჭედი, 16X13 სანტ. მთავარ ანგელოზი სრულის ტანით არის: წარმოდგენილი ლაბარუმით და ბურთით; თმა ხუჭუჭი აქვს. აშია რომბ-ლურსმული; ხელობა ტლანქია, სვანური, მე-17-18 საუკ. (№17323).

23. ხატი ღვთის მშობლისა ჩჩვილელი, ვერცხლისა, ნაჭედი, ღვთის მშობელი წელსზევითია, თავი ძისა მომტვრეულია. აშია ოთხკუთხედებად არის დაყოფილი წერტილოვანი შემკობილობით. ხელობა დაბალია, მე-17 საუკ. (№17323). (უკანასკნელი ოთხი ხატი 20-23 ერთ ფირფიტაზე არის გადმოღებული).

24. ხატი მაცხოვრისა, წელსზევითი, კარედი, მაგრამ კარები ეხლა დაკრეულია. დარჩენილია შუა ნაწილი, 10X8 სანტ. მაცხოვარი ყოფილა ფერადებით დახატული; ფერადები ეხლა სულ გადასულია; დარჩენილია ნაწილი შესამოსლისა და ნიშბი ჯვარის სახისა, დიდი, თხელის ოქროს ბასმისა, მოჩუქურთმებული (№17308). მეორე გვერდზე არის ასომთავრული წარწერა (№17309):

წმდა  
ო მცხვრო . მ  
ხ ექმე მრში  
ანსა : დ  
ა ძეს მ

წმიდა-  
ო მაცხოვარო, მე-  
ოხ ექმე(ნ) მარუში-  
ანსა დ-  
ა ძეს(ა) მ(ისსა).

წარწერაში ასო ე თავის ადგილზე არ არის. ასო ს-ნი ორივე შემთხვევაში შებრუნებულად სწერია. ასო რ მოგვაგონებს ასო ს-, მოკაუჭებული წრით, მარცხნივ, შუაში; ეს მიტომ, რომ შებრუნებულია.

ამ წარწერაში მოხსენებული მარუშიანი უნდა იყოს მარუშიან ვარდანისძე, რომელსაც თამარ მეფემ უბოძა ჩუხჩერახობა (H.G. I. p. 410, N 2). რომ ასეც არ იყოს, ხატი თავის ხელობით მაინც მე-12 საუკუნეს ეკუთვნის.

25. ხატი მაცხოვრისა, ვერცხლისა, ნაჭედი, 32X22 სანტ. მაცხოვარი ტახტზე მჯდომარეა ჩვეულებრივი პოზით, ნიშბი ჯვარის სახისა არის. სახარება მისი ორის ჯვარით არის შემკობილი; აშია რომბ-ლურსმული, მრავალის მედალიონებით; რვაში წ-თა სახეებია. ხელობა დაბალია, მე-16 საუკ. (№17322).

26. ხატი მაცხოვრისა, ვერცხლისა, 21X15 სანტ. მაცხოვარი ტახტზე ზის ჩვეულებრივის პოზით. ხატი დაშლილია და ფრიად დაზიანებული; რომბ-ლურსმულის აშიიდან მარტო ნაწილია დაცული მარცხენა მხარეს. ხელობა ტლანქია (№17322), მე-18 საუკ.

27. ხატი მაცხოვრისა, ვერცხლისა, მაცხოვარი წელსზევითია, სახარებით და მაკურთხეველის მარჯვენით; ფრიად დაზიანებულია. აშია რომბ-ლურსმული. ხელობა ტლანქია, მე-18 საუკუნ. (№17328).

28. ხატი წმიდა გიორგისა, ვერცხლისა, ნაჭედი. მთავარ მოწამე წარმოდგენილია ფეხით, მარჯვენა ხელში შუბი უჭირავს, მარცხენა ფარზე აქვს დადებული; წარწერა სახელისა ასომთავრულით: წ-ე გ-ი. აშია თხელის ბასმისა აქვს ტალღისებური შემკობილობით. მე-17 საუკ. უნდა იყოს (№17328).

29. ხატი წმ. გიორგისა, ვერცხლისა, ნაჭედი 31X24,5 სანტ. წ-ა გიორგი წარმოდგენილია ფეხით; მარჯვენა ხელში შუბი უჭირავს, მარცხენა ფარზე აქვს დადებული. წარწერა: წი გი. (უკანასკნელი ორი ანბანი შებრუნებით არის დაწერილი). აშია ბროწეულის ყვავილის მსგავსი ორნამენტითაა შემკობილი; ქვემოდ არ შენახულა. მარჯვენა აშიაზე ქრისტეა ტახტზე მჯდომარე; მარცხენაზე – ღვთის მშობელი. ზემოდ მრგვალი მედალიონებია. ხელობა მე-16 საუკ. უნდა იყოს (№17322).

30. ხატი მთავარ ანგელოზისა, სალოცავად მიმართულის პოზით, ვერცხლისა, ნაზი ლამაზი ხელობის არის. აშია ორი აქვს მცირე წრეების და წერტილების სახეებით შემკობილი (№17327). მე-13-14 საუკ. უნდა იყოს.

31. ხატი მთავარ ანგელოზის მიქაელისა, ვერცხლისა, ნაჭედი, 17X14 სანტ. ტლანქი ხელობისა, მე-18 საუკ. აშია რომბ-ლურსმული (№17327).

32. ხატი წა გიორგისა, ვერცხლისა; წმიდა გიორგი ფეხოსანია, შუბით და ფარით, რომელზედაც მარცხენა ხელი უდევს. წარწერა: წი გ-ი. აშია, რომბ-ლურსმული, ცოტა დაზიანებულია. მე-16-17 საუკ. (№17327).

33. დროშა ტყავისა, რომელზედაც გამოსახულნი არიან სხვა და სხვა წმიდანები, ტლანქი ხელობისა. ტარი მისი თავდება ზემოდ ჯვართ, რომელიც შემკობილია ორი მვირფასი ქვით (№17334).

34. ჩარდახი ხატებისათვის, ოთხ წვრილ სვეტზე გუმბათის მსგავსი თავით. სვეტები შემერწილია ოქროთ დაფერილი ვერცხლით. ჩარდახი ეხლა დანგრეულია.

35. ბარძიმი ვერცხლისა, ოქროთ დაფერილი, სირიულის ყაიდისა, არაბულის წარწერით. შემკობილია სევადით და მცირედ ამობერვილი სურათებით. ამათ შორის წა გიორგი ცხენით, რომელიც ადამიანს გმირავს (№17332). იოსები ჰყვედრის მარიამს, შობა ქრისტესი (№17311), ნათლის ღება (№17311 და 17625), იერუსალიმში შესვლა და ჯვარცმა (№17625). შეადარე უვაროვისა, გვ. 140, სურათი 61.

36. კათხა ფეშუმის მაგიერ, ოქროთ დაფერილი ვერცხლისა, მსხალის მსგავსი რელიეფებით შემკობილი (№17331), მაღალის ფეხით, რომელსაც ხის სახე აქვს და ამ ხეზე რელიეფით გამოყვანილი ადამიანია წარმოდგენილი, ცულით ხელში და ხეს მოჭრას უქადის. კათხაზე შემდეგი მხედრული წარწერაა:

ქ: შემომიწირავს : ეს : ვერცხლის : კათხა :. მე ერისთავს :  
შოშიტას : უმკულის : დედა მღთისათვის : ჩვენად სად-  
ლეგრძელოდ :. და :. გასამარჯვებლად . ამინ :. ღმერთო.

აქ უეჭველია იგულისხმება რაჭის ერისთავი შოშიტა. მაგრამ შოშიტა სამი იყო. შოშიტა პირველი იყო თანამედროვე ბაგრატ IV იმერეთის მეფისა და რაჭის ერისთავად გახდა 1535 წელს. შოშიტა მეორე გარდაიცვალა 1684 წ. ხოლო შოშიტა მესამე ერისთავად დაჯდა 1697 წ. და გადაიცვალა 1729 წ. წარწერის ხასიათის



მიხედვით, შემწირველი კათხისა უნდა იყოს შოშიტა მესამე. ყოველ შემთხვევაში თვით კათხა ძველი ხელობის არის, ვიდრე შოშიტათა ეპოქა.

37. **ფეშუმი** ვერცხლისა, ოქროთ დაფერილი, 28 სანტ. სიმაღლით; აქვს ფოთოლისებური შემკობილობა; ლამაზი ნახელავია (№17331, მარცხნივ).

38. **აზარფეშა** ვერცხლისა, შემკობილი უკანა მხარეს (იქვე, №17331), მხედრულის წარწერით სულა გელოვანის:

ქ.: ესე.: აზარ : ფაშა (sic) :. გულუანა (sic) სულას :.

39. **რქა** ჯიხვისა, ანუ **ქარასხი**, ღვინის სასმელი, ლამაზად შემკობილი (იქვე №17331), მხედრულის წარწერით:

ქ.: ღმთის :. მაღლს :. რას :. მიწყენს :. შავი :. ყირმიზი :.  
ღვინო :. ჯელთ :. მეჭიროს :.  
ვარდი :. თავს :. მერჭოს :. ამ ვარდს : ვერ : ხედავ : და-  
ლიე :. ღმთის :. მაღლსა :.  
ქვემოდ უწერია:  
ქ.: ესე :. ქარასხი :. წულუკიძის :. მერაბისა :. არის :.

40. ვერცხლის **სურა** (პატარა დოქი), ჩუქურთმიანი, მხედრულის წარწერით, (იქვე, №17331):

ქ: შეუწირავს : წულუკიძეს : მერაბს : უშკულის : დედა :  
მღვთისათვის : ესე ვერცხლის სურა : მისდა : სადღეგრძე-  
ლოდ : ამინ :

მერაბ წულუკიძე ცხოვრობდა მე-18 საუკ. დამდეგს (ქართლ. ცხოვ. II, გვ. 226, H.G. II, 1 p. 643).

41. **სარკე** მრგვალი, ფოლადისა, 13,5 სანტ. დიამეტრით და ძვალის ხელით (№17332).

42. **სარკე** ხის ჩარჩოთი, სახეებიანი, „ჟესტით“ შეძერწილი. გამოცემულია უვაროვის მიერ (გვ. 142).

43. **სარკე** მრგვალი, ლითონის ხელით (იქვე, №17332).

44. **თასი** ვერცხლისა, ნავისებურად წაგრძელებული, შემკობილი მსხალის მსგავსი სახეებით (იქვე №17332).

45. ვერცხლის **ჯამი**, მხედრულის წარწერით:

ქ: ეს : ჯამი : ბეჟან : ლორთქიფანიძისაა.

ბეჟან ლორთქიფანიძე იყო მოღვაწე მე-18 საუკ. დასაწყისისა, თანამედროვე შოშიტა მესამე რაჭის ერისთავისა (ქართ. ცხ. II, გვ. 213, H.G. II, 1, 295, 299).

46. ვერცხლის თასი, მხედრულის წარწერით:

ქ : ლოლაბერიძის : როსტომის :. არის :.

47. ვერცხლის თასი, მხედრულის წარწერით:

ქ : ეს : თასი : სიხნია (sic) მეიფარიანის :. არის .

48. ვერცხლის ჯამი, მრუდი ზოლებით შემკობილი.

49. ვერცხლის წოწოლა ჯამი შემკობილობით.

50. სხვა ვერცხლის სადა ჯამები – 20.

51. ვერცხლის თასი მაღალის საფეხურით და მხედრულის წარწერით:

სულ : მქნელი :. ამისი . მანქარაშვილი ოტია

52. ბადია ვერცხლისა, დიდი დრობნიცით ფსკერში, მსგავსად დადემკელიანის ბადიისა ეწერში (ფოტ. №17153), შემკობილი 4 თვალით; მისი დიამეტრი უდრის 41 სანტ.

53. ვერცხლის თევში მხედრულის წარწერით:

ქ . წმიდის :. გიორგის ;. ილორის :. არის.

შიგნით ფსკერზე ხლართულის მხედრულით, ისე როგორც ლევან დიდი დადიანი ხელს აწერდა სიგელებზე, სწერია: „ლევან“. ცხადია, ეს ბადია ლევან დადიანის მიერ ყოფილა შეწირული ილორის ეკლესიისათვის, მე-17 საუკუნის პირველ ნახევარში.

54. ლახტი რკინისა, შვიდის ფრთით, შემკობილი ვერცხლის ჭდეებით (№17333), (ნ. უვაროვისა, გ. 141).

55. ცული საომარი ბრინჯაოსი, კელტური რიგისა; საფლავიდან უნდა იყოს ამოღებული (იქვე №17333); (უვაროვისა, გ. 142, სურათი 63). ასეთი ცულები ჩვეულებრივია კობანის სასაფლაოებში, ოსეთში.

56. ცული საომარი, რკინისა, რკინისავე ტარით, საფლავიდან უნდა იყოს ამოღებული (№17333).

57. **ცული საომარი**, რკინისა, ვერცხლის ჭდეებით (იქვე, №17333), უვაროვისა, გვ. 141, სურ. 64. ეს ცული ერთობ ლამაზი ნახელავია და, როგორც სამართლიანად შენიშნავს უვაროვისა, ხელისუფლების ღირსების აღსანიშნავად ატარებდენ; ალბათ ასეთი ცულით აღჭურვილი კაცი წინ უძღოდა მეფეს ან ერისთავს. მესამე ცული რკინისა, ალუბარდის ფორმისა; ნ. უვაროვისა, გვ. 141, სურ. 65.

58. **ვერცხლის ქამარი**.

59. **სამი ვერცხლის საწამლე** (თოფის წამლის შესანახი).

60. **სატეხი** ბრინჯაოსი, 16 სანტ. სიგრძით, რომელიც უვაროვისას მიუღია შუბის წვერად (გვ. 141, სურ. 66).

61. **ზანდუკი** ხისა მოხარატებული, რომელშიც ინახება სხვა და სხვა ყურსაკიდები ვერცხლისა, სადა, ტატილები, ფოლაქები, პატარა ჭურჭლები ვერცხლისა, ჭიქები სასმისი, პატარა ბოთლები და სხვა; ნაწილი ზანდუკისა იხ. უვაროვისა, გვ. 128, სურ. 42.

62. **დ. ბაქრაძე უჩვენებს კიდევ** საეკლესიო წიგნებს და მათ შორის მეტაფრასს ანუ წმიდათა ცხოვრებას, რომელნიც დღეს აღარ ჩანან.

მეორე ეკლესია ჟიბიანში არის **წა გიორგის ეკლესია**, ცოტა ქვემოდ ღვთის მშობლის ეკლესიისა, სოფლის თავში; ეს ეკლესია ქვისაა, პატარა, შემოზღუდული, როგორც პირველი ეკლესია. კანკელი აქაც ქვისაა, სამი კამარით ზემოდ. ამ ეკლესიაში ჩვენ ვნახეთ მხოლოდ:

1. **ხატი წა გიორგისა**, ვერცხლისა, ნაჭედი, 24X19,5 სანტ. მხედარი წარმოდგენილია ცხენით, საომარი ტანისამოსით; უკან წელზე ჰკიდია კაპარჭი, ისრებით სავსე და შვილდი, გამირავს გველეშაპს შუბით, რომელიც ჩაუჭვდია მის დაბჩენილს საშინელს ხახაში, თანაც ხელს ფართით იფარავს. ეზო და აშიები ხატისა სადაა (№17325). ხატი მე-17-18 საუკუნის უნდა იყოს.

2. **დიდი კანდელი** ხისა, ერთობ თავისებური, ჯვარის სახისა, ოთხი ხის ფეხით. თავი თავდება ხიდანვე გამოქანდაკებული ხარის თავით, ხოლო ბოლო ცხვრის თავით და კიდევ ახლავს მასკების მსგავსი ფიგურები; ზემოდ დარჭობილი აქვს ოთხი ხისაგან გამოქანდაკებული ტრედის ფიგურა (№17310), ასეთ ნივთს დ. ბაქრაძე გალიას უწოდებს, მაგრამ ეს კანდელის დანიშნულებას ასრულებდა. ამ ფიგურებზე აკრავდენ თავლის სანთლებს. კანდელი ჩამოკიდებული იყო წინეთ ყოველთვის საკურთხევლის წინ. წყალ კურთხევის დღეს ასეთი კანდელი იორდანეზე მიჰქონდათ. ასე აგვიხსნეს ამ ნივთის დანიშნულება ყველა ყოფილმა სვანეთის პაპებმა.

**მესამე ეკლესია ჟიბიანისა არის მაცხოვრისა**; სვანები ეძახიან: „უფალ“. ეს ეკლესიაც ქვისაა, პატარა, ქვის კანკელით, რომელზედაც სამი კამარა არის. ეკლესია მთაზეა შენებული, სოფლის ბოლოში, ხენარში. ეკლესიაში ჩვენ ვიპოვეთ:

1. ხატი წა გიორგისა, ვერცხლისა, 25X18 სანტ. მხედარი სრულის ტანით არის ჩვეულებრივად წარმოდგენილი, წარწერით :

წ-ღ გ-ი. ტლანქი ხელობისაა.

2. ხატი წა გიორგისა, ვერცხლისა, 23X11,5 სანტ. მხედარი ცხენით არის წარმოდგენილი, გმირავს ვეშაპს. წარწერა: წ-ღ გ-ი. სვანური ტლანქი ხელობისაა.

3. ხატი წის გიორგისა, ვერცხლისა, 30X22 სანტ. მხედარი ფეხოსანია, შუბით და ფარით. აშია მოძარცულია. სვანური ხელობისაა, მოტლანქო.

4. ხატი წის გიორგისა, ვერცხლისა, 16,5X13 სანტ. უკეთესი ხელობის არის, ვიდრე წინა ხატი.

5. ხატი წის გიორგისა, ვერცხლისა, 25,5X18,5 სანტ. მხედარი წარმოდგენილია სრულის ტანით, რომაულ საომარ ტანისამოსში, შუბით და ფარით. აშია რომბ-ლურსმულია. ხატი ადგილობრივი, სვანური ხელობისა არის, მაგრამ სხვებს სჯობია; დაზარალებულია.

6. ხატი მაცხოვრისა, ვერცხლისა, ოქროთ დაფერილი, 31X24 სანტ. მაცხოვარი წელსზევითია, სახარებით და მაკურთხეველის მარჯვენით. ხატი ერთობ დაზარალებულია.

7. ხატი მთავარ ანგელოზ მიქაელისა, ვერცხლისა, ნაჭედი, 16,5X12 სანტ. მთავარ ანგელოზი წარმოდგენილია ხმლით და წარწერით: მქლ მთ-გლზი. ხელობა სვანურია, ტლანქი.

8. ორი პატარა ვერცხლის ხატი მაცხოვრისა; გაფუჭებულია და ტლანქი; სვანური ხელობისა არის.

9. ჯვარი ხისა, 54,5X36 სანტ. შეძერწილია ვერცხლის ფირფიტებით; ტლანქი სვანური ხელობისა.

ყველა აქ ჩამოთვლილი ხატები სვანური ტლანქი ხელობისა ეკუთვნის მე-18 საუკ.

### სოფელი ჩვიბიანი (ჩვბიანი).

ამ სოფელში პატარა ეკლესია არის, ქვისავე კანკელით, რომელზედაც სამი კამარა არის, სურათი ეკლესიისა იხ. უვაროვისა, გვ. 63. სურ. 6. ეკლესიაში ჩვენ ვნახეთ:

1. **პატარა ხატი მაცხოვრისა**, ვერცხლისა, ნაჭედი, 18X14 მაცხოვარი წელსზევითია. აშიაზე სრულის ტანით წარმოდგენილია ზემოდ ღვთის მშობელი ჩჩვილედ, ქვემოდ წარწერაა ვულგარული ხუცურით:

ამს მწერალსა / გაბრლს ცო / დვნი : შოვენ ღ-ო .

ესე იგი: „ამის მწერალსა გაბრიელს ცოდვანი შეუნდვენ ღმერთო“.

2. **ხატი წმინდა გიორგისა**, 22X16 სანტ. წითელი ფერადებით არის დახატული ხეზე, ვულგარული ხუცურის წარწერით: წ. გიურგი (sic). ხელობა ერთობ ტლანქია, ადგილობრივი, სვანური, მე-19 საუკუნისა.

3. **ვერცხლის ჯამი მხედრულის წარწერით:**

ქ . გოპირბა : იტასა : ღმერთო : ახმრ .

4. **ჯამი ვერცხლისა**, არაბულის წარწერით. (ფოტოგრაფიაზე სამწუხაროდ, წარწერა არ გამოვიდა).

5. **ორი სხვა ვერცხლის ჯამი, უწარწერო.**

6. ათი დიდი სადა ღაწვზე ჩამოსაკიდებელი რგოლები, ვერცხლისა (რუსულად: „ვისოჩნია კოლცა“), ისეთივე რიგისა, როგორც ოსეთში გვხვდება.

შენიშვნა: სხვა ხატები, რომელნიც ამ ეკლესიაში დ. ბაქრაძეს უნახავს (გვ. 120-122) ეხლა მურყმელის ეკლესიაშია და თავის ადგილას იქნება ქვემოდ აღწერილი.

### სოფელი ჩაქაში

ამ სოფელში ორი ეკლესია არის. ერთი აწ უკვე გაუქმებული, წმიდის გიორგისა, თამარ მეფის ციხეში, ორს დიდ შავის ტუფით აშენებულ კოშკებს შუა. ეს პატარა ქვის ოთხკუთხედი ეკლესიაა, ქვის კანკელით, და უძახიან „ლაშკუდირ“. ჩვენ გვითხრეს, რომ ეს და სამების ეკლესია (უფალ) ჟიბიანის სოფლისა ოსებმა გაძარცვესო, და მართლა, ორთავე ეკლესიაში დარჩენილია უამრავი ხატის და ჯვარის ფიგურები მოძარცულნი.

მეორე შტატის ეკლესია არის **მაცხოვრისა**, ქვისაგან ნაშენი და ქვისავე კანკელით, რომელსაც მარტო ერთი კარი აქვს. ეკლესია სულ მოხატულია და საკმაოდ კარგად შენახული. თვით ფრესკებიც შედარებით კარგია. საკურთხევლის კონქში წარმოდგენილია ვედრება მთავარ ანგელოზებითურთ, ქვემოდ ეკლესიის მამები, ჯვარიანის ფილონებით, სულ ექვსი. ჩრდილოეთ კედელზე ჯვარცმა, ხარება, ღვთის მშობლის მიძინება და დანიელ წინასწარმეტყველი (ასეთივე წარწერით). სამხრეთ კედელზე: ამაღლება და ჯოჯოხეთის წარტყვენა, ფერისცვალება და ლაზარეს აღდგენა. დასავლეთის კედელზე: წმ გი და წმ თე. დასავლეთის ფანჯრის ორივე მხრით თითო წამებული მანდილოსანი (წარწერა მათი არ განირჩევა). წმ. ნინოს სურათი, რომელსაც იხსენიებს ა. ხახანაშვილი (გვ. 35), ჩვენ ვერ ვიპოვით და არც უნდა იყოს. ეკლესიაში ინახება:

1. ხატი დიდი მაცხოვრისა, 78X55 სანტ. მაცხოვარი დახატული ყოფილა ფერადებით, მაგრამ ფერადები ახლა სულ გადასულია; დარჩენილია ზემოთ ვერცხლის შემკობილობა ხატისა ვერცხლისავე ოქროთ დაფერილი დიდი ნიმბი ქრისტესი, ჯვარის სახედ გაყოფილი, სამი ძვირფასი ქვით წარმოდგენილის ნაჭრებით (№17342). დარჩენილია აგრეთვე აშიები, სანახევროდ ოქროთ დაფერილნი, მაგრამ ერთგვარი და ერთი დროის არ არის და ზოგი დაზიანებულია. აშიებზე წარმოდგენილნი არიან ზემოდ, ნიმბის გასწვრივ: სრულის ტანით წა თეოდორე (მარცხნივ) და წა გიორგი (მარჯვნივ); მათ ქვემოდ ღვთის მშობლის სურათებია, მაგრამ არა ერთგვარი; მარცხნივ წელსზევითი, მრგვალ მედალიონში, ჩჩვილეთი, ბერძნულის წარწერით; მარცხნივ უფრო დიდი სურათი წელსზევითი, უძეოდ, ხელებ-გაშვერილი, ვედრების სახით. ამის პირდაპირ, მარცხნივ ალბათ წინეთ იოანე ნათლის მცემელი იყო, როგორც ვედრების კომპოზიციის რიგია. მარცხენა აშიაზე, ქვემოდ, კიდევ ორი მედალიონია: ერთი მთავარ ანგელოზისა, გაფუჭებული, მეორე უწარწერო: ასეთივე უწარწერო მედალიონი მარჯვენა აშიაზეც არის. ქვემო აშიაზე მოსჩანს თავი წმიდანისა, დარჩენილი ასოებით, მარცხნივ „ი“ , მარჯვნივ „ლსს“. ზემო აშიაზე, შუაში, ღვთის მშობელია ჩჩვილეთი და მის აქეთ ორი წმიდა მხედარია ხმალ-ფარით. მარცხენა კუთხეში ღვთის მშობელია ჩჩვილეთი; მარჯვნივ, ვგონებ, მაცხოვარია. მარცხენა კუთხეში ჯვარისა მთავარ ანგელოზია; მარჯვენაში წი დ.ი. ხატი თავის ძველი ნაშთებით მე-12-13 საუკუნისა არის.

2. ხატი მაცხოვრისა, ვერცხლისა, ნაჭედი, 47X36 სანტ. მაცხოვარი წარმოდგენილია წელს ზევით, მაკურთხევლის მარჯვენით და სახარებით მარცხენა ხელში. ყდა სახარებისა შემკობილია ჯვარით და სიმრგვალებით. ეზო სადაა. წარწერა ზემოდ: იჰ ქე; ქვემოდ: იგივე ბერძნულის ასოებით. ნიმბი ჯვარის სახედ აქვს. ტანისამოსი მსხვილ ნაოჭიანია. აშია რომბ-ლურსმული, მოქცეულია ორს სხვა წერტილებით შემკობილ წრეებში (№17343). ქვემო აშიაზე ასომთავრული წარწერა:

„მცხოვარო : ცხოს : მყოფლო : მოხეყ : ჯდმს : სტრვენყელ-  
სა : წე : თქვენსა : “

ამ წარწერაში ასო ც ორივე შემთხვევაში გადმოზრუნებულია. ასო ო და უ დამწერლობის ხასიათით ერთგვარია. საკუთარი სახელები შემოკლებითაა მოყვანილი და ვინაითგან საყოველთაოდ ცნობილს სახელებს და გვარს არ შეიცავენ, ამიტომ ძნელია თქმა, როგორ უნდა წავიკითხოთ. ჩვენი ცდა ასეთია:

მაცხოვარო ცხოველს მყოფელო, მეოხ ეყავს ჯადუმს სა-  
ტარვანყელსა (?) წინაშე თქვენსა.

დ. ბაქრაძე (გვ. 123) კითხულობს, როგორც რუსული თარგმანიდან სჩანს: „ჯდამს, შვილსა სტრვენისა“. ფოტოგრაფიაზე წარწერა საუცხოოდ მოსჩანს და შემოწმება ადვილია. ხატი ჩვენის აზრით მე-15-16 საუკ. არის.

3. ხატი ღვთის მშობლისა ჩჩვილეთი. ყოფილა ფერადებით დახატული, მაგრამ ეხლა ფერადები გადასულია, დარჩენილია მისი ზემოთი სამოსელი ნიმბებით და

აშეები, რომელნიც ლამაზის ბალახის მსგავსი ორნამენტებით არის შემკობილი (№17344). აშეებში სადა სიმრგვალებია; ქვემოდა ასომთავრული წარწერა:

1. ყვლადა წ-ო ღვთის მშობელო, შეგვწყალენ სულიერადა და ჯორ-
2. ციელადა სასუებით მვედრებელნი შენნი წახანელ
3. ის ძე ვახტანგ :: და მეულლე ჩემი ხუაშაქი ::

უქარაგმოდ:

„ყოვლადა წმიდაო ღმრთის მშობელო, შეგვწყალენ სულიერადა და ჯორციელადა სასუებით მვედრებელნი შენნი წახანელის ძე ვახტანტ და მეულლე ჩემი ხუაშაქი“.

ხატი მე-12-13 საუკ. არის. გვარი წახანელის ძე ცნობილი არ არის. დ. ბაქრაძე (გვ. 123) მას უფარდებს ძაგანის ძეს, რომელიც ცნობილია თამარ მეფის დროს. (იხილე ქართლის ცხოვრება, I, 283, H.G. I. 410), მაგრამ ეს საეჭვოა.

4. ხატი მთავარ ანგელოზისა, ვერცხლისა, 28,5X21 სანტ. მთავარ ანგელოზი სრულის ტანით არის წარმოდგენილი, შუბით და ბურთით. აშია ფართოა, რომბ-ლურსმული; ხელობა სვანურია, ტლანქი, მე-18 საუკ. (№17344).

5. ხატი ღვთის მშობლისა, ვედრებისა, 23X16,5 სანტ. (№17345). დახატული ყოფილა ფერადებით, მაგრამ ფერადები გადასულია, დარჩენილია შემოსილობა ოქროსი, კარგის კლასიკური ხელობისა: ნიშბი და აშეები შემკობილია რომბ-ლურსმული ორნამენტით და მედალიონებით. ოთხს ოთხკუთხედა მედალიონში სახეები წმიდანებისა, მრგვალები სადაა. ქვემოდა დარჩენილია ნაწყვეტი ასომთავრული წარწერისა:

„... ღთსო : მოხე / . . სა შნსა ხექებლსა ზ-სლ“.

სიტყვების აზრით დამატებით წარწერა შეიძლება ასე წავიკითხოთ:

[წმიდაო დედაო] ღმრთისაო, მეოხ ე-  
[ქმენ მოსავ]სა<sup>1</sup> შენსა ხექებლსა (?) ბასილს.

ა. ხახანაშვილი (გვ. 35) არ იხსენიებს, რომ წარწერა ნაკლულია და კითხულოს და თარგმნის წარწერას ასე: „დედაო ღმრთისაო მეოხ ყყავ მამკობელსა შენსა“. ხატი მე-13 საუკ. უნდა იყოს

6. ხატი მთავარ ანგელოზისა, ვერცხლისა, ოქროთ დაფერილი, ნაჭედი, 25X17 სანტ. მთავარ ანგელოზი წარმოდგენილია სრულის ტანით, ლაბარუმით და ბურთით; ეზო სადაა; აშეები შემკობილია ბროწეულის ყვავილების მსგავსი ორნამენტით; ქვემო აშია მოძარცულია (იქვე, №17345). ხატი მე-13-14 საუკ. უნდა იყოს.

7. ხატი მთავარ ანგელოზის მიქაელისა, ვერცხლისა, ნაჭედი, 23X17,5 სანტ. აშიები რომბ-ლურსმული, რვა სადა მრგვალი მედალიონით ფოლაქისებურ წრეებში. მთავარ ანგელოზი წარმოდგენილია სრულის ტანით, ლაბარუმით და ბურთით. ხელობა ისეთია, როგორც წინა ხატისა (იქვე, № 17345). წარწერა სახელისა: წ-მ მ-ქლ.

8. ხატი მთავარ ანგელოზისა; ფერადებით ყოფილა დახატული; ფერადები ეხლა სულ მოსკობილია; დარჩენილია ნიშბი და აშიები, ოქროთ დაფერილი, 19 X13,5 სანტ. აშიები რომბ-ლურსმული, მრგვალი, სადა მედალიონებით. ხელობა ისეთია, როგორც წინა ხატისა (იქვე, № 17345).

9. ხატი წ-თ ანასი, ეკატერინესი და ბარბარესი, 47X40,5 სანტ. ფერადებით დახატული; ფერადები დაზიანებულია. სურათი ანასი უკეთ არის შენახული, ლამაზი ხელობისა; აშიები ვერცხლისა, რომბ-ლურსმულის შემკობილობით და რვა მრგვალი მედალიონით წმიდათა. ზემოდ ვედრებაა და მთავარ ანგელოზნი; ქვემოდ წმიდა მხედარნი (№17335). მე-14 საუკ. უნდა იყოს.

10. ხატი ჯვარცმისა, ვერცხლისა, ნაჭედი, 28X23 სანტ. აქეთ-იქით ჯვარცმულისა მოსჩანან ღვთის მშობელი და იოანე; ჯვარცმულის ფეხ ქვეშ ადამის თავი; მას ქვემოდ მრგვალი მედალიონი ღვთის მშობლისა ბერძნულის წარწერით სახელისა. ასეთივე მედალიონები რომბ-ლურსმულ აშიებზე; მარჯვენა აშიაზე წ-მ პ-ე; მარცხენაზე მთავარ ანგელოზი (№17360). ხატი კარგად არის დაცული. უნდა ეკუთვნოდეს მე-14 საუკუნეს.

11. ხატი მაცხოვრისა, ვერცხლისა, ნაჭედი, 26,5X20 სანტ. მაცხოვარი ტახტზე მჯდომარეა სახარებით და მაკურთხეველის მარჯვენით. ნიშბი ჯვარის სახის აქვს;

1 ან მამკობელსა.

წარწერა სახელისა ბერძნულია; აშიები რომბ-ლურსმული ორს, ფოლაქების მსგავს, წრეშია მოქცეული (იქვე, №17360).

12. ხატი მთავარ ანგელოზისა, ვერცხლისა, ნაჭედი, 28X21 სანტ. ხატი ტლანქი ხელობისა, სვანური, მე-18 საუკ. აშია სამი კედრით მომარცულია, მეოთხეზე ორმაგია, ერთი ვიწრო ტალღისებური, მეორე – უფრო ფართო, ბალახის მსგავსი შემკობილობით. (იქვე, №17360).

13. პატარა ხატი მაცხოვრისა, 13X16 სანტ. ყოფილა წამლით დახატული, მაგრამ ფერადები გადასულია; სამოსელი და აშიები ვერცხლისა; ნიშბი ჯვარის სახედ არის. წარწერა ბერძნულია (იქვე, №17360).

14. ხატი მაცხოვრისა, ვერცხლისა, ნაჭედი, 14,5X11,5 სანტ. წარწერა: მ-წ ქ-ე. ქრისტე წელს ზევითია. ნიშბი ჯვარის სახედ აქვს, აშიები ორმაგი ფოლაქისებური და მათ შუა კიდევ სხვა შემკობილობანი (იქვე, №17360). მე-17 საუკ. უნდა იყოს.



15. **ხატი მაცხოვრისა**, ვერცხლისა, ნაჭედი, 23,5X 16 სანტ. ქრისტე წელს-ზევითა, მაკურთხეველის მარჯვენით და სახარებით მარცხენა ხელში. სახარება ჯვართით არის შემკობილი. ნიმბი რომბ-ლურსმულია, ორმაგი წერტილებიანი წრეებით (№17352); ქვემოდ ასომთავრულით სწერია:

ქ . ქე : ლამარტოლისაო<sup>1</sup> : მგ

არველ : გუეყავ . მად

იდებელთა შენთა : მაცხოვარო : დ-თ

უქარაგმოდ:

ქრისტე ლამარტოლისაო, მფარ-

ველ გუეყავ მადიდებელთა

შენთა, მაცხოვარო ღმერთო.

ხატი კარგად არის დაცული და უნდა ეკუთვნოდეს მე-16 საუკუნეს.

16. **ხატი მაცხოვრისა**, ვერცხლისა, ნაჭედი, 20X16 სანტ. მაცხოვარი მაღალ ტახტზე ზის მოქარგული მუთაქით, მარჯვენა ხელით აკურთხებს, მარცხენაში სახარება უჭირავს; ნიმბი ჯვარის სახის არის; აქეთ-იქით რგოლებში სახელი: ძჳ ქე. ეზო სადაა, აგრეთვე აშიები, მაგრამ კუთხეებში აშიებისა „დედა ღვთისა“ მედალიონებში, ხოლო ეს მედალიონები სანახევროდ ჩამოჭრილია (იქვე №17352). ხატი მე-16 საუკ. უნდა იყოს.

17. **ხატი წა გიორგისა**, ვერცხლისა, ნაჭედი, 26X17 სანტ. მხედარი ფეხოსანია, რომაულ საომარ ტანისამოსით და ნიმბით; მარჯვენა ხელში შუბი უჭირავს, მარცხენა გრძელს ფარზე აქვს დადებული. წარწერა: წ-ი გ-ი. აშიები ოთხკუთხედად დაყოფილი, რომბ-ლურსმულია (№17352). მე-16 საუკ. უნდა იყოს.

18. **ხატი წ დიმიტრისა**, ვერცხლისა, ოქროთ დაფერილი, ნაჭედი, 21X14,5 სანტ. წმიდანი წარმოდგენილია ახალგაზრდათ, ფეხზე, საომარ რომაულ ტანისამოსში; წელზე უკან ხმალი ჰკიდია; მარჯვენა ხელში შუბი უჭირავს; მარცხენა მოგრძო ფარზე უძევს. წარწერა: წა დ რი. აშია რომბ-ლურსმული; ქვემო და მარცხენა მხარეს ნახევარი აკლია. აშიები შემკობილია სიმრგვალებით. ქვემოთ უწერია:

წო დ რი შე : გ ი რო .

ესე იგი: ”წმიდაო დიმიტრი, შეიწყალე გიორგი რო”, ანუ რუ (იქ. №17352). ხატი მე-14 საუკ. უნდა იყოს.

19. პატარა **ხატი წა გიორგისა**, ვერცხლისა, ოქროთი დაფერილი, 13,5 X9 სანტ. წმიდა გიორგი წარმოდგენილია ფეხზე მდგომარედ, შუბით და ფარით. ხელობა

---

<sup>1</sup> უნდა იყოს: ჰამარტოლისაო, მაგრამ ასო ლ გარკვეულად სწერია; იხ. ფოტოგრაფია.

მდარეა, მე-18 საუკ. წარწერა: წ ი გ ი.

20. ხატი პატარა წ-ა გიორგისა, 16X12 სანტ. დახატულია ფერადებით, ლამაზი ხელობისა. წმიდანი მდგომარეა და აქვს წარწერა: „წ-ა გ-ი ხუამლისა“. მე-17 საუკ. უნდა იყოს.

21. სულ დაშლილი ვერცხლის ხატი ორთა წმიდათა, ოქროთ დაფერილი, 20X15 სანტ. წმიდათა შუა ორი მედალიონია; ქვემოდ ერთი ფიგურა, ვედრების პოზით. ხელობა დაბალია.

22. ხატი პატარა, ღვთის მშობლისა, ვერცხლისა, ნაჭედი, 10,5X8,5 სანტ. ამიები შემკობილია ფოლაქების მსგავსად; მდარე ხელობისაა.

23. ჯვარი, დიდი, გამოსასვენებელი (№17336), 38X32 სანტ. ხეტარით; დაშლილია და შემდეგ შეკრული ჯაჭვით, თან ახლავს ჩამოკიდული მრავალი მძივის მარცვლები, ტატილები და ჩანჩხურები. წინა პირზე ჯვარცმაა წარმოდგენილი და გაფართოებულ ფრთების ბოლოში მედალიონებია წმიდათა; ზემოდ მაცხოვარი; მარცხნივ და მარჯვნივ წმიდანი მხედარნი; ქვემოდ მოციქული; ჯვარი ხეტარზე ბურთით არის დასობილი. მეორე გვერდზე (№17337) ოთხი მედალიონია წმიდათა; ზემოდ წ-ა პეტრეა; მარჯვნივ წ-ა გ-ი; მარცხნივ წ-ა დიმიტრი (?), ქვემოდ ვგონებ, პავლეა. ქვემო ტარზე ვულგარული ხუცური წარწერის ასოებია.

24. ჯვარი შუათანა ზომისა, შეჭედილი ვერცხლის ფირფიტებით წმიდანებისა, არა უმნო ხელობისა. ზემოდ ლამაზი გამოხატულებაა იესო ქრისტესი.

25. ჯვარი შუათანა ზომისა, შეჭედილი ვერცხლის ფირფიტებით, გვარიანი ხელოვნებისა. უმბოს ყოველ მხარეს მთავარ ანგელოზებია და მოციქულები; ქვემოდ: ღვთის მშობელი წელსზევითი და ქრისტე სრულის ტანით. ზემოდ მთავარ ანგელოზი. ქვემოდ ხუცურად აწერია:

ქ. ნასრეთისა ღის მ	ნასრეთისა ღმრთის მშო-
მშობელო : შ-ე იე	ბელო, შეეწიე იოანე
ჭაბიანსა და მ	ჭაბიანსა და მე-
უღლესა მისსა	უღლესა მისსა
თაზასა : და ძეთა მისთა :. ან	თაზასა და ძეთა მისთა, ამინ.

26. ჯვარი შუათანა ტანისა; შეჭედილია უფრო მდარე ხელობის ვერცხლის ნაჭრებით, ვიდრე პირველი ორი.

27. პატარა ხატი ღვთის მშობლისა, კარედი, 26,5X19 სანტ. კარებზე წარმოდგენილნი არიან მთავარ ანგელოზები. შუა ნაწილზე ყოფილა ფარდებით დახატული ღვთის მშობელი, კარგი ნახელავი, მაგრამ ეხლა დაზიანებულია.

28. სამი ვერცხლის სადა ჯამი.

29. ბუკი ანუ საყვირი, სპილენძისა, გრძელი; იხ. უვაროვისა, გვ. 141, სურ. 67.

## სოფელი მურჭმერი (მურყმერ).

ამ სოფელში ორი ეკლესია არის, ერთი შტატისა, მაცხოვრისა; მეორე – სოფლის დასასრულს – წმიდა ბარბარესი. ეკლესია მაცხოვრისა ქვისაა, ქვისავე კანკელით. ამ კანკელში სამი კამარა არის და კამარები იწყება თვით იატაკიდან. კედლებზე ემჩნევა ნაშთები ფრესკებისა; უკეთ მოსჩანან დასავლეთის კედელზე: ნათლის ღება და ჯვარცმა. ეკლესიაში ნივთები ბევრია.

1. **ჯვარი**, კანკელის საწინავე, ფრიად მაღალი, თითქმის 4 არშინი; შექმნილია ვერცხლის ფირფიტებით, რომლებზედაც წმიდათა სახეები საკმაოდ ტლანქებია.

2. **ჯვარი** შუათანა ზომისა, აგრეთვე შექმნილი ოქროთი დაფერილი ფირფიტებით; ტლანქი ხელობისაა.

3. **ჯვარი** გამოსასვენებელი, ხეტარით, ვერცხლისა, ნაჭედი. წინა პირზე წარმოდგენილია ჯვარცმა, მაგრამ ჯვარცმული სრულებით არ ჰგავს ჩვეულებრივად წარმოდგენილს ქრისტეს, არამედ სულ დაბალ ტანის ახალგაზრდას (№17340); ზედ აწერია: „[ძ]ელც“ (resp. ძელცმა); მარცხენა ფრთაზე მთავარ ანგელოზია გამოხატული; მარჯვენაზე – იოანე, წარწერით: „წი იო“. ზემოდ: მაცხოვარი სახარებით და მაკურთხევლის მარჯვენით; წარწერა ბერძნული აქვს; ქვემოდ გაბრიელ მთავარ ანგელოზია: წმ გ. ხელობა ტლანქია. მეორე გვერდიც ჯვარისა ნაკლებად საყურდღებოა; აქ ბაწრისებური შემკობილობა არის და ოთხივე ფრთაზე ჯვარის სახეები (№17341); აგრეთვე ვულგარული ხუცური წარწერა, გაუგებარი.

4. მეორე, გამოსატანი **ჯვარი**, მალტის წმ. გიორგის ჯვარის სახის არის, ხისა, შექმნილია ვერცხლის ფურცლებით, მკრთალად და ტლანქად გამოსახული ჯვარცმულებით და სხვათა წმიდათა.

5. **ხატი მაცხოვრისა**, ოქროთი დაფერილი ვერცხლისა, ნაჭედი, 44X33 სანტ. მაცხოვარი ტახტზე ზის მუთაქით, მაგრამ ტახტს ზურგი არა აქვს. მარჯვენა ხელით აკურთხებს, მარცხენაში სახარება უჭირავს. ეზო სადაა; ზემოდ ჯვარის სახის დრობნიცებში წარწერა ბერძნულად არის. აშიები ბალახისებური შემკობილობით არიან მორთულნი. მათში 10 მედალიონია, რომლებზედაც ტლანქად შესრულებული წმიდათა სახეებია. ზემოდ ვედრებაა, აქეთ-იქით მთავარ ანგელოზნი; ქვემოდ – წმიდანი მხედარნი (№17353). ხატი მე-16 საუკ. უნდა იყოს.

6. **ხატი მაცხოვრისა**, ვერცხლისა, ნაჭედი, 44X35 სანტ. მაცხოვარი წარმოდგენილია სრულის ტანით, მღვდლის ტანისამოსით, მარჯვენა ხელით აკურთხებს, მარცხენაში სახარება უჭირავს და თუმცა სახარება გაშლილი არ არის, მაგრამ ყდაზე აწერია : : „მე ვარ ნათელი სოფლისა“. სახე მაცხოვარისა ხანშესული კაცისაა. მის ორივე მხარეს მთავარ ანგელოზებია, უფრო მოკლე ტანით, შუბებით და ბურთებით; მარცხნივ – მიქელ, წარწერით: „მიქელ მთავარ ანგელოზი“, მარჯვნივ:

„გაბრიელ მთავარ ანგელოზი“. ქრისტეს ნიშნის ორივე მხარეს – წარწერა ჯვარისებრ წრეში: ი-სო ქე. ეზო და აშიები მოცულია ბალახისებური შემოკლებით. აშიებზე მედალიონებია წ-თა. მარჯვნივ და მარცხნივ – წმიდანი მხედარნი, სრულის ტანით; ქვემოდ შუაში, ვგონებ, იონა; კუთხეებში – მთავარ ანგელოზნი; ზემოდ მთავარ ანგელოზნი და სხვა (იქვე, №17353). ხელობა ქართულია. მე-16 საუკუნის უნდა იყოს.

7. **ხატი მაცხოვრისა**, ვერცხლისა, ნაჭედი, 42X36,5 სანტ. (№17351). შუაში გამოსახულია ჯვარი გოლგოთაზე დამყარებული; მის ზემოდ იესო ქრისტე წელსზევითი, მაკურთხეველის მარჯვენით და სახარებით. მას აწერია: ძ-ჟ ქე. აქეთ-იქით ქრისტესა ორი წმიდა დედაა სრულის ტანით: სახელები არ აწერია; ქვემოდ, ჯვარის მარცხნივ: წ-ა ა-ნა; მარჯვნივ დ-დ ღ-ღ. აქ ღვთის მშობელი მაღალ ტახტზე ზის ძითურთ, რომელსაც თითქოს ძუძუს აწოვებს; ტახტის სვეტების თავები ფიგურებით არის შემკობილი, ვგონებ, მთავარ ანგელოზთა, აშია ყვავილოსანია, მედალიონებით. ზემოდ სამი მრგვალი მედალიონი ვედრების კომპოზიციას წარმოადგენს. გვერდებზე წმიდანი მხედრებია სრულის ტანით, შუბით და ფარით. ხელობა ქართულია, მე-16 საუკუნის უნდა იყოს.

8. **ხატი მაცხოვრისა**, ვერცხლისა, ნაჭედი, 23X18 სანტ. მაცხოვარი წელსზევითია, ჩვეულებრივის პოზით. აშიები რომბ-ლურსმული; ქვემო და მარჯვნივ აკლია. ხელობა ტლანქია; წარწერაც არა ჩვეულებრივი ხუცურ-ბერძნული. მარჯვნივ: ი-ო და ბერძნული ხ; მარცხნივ ჯ-ღ (გადმობრუნებული) ძ-ჯს მაგიერ. მე-18 საუკუნის უნდა იყოს. (№17350)?

9. **ხატი მაცხოვრისა**, ვერცხლისა, 18X14,5 სანტ. მაცხოვარი ტახტზე მჯდომარეა; მარჯვენა ხელით აკურთხებს, მარცხენა სახარებაზე აქვს დადებული; სახარება მუხლზე უძევს. აქეთ-იქით მთავარ ანგელოზებია მთელის ტანით, ლაბარუმებით და ბურთებით; ქვემოდ დაჩოქილი მანდილოსანი ფეხს ჰბანს ქრისტეს. ერთობ ტლანქი, მახინჯი ნახელავია. (№17349).

10. **ხატი მაცხოვრისა**, ვერცხლისა, ნაჭედი, 18,5X14 სანტ. მაცხოვარი წარმოდგენილია წელს ზევით, სახე ხანშესული კაცისა აქვს; მარცხენა ხელში დიდი სახარება უჭირავს, მარჯვენით აკურთხებს; აშია სიმრგვალებით და წერტილებით არის შემკობილი; მარჯვენა მორღვეულია. ნიშნი ჯვარის მსგავსი. წარწერა ხუცური; მარცხნივ: ქე (უკანასკნელი ასო შებრუნებულია) და მას ზემოდ: დ. მარჯვნივ: „ვსბ“. მე-17 -18 საუკუნის უნდა იყოს. (№17347)?

11. **ხატი მაცხოვრისა**, ვერცხლისა, ნაჭედი, 23X18 სანტ. აშიები რომბ-ლურსმული. მაცხოვარი ტახტზე მჯდომარეა, ჩვეულებრივი პოზით; მაგრამ ერთობ ტლანქი და ფრიად მახინჯი გამოხატულება აქვს. წარწრა ვულგარული: ი-ჟ ქე. (№17347)?

12. **ხატი მაცხოვრისა**, ვერცხლის, 21X15 სანტ. წვრილ რომბ-ლურსმულის აშიებით. მაცხოვარი ტახტზე მჯდომარეა ჩვეულებრივის პოზით. ზემოდ: წარწერა: ძს ქე. ტლანქი ხელობისაა. (№17347)?

13. **პატარა ხატი მაცხოვრისა**, ვერცხლისა, 12X10 სანტ. მაცხოვარი არის მთელის ტანით წარმოდგენილი, სახარებით და მაკურთხევლის მარჯვენით. წარწერა სახელისა ბერძნული ასოებით არის. აშია მოკაზმული ორ ფოლაქოვან წრეებს შუა დაბალი ხელობისაა, მაგრამ წინა ხატზე უკეთესი.

14. **ხატი მაცხოვრისა**, წელსზევითი, მცოვანი კაცის სახით, ვერცხლისა, ნაჭედი, 22X20 სანტ. მარცხნივ ქრისტესა არის დედა ღვთისა; მარჯვნივ იოანე; ზემოდ, მედალიონებში: მაცხოვარი და ორი მთავარ ანგელოზი; ქვემოდ ამ სახისავე მრგვალ მედალიონებში ორი მთავარ ანგელოზი. დაბალი ხელობისაა (ნ. 17350)?

15. **ხატი მაცხოვრისა**, ფერადებით დახატული; ბერძნულის წარწერით სახელისა; ფოლაქისებური აშიებით; მე-17 საუკუნის უნდა იყოს. (17350)?

16. **ხატი კარედი წინასწარმეტყველის ილიასი**; ყოფილა წამლით დახატული, მაგრამ ფერადები შუა ნაწილისა, სადაც სამი სახე ყოფილა, გადასულია, ხოლო ზემოდ, ოქროს შესამოსელის ნაწილზე, აწერია სახელი შუა ყოფილი ფიგურისა: „წდელი“. კარებზე მხატვრობა შერჩენილია, ნამეტნავად კარგად არის დაცული მარჯვენა კარზე მიქელ მთავარ ანგელოზი, წარწერით: „მქლ“. მარცხენა კარზე გაბრიელ მთავარ ანგელოზია: „გბრლ“. (№17338). შემოსილობა ხატისა ოქროსია; შემკობილობა ბალახოვანი ხლართულებით, ლამაზი. ხატი ეკუთვნის მე-12-13 საუკუნეს. მეორე გვერდზე ჯვარია გამოსახული ლამაზ ხლართულებში და კარგად დაცული წარწერაა ასომთავრულით (№17339):

წ ჯვარო : პა	წ ჯუარო პა-
ტი ოს	ტიოს-
ანო და ყვლოთა წმდა	ანო და ყოველოთა წმიდა-
თა : მდ	თა მად-
ლო ყვლისა ცდვს . გან-	ლო, ყოვლისა ცოდვისაგან
განწმიდ ე მშვრე გი	განწმიდე, მაშოვრე, გიორგი
ნსტაი	ნასტაი(?),
ან ჭა	ამინ. ჭა-
ბღს : ჩმსა	ბუღს (ანუ ჭაბაღს) ჩემსა
მვღლ	მეუღლე
ფსა	(ყო)ფილსა, (შეუნდვენ).

დ. ბაქრაძეს წარწერა შეცდომით აქვს მოყვანილი და როგორც მისი თარგმანიდან ცხადდება, აზრიც გაუგებარი დარჩენია (გვ. 121-122). ა. ხახანაშვილი ამ წარწერას სრულიად არ იხსენიებს (გვ. 35).

წარწერის დამწერს ადგილი არა ჰყოფნია და ამიტომ უკანასკნელი ორი სიტყვა ფრიად შეუმოკლებია და ბოლოში ზმნაც გამოუშვია; ამიტომ ამაებს აზრის მიხედვით ჩვენ ფრჩხილებში ვუმატებთ. საკუთარი სახელები **ნსტაი** და **ჭაბღს** არ გულისხმობენ საზოგადოთ ცნობილ სახელებს და ამიტომ ძნელია თქმა, როგორ უნდა წავიკითხოთ შეუმოკლებლად. ჩვენ ვკითხულობთ: ნასტაი და ჭაბუღს, მაგრამ შეიძლება იყოს: ნესტაი, ჭაბაღს ან სხვა.

დიმიტრი ბაქრაძე „ჭა“-ის მაგიერ კითხულობს „და“; თუ მის კითხვას მივიღებთ, მაშინ სიტყვა უნდა ნიშნავდეს: დაბალს, მაგრამ აქ დ-ს მუცელი შეკრული არა აქვს და ამიტომ არ შეგვიძლია ის დ-ნად მივიღოთ. დ. ბაქრაძე არ უჩვენებს აგრეთვე დასაწყისს ასოს წარწერისა, რომელიც, ჩვენი აზრით, ხუცური ზ არის (№17339).

17. ხატი ღვთის მშობლისა, ვედრებისა, 19X15 სანტ. ყოფილა ფერადებით დახატული; ფერადები უკვე გადასულია; დარჩენილია კლასიკური დროის ნიმბი და აშია მარჯვნივ, ლამაზად შემკობილი ბროწეულის ყვავილების მსგავსი ორნამენტით. წარწერა ბერძნული აქვს სახელისა (№17349). ხატი მე-12-13 საუკ, არის.

18. ხატი ღვთის მშობლისა ჩჩვილელი, 19X15 სანტ. ყოფილა ფერადებით დახატული, მაგრამ ფერადები გადასულია. შემკობილობა ხატისა, ნიმბები, აშიები ოქროთ დაფერილი ვერცხლისა არის ნაზი ხელობისა, მე-13-14 საუკ. სურათი წელზევითია, ნიმბი ჯვარის სახედ არის; აშიები დაყოფილია კვადრატებად და შემკობილი პალმეტებით (№17347). მეორე გვერდზე ასომთავრული წარწერაა ჯვარის ირგვლივ, საკმაოდ უთავბოლო და არა ადვილად გასაგები, თუმცა ასოები კარგად არის შენახული<sup>1</sup>. წარწერა ჯვარით ორად იყოფა, მარცხენა და მარჯვენა ნაწილად; დ. ბაქრაძე ერთად კითხულობს ორივე ნაწილს წარწერისა და ამიტომ მას შინაარსი გაუგებარი რჩება. (გვ. 120-121). ა. ხახანაშვილი წარწერას სრულიად არ ახსენებს. აქ სწერია (№17365).

ჯვარის მარცხნივ:	ჯვარის მარჯვნივ:
ქ დედაო : ღმ	ძისა შენი
ართსაო შ	სა მალე
ეიწყალე	სა
და მამაი	დედაო : ღ
და : შალიკა	მრათის
სა : ცოდვა	აო .:
ნი : მათა	
ნი	

ამ წარწერაში ზოგიერთი ასოები შებრუნებულია და გვხვდება ხორცმეტი ასოებიც: ღმრათისაო, ღმრთისაო-ს მაგიერ; მარჯვენა წარწერაში იგივე სიტყვა ასეთი ფორმითაა წარმოდგენილი: ღმრათისაო; მათანი, მათნი-ს მაგიერ; ამას გარდა, მეორე

<sup>1</sup> ფოტოგრაფიაზე წარწერა თავუკუღმა არის გამოსული.

წარწერის სიტყვა **მალესა**, რომელიც დ. ბაქრაძეს საკუთარ სახელად მიუღია, ჩვენის აზრით, უნდა იყოს შემცველი სიტყვისა: **მადლსა**. გადაჭრით თქმა ძნელია „და“ სიტყვის წინ მამაი ცალკე სიტყვად ესე იგი კავშირად მივიღოთ, თუ უნდა შემდეგ ჯგუფს მივუმატოთ. პირველ შემთხვევაში გამოვა ორი სიტყვა: და მამაი, თუმცა აქ „და“ ზედმეტია; მეორე შემთხვევაში: დამამაი, როგორც ერთი სიტყვა, საკუთარი სახელი. მამაი, როგორც საკუთარი სახელი არსებობს, ხოლო დამამაი არ შეგხვედრია.

ამას გარდა, მარცხენა წარწერას ბოლოში ზმნა აკლია და ფრაზა დამთავრებული არ არის. აქ უნდა მივუმატოთ: „შეუნდვენ“.

ამ შენიშვნების შემდეგ, ჩვენის აზრით, წარწრა ასე უნდა წავიკითხოთ:

„ქ. დედაო ღმრთისაო, შეიწყალე დამამი (ანუ მამაი).

და შალიკასა ცოდვანი მათნი (შეუნდვენ), ძისა შენისა

მადლსა, დედაო მღრთისაო“.

19. ხატი პატარა, ღვთის მშობლისა, ვედრებისა, წელსზევითი, 22X10 სანტ. ვერცხლისა, ნაჭედი, წარწერით: „ღ მ ღ მ“. სახე ქართულია; აშია შემკობილი (№17346). მე-16-17 საუკ. უნდა იყოს.

20. ხატი ღვთის მშობლისა ჩჩვილედის, ვერცხლისა, ნაჭედი, 12,5X11 სანტ. აშია ლამაზად შემკობილია. წარწერა: „დედა ღთს“; ძეს ბერძნული წარწერა აქვს; ხელობა მე-134-14 საუკ. (იქვე, №17346).

21. ხატი პატარა ღვთის მშობლისა, ვედრებისა, (№17338), ოქროთ დაფერილი ვერცხლისა, ნაჭედი; უფრო უკეთესი ხელობისაა, ვიდრე წინა ხატი. ღვთის მშობელი წელსზევითია. წარწერა: „ვდრბსა ღთის მშბლი“. აშიები ნაზი, ტალღისებური შემკობილობით არის (№575. აქ ჩვენ ვუჩვენებთ არა პირველ ნომერს, არამედ მეორე ბოლო ნომერს). მეორე გვერდზე ჯვარია გამოხატული და ჯვარის ირგვლივ ასომთავრული წარწერა (ნ. 17339):

: ქ : დედაო : ღთისაო : მეოხ

მეწმენ : წე : ძესა :

შენსა : მამძკბსა

ხა ტს

ა : შენისასა :. დღ

ესე :. განკითხვ

სა :. ოღნოსა : შვ

ლსა : საღირს

დედაო ღმრთისაო, მეოხ

მექმენ წინაშე ძესა

შენსა მამძკობსა

ხატისა

შენისასა დღე

სა განკითხვი-

სა ოღნოსაშვილ-

სა საღირს.

თარმანში ამ წარწერისა დ. ბაქრაძეს ოღნოსა (მისი კითხვით ოღნო) მიუღია საღირისშვილად (გვ. 121).

22. ხატი ღვთის მშობლისა, კარედი, 14X12 სანტ. ყოფილა წამლით დახატული, მაგრამ ფერადები გადასულა, უმთავრესად კარებზე, რომელზედაც გარედან წარმოდგენილი ყოფილა ორი წმ. დიმიტრი; წარწერა ორივესი დაცულია: წ მ დ ე. შუა ნაწილზე ღვთის მშობელი ყოფილა, წარწერით: დღ მ ღ მ. კარებზე შიგნიდან ყოფილა ორი წმიდა დედაკაცი. სამოსი ხატისა და მოკაზმულობა ოქროთ დაფერილი ვერცხლისაა, ლამაზი, ნაზი ხელობისა, მე-13-14 საუკ. მეორე გვერდზე წარმოდგენილია ჯვარი, წმ. ანნა და წმ. დიმიტრი, სრულის ტანით. ამის ფოტოგრაფია სამწუხაროდ გაფუჭდა და არა გვაქვს.

23. ხატი წმ. იოანესი, ვერცხლისა, ნაჭედი, 14X15 სანტ. წმიდანი წარმოდგენილია სრულის ტანით, ვედრების პოზით, ხელებგამვერილი და წარწერით: წ მ დ ე. აშია ბალახოვანი ორნამენტების არის. ხელობა მე-17 საუკ. უნდა იყოს. (№17346).

24. ხატი წმ. იოანესი, ვერცხლისა, 9X7 სანტ. წარწერით: წმ იე; უფრო ტლანქი ხელობისაა, ვიდრე წინა ხატი; მე-18 საუკუნისა.

25. ხატი უცნობი წმიდანისა, ვერცხლისა, ნაჭედი, 15X12 სანტ. შუაში წმიდანი წარმოდგენილია მღვდლის ტანისამოსით და ჯვართ ხელში; აქეთ-იქით მთავარ ანგელოზები უდგანან სრულის ტანით და შუბებით. ზემოდ სამი მედალიონია წელსზევითი სურათით ქრისტესა: ძვ ქე, და კიდევ რაღაც სხვა წარწერა. (№17348).

26. ხატი წა გიორგისა, ოქროთ დაფერილი ვერცხლისა, ნაჭედი, 23X18 სანტ. მთავარ მოწამე წარმოდგენილია რომაულ სამხედრო ტანისამოსით; მარჯვენა ხელი მახვილის ვადაზე უძევს, რომელიც წელზე ჰკიდია, მარცხენა ხელი მოგრძო ფარზე დაუდვია; მარჯვნივ აყუდებულია შუბი, რომელსაც ის იდაყვით ეხება. თმა ხუჭუჭი აქვს. ნიშნის აქეთ-იქით სიმრგვალებში წარწერა: წმ გ. აშიები სიმრგვალებით და ბალახის მსგავსად არის შემკობილი. ხელობა ახალია, მე-18 საუკ. მეორე ნახევრისა.

ქვემოდ უწერია (№17351):

ქ წო : გ.დ : მცხეთსაო : წე : ჰევი :

მცხეთმს : შენსა : წმშე : შმავა :

წმიდაო გიორგი მცხეთისაო, შეიწყალე ჰევი

მცხეთისა შენისა წინაშე შემავა(ლი).

აქ იგულისხმება ლეჩხუმის მცხეთის სოფელი, რომლის ეკლესია და მისი ნივთები ჩვენ უკვე აღვწერეთ (იხ. ზემოდ, გვ. 43).

27. ხატი წმ. გიორგისა, ვერცხლისა, ნაჭედი, 30X23 სანტ. მხედარი სრულის ტანით არის წარმოდგენილი, შუბით და ფართი; წარწერა: წმ გ.ი. თმა დიდ კიკინებად აქვს დაწყობილი; ეზო სადაა; აშიები ტალღისებური შემკობილობით ორ წერტილებიან წრეში გვარიანია; ხატი დიდად დაზარალებულია (№17348). მე-16-17 საუკ. უნდა იყოს.

28. ხატი წმ. გიორგისა, ვერცხლისა, ნაჭედი, 30X22 სანტ. წმიდანი წარმოდგენილია სრულის ტანით, ჩვეულებრივი პოზით და წარწერით: წმ გ.ი. ხელობა ისეთია, როგორც წინა ხატისა, მაგრამ აშიები უფრო უბრალოა (ამის ფოტოგრაფია არა გვაქვს).

29. ხატი წმ. გიორგისა, ვერცხლისა, 31X26 სანტ. მთავარ მოწამე ცხენით არის წარმოდგენილი შუაში, გრეხილიან ოთხკუთხედში; გვირგვინოსან ადამიანს გმირავს შუბით; წელზე გრძელი ხმალი ჰკიდია; შუბი ჯვართ თავდება; მოსასხამი წმიდანის ზურგს უკან მაღლად ფრიალებს ჰაერში; ეზო სადაა; აშიები ბასმისაა, მქრთალად გამოსახული, ხელაპყრობილნი მთავარ ანგელოზებით. ხელობა ტლანქია. სვანური, მე-18 საუკ. (№17348).

30. ხატი წმ. გიორგისა, ვერცხლისა, 18X14,5 სანტ. წმიდანი ცხენით არის, შუბით გმირავს ადამიანს. წარწერა: წმ გ. აშია გაფუჭებულია. ხელობა ტლანქია, სვანური, მე-18-19 საუკ. (№17346).



31. **ხატი წმ. გიორგისა**, ვერცხლისა, ნაჭედი, 14,5X13 სანტ. მთავარ მოწამე ცხენით არის. წარწერა: წ. გ. ი. წმიდანი ვეშაპს გმირავს. ხელობა ტლანქია (ფოტოგრაფია არ არის).

32. **ხატი წმ. გიორგისა**, დიდი, წამლით დახატული; მხედარი ცხენით არის წარმოდგენილი, ვეშაპს გმირავს. არა ცუდი ნახელავია, მაგრამ ძველი არ არის; მე-19 საუკ. უნდა იყოს. (სურათი არ გადმოგვიღია).

33. **ხატი მთავარ ანგელოზის მიქელისა**, ვერცხლისა, ნაჭედი. მთავარ ანგელოზი სრულის ტანით არის წარმოდგენილი; მარჯვენა ხელში ლახვარი აქვს, მარცხენა ხელში ბურთი. ზემოდ უწერია: წმ მიქაელ. მარჯვნივ, ქვემოდ კაცია დაჩოქილი, სავედრებლად აწეული ხელებით და მაღალის ქუდით. აშიები ყვავილებით და სიმრგვალებით არის შემკობილი; ქვემო აშია (ალბათ წარწერიანი), აღარ არის №17348 ?). ხელობა მე-16 საუკ. უნდა იყოს.

34. **ხატი მთავარ ანგელოზ მიქაელისა**, ვერცხლისა, ნაჭედი. მთავარ ანგელოზი წარმოდგენილია სრულის ტანით, ლაბარუმით და ბურთით, წარწერით: წმ მქლ. აშია გაფუჭებულია. ხელობა ტლანქია, მე-18 საუკ. (№17347).

35. **ხატი მთავარ ანგელოზისა**, ვერცხლისა; ძლიერ გფუჭებულია. მთავარ ანგელოზი სრულის ტანით არის და შუბით მარჯვენა ხელში. რა ჰქონდა მარცხენაში, არა სჩანს. წარწერიდან ემჩნევა მართო: წმ. აშია რომბ-ლურსმული, მოტლანქია (№17350). მე-18 საუკ. უნდა იყოს.

36. ვერცხლის **ფირფიტა** ლაბარუმისა, 15X16,5 სანტ. ორი მთავარი ანგელოზის გამოხატულობით, შემკობილი სიმრგვალებით და წერტილოვანი ჯვრებით; ტლანქი, სვანური ხელობისა, მე-18 საუკ. (№17350) (?).

37. **ბუკი** ანუ საყვირი სპილენძისა.

მეორე ეკლესია მურყმერის სოფლისა არის **წმ. ბარბარეს ეკლესია**, აშენებულია ქვემოდ, სოფლის ბოლოს, გორაკზე. ეს პატარა, ქვის ეკლესია არის, ოთხკუთხედი, გადახურულია ფიქალის ქვებით, ეკვტერი აქვს სამხრეთით; აქედანვე აქვს შესავალი; კანკელი ქვისაა ერთის აღსავლის კარით. კამარები კანკელს არ ახლავს, მაგრამ ხის თაროები აქვს ხატებისათვის. ეს ეკლესია არა ერთხელ წაულეკია თოვლის ზვავს და ამიტომ ნივთები მასში დანოტვილი და დაზიანებული არის. უმეტესად. ეკლესიაში ჩვენ ვნახეთ:

1. **ჯვარი დიდი, ხისა**, კანკელის საწინავე, სამ არშინზე მეტი სიმაღლით, შემერწილი ვერცხლის ფირფიტებით, წმიდათა სახეებით; სვანური, ტლანქი ხელობისა; ზემოდ დაცული აქვს ქუდი; ქვემოდ ყველაზე დიდი ფირფიტა უჭირავს ღვთის მშობლის ხატს ჩჩვილედს. შემდეგ ჩვენ ვხედავთ ორს წმ. გიორგის და 11 მთავარ ანგელოზს სხვა და სხვა დროისა და სხვა და სხვა

ხელობისა. ორი მთავარ ანგელოზი უმბოს აქეთ-იქით ოქროთი დაფერილია. ესენი საუკეთესო ნახელავია. მარჯვენა და მარცხენა ფრთებზე წარმოდგენილნი არიან მაცხოვარი და მთავარ ანგელოზები. ჯვარი ეხლა დაქანებულია თავის ადგილიდან და მიყუდებულია კანკელზე მარჯვნივ.

2. ასეთივე ჯვარი კანკელის საწინავე, 1 არშინი და 5 ვერშოკი სიმაღლით, სდგას კანკელის წინ, ქვის კვარცხლბეკზე, რომელიც დამყარებულია ოთხკუთხედი ხის სადგომზე; შეძერწილია დაფერილი ვერცხლის ფირფიტებით. ლამაზი ხელობისაა, რაც ასე იშვიათია სვანეთში. ზემო ფირფიტაზე მაცხოვარი ლამაზად ნახელავ მედალიონში; უმბოს ქვევით წა გრიგოლია, სრულის ტანით და წარწერით: წგ გლ; მის ქვემოდ: წდ მარკუ. შემდეგ: წა გიორგი ცხენით; მის ქვემოდ წარწერა. ეს წარწერა ძნელი გასარჩევია, მაგრამ დ. ბაქრაძის და ა. ხახანაშვილის წაკითხვა ჩვენთვის მიუღებელია. ჩვენ ასე ვკითხულობთ:

წო ბრბლე : შენ  
მმგნბლ შნ ყფ  
ისომ ქლისა ან

წმინდაო ბარბაღე, შეუნდვენ  
მომგონებელი შენი ყაფ-  
ისომ ქალისა. ამინ.

შესაძლოა „მომგონებელის“ მაგიერ იყოს „მომგებელი“, მაგრამ ასო ნ-ის არსებობა ჯგუფში „მმგნბლ“ ამის ნებას არ გვაძლევს, თუ ეს დამწერის შეცდომა არ არის. დ. ბაქრაძე (გვ. 119) და მისი მიხედვით ა. ხახანაშვილი (გვ. 35) ამ წარწერაში კითხულობენ „მიქელ იოსელიანის“ სახელს.

მარცხნივ ჩჩვილედ იღვთის მშობლის სურათის მეორე წარწერაა, რომელსაც ა. ხახანაშვილი არ იხსენიებს, მაგრამ დ. ბაქრაძეს მოყვანილი აქვს და ის შენიშნავს, რომ გადათარგმნა შეუძლებელიაო:

დ. ბაქრაძე კითხულობს:  
დდოღ  
თსოღი  
ვერვ  
გგდთნ  
ანი ამნ

ჩვენ ვკითხულობთ:  
დ-დო ღ  
თსო : დი  
ვერე  
გ-გითა  
ანი : ამნ

ჩვენი ცდა წარწერის წაკითხვისა ასეთია: „დედაო ღთისაო, დაივედრე გოგითაანი, ამინ“.

სამწუხაროდ ფოტოგრაფიულად ამ ჯვარის სურათები ვერ გადავიღეთ, ვინაიდან ჯვარის მოშლა და კარში გამოტანა შეუძლებელი იყო, და დიდი აპარატი კი ეკლესიაში არ გაიმართა; პატარა აპარატი დ. ერმაკოვს არ ჰქონდა. საჭიროა ამ წარწერების გადმოღება და ჩვენს ტექსტთან შედარება, რომ საბოლოოდ გადაიჭრას საკითხი.

3. ჯვარი ხისა, შუათანა ტანისა, 63X41 სანტ. შეძერწილია ვერცხლის ფირფიტებით და ზედ გამოხატული ფიგურებით: ზემოდ ჯვარცმა წინამდგომებითურთ ოქროთი დაფერილია; მეორე ჯვარცმა ჯვარის ცენტრშია; ამის ქვემოდ და აგრეთვე მარჯვენა და მარცხენა ფრთაზე ღვთის მშობელია ჩჩვილედ; ზემოდ, ვგონებ, დავითია; წარწერა ნათელი არ არის. ერთი

მედალიონი წელსზევითი ფიგურით ქვემო ფრთაზე არის (№17362). ბოლო, ქვემოდ წა პეტრეა: წა პტრ.

4. **ჯვარი ხისა**, შუა ტანისა, 50X44 სანტ. შემერწილია ვერცხლის ფირფიტებით, უკეთესი ხელობისა, ვიდრე წინა ჯვარი. უმბოს ზემოდ სრულის ტანით წარმოდგენილია: ი-ჯ ქე სახარებით, მაკურთხეველის მარჯვენით და ჯვარის სახის ნიმბით. ქვემოდ უმობსა აგრეთვე სრულის ტანით იოანე უნდა იყოს: წ-დ...ი(?). ამას ქვემოდ, მრგვალ მედალიონში წმიდანია ჯვარით, წელსზევითი. წარწერა არა აქვს. მარცხენა და მარჯვენა ფრთები ბროწეულის ყვავილების მსგავსი ორნამენტითაა შემკობილი და მედალიონებით ღვთის მშობლისა: დ-დღ ღ-ღ (მარცხნივ) და იოანესი: „წ-დ ი-ნე ნთსმც“ მარჯვნივ. კუთხეებში მთავარ ანგელოზებია (№17364).

5. **ჯვარი ხისა**, შუა ტანისა, 44X26,5 სანტ. შემერწილია ვერცხლის ფირფიტებით, ტლანქი სვანური ხელობისა. ზემოდ წარმოდგენილია მაცხოვარი სრულის ტანით. ქვემოდ ღვთის მშობელი მვედრებელი; მის ქვემოდ წმიდანი ჯვარით ხელში, შეიძლება წმ. გიორგი იყოს. მარჯვენა და მარცხენა ფრთებზე ორ-ორი მედალიონი წმიდათა, უწარწეროდ. (№17377).

6. **ჯვარი გამოსასვენებელი**, ოქროთ დაფერილი ვერცხლისა, 26X21 ს. ერთის კარგად გამოქანდაკებული ჯვარცმულის სახით შუაში, ზემოდ ნიმბისა ჯვარის სახეა ჩვეულებრივად სახელის წარწერისთვის, მაგრამ აქ წარწერა არ არის; ზემოდ კი აწერია: წ-ო ს-ბო. ჯვარცმულის წარწერა მოიპოვება მარცხენა და მარჯვენა ფრთებზე, ქრისტეს ხელების ახლო: ი-ჯ- ქ-წ. ჯვარი გრეხილით არის შემოზღუდული, ხოლო ყველა ფრთის ბოლოები ორ-ორი პალმეტით თავდება; ამათში ოთხი დაკარგულია, ოთხი დარჩენილი. პალმეტები ცალკეა დამზადებული და შემდეგ მიკრული (№17370). ეს უნდა იყოს მე-16 საუკუნახელავი და მიბაძვა ძველი ჯვარცმის გამოსახვისა.

7. სრულიად ასეთივე ხელობის და ფორმის **ჯვარი**, ვერცხლისა, 25X23 სანტ. იგივე წარწერები, იგივე პალმეტები, ხოლო აქ ყველა დაცულია, ერთი მერმეა მარჯვენა ფრთაზე მილურსმული და სხვებთან შედარებით ტლანქია; ჯვარი ვერცხლის ბურთზეა დამყარებული. თავი გარჩევა წინა ჯვარიდან მდგომრეობს იმაში, რომ რელიეფი გამოყვანილი ჯვარცმული აქ უფრო ტლანქია, ვიდრე წინაზე (№17374).

8. **ჯვარი გამოსასვენებელი**, ვერცხლისა, 29X23 ს. დამყარებულია ხეტარზე, ვერცხლის შემკობილის ბურთის საშუალებით. წვეტიანი კუთხეები თავდება ვერცხლის პატარა ბურთებით, პალმეტების მაგიერ წინა ჯვრისა. შუაში დიდი ლალი უზის. მარცხენა, მარჯვენა და ზემო ფრთანი შემკობილია სევადით და სიმრგვალებით, ჯვარის სახედ შიგნით. ქვემო ფრთაზე ორი ღვთის მშობლის სახეა, ერთი ჩვეილადი ქვემოდ და მეორე უფრო დიდი, ვედრების სახით, ზემოდ, სრულის ტანით. საზოგადოთ ჯვარი კარგ შთაბეჭდილებას ახდენს (№17373).

9. **ჯვარი ხისა**, გამოსასვენებელი, 35X27,5 სანტ. შეძერწილია ვერცხლის ფირფიტებით, ორი მთავარ ანგელოზის გამოსახულებით ზემოდ და ქვემოდ და წერტილებით შემკობილის ორ-ორი სიმრგვალით მარჯვნივ და მარცხნივ უმბოსა (№17371). მეორე გვერდზე ჯვარისა ნუსხა მხედრულით სწერია:

შე ესტატე ოქრო მჭდლი.

დ. ბაქრაძეს ვერ გაურჩევია წარწერა, მაგრამ ხელით გადმოვლია (იხ. გვ. 119, დამატება №39). რომ წარწერა წავიკითხოთ, ჯვარი უნდა შევაბრუნოთ. ალ. ხახანაშვილს სწორად აქვს წაკითხული (გვ. 35).

ხელობა ტლანქია, ადგილობრივი, მე-18 საუკუნისა. (№ წარწერისა 17372).

10. **ჯვარი გამოსასვენებელი**, ოქროთი დაფერილი, ვერცხლისა, 44X34 სანტ. შუაში გამოსახულია ჯვარცმა ძლიერ ტლანქი ხელობისა და ყველა მომრგვალებულ კუთხეებში ასეთივე ტლანქი გამოსახულებაა მედალიონებში წმიდათა (№17375). მეორე გვერდზე წერტილებიანი შემკობილებანია ჯვარედინი ხაზების გარშემო და ქვემოდ ძნელი გასარჩევი წარწერა ასომთავრულით (№17376).

წარწერა გადმოღებული აქვს ხელით დ. ბაქრაძესაც, მაგრამ გაურჩეველია (იხ. გვ. 119), დამატება №40). ჩვენს ფოტოზე წარწერა კარგად არის გამოსული, მაგრამ ვინაიდან გარჩევა ჩვენც ვერ შევსძელით, ამიტომ აღარ მოგვყავს.

11. **ხატი წმიდისა თეოდორესი**, ვერცხლისა, ნაჭედი, 63X49 სანტ. მშვენიერი კლასიკური ხელობისა (№17355). წ-ა თეოდორე მდგომარეა, რომაული ტანისამოსით. მარჯვენა ხელში შუბი უჭირავს, მარცხენა მოგრძო, შემკობილ ფარზე დაუდვია; თმა ხუჭუჭი აქვს; ნიშბი დიდი; პირი თითქოს დაღებული. ეზო ხატისა ვაზოვანი და ფურცლოვანი ორნამენტით არის შემკობილი, ხოლო ფართო აშია შემოცულია ორმაგი ბროწეულის მსგავსი ყვავილების შემკობილებით და მრავლის მედალიონებით წმიდათა. ზემოდ მრგვალ მედალიონებში წარმოდგენილნი არიან წელსზევითნი ფიგურები: შუაში ქრისტესა, სახარებით და მაკურთხეველის მარჯვენით, წარწერით: ძვზ (sic) ქე; კუთხეებში მთავარ ანგელოზები: წ-ა მ-ქლ, წ-ა გ-ბრლ. ქვემოდ ასეთივე მედალიონებით: წ-ი დ-რი, წ-ი ბ-სლი და წ-ი ნკ-ლზ. მარცხენა აშიაზე სრულის ტანით ოთხკუთხედ მედალიონში. მარცხნივ: დ-დი ლ-საი და ი-ნე ნთლმმცმელი. მარჯვნივ: წ-ი ი-ნე მხრებლი და წ-ი ი-ნე ოქროპირი; ხატი მე-12 საუკუნის უნდა იყოს.

12. **ხატი წმ. გიორგისა**, ვერცხლისა, ნაჭედი, 83X57,5 სანტ. (№17354). მთავარ მოწამე ცხენით არის წარმოდგენილი, რომაულის საომარის ტანისამოსით; გმირავს გვირგვინოსან კაცს, მაგრამ ეს ნაწილი ხატისა, სადაც გვირგვინოსანია გამხვართული, სულ მოშლილი ყოფილა და შემდეგ მიუმატებიათ ტლანქად ახალი ფიგურა. ეზო ზემო ნაწილისა შემკობილია რელიეფით წარმოდგენილის ფოთლოსანი შტოებით. ქვემოდ, ამისვე მიზამვა მქრთალია. სახელის წარწერა წმიდანის ასომთავრულით: წ-ი გ-ა. მოქცეულია ორივეს მხრით ნიშბის ლამაზად

ნაჭედ დიდ მრგვალ მედალიონებში. აშია ფართო რობმ-ლურსმული შემკობილობისაა, მაგრამ მერმინდელი უნდა იყოს, ვინაიდან მისი მედალიონების დაბალი ხელოვნება არ ეგუება ხატის ზემო ნაწილის ლამაზ ხელოვნებას. ზემოდ მედალიონებში ვედრებაა; ქვემოდ: წმიდა მხედარნი უნდა ყოფილიყვნენ, მაგრამ ეხლა მოშლილია; მარჯვნივ და მარცხნივ: დედა ღვთისა და იოანე, სრულის ტანით. ძველი ზემო ნაწილი ხატისა, ჩვენის აზრით, მე-13-14 საუკ. არის.

13. **ხატი იოანე ნათლის მცემლისა**, 62X46,5 სანტ. ფერადებით დახატული ყოფილა, მაგრამ ეხლა ფერადები სულ გამქრალია; დარჩენილია მხოლოდ ნაწილი აშიებისა ფურცლოვან-ყვავილოვანის შემკობილობით, საუცხოო ხელობისა, და მარცხენა პატარა ნაწილი ორ-სტრიქონიანი ასომთავრული წარწერისა (№17361). ეს ნაწილი წარწერისა, მცირე შეცდომით, მოჰყავს დ. ბაქრაძეს (გვ. 120); გრაფინია უვაროვისა და ალ. ხახანაშვილი არც ხატს, არც წარწერას არ იხსენიებენ (გვ. 169, დამატება, გვ. 35).

ამ წმ. ბარბარეს ეკლესიაში, საკურთხეველში, პატარა სკივრი იყო დაკეტილი. დიდი ლაპარაკის და დავიდარაბის შემდეგ მე ვაიძულე გაეხსნათ ეს სკივრი და სხვა მრავალ საყურადღებო და არა საყურადღებო ნივთებთა შორის, აქ ჩვენ ვიპოვეთ გაგრძელება ამ წარწერისა. ეს ჩვენ მივაღვეით თავის ადგილს და ხელმეორედ გადავიღეთ. ასე რომ ამ წარწერის სურათი ეხლა მთელად გვაქვს (№17369). წარწერა ნათლის მცემლის ხატისა ასე იკითხება:

: ქ : წო : იე ნთლს მცმლო : მო[ხ და] მფრვლ ექმნ წე  
ქესა ცოტნეს და ქობლეს და ცოტნე[ს] ცოლსა ვნელსა  
ამნ.

შეუმოკლებლად: წმიდაო იოანე ნათლის მცემლო, მეოხ და მფარველ ექმენ წინაშე ქრისტესა ცოტნეს და ქობულს და ცოტნეს ცოლსა ვანელესა, ამინ.

ჯგუფი **ქობლს** შეიძლება წავიკითხოთ კიდევ **ქუაბულს**. ცოტნეს ცოლის სახელი **ვნელს** ჩვენ ვკითხულობთ **ვანელსა**, სახელი ვანენეს ანალოგიით, ვინაიდან ეს სახელი ცნობილია სხვა წარწერებიდან. ვფიქრობთ, ვანენე და ვანელე ერთი და იგივეა, ლ და ნ გადადიან ერთი მეორეში. ჩვენს წარწერაში მოხსენებული ცოტნე უნდა იყოს ცოტნე დადიანი, შერგილ დადიანის და მისი ცოლის ნათელას შვილი (იხ. ჩვენი არხეოლოგიური მოგზ. ტ. 2; გვ. 153). ცოტნე დადიანი კარგად ცნობილი მოღვაწეა ჩვენს ისტორიაში დედოფალ რუსუდანის დროს, თამარის ქალისა, მე-13 საუკ. მაგრამ მისი ცოლის სახელი პირველად გვხვდება ამ წარწერაში, თუ მართლა აქ ცოტნე დადიანი იგულისხმება. ის ყოფილა ვანელე ან ვანენე.

ქობულ ანუ ქუაბულ ჩვენი წარწერისა ცნობილი არ არის, ის უნდა იყოს ძმა ან სხვა ნა თესავი ცოტნესი.

13 ბ. №17369-ზე ჩვენი ფოტოგრაფიისა ჩვენ ცოტნე დადიანის წარწერასთან ერთად გადაღებული გვაქვს ნატეხი ერთი მთავარ ანგელოზის ხატის წარწერისა, რომელიც ჩვენ იმავე სკივრში ვიპოვეთ. ეს წარწერა იკითხება ასე:

ქ წო : მთავარ ანგელოზო . მეო

ხ : ექმენ : მონასა შენსა : ჳდმ ე  
. . . . . რიანსა : ამინ .

14. ხატი სამთა წმიდათა: იოანესი, ელიასი და შიოსი; ყოფილა ფერადებით დახატული, მაგრამ ფერადები ეხლა საერთოდ გადასულია; მათი ნიმბები, შესამოსელის ნაწილი ოქროსი დაცულია და მათ უწერიათ სახელები: წ-ა ი-ნე, წ-წყე. ელია, წ-ა შიო, 25X21 სანტ. დაცულია უმეტესი ნაწილი ოქროსავე აშიებისა, ფურცლოვან-ყვავილოსანი საუცხოო შემკობილობით (№17379), ქვემოდ: სამსტრიქონიანი ასომთავრული წარწერიდან დარჩენილია პირველი ნახევარი მარცხენა კედაროსი, რომელიც იკითხება ასე:

ქ : რლთ : გქს : კდნ. . .

ქ : რომელთა გაქვსთ კად[ნიერება].

ინე : ელია : და შიო . . . .

იოანე, ელია და შიო . . . .

მსვსა : ფრსმნ : ა. . .

მოსავსა ფარსმანს. . .

ხატი მე-12 საუკუნის უნდა იყოს.

15. ხატი მაცხოვრისა, ვერცხლისა, ნაჭედი, 43X31 სანტ. ქრისტე წელსზევითია. მაკურთხეველის მარჯვენით და სახარებით მარცხენა ხელში. ტანისამოსი ერთობ მსხვილად და მჭიდროდ დანაოჭებულია. აშიები რომბლურსმულია. ხელობა ადგილობრივია, ტლანქი, მე-18-19 საუკ. საკვირველი კიდევ ისაა, რომ წარწერა სახელისა არეული ასოებით არის: ბერძნულ-ქართულით: ქ'c x'ე (№17356).

16. ხატი მაცხოვრისა, ვერცხლისა, ნაჭედი, 45X33 სანტ. მაცხოვარი ტახტზე მჯდომარეა, მაგრამ ჩვეულებრივად მუთაქაზე კი არ ზის, არამედ არდიგარდათ გადებულ ხეზე; ეს ხე და აგრეთვე ტახტის სვეტები წერტილოვანი შემკობილობით არის მოცული. მაცხოვარს ორივე ხელი დაუდვია სახარებაზე და სახარება მუხლზე უძევს. აშიები რომბლურსმულია. ხელობა ტლანქია, ადგილობრივი მე-18 საუკუნისა (№17358).

17. ხატი პატარა გარდამოხსნისა. 15X11,5 სანტ. ყოფილა წამლით დახატული; ფერადები გადასულია; შემოსილობა ოქროსია, ნაზი, ლამაზი ხელობისა, მე-12-13 საუკ. წარწერა სახელისა: „გა-დმოჴნა იესოს“ (№17359). მეორე გვერდზე ასომთავრულით წარწერა (№17365):

ქ. ქრისტე ღ-ო / მომი / ჳსნე. მჳსნელო : სახჳფეველ-ა /

შნსა : მეღ / ომნაძე : ქველი და მეჳღლე : ჩემი : რჳსჳდან.

დ : შვღ / ნი ჩ / ნი : ვახტგ / დ ძმნი : მისი : ამი(ნ).

უქარაგმოდ:

ქ. ქრისტე, ღმერთო, მომიჳსენე, მჳსნელო, სასუჳეველსა

შენსა მე, ლომინაძე ქველი, და მეუღლე ჩემი რუსუდან

და შვილნი ჩემნი ვახტანგ და ძმანი მისნი, ამი(ნ).

18. ასომთავრული წარწერა ზურგზე დაკარგულ პატარა ღვთის მშობლის ხატისა (№17365).

ქ. ვედრე  
ბისა : ღოსა : შობე  
ლო : მეოხ და მფრვლ :  
მექმენ :  
დღესა : გნკითხვისა  
სა : მამკბსა : ხატისა  
შენისსა : წე : ძესა (sic)  
შენსა :  
გალდისა .

ქ. ვედრე-  
ბისა ღვთის მშობე-  
ლო, მეოხ და მფარველ  
მექმენ  
დღესა განკითხვისა-  
სა მამკობსა ხატისა  
შენისასა, წინაშე ძისა  
შენისა,  
გალდისა.

უკანასკნელი სიტყვა წერტილებით არის შესრულებული ჯვარის კვარცხლბეკთან და შეიძლება მერმე იყოს მიმატებული.

19. **კარედი ხატი ხისა**, ცილინდრულის თავით ოთხკუთხედზე, ორად დასაკეცი. დიპტიხი, 18X11 სანტ. შექმნილია ოქროს წრის რომბ-ლურსმულის შემკობილობით, დაყოფილია უჯრებად; თავის უჯრა ცილინდრულია, სხვები ოთხკუთხედი, შუა უჯრა ორივე ნაწილისა სხვებზე დიდია. უჯრებში ყოფილა მოთავსებული მინაზე ფერადებით დახატული წმიდათა სახეები, მაგრამ არც ერთი არ შენახულა. მხოლოდ თუ რა მშვენიერი ხელოვნური დარგის სახეები იყო იქ, ამას მოწმობს ერთად ერთი დარჩენილი, ზემოდ, მარჯვენა კუთხეში, ტრედის სურათი; მშვენიერი რამ არის, როგორც თავისი მოხაზულობით, ისე ფერადების შეხავებით და მხატვრულის სახით, რომელსაც ფოტოგრაფია, სამწუხაროდ, ვერ გადმოსცემს. (№17378). ამას გარდა, ერთი ასეთივე მინაზე დახატული მაცხოვრის სურათი ჩვენ ვნახეთ ბლალოჩინ ნიჟარამესთან და საუცხოო რამ იყო. სურათი ალბათ ამ ხატიდან იყო ამოღებული. სხვაგან, საქართველოში, ასეთი დარგის ხატები ჩვენ არ შეგხვედრია, მაგრამ სვანეთში ჩვენ ვიპოვეთ სხვა ხატიც და ჯვარიც, რომელნიც უჯრებად არიან დაყოფილნი და უჯრებში წინეთ მოთავსებულნი ყოფილან პერგამენტზე ფერადებით დახატულნი წმიდათა სურათები. როგორც თავის ადგილზე იქნება აღნიშნული, ერთი ასეთი ხატი მოიპოვება სადადეშკელიანო სვანეთში, ფხოტრერის ეკლესიაში, №17140, ხოლო ჯვარი მოიპოვება ლატალის თემში, ენაშის ეკლესიაში, №№17003, 17004.

20. **ხატი ორთა მთავარ ანგელოზთა**, ვერცხლისა, ნაჭედი, 42X40 სანტ. თითოეული მთავარ ანგელოზი მოქცეულია მოსხო წერტილებისაგან შემდგარ ოთხკუთხედში ლაბარუმით და ბურთით. ზემოდ და ქვემოდ მთავარ ანგელოზთა არის სამ-სამი წერტილებით შემოვლებული მრგვალი მედალიონები, რომლებშიაც წარმოდგენილნი არიან, ზემოდ: ღვთის მშობელი, წმ. გიორგი და იოანე, ქვემოდ: ორი იოანე და წმ. გიორგი, ყველა სახარების წარწერით; აშიები ბრტყელი ლურსმეული, ორ-ორი მედალიონით კუთხეებში; ერთში ზემოდ ღვთის მშობელია (№17356).

21. **ხატი მთავარ ანგელოზთა**. ოქროთ დაფერილი ვერცხლისა, ნაჭედი, 46X34,5 სანტ. ორივე მთავარ ანგელოზი წარმოდგენილია სრულის ტანით, საზომებით და ბურთებით. ბურთები ერთი მეორესათვის მოუახლოვებიათ.

ნიმბები წერტილოვანი სიმრგვალებით არის შემკობილი. ეზო ხატისა თითქო ვარსკვლავებით არის შემკობილი. აშიები ბალახ-ყვავილოსანია, ლამაზი და რვა მედალიონით. ყველაზე წი კე (კვირიკე) არის გამოხატული. ხატი მე-14 საუკ. უნდა იყოს. (№17357).

22. **ხატი მთავარ ანგელოზ გაბრიელისა**, ვერცხლისა, ნაჭედი, 42X27 სანტ. მთავარ ანგელოზი სრულის ტანით არის, წარწერით: წი გლ. მარჯვენა ხელში ლაბარუმი უჭირავს, რომელზედაც აწერია: „წმიდა არს, წმიდა არს“. მარცხენა ხელში ბურთი აქვს, ზედ ჯვარია გამოსახული; ეზო სადაა; აშია არ აქვს. ხელობა აღორძინების ხანის არის, მე-16 საუკ. (№17363).

23. **ხატი მთავარ ანგელოზ მიქაელისა**, ვერცხლისა, ნაჭედი, 48X39 სანტ. მთავარ ანგელოზი სრულის ტანით არის, საზომით და ბურთით. წარწერა სახელისა: წდ მქლ. მისი ფიგურა მოკლეა, მძიმე; ნიმბი დიდი ხლართულებით შემკობილი. აშია რომბ-ლურსმული, მედალიონებით წმიდათა. ხელობა ტლანქია, მე-18 საუკ. სვანური (№17358/595).

24. **ხატი მთავარ ანგელოზ მიქაელისა**, ვერცხლისა, ნაჭედი, 50X35 სანტ. უკეთესი ხელობისაა, ვიდრე წინა ხატი. მთავარ ანგელოზი წარმოდგენილია სრულის ტანით, (მაგრამ ტანი მოკლეა), ლაბარუმით და ბურთით; ეზო ხატისა ფურცლოვანი ვაზის ყლორტების მსგავსი ორნამენტით არის შემკობილი ლამაზად, ხოლო აშიები ორმაგი ბროწეულის ყვავილებით. ეს სულ მიბადვია კლასიკური ეპოქის ნაწარმოებისა. წარწერა სახელისა: „მღლ მთავარაგლზ“. ხატი მე-16 საუკ. უნდა იყოს. (№17357). მარცხენა აშია დაკარგულია.

25. **ხატი მთავარ ანგელოზისა**, ვერცხლისა, ნაჭედი, 27X26 სანტ. მთავარ ანგელოზი წარმოდგენილია სრულის ტანით, საზომავით და ბურთით; ეზო სადაა; აშიები ბალახების გვარის შემკობილობით. ხელობა ტლანქია, მე-18 საუკ. სვანური (№№17359/596).

26. ასეთივე **ხატი მთავარ ანგელოზისა**, 20X16 სანტ. ლაბარუმით და ბურთით, გაფუჭებულის აშიებით, გადმოღებულია სხვა ხატებთან ერთად. ამავე ფოტოგრაფიაზე მოთავსებულია დაბლა, მარცხნივ, სურათი პატარა მაცხოვრის ხატისა, წელსზევითი, ჯვარის სახის ნიმბით, სახარებით და მაკურთხეველის მარჯვენით; საკმაოდ ლამაზი.

27. **ხატი მთავარ ანგელოზ მიქაელისა**, ვერცხლისა, ნაჭედი, 21X16 სანტ. ლაბარუმით და ბურთით, აშიები რომბ-ლურსმული; ადგილობრივი მოტლანქო ხელობისაა, მე-18 საუკ. წარწერა სახელისა: მქლ მთ-გლ. ქვემოდ, მარჯვნივ მოსჩანს ნაშითი წარწერისა (№17359).

28. **ხატი მთავარ ანგელოზისა**, ვერცხლისა, უფრო ცუდათ დაცული, ვიდრე წინა ხატი; ტლანქი, ადგილობრივი ხელობისა, მე-18 საუკ. (№17359).



29. ხატი მთავარ ანგელოზისა, ვერცხლისა, ნაჭედი. მთავარ ანგელოზი წარმოდგენილია ლაზარუმით. საკვირველია, რომ ამ ხატს აწერია ე-ე, თუმცა სურათი მთავარ ანგელოზისაა, ფრთებით, ლაზარუმით და სხვა. აშიები რომბ-ლურსმულია; ხელობა ტლანქი, მე-18 საუკ. (№17359).

30. ვერცხლის ჯამი შემკობილობით (№17366. სურათზე ამ ჯამისა მოთავსებულია თიხიდან გაკეთებული „ბოჭკის“ მსგავსი ჭურჭელი).

31. ორი უბრალო ვერცხლის ჯამი და ერთი ვერცხლის ჭიქა.

32. დოქი სპილენძისა, მაღალის ხელით (№17366).

33. ჭურჭელი თიხისა, „ბოჭკის“ მსგავსი (17366), უკვე ზემოდ ნაჩვენები.

34. ფარი სპილენძისა, მრგვალი (იქვე №17366).

35. ხის კათხა, ძაღლის თავის ქანდაკებით და მეჭექის მსგავსი შემკობილობით (იქვე, №17366).

36. ლახტი რკინისა, მრავლის ფრთებით, ვერცხლის ჭდებით შემკობილი (უვაროვისა, გვ. 141, სურ. 62). (№17367).

37. ვერცხლის სკიპტრა-ლახტი, დიდი, რომბისებური შემკობილობით. ეს აღმოჩნდა სკივრში, როლმელიც გავახსნიეთ (№17367).

38. მეორე უფრო დიდი და უფრო ლამაზი ვერცხლის სკიპტრა-ლახტი იმავე სკივრში აღმოჩნდა; სახელური იკლიკანტური ხაზებით არის შემკობილი, ხოლო მსხვილი თავი, ბურთი, ცხოველთა თავების სახეებით (№17368).

შენიშვნა: ეს ორი ნივთი, პირველად ჩვენი ექსპედიციის მიერ აღმოჩენილი, ფრიად საყურადღებოა. ფორმით ესენი ლახტს მოგვაგონებენ, მაგრამ რეალურად საომარი იარაღები ვერ იქნებოდნენ. ამგვარი ნივთი უნდა ყოფილიყო ემბლემა ერისთავთა ხელისუფლებისა, მათი სკიპტრა.

ამავე №17368 ჩვენ გვქვს გადმოღებული სხვა ნივთებიც, რომელნიც სკივრში აღმოჩნდა: 1) სხვა და სხვა ზომის და სხვა და სხვა მასალიდან გაკეთებული კრიალოსანის მარცვლები (ბუსები), 2) მოღუნული დანა რკინისა; როგორც ეტყობა, ძველი სასაფლაოდან უნდა იყოს ამოღებული, 3) ვერცხლის რგოლი, სამაჯურის მსგავსი, ტრედის ქანდაკებით ოვალურ წრეში, ერთობ ლამაზია, 4) ქინძისთავი ცხენის გამოხატულებით ზემოდ, 5) ჩანჩხურეები („პრივესკი“) სპილენძისა, შველის, ფრინველების და სხვა სახეებით.

40. სკივრში ამას გარდა იყო ბევრი მოქარგული და ნაკეთი ტანისამოსი, უფრო ბავშვებისა და ქალებისა. ფრიად დაოხებულნი სინესტისაგან; ზოგი სულ გაფუჭებული იყო. რამოდენიმე ვერცხლის ფული თათრული, სპარსული და ბიზანტიური, პატარა ჭურჭელი მინისა და სხვა.

41. პირობა დადებული უშკულის თემის მიერ სხვა თემთან (არა სჩანს რომელთან).

ეს საბუთი ჩვენ ვნახეთ ძველ ქაღალდზე დაწერილი მხედრულის ხელით ცაგერში, მამა მარგიანის ხელში. საბუთი მოგვყავს უცვლელად, მაგრამ უნდა გვახსოვდეს, აქ, როგორც სხვა ამგვარ სვანეთის საბუთებში, ხშირად ასო ო იკითხება უ-ნად და წინაუკმო, აგრეთვე ასო შ-ნის მაგიერ იხმარება ჭ-რი.

ქ უჯობდეს : გოლმართლად : მას ვიჭირვეთ : თქვენია-  
ნად : და უთქვენუდ : და რასაც : პირსა : ზედა : შედ-  
გომილი : ვართ : არ გაგი ტეხოთ : ჯეუმან : ჯეუსა :  
ჯეუბითა : თო გაგიტეხოთ : რაიცა ჭვენსა : მტერა-  
(შტერა?).

სა : უყოთ : იმისა საქმესა : არას : გერჭოდეთ : თო  
ერთმან : ანუ ორმან : გაგვიტეხოს : ერთობილმან :  
წავეკიდოთ : ამისა : გათა-  
ვებისა : თაუს დებად : მოგვიკსენიებია : დედაი : ღ-თი  
სა : უშგოლისა :

წმიდაი : კვირიკე : კალისა : კაცთაგან : ადაი : გომგო-  
თელიანი<sup>1</sup> : ხაჯი (?) : ჭორგა სიანი<sup>2</sup> : გიორგი : დადი-  
ლიანი : დათვაი : გელივანი : მე : ჯუარისმან-  
ა ნაბარჯგიანსა : დამიწერია : და მოწამეცა : ვარ:

---

1 ეხლა გომთელიანი ყოფილი აზნაურები მესტიაში.

2 ჩარგსიანები ცხოვრებენ ჩოლაურში.

## კალას თემი

ლათფარის უღელტეხილს რომ გადალახავთ, თქვენ ჩადიხართ პირდაპირ კალას საზოგადოებაში, რომელიც შესდგება ექვსი სოფლისაგან: ვიჩნაში, ხე, ლაიხორი, დავბერი, იფრარი და ხალდე. პირველი სოფელი ლათფარის უღელტეხილის ჩასავალს არის – დავბერი (სვანურად: დავბერ). თვალწარმტაცი პანორამა ამ საზოგადოებისა და მთელი ენგურის ხეობის თქვენს თვალს წინ იშლება ჯერ კიდევ ლათფარის უღელტეხილიდან. კანცელიარიის პირდაპირ რამოდენიმე სახლია და აქ ამ სახლებთან არის ერთობ ლამაზი კომპები,

რიცხვით ხუთი. ამათი სახე გადაღებულია ფოტოგრაფიულად ერმაკოვის მიერ ჯერ კიდევ 1876 წ. (ძველი ნომრით 91/180).

ამ სოფლის ცოტა ქვემოდ, მარცხნივ, მაღალ განცალკევებულ მთაზე არის გაშენებული კვირიკე და ივლიტას ეკლესია, ყოფილი მონასტერი. მთა ძირიდან წვერამდე შემოსილია ტყით, ნამდნარით, რომელიც საღმრთოდ ითვლება და სვანი იქ წვეპლასაც არ მოსჭრის. ხეები დიდრონია და უწევენ საგანგებოდ დავაკებულ მწვერვალს, რომელზედაც გაშენებულია პატარა ეკლესია წა კვირიკე და ივლიტას სახელობისა (სვანები უწოდებენ „ლაგურკა“-ს).

საზოგადო სახე ადგილისა ეკლესიითურთ იხ. ფოტ. №17485 და 17486. პანორამა სხვა სოფლებისა და მთებისა ამ ეკლესიიდან იხ. №17484.

სწორი ადგილი კლდოვანი მწვერვალისა პატარაა და იტევს მხოლოდ პატარა ეკლესიას, არა წმინდათ ნათალი ქვისაგან აშენებულს, რომელსაც დასავლეთით ადგია პატარა სამრეკლო და სამხრეთით მიშენებული აქვს უბრალო ქვის ოთახი. შესავალი ეკლესიაში ამ სამხრეთის ოთახიდან არის. საზოგადო სახე ეკლესიისა იხ. ფოტო №17487 (აგრეთვე უვაროვისა, ტაბ. XI). ეკლესიას ზღუდე ჰქონია ქვითკირისა, მაღალი, კბილოვანი, მაგრამ ეხლა სანახევროდ დანგრეულია.

სხვა შენობები, უმთავრესად დიდი ძველი საოსტინაგე, ანუ სატრაპეზო, ოთახები და სენაკები ქვემოდ ფერდობზეა გაშენებული და უერთდებიან ეკლესიის ზღუდეს. აქ ბარტოლომეის დროს პაპები (სვანეთის დეკანოზები) ცხოვრობდნენ, ეხლა იქ ეკლესიის შეიარაღებული მცველების სადგომია.

კალის ეკლესია წარმოადგენს მთელი სვანეთის მთავარ სამლოცველოს. ეს სვანებისათვის ის არის, რაც მთელი საბერძნეთისათვის დელფის ტაძარი იყო. ეს აერთებს სვანებს თემებად დაყოფილს ისე, როგორც დელფის ტაძარი აერთებს სხვა და სხვა ბერძენთ რესპუბლიკებს.

ყოველ თემს სვანებისას თავისი ეკლესიები აქვს აუარებელის ჯვარ-ხატებით, რომელნიც დიდათ სწამთ, მაგრამ არც ერთი ისე ძლიერად არ მიაჩნიათ, როგორც „ლაგურკა“, წა კვირიკეს და ივლიტას ეკლესია და მასში დაცული საუცხოო, ბიზანტიური ხელოვნების სანაწილე-ხატი, რომელსაც ისინი შალიანს უწოდებენ. ამიტომაც დიდი ბოროტების და დანაშაულობის ჩამდენის აღმოსაჩენად შენიშნულ პირებს ამ ხატზე აფიცებენ და მაგალითი არ ყოფილა წინა დროში, რომ სვანს ფიცის დროს თავისი დანაშაული არ აელიარებოთ და არ გატეხილიყოს დანაშაულობაში.

სვანების გადმოცემით შალიანი სვანი იყო. ერთხელ იმერეთის მეფემ ასი სვანი გამოიწვია და მათ შეუკვეთა გეგუთის ველის მოთიბვა. შალიანმა მეფეს წინადადება მისცა, რომ ის მარტოდ მარტო მოთიბავდა ველს სწორედ იმ დროის განმავლობაში, რაც მან ას სვანს დაუნიშნა, მაგრამ გასამრჯელოდ შალიანისათვის ის ნივთი უნდა მიეცა, რასაც ის მოითხოვდა. მეფემ თანხმობა გამოაცხადა. შალიანი შეუდგა საქმეს და დანიშნულ დროზე შეასრულა იგი. გასამრჯელოდ გამოითხოვა ეს კალას ხატი. მეფემ პირობა აუსრულა. შალიანმა ხატი გამოხვია ვაცის ტყავში და სვანეთში გამოემგზავრა. კალას თემის მცხოვრებლებმა გაიგეს, რომ შალიანს ასეთი ძვირფასი ნივთი მოაქვს, მოინდომეს მისი წართმევა, დახვდნენ გზაში, მოკლეს შალიანი და ხატი ჩაიგდეს ხელში, მაგრამ არ იცოდნენ, სად წაეღოთ, სად დაესვენებინათ; ამიტომ შეუბეს

უღელში ორი კურო; უღელზე ბოძი მიაკრეს, ბოძზე ხატი დაამაგრეს და ისე გაუშვეს თავის ნებაზე კუროები. ხარებმა გადალახეს ენგურის მდინარე, შეუდგენ აღმართს და გაჩერდნენ იმ მთის წვერზე, სადაც ეხლა წმინდა კვირიკეს ეკლესია არის. აქ ააშენეს მონასტერი სვანებმა და მას შემდეგ აქ ინახება შალიანის ხატი.

არსად სვანეთში ეკლესიას მცველი არა ჰყავს. მხოლოდ კალას ეკლესიას დღიან-ღამიან დარაჯობს ორი შეიარაღებული სვანი. თავი შალიანის ხატი შენახული აქვთ აბრეშუმის მანდილში გამოხვეული, რკინით შეჭედდის სკივრში. ორჯერ წელიწადში, კვირიკე და ივლიტას დღეობას, შაბათს აღდგომის კვირისა და 15 ივლისს, ხატს ამოიღებენ, გარეცხენ და ნარეცხი წყალი ითვლება წმიდა წყლად, რომელიც ყველაფერს არჩენს, ყველაფერს შველის. ამ წყალს ასხამენ განსაკუთრებულ სპილენძის პატარა დოქში, რომელიც თავის თავად ჩაითვლება უაღრესი ხელოვნების ნაწარმოებათ, და მით ატარებენ სოფელში. ამ წყლის საშუალებით აფიცებენ ხალხს, ზოგჯერ, ხატის მაგიერ. ეს ორი ნივთი, შალიანი ხატი და საუცხოოდ შემკობილი, ნაჭედი, სპილენძის დოქი, შეადგენენ უმთავრეს და ფასდაუდებელ საგანძურს ამ ეკლესიისა.

ეკლესიაში იშვიათად თუ ვინმეს შეუშვებენ, არა თუ საერო, არამედ სამღვდელო პირთაც. ცნობილია, რომ გაბრიელ ეპისკოპოსსა დიდი დავიდარაბა დასჭირდა, რომ ეკლესიაში შეეშვათ. აგრეთვე ა. სტოიანოვს და დ. ბაქრაძეს შალიანის ხატი არ აჩვენეს.

ხატი და ეკლესია პირველად გაშინჯა პოლკ. ბარტოლომეიმ 1854 წ. შემდეგ ფრანგმა მოგზაურმა ბურნევილმა 1875 წ. ხოლო დაწვრილებით აღწერა და ზოგიერთი ხატები ფოტოგრაფიულადაც გადმოიღო გრაფ. უვაროვისამ, თათარხან დადიშკელიანის ხლებით და მისი გავლენით სვანებზე. ჩვენც პირველად აქ დაბრკოლება შეგვხვდა. როცა ჩვენ კალას საზოგადოებაში ჩავედით და ადგილობრივ სკოლაში დავბინავდით, საუბედუროდ, ავდარი მოვიდა. კალის ტოპოგრაფიული მდებარეობა ისეთია, რომ აქ ხშირია სეტყვა ზაფხულში და ამას სვანები ხატს აწერენ. ხატი განრისხდება, თუ ხელი შეახეს და სეტყვას მოუვლენს სოფელსო. ამიტომ ჩვენ ვამჯობინეთ, ზოგიერთი გავლენიანი სვანების რჩევით, ჯერ სხვა ეკლესიები დაგვევლო, ენგურის სვანეთისა, შემდეგ მოვსულ ვიყავით კალაში; მაშინ უფრო ადვილი იქნება ამ ეკლესიის გაშინჯვაო. ჩვენც აგრე მოვიქეციით.

დაბრუნებისას, რომ უკეთ მივღწეოდით მიზანს, ბესარიონ ნიჟარაძის რჩევით, წინდაწინ პაპებს ვაცნობეთ, კალის ეკლესიის მოლოცვა გვინდა და მთელს საზოგადოებას ვპატიჟობთ ნადიმზეო. ამისთვის ფული გავუგზავნეთ და ვსთხოვეთ მარაგი დაეჭირათ: დაემზადებინათ არაყი, პური, ყეიდათ ცხვრები, ჩამოესხათ თაფლის სანთლები და სხვა, რაც საჭირო იყო. მაგრამ წინა დღით, როცა კალასკენ ვბრუნდებოდით, საშინელი ავდარი დადგა, დიდი წვიმა დაიწყო, წვიმაში თოვლსაც ურევდა. ჩვენ იმედი დაგვეკარგა ჩვენი წადილის განხორციელებისა, მაგრამ საბედნიეროდ, მეორე დღეს მშვენიერი მზიანი დღე გათენდა. ამან გვიშველა. ეს იმის ნიშანი იყო, რომ ხატები ჩვენზე აღარ ჯავრობდნენ. ადრე დილით უკვე ეკლესიაზე ავედით ცხენებით. პაპები, მცველები და ნაწილი ხალხისა იქ დაგვხვდა. საკლავი ცხვრები მოეყვანათ. ხალხმაც იწყო მოდენა. პაპებმა ცხვრებს ანთებული სანთლები მიაკრეს, დაიჩოქეს მთელ ხალხთან და ჩვენთან ერთად და იწყეს სვანური ლოცვა. ბლალოჩინი ბესარიონ

ნიჟარაძე ლოცვაში არ გაირიეს. როდესაც ლოცვა გაათავეს, ცხვრები წაიყვანეს დასაკლავად და სადილის მარაგს შეუდგნენ. ჩვენ ეზოში ფოტოგრაფიული აპარატი მოვაწყვეთ და პაპებს ვსთხოვეთ ხატები ჩამოეღოთ კედლებიდან და მოეწოდებინათ, მაგრამ მათ განაცხადეს, რომ ხატებს ხელს ვერ ახლებენ შიშით. იძულებული შევიქენი მე თვითონ ჩამომეღო კედლებიდან და თაროებიდან ხატები. დახმარებას მიწევდა ერთი სვანი დიაკონი, რომელიც იმერეთში ნამყოფი იყო და საიმისოდ ხატის ხელის შეხებას არ შიშობდა. გაშინჯვის და აწერის შემდეგ მე ხატს ვაძლევდი ბესარიონ ნიჟარაძეს, მას მიჰქონდა ეზოში აპარატთან და ერმაკოვი იღებდა სურათებს. მაგრამ ხალხი გუნდ-გუნდათ მოდიოდა და ყოველთვის განგაშს ასტეხდა ხოლმე, ვიღუპებით, ეს რა არის ჩვენს თავზე, რაც ეკლესია გაშენებულა, ხატები არავის გამოუტანია გარედ, ეხლა ამოგიწყდება ცოლშვილი და სხვა. ბესარიონ და ივანე ნიჟარაძე ამშვიდებდნენ ხალხს, ზოგჯერ იძულებული ვიყავი მიშველებოდი მათ, მაგრამ როცა ერთი გუნდი დაწყნარდებოდა, მეორე მოვიდოდა შეიარაღებული და ხელახლა შეიქმნებოდა განგაში და ჩოჩქოლი. ეს გარემოება, რასაკვირველია, ხელს გვიშლიდა და ამით აიხსნება, ზოგიერთი ჩემი მიწოდებული ხატი ერმაკოვს გადაუღებელი დარჩა, თუმცა ცოტა-რიცხოვანი და მეორე ხარისხისა. თავი ხატები და ნივთები ყველა კარგად გადაღებული იქმნა ფოტოგრაფიის საშუალებით.

როცა ხალხის დენა შეწყდა, ყველა დამშვიდდა, წინეთ მარტო ლაპარაკი და განგაში იყო, თორემ უდიერად არავინ მოგვპყრობია. პირიქით, მე ლმობიერად ლაპარაკი და ხვეწნა დამიწყეს, ამეხსნა მათთვის, რომელი ხატი უფრო ძლიერია. ბოლოს გავახსენე ვინეთ რკინით შექედილი ზანდუკი, რომელიც ჩვენს წინ არავის ენახა. შიგ, სხვათა შორის, აღმოჩნდა ხელნაწერი, ტყავის წიგნი, იერუსალიმის დიდი კანონი, ჭურჭლები და მრავალი წვრილმანი ნივთები. ესენიც გადმოვიღეთ ფოტოგრაფიულად და აღვსწერეთ. ნაშუადღევის ხუთს საათზე მუშაობა დავამთავრეთ და ნადიმს შევუდექით.

სვანებმა დიდათ მოილხინეს, იყო სიმღერა, გალობა; ზოგიერთი ჰიმნი და სიმღერა მარტო ეკლესიისათვის აქვთ მიჩნეული; სხვაგან მას არ გალობენ. ხალხი კმაყოფილი დარჩა, სიმღერით და თოფის სროლით გამოგვაცვილეს. ერთი გუნდი თავი კაცებისა, რომელიც ჩვენ დაგვესწრო, ფოტოგრაფიულადაც გადმოვიღეთ და ეს ფოტოგრაფია საუკეთესო ნიმუშია სვანების ტიპებისა (№17539).

ეხლა გადავიდეთ თვით ეკლესიაზე და მასში დაცულ ნივთებზე.

ეკლესია, როგორც მოვიხსენიეთ, პატარაა, სიგრძის 11 არშინი და 12 ვერშოკი; განით 7 არშინი. თალი დამყარებულია სამ თლილის ქვით გაკეთებულს სარტყელზე; ფანჯარა ორი აქვს; ერთი აღმოსავლეთით და მეორე დასავლეთით. ეკლესია სულ მოხატულია. მხატვრობა საკმაოდ ლამაზია და შეიცავს უმთავრესად ცალკე სახეებს და სცენებს წა კვირიკე და ივლიტას ცხოვრებიდან. საკურთხეველის კონქში მოთავსებულია ვედრება, ხუცური წარწერებით სახელებისა. დასავლეთის კედელზე წარმოდგენილნი არიან სრულის ტანით: წ-დ კე და წ-დ ივლიტა. ჩრდილოეთის კედელზე : წ-დ გ-ი და წ-დ თე. აქვეა წარმოდგენილი კიდევ: წ-ა ივლიტა, ვედრების სახით, ქრისტეს წინ და წარწერით:

„წ“ : ივლიტა : ჰმადლობს : ქესა  
ლსა : რმლმნ სრლყო წმზდ  
თთესა : ივლისსა იე : წმზად წმსა“.

იმავე კედელზე სწერია:

„თთესა : ივლისსა / ივ : წმზად წმსა / კ-ესი“.

ეკლესიის ცაში წარმოდგენილია ამაღლება ქრისტესი.

კანკელი ქვისაა, სამ-კამარიანი, შუა კამარა ერთად ერთი შესავალია საკურთხეველში. კანკელიც მოხატულია. მასზე წარმოდგენილი არიან: წა სტეფანე, წა კვირიკე, წა ივლიტა და წა ეკატერინე. ყველას ასომთავრული წარწერა აქვს სახელისა. სარტყელზე თაღისა სწერია:

საყდარი.

ესე. წდისა

კრკესი : ოდეს . მ

იწისა :: ძრვამნ

დაარღვია . მე

ანტონის . შ-მნ . გ-ი

ახლად . შევკეთე . ვ

ნცა . არ . დამივ

წყოთ . ღნ შეგიდ

ოს :

საყდარი

ესე წმიდისა

კვირიკესი, ოდეს მ

იწისა ძვრამან

დაარღვია, მე

ანტონის შვილმან გიორგი

ახლად შევაკეთე. ვი-

ნცა არ დამივი-

წყოთ, ღმერთმან შეგინდ-

ოს.

(შეადარე: დ. ბაქრაძე, გვ. 117-118. ბარტოლომეი, გვ. 164, ტაბ. I, №5). ჩემს და ბაქრაძის წაკითხვაში ერთი განსხვავება არის: ის კითხულობს მე-7 სტრიქონში: შევსზეთე; მე კვითხულობ: შევაკეთე. ბარტოლომეის მიერ ხელით გადმოღებული წარწერა სრულიად სწორი არაა, მაგრამ ასო: კ: ამ სიტყვაში იქაც კარგად მოსჩანს. (იხ. ბარტოლომეი, ტაბ. I, №5).

3. ინგოროყვა თავის სვანეთში მოგზაურობის მოკლე ანგარიშში („საქართველოს მუზეუმის მოამბე“, ტ. VII, გვ. 348) აღნიშნავს საფრესკო წარწერას კალას ეკლესიაში 1183 წლისა, რომელიც ჩვენ არ შეგვინიშნავს. ეს არც გასაკვირალია, ჩვენი ყურადღება უმთავრესად მიქცეული იყო ცდაზე, რომ ერთს დღეს, ნაშუადღევს 5 საათამდის, მოგვესწრო აღნუსხვა, აღწერა და ფოტოთი გადმოღება მრავალ-რიცხოვანი ძეგლებისა, სულ 84, რომელიც იქ აღმოჩნდა. თვით წარწერა შეიძლება ეხლა გამოცემული იყოს, მაგრამ ჩვენამდის ჯერ არ მოუღწევია. მუზეუმის „მოამბის“ ჯერ მარტო რვა ტომი გვაქვს ნახული.

ეკლესიაში ინახება:

1. **ჯვარი** დიდი ხისა, კანკელის საწინავე, რომელიც დატოვებულია თავის ადგილზე, ესე იგი კანკელის წინ, შუაში, აღსავალის კარის პირდაპირ და ჰფარავს თითქმის მთელს ეკლესიას, ვინაიდან თავის კვარცხლბეკით და ზემოთ ქუდით სიმაღლე აქვს ორი საყენი, კვარცხლბეკის სიმაღლეა 1 არშინი და 11 და ნახევარი ვერშოკი, და თვით ჯვარისა 3 არშინი და 8 ვერშოკი, განი მისი მარცხენა და მარჯვენა ფრთებით სულ არის 2 1/2 არშინი. კვარცხლბეკს ორი საფეხური აქვს. ჯვარი შეძერწილია ოქროთი დაფერილის ფირფიტებით, საერთოდ მდარე ხელობისა. წმიდათა სახეები: მაღლა – ჯვარცმა, მის ქვემოდ უმზომდის ჯვრებია, თვით უმზო ძვირფასი ქვით არის შემკობილი; მის ქვემოდ – მთავარ ანგელოზები; ამას ქვემოდ: ორი მაცხოვარი, ორი წა გიორგი ცხენით;

კიდევ მაცხოვარი და ორი წა გიორგი, ოთხი მთავარ ანგელოზი, ტლანქი ხელობისა და ბოლო ორი მთავარანგელოზი ლამაზი ნახელავი. მარცხენა და მარჯვენა ჯვარის სახეები კიდევ უფრო ტლანქია. ამ ჯვარს აქვს ზემოდ, როგორც მოვიხსენიეთ, ქუდი ანუ მიტრა ცილინდრის სახისა; შესდგება ხუთი ერთმანეთზე მილურსმული ვერცხლის ფირფიტებისაგან, რომელთა წაწვეტიანებული თავები იყრებიან ზემოდ და ქმნიან კონუსის თავს სამის ბურთით, და მათზე ზემოდ ჯვარით. ყველა ფირფიტების შუა ადგილი უკავია ვედრების გამოხატულებას, ამობურცული შემკობილობით (ამ ქუდის კარგად გამოსული სურათი იხ. უვაროვისა, გვ. 84, ნახ. 16). თვით ჯვარის გადმოღება ფოტოგრაფიულად შეუძლებელი შეიქმნა პატარა აპარატის უქონლობის გამო.

2. **ჯვარი ხისა**, შუა ტანისა, 67X45 სანტ. შეძერწილია ოქროთი დაფერილ ვერცხლის ფირფიტებით, რომლებზედაც სახეები წთა ამრიგად არის განაწილებული: ზემოდ – მაცხოვარი, სრულის ტანით, სახარებით, მაკურთხევლის მარჯვენით და წარწერით: იო ქე; ღვთის მშობელი ჩვილად, წარწერით: დდა ლსა; ღვთის მშობელი ვედრებისა, იოანე ნათლის მცემელი, სრულის ტანით: წდ იე; მთავარ ანგელოზი და ერთი წმიდანი კიდევ, სახელი არ უწერია. მარცხენა და მარჯვენა ფრთებზე: ორი მახარობელი, ორი მთავარ ანგელოზი და ორი სხვა წმიდანი. ხელობა გვარიანია (ფოტო არა გვაქვს).

3. **ჯვარის ხისა**, შუა ტანისა, შეძერწილი ვერცხლის ფირფიტებით, რომლებზედაც წარმოდგენილი არიან: ზემოდ მაცხოვარი, სრულის ტანით, მაკურთხევლის მარჯვენით და სახარებით მარცხენა ხელში; შუაში ჯვარცმა; მის ქვემოდ მთავარ ანგელოზი, სრულის ტანით, ლაბარუმით და ყვავილით; კიდევ მთავარ ანგელოზი, მაგრამ წელსზევითი, მედალიონში; მარცხენა ფრთას ჯვარისა ვერცხლი მოძარცული აქვს; მარჯვენაზე ორი მედალიონია უწარწერო სახეებით, თავუკუღმა მოქცეულნი, წელსზევითნი (№17281). მეორე გვერდზე ჯვარისა (№17282), ზემოდ ვედრებაა; მისი ქვემოდ მთავარ ანგელოზი მედალიონში; უმბო შემკობილია დიდის ქვით; მის ქვემოდ მაცხოვარი სრულის ტანით, სრულიად ისეთი, როგორც პირველ გვერდზე, და მთავარ ანგელოზი მედალიონში. მარჯვნივ და მარცხნივ ფრთებზე: მთავარ ანგელოზნი და ორი წმიდანი, თავუკუღმა მოქცეულნი. ხელობა ამ ჯვარისა უკეთესია, ვიდრე სხვებისა.

4. **ჯვარი**, სიმაღლით ერთი არშინი და 6 ვერშოკი, განით 13 ვერშოკი; დაფარულია ვერცხლის ფირფიტებით, რომელზედაც წარმოდგენილი არიან მოციქულნი, მაცხოვარი ტახტზე მჯდომარე და მთავარ ანგელოზნი. ქვემო ნაწილი მოძარცულია; ხელობა დაბალია.

5. ასეთივე ხელობის **ჯვარი**, რომელზედაც არის სახეები წა გიორგისა, ტლანქი ხელობისა.

6. **ხატი-სანაწილე**, თავი განძი ეკლესიისა, მინანქრიანი, ბიზანტიური ხელობისა (№17299). ეს სანაწილე შეიცავს ხისაგან გაკეთებულ ოთხკუთხედ კოლოფს, ანუ ყუთს, შეძერწილს ოქროთი დაფერილის ვერცხლით. შუაში

წარმოდგენილია ექვს-ფრთიანი ჯვარი გოლგოთაზე დამყარებული, ოთხის საფეხურით. ძველი განკუთვნილი ყოფილა შესანახავად ძელი ჭეშმარიტისა, ესე იგი ნაწილის იმ ჯვარისა, რომელზედაც ქრისტე იყო ჯვარცმული. ჯვარს აქეთ-იქით წარმოდგენილნი არიან მდიდრულ სამეფო ბიზანტიურის სამოსლით და გვირგვინებით კონსტანტინე და ელენე. ჯვარის ზემოდ ორ მრგვალ მედალიონში ორი მთავარ ანგელოზია: მიქელ და გაბრიელ. ზემოდ და ქვემოდ კონსტანტინესა, ისე როგორც ელენესა, ოთხკუთხედი უჯრედებია ნაწილებისათვის და მათ კარებზე წარმოდგენილნი არიან: მოციქულნი პეტრე და პავლე, იოანე ნათლის მცემელი და წინასწარმეტყველი ელია. ყველა ამ სურათებს ბერძნული წარწერები აქვს სახელებისა და ყველა ფრიად ლამაზი და ნაზი ხელობისა არის. ზედა პირს კოლოფისა უვლის აშია, მორთული აკანთის ფურცლების მსგავსი შემკობილობით. ამას კიდევ ახლავს დაკბილული ნაჭედი წრე, რომლიდანაც შედის ხატის ნაწილების თავსახურავი ფიცარი, აგრეთვე ოქროთ დაფერილი ვერცხლისა. ამ სახურავის შემკობილობა და მორთულობა უფრო დიდი ღირებულობის არის. შუაში აქ ოქროს ფირფიტაზე, რომლის სიმაღლე არის 3 და ნახევარი ვერშოკი, ხოლო განი ორი ვერშოკი, წარმოდგენილია ჯვარცმა საუცხოო ბიზანტიური მილანქრით შესრულებული, მაგრამ, სამწუხაროდ, დაზიანებული. ქვემოდ ჯვარცმულის ორივე მხარეს დგანან ღვთის მშობელი და იოანე ღვთისმეტყველი. ზემოდ მოფრენილნი მთავარ ანგელოზნი; მათ ზემოდ, ცაში მზე და მთვარე. ყველა სურათებს ბერძნული წარწერა აქვს სახელებისა. ქვემოდ ჯვარცმულისა, ოქროს ფირფიტაზე მილანქრით გამოყვანილია ბერძნული სამ-სტრიქონიანი წარწერა, რომელიც წარმოადგენს იამბიკურ ლექსს და რომელიც გარჩეულია პამიალოგსკის მიერ. შინაარსი მისი ასეთია:

„ილარიონს, რომელმაც შემოზღუდა (შეამკო) ნათელი (ღვთიური სახე) ბრწყინვალე ნივთითა, ექნება ამით გზა მიმავალი უაღრესი ნათელთან“.

ჯვარცმის ფირფიტა შემოზღუდულია ისეთივე ხელობის აკანთის ფურცლების აშით, რომელიც არის პირველ ფიცარზე. ყველა ამას უვლის დიდი და ფართო აშია შემკობილი მრავალი ძვირფასი ქვებით, რომელნიც მოთავსებულნი არიან დიდრონს და მძიმე ბუდეებში. უმეტესი ნაწილი ამ ქვების დაცულია. კუთხეებში და შუაში ბუდეები ოთხკუთხედია, ზემოდ და ქვემოდ კვერცხის მსგავსნი, ხოლო ოთხკუთხედეების ზემოდ და ქვემოდ მრგვალნი. ზოგი მცირე ქვები ვარსკვლავის სახედ არიან განწყობილნი; ქვემოდ, შუა წოწოლა ბუდეში სარდიონის ქვაა და ამ ქვაზე ამოჭრილია მშვენიერი სახე იესო ქრისტესი. ხოლო ეს ქვა და მისი ბუდე თავის ადგილზე არ არის; ის პირდაპირ უნდა იდგეს, აქ კი გვერდზე არის დაწოლილი. ქვემო აშია აქ ნაჭედი მორთულობითაა შემკობილი და წარმოადგენს ერთი მეორეზე გადაბმულ ბალახს, რომელშიაც მოსჩანან ხუთ-ფოთლიანი მისტიური ვარდები სპარსულ-ბიზანტიური რიგისა. სისქეზე შემოვლებული ნაჭედი ლამაზი აშია ყუთისა შემკობილია მრავალი მედალიონებით და სხვა და სხვა ჯვრებით. ერთი მხარე აშიისა დაკარგულია, სხვებზე მედალიონებში წარმოდგენილნი არიან წელსზევითნი სახეები წა თეოდორესი, დიმიტრისი, იაკობისა, წა გიორგისა და წმიდა მარინესი. ყველას ამათ ბერძნული წარწერები აქვს სახელებისა. ერთის მედალიონის წარწერა გაფუჭებულია. სამწუხაროდ ამ გვერდის წმიდათა სახეები



მთელად ფოტოგრაფიულად გადმოღებული არ არის, მხოლოდ №17299-ზე ჩვენი ფოტოგრაფიისა ჯვარის, საფეხურების ქვემოდ, გადმოღებულია ნაწილი აშიისა წმიდა მარინეს მედალიონებით, სწორკუთხედებიანი ჯვარით და სხვა შემკობილობით. აქედან შეიძლება ვიქონიოთ წარმოდგენა ამ საუცხოო აშიის შესახებ, ვინაიდან სხვა მედალიონებიც ამავე რიგის არის. ხალხის განგაში ხელს უშლიდა, ერმაკოვი ნერვიულობდა და ამით აიხსნება, რომ ეს ნაწილი გადმოუღებელი დარჩა, თუმცა დანიშნული იყო ჩემს მიერ.

მეორე გვერდი ხატ-კოლოფისა (№17301) შემკობილია ერთობ ლამაზი ნახელავი კომპოზიციით ქრისტეს აღდგომისა, ანუ უკეთ ვსთქვათ, ჯოჯოხეთის წარტყვენისა, ბერძნულის წარწერით. ქრისტე სდგას ჯოჯოხეთის შემუსვრილ კარებზე, მარცხენა ხელში ექვს-ფრთიანი ჯვარი უჭირავს, მარჯვენით ჩასჭიდებია მის წინ დაჩოქილს ადამის ხელს და აღადგენს მამად მთავარს; ადამის გვერდით ევა სდგას, სავედრებლად გაპყრობილი ხელებით; ევას უკან კიდევ ორი ფიგურაა; ქრისტეს უკან ოთხი; მათ შორის ორი გვირგვინოსანი მეფე, დავითი ახალგაზრდა და სოლომონი მხცოვანი. პეიზაჟი მთისაა. აშია ირგვლივ ფრიად ლამაზია ბროწეულის ყვავილების სახით შემკობილი.

დაწვრილებით აღწერა ამ ხატ-კოლოფისა იხ. უვაროვისა გვ. 94-100, ტაბ. XXVI-XXVII. დრო მისი გაკეთებისა ჯერ ნამდვილად არ არის დადგენილი და ზოგადად ნაჩვენებია გრაფ. უვაროვის მიერ IX-XI საუკ. ჩვენი სურათები ბევრად უკეთესია, ვიდრე უვაროვის გამოცემაში. მე მაქვს კიდევ კარგად შესრულებული დიდი სურათი ამ ხატის ბერძნული წარწერისა.

7. **ხატი მაცხოვრისა**, ვერცხლისა, ნაჭედი, 87X60 სანტ. მაცხოვარი მაღალ-ზურგიან ტახტზე ზის. ტახტი შესდგება ქვემოდ სამმაგი ჩუქურთმიანის სვეტებისაგან, რომელნიც ზემოდ ვიწროვდებიან და თავდებიან საერთო სვეტის თავით აკანთის ფოთლის სახედ. ხის ნაწილზე საჯდომისა ძვეს ორი მუთაქა, მოქარგული თავებით და ამ მუთაქებზე ზის მაცხოვარი. ზურგი ტახტისა შესდგება ორმაგი ჩუქურთმიანი სვეტებისაგან; ესენი თავდებიან მარცხნივ; ორი ფრინველის ქანდაკებით, რომელთაგან ერთი მეორეს ნისკარტს უდებს პირში; მარჯვნივ ასეთივე პოზით ორი მხეცია. მაცხოვრის სახე მხცოვანია; გრძელი თმა მისი ნაწნავებად ჩამოდის მხრებზე; ნიშბი დიდია, ჯვარის სახისა; შემკობილი ყოფილა ხუთის ქვით; ერთი აკლია; მაცხოვარი მარჯვენა ხელით აკურთხებს, მარცხენა უდევს სახარებაზე, რომელიც მუხლზე უძევს; ფეხები შიშველი უძევს მოჩუქურთმებულ სკამზე დაწყობილი. ზემოდ, ნიშბის აქეთ-იქით, ოთხკუთხედებში ასომთავრული წარწერა: **ა-ო ქ-ე. ეზო და აშიები შემკულია ლამაზის ყვავილოვანის ორნამენტით.** ზემო აშიაზე, მრგვალ მედალიონებში, წარმოდგენილია, შუაში გამზადებული ტახტი; კუთხეებში დედა ღვთისა და ნათლისმცემელი, წარწერებით: **ღ-ღღ ღ-თსა, წ-ღ ნათლის მცლი.** ასეთივე სამი მედალიონი, წელს ზევითი ფიგურებით **წ-თა**, ქვემო აშიაზეა; სახელები არ უწერია. მარცხენა აშიაზე სრულის ტანით, ოთხკუთხედებში, წარმოდგენილნი არიან გრიგოლ დიდი: **წ-ღ გ-გლ**; მეორეს ზემოდ, აწერია: „**წ-ღ ედლ(?)**“ მარჯვენა აშიაზე: **წ-ი მქლ**, საზომით და **წ-ი გ-ი** სრულის ტანით. ხელობა მე-14-15 საუკ. უნდა იყოს. (№17298).

8. ხატი წმიდისა კვირიკესი, ოქროსა, ნაჭედი, 15 3/4X10 3/4 ვერშოკი; წმიდანი წარმოდგენილია სრულის ტანით და თავისებური ტანისამოსით, რომელიც გერმანულს გვაგონებს; გაშლილი მარჯვენა ხელი გულზე აქვს მიდებული; მარცხენაში ჯვარი უჭირავს. (№17304). დაწვრილებითი აღწერა იხილეთ უვაროვისა, გვერდი 117, ტ. XXXVI, 62.

ნიმბი დიდია, ორმაგი გრეხლით შემოვლებული. სახე წმიდანისა დაზარალებულია, აგრეთვე ქვემო ნაწილიც. მარჯვენა კუთხიდან, ზემოდ, ექვს-ნაწილედ სფეროდან ქრისტეს მაკურთხეველი ხელი მოსჩანს.

წარწერა სახელისა გამოყვანილია ერთობ ლამაზის მოგრძო ასომთავრულით: წ-დ კ-კე. ეზო შესდგება ერთი ერთმანეთში გადაბმული სიმრგვალებებისაგან და რომბებისაგან. აშიები ბალახოვანის სახით არის შემკობილი ლამაზად. ქვემო აშიას ნახევარი აკლია. აშიებში ეხლა შვიდი მრგვალი მედალიონია წმიდათა, წელსზევითნი; ესენი არიან მოციქულნი, წ-ა გიორგი და სხვა. ქვემოდ, მარჯვნივ, კვირიკეს ფეხთან დაჩოქილი ფიგურაა წარმოდგენილი, მაგრამ წელს ზევით ფიგურა სულ მოშლილია. აგრეთვე ეხლა მოშლილია ნაწილი წარწერისა ამ ფიგურის ზურგს უკან; ხოლო დ. ბაქრადის დროს ცოტა კლებია (ბაქრადე, გვ. 117). მოგვყავს წარწერა შევსებით. ბაქრადის ტექსტიდან ამოღებულს ასოებს ფრჩხილებში ვსვამთ:

ქ : წო : და : დ-ბლო : ქსმწმ

წმიდაო და დიდებულო ქრისტეს მოწა

ეო : კ-ე : მეოხ : ექმენ : წ-ე

მეო კვირიკე, მეოხ ექმენ წინაშე

ქსსა : ფ დ : მოსავ[სა]

ქრისტესა ფრიად მოსავსა

ძლისა : ძ-ნსა : [სგანუ]. . .

ძალისა შენისა სგანუ. . .

ნის : რ-ნ : შეამ[კო]

ნის, რომელმან შეამკო

წ-დ : ესე : ხ-ტი : დ-ბლ[ი]

წმიდად ესე ხატი დიდებულისა

სა : სახისა :

სა სახისა

შენისა :

შენისა.

ხატი მე-12-13 საუკ. უნდა იყოს.

9. ხატი წმიდისა კვირიკესი და წმიდისა ივლიტასი, ვერცხლისა, ნაჭედი, 69X47 სანტ. შუაში, განცალკევებულ ოთხკუთხედ ფირფიტაზე წარმოდგენილი არიან რელიეფით ტლანქი ფიგურები კვირიკე და ივლიტასი, წარწერებით: წ-დ კე, წ-დ ილტა. ამას ახლავს ყოველი მხრით სხვა ფირფიტები, მარჯვნივ და მარცხნივ თითო; ორი მოგრძო ქვემოდ და ერთი დიდი ზემოდ. ყველა ეს ფირფიტები სავსეა რელიეფით განაჭედი ფიგურებით. ზემო ფირფიტაზე ფიგურები ორ რიგად იყოფა; ზემო რიგში, შუაში, ლამაზი „დროზნიცა“ ფილიგრანისა, ერთის ძვირფასის ქვით შუაში. ამ დროზნიცის მარჯვნივ მედალიონებში მკერდსზევითი ფიგურაა ქრისტესი, წარწერით: დ-ჰ ქ. მარცხნივ: დ-დ ლ-დ. ამის მარცხნივ: ჯვარცმა ღვთიმობლითურთ. ქვემო რიგში ზემო ფირფიტისა, შუაში, ვედრებაა; ქრისტეს ფიგურა ვედრებაში წელსზევითია, ოთხკუთხედში, სახარებით და მაკურთხეველის მარჯვნივით; წარწერა: დ-ჰ ქ-ე. ფიგურები ღვთის მშობლის და იოანესი ორ მრგვალ პატარა მედალიონებშია მკერდზევითად წარმოდგენილი, წარწერებით: დ-დ ლ-დ, წ-დ ი-ე. ამის მარცხნივ წმიდა გიორგია წელსზევითი, ოთხკუთხედ მედალიონში, შუბით და წარწერით: წ-ი გ-ი. ამის მარცხნივ მთავარ ანგელოზია.

ორად განყოფილებას ფიგურებისას ზემო ფირფიტაზე არღვევს ფიგურა წა ნიკოლოზისა, რომელიც ყველაზე მოზრდილია, წელსზევითი, ოთხკუთხედში, და უჭირავს მთელი სიმაღლე ზემო ფირფიტისა. ის მარჯვენა ხელით აკურთხებს, მარცხენაში სახარება უჭირავს. წარწერა: წ-ღ ნკლზს (sic). ამის მარჯვნივ, ზემოთ კუთხეში მაცხოვარია ტახტოსანი; მის ქვემოდ მთავარ ანგელოზი. მარჯვენა და მარცხენა ფირფიტებზე, ორთავეზე, სამ-სამი ერთგვარი ფიგურაა: ზემოდ და ქვემოდ მაცხოვარი ტახტოსანი; შუაში წმიდა მხედარი ცხენით; წარწერა არა აქვს, მაგრამ ერთი უნდა იყოს წა გიორგი, მეორე – წა თეოდორე; ფიგურები ცოტა განირჩევიან ერთი მეორისაგან; მარცხენა ვეშაპს გმირავს თავ-ჯვარიანი შუბით; ის უხმლოდ არის; მოსასხამი ზემოდ არ აცვია. მარჯვენა ფიგურა ადამიანს გმირავს; მას ხმალი არტყია და მისი მოსასხამი მის ზურგს უკან ჰაერში ფრიალებს.

ორ ქვემო ფირფიტაზედაც ოთხი სრულიად ერთგვარი ფიგურაა. შუაში წა მხედარი; ზემოდ ის, რომელიც ადამიანს გმირავს; ქვემოდ ის, რომელიც ვეშაპს გმირავს; მათ ორივე მხარეს მაცხოვარია ტახტოსანი. გამოხატულება ყველა ამ ფიგურებისა სრულიად ისეთია, როგორც მარჯვენა და მარცხენა ფირფიტების ფიგურებისა. ხოლო აქ ფირფიტების ბოლოებში წარმოდგენილია ორი ერთგვარი ფიგურა, სრულის ტანით; მარჯვენა ხელით აკურთხებს, მარცხენაში სახარება უჭირავს, ნიშბი არა აქვს, თავზე თითქო ჩალმა ახურავს დანაოჭებული, ტანისამოსიც დასერილის მინაგვარად დანაოჭებულია. ყველა ფირფიტის ფიგურები ერთი ერთმანეთისაგან იყოფა სქლად დაწნულის სიმრგვალებით. ამასთანავე ქვემო ფირფიტაზე, ფიგურებს შუა, ზემოდ და ქვემოდ სიმრგვალებებისა, ასომთავრული ასოებია, რომელნიც წარწერას შეადგენენ, მაგრამ დასაწყისი წარწერისა ქვემო ფირფიტაზეა; ეს შეცდომით მოსვლიათ. ეს ფირფიტა ზემოდ უნდა ყოფილიყო. ასოები საკმაოდ ვულგარულია. ქვემო ფირფიტაზე (№17297) სწერია:

წო კე ილტა	წმიდაო კვირიკე, ივლიტა,
შე კე შლ ცი	შეიწყალე კვირიკე შვილი-ცოდვილი.
ზემო ფირფიტაზე:	
მხცი ორსავე	მოხუცი ორსავე
ცხო რე ბა სა .	ცხორებასა.

ძნელია გადაჭრით თქმა, რას შეიცავს მეორე სტრიქონის ჯგუფი: „კე შლ ცი“. პირველი სიტყვა უნდა იყოს „კვირიკე“, როგორც ეს პირველ სტრიქონშია, თუმცა ასეთი შემოკლებით ზოგჯერ კონსტანტინეც იწერება; მეორე სიტყვას „შლ“ ქარაგმა არა აქვს: შეიძლება ნიშნავდეს „შვილს“, ხოლო „ცი“ უნდა უდრიდეს გამოთქმას: „ცოდვილი“. ამიტომ მეორე სტრიქონი უნდა იკითხებოდეს: „შეიწყალე კვირიკე (თუ კონსტანტინე) შვილი-ცოდვილი“, ანუ „შეიწყალე კვირიკეს შვილი ცოდვილი“. ფოტოგრაფიაზე წარწერა მშვენიერად მოსჩანს. შედარება ადვილია. წარწერას არც ერთი მკვლევარი არ იხსენიებს.

აშიეები ხატისა ერთგვარია, ლამაზად შემკობილი ბროწეულის ყვავილების მსგავსი ორნამენტით და მრგვალი პატარა მედალიონებით წმიდათა, უწარწეროდ. სულ 34 მედალიონი ყოფილა; ეხლა 1 აკლია; შესაძლოა აშია უფრო ადრინდელი

იყოს, ვიდრე თვით ხატი. ამას გარდა ოთხი ძვირფასი ქვაც ამკობს ხატს. ხელობა ხატისა, ჩვენის აზრით, მე-16 საუკ. უნდა ეკუთვნოდეს.

10. **ხატი წმიდა კვირიკესი**, ოქროსა, ნაჭედი, 65X47 სანტ. (№17275). წმიდანი წარმოდგენილია რელიეფით და სრულის ტანით, ახალგაზრდათ, მდიდრულ ბიზანტიურ ტანისამოსით და ჯვარით ხელში და ნიშბით. წარწერა ლამაზის ასომთავრულით: „წმ კე გვერცლისაი“. უკანასკნელი სიტყვა უფრო პატარა ასოებით არის დაწერილი, ვიდრე პირველი ორი. დ. ბაქრაძე უჩვენებს წარწერას კიდევ ქვემო აშიაზე (გვ. 117): წო : ინე : ნათლის : მცემელო შე . . . მაგრამ ქვემო აშიაზე აქ არავითარი წარწერა არ არის და სხვა ხატიდან აქ შეცდომით უნდა იყოს მოყვანილი.

აშიები შემკობილია ორმაგი ბროწეულის ყვავილების მსგავსი ორნამენტით, საუცხოო ნაჭედისა და შიგ მოქცეულია 8 რგვალი მედალიონი, მკერდ-ზევითი ფიგურებით წმიდათა. ზემოდ: მაცხოვარი მთავარანგელოზებითურთ, ქვემოდ: წმ თე, წმ დმტრი, წმ გი; გვერდებზე: წმ პტრე, წმ პლე. გრაფ. უვაროვისას აშიები უფრო კლასიკურის დროისად მიაჩნია, ვიდრე ფიგურა თვით კვირიკესი (გვ. 106, 109), მაგრამ, ჩვენის აზრით, ესენი ერთი დროის არიან, არა უგვიანეს მე-13 საუკ. სურათი ამ ხატისა გამოცემულია გრ. უვაროვის მიერ; იხ. ტაბულა XXXI, სურათი 52.

11. **ხატი წმ კვირიკესი**, ოქროთ დაფერილი ვერცხლისა, ნაჭედი, 55X42,5 სანტ. წმიდანი წარმოდგენილია რელიეფით, წელს ზევით, ჯვარით მარჯვენა ხელში; ნიშბი დიდი აქვს; წარწერა: წმ კე. აშიები ბროწეულის ყვავილების მსგავსი ორნამენტით შემკობილი, რვა მედალიონით მკერდს ზევითი წმიდათა ფიგურებით. მარცხენა კუთხეში ხატისა ცის სფეროდან სჩანს მაკურთხეველი მარჯვენა უფლისა. ხატი უნდა ეკუთვნოდეს მე-15-16 საუკუნეს (№17276).

12. **ხატი წმ კვირიკესი**, ვერცხლისა, ნაჭედი, 55X39 სანტ. (№17284). წმიდანი წარმოდგენილია სრულის ტანით, ახალგაზრდათ, რომაულ ტანისამოსში, ჯვარით ხელში და ნიშბით. ეზო ბალახის მსგავსად არის შემკობილი, ხოლო აშიები რომბ-ლურსმულია. ამათში წარმოდგენილნი არიან მკერდსზევითნი ფიგურები მედალიონებში. ზემოდ ვედრება; ქვემოდ წმიდა მხედარნი; მარჯვნივ და მარცხნივ სრულის ტანით მოციქულნი პეტრე და პავლე. ხატი მე-14 საუკ. უნდა იყოს.

13. **ხატი წმ კვირიკესი**, ვერცხლისა, ნაჭედი, 51X39 სანტ. წმიდანი წარმოდგენილია სრულის ტანით, ბიზანტიური ტანისამოსით და ჯვარით ხელში. გრძელი თმის კავები ჩამოშვებული აქვს მხრებზე. წარწერა: წმ კე. ხელობა ტლანქია (№17285), მე-17-18 საუკ. აშიები უკეთესი ხელობის არის, ბროწეულის ყვავილების მსგავსად მორთული, რვა წელსზევითი სურათებით წმიდათა მედალიონებში.

14. **ხატი ვედრებისა**, ვერცხლისა, ოქროთ დაფერილი, 84X75 სანტ. ყველა ფიგურები სრულის ტანით არიან წარმოდგენილნი (№17274), წარწერებით: ძჳ ქე, დ დდ ლა, წმ ნაი. (=ნათლის მცემელი). აშიები რომბ-ლურსმულია ცხრა, მკერდზევითი წმიდათა ფიგურებით მედალიონებში. მაცხოვრის ფეხებ ქემ წარწერა:

ქე : შე : გი : დეკანოზი:

დ. ბაქრაძეს სიტყვა გ-ი (გიორგი) გამოშვებული აქვს. (გვ. 117). ხელობა მე-16-17 საუკ. უნდა იყოს.

15. **ხატი იოანე ნათლის მცემელისა**, ვერცხლისა, ნაჭედი, 45X35 სანტ. იოანე წარმოდენილია სრულის ტანით; შესამოსელი ქართულ ჩაცმულობას მოგვაგონებს, კაბას გრძელი სახელურებით (№17279). ფიგურა მოკლეა. წარწერა ასომთავრული:

წ-ო : ინე : ნათლის : მცემელო : შ-ე : ენჭუგრსიძე : და  
მეულლესა : მისსა : მრმს : ამ-ნ.

უქარაგმოდ:

წმიდაო იოანე ნათლის მცემელო, შეიწყალე ენჭუგრსიძე და მეულლესა მისსა მარიამს (შეუნდვენ), ამინ. (შეადარე დ. ბაქრაძე, გვ. 116).

აშიები საცერის მსგავსი შემკობილობით არის შემოზღუდული წერტილებიანი წრეებით. მრგვალ მედალიონებში აშიების წარმოდგენილი არიან მკერდზევითნი ფიგურები: ზემოდ ვედრება. წარწერა ქრისტესი ბერძნულია, სხვებისა ასომთავრული: დ-დე დ-ს, წ-ე ი-ნე; ქვემოდ: წ-ე ეკატ. (=ეკატერინე), წ-ე ლუკა და წმიდა ზაქარია (?). აქეთ-იქით: წ-ე კ-ტრე, წ-ე კ-ლე. ხელობა მე-15 -16 საუკ. უნდა იყოს.

16. **ხატი ღვთის მშობლისა**, ჩჩვილედი, 84X52 სანტ. ყოფილა ფერადიანი, მაგრამ ფერადები საკმაოდ მოშლილია; წარწერა ხუცური: დ-დე დ-ე. პერანგი ვერცხლისა აქვს; ნაჭედი ნიშნები და აშიები შემკობილია მდარედ, მედალიონებიც აშიებისა წ-თა ფიგურებით ტლანქია (№17273), მე-17 საუკ. უნდა ეკუთვნოდეს.

17. **ფერადებიანი ხატი**, 72X47 სანტ. ფერადები მოშლილია, წარწერა არა სჩანს; არ ვიცით, რომელი წმიდანის არის. სურათი წელსზევითია; მარცხენა ხელში მოგრძო ტარი სჩანს, ლაბარუმის თუ შუბის, მნელი სათქმელია, მარჯვენა გულზე აქვს მიდებული. აშიები კარგი ხელობის არის, ორმაგი ბროწეულის ყვავილების მსგავსი ორნამენტით შემკობილი და კარგის მედალიონებით წ-თა. აქეთ-იქით სრულის ტანით; წ-ი ანდრია (მარცხნივ), წ-ე ლ-კა (მარჯვნივ); ქვემო აშიაზე მკერდზევითნი პეტრე და პავლე და ერთი კიდევ სხვა ფიგურაა, უწარწერო. ზემო აშია მოძარცულია (№17289). ხელობა მე-12-13 საუკ. არის.

18. **ფერადებიანი ხატი**, ვგონებ, **მაცხოვრისა**; ფერადები სრულიად გადასულია; დარჩენილია მხოლოდ ნაჭედი აშიები, ორმაგი ბალახის მსგავსი მორთულობით შემკობილი (№17287); მე-13-14 საუკუნისა უნდა იყოს.

19. **ხატი ღვთის მშობლისა** ჩჩვილედი, ოქროთ დაფერილი ვერცხლისა, 15,5X13 სანტ. ფიგურა წელსზევითია, სახეები დაზიანებულია. აშიები ფურცლოვანი მოხატულობით საუცხოოა, მე-12-13 საუკ. ქვემოდ ორ-სტრიქონიანი წარწერა ცოტა დაზიანებულია:

დ-დო : ღთსო : მიოხე : ბავშეშას : ძესა : ბასლა : და  
მეულლესა : მისა : გუაცას : და : შვილსა მათსა.

მე-13-14 საუკ. უნდა იყოს. (№ არ მახსოვს, სხვა ხატებთან არის გადაღებული).

20. ხატი ღვთის მშობლისა, ნიშოვანი, ფერადებით დახატული (№17268), ფერადები დაზიანებულია; ქრისტეს ყრმას ბერძნული წარწერა აქვს სახელისა, პერანგი და ბალახების მსგავსად შემკობილი აშიები ლამაზი ნახელავია; 19,5X15 სანტ. ღვთის მშობლის ზემოდ, კუთხეებში მთავარ ანგელოზებია; ქვემოდ ორ სტრიქონიანი წარწერა:

ქ . დედაო : ღმრთისაო : მოხ : ექ

მნ სულს : ბერის : ხშს და მის დდ მ .

უქარაგმოდ:

დედაო ღმრთისაო მეოხ ექ-

მენ სულსა ბერის ხომას (?) და მის დედმამას.

ძნელია თქმა, როგორ უნდა წავიკითხოთ შემოკლებით გადმოცემული სახელი „ხშს“, „ხომას“, „ხომიას“, თუ სხვა.

ხატი მე-12-13 საუკ. უნდა ეკუთვნოდეს.

21. ხატი ღვთის მშობლისა, ტახტზე მჯდომარისა, ვერცხლისა, ნაჭედი, 44X33 სანტ. ტლანქი ხელობისა; დაზიანებულია; წარწერით: დ-ღ ღ-ღ. აშია რომბ-ლურსმული, ცხრა მედალიონით ზემოდ ტახტის გამზადებაა მთავარ ანგელოზებითურთ (№17288). ღვთის მშობლის ტახტის შემკობილობა ამ ხატისა სუსტი მიბაძვია №17289 ხატის ტახტისა. მე-16-17 საუკ. უნდა იყოს.

22. ხატი ღვთის მშობლისა, ვედრებისა, ვერცხლისა, ნაჭედი, 20X16 სანტ. ღვთის მშობელი წელსზევითი წარმოდგენილია ოთხკუთხედში, მავედრებელის სახით და წარწერით: დ ა ღ თსა აშია ფოლაქების მსგავსი წრეებით არის შემოვლებული. ხელობა რიგიანია, (17270-507 ?). მე-17 საუკ. უნდა იყოს.

23. ხატი ღვთის მშობლისა, ფერადებით დახატული, 33X25 სანტ. ფერადები სულ გადასულია; დარჩენილია ოქროთ დაფერილი ვერცხლის ნიშბი და ლამაზი აშიები ბალახოვანის რიგით შემკობილი (№-527); არა უგვიანეს მე-14 საუკ.

24. ხატი ღვთის მშობლისა, ვერცხლისა, ნაჭედი, 49X38 სანტ. წარწერით: წ-ღ მსმლი (=მღთის მშობელი) დ-ი (დედაი) ქესი. აშიები ბალახის სახით შემკობილი კარგი ნახელავი არის. (ფოტოგრაფია არ არის).

25. ხატი მაცხოვრისა, ნაჭედი, 37X30 სანტ. მაცხოვარი წელსზევითია, მაკურთხეველის მარჯვენით და სახარებით; ნიშბი ჯვარის სახედ აქვს. ნიშბზე ყოფილა ძვირფასი ქვა, ეხლა უკვე დაკარგული. წარწერა: წ-ი მ-სა (=მაცხოვრისა) ხატი. აშია ბროწეულის ყვავილების მსგავსი ორნამენტით და წ-თა მედალიონებით არის შემკობილი; გვერდებზე ღვთის მშობელია და იოანე სრულის ტანით. წარწერებში: წ-ი ღ-სლ, წ-ი ი-ნე. ზემოდ: ვედრება და ქვემოდ: წმიდანი მხედარნი: დიმიტრი, თეოდორე და გიორგი, ყველა წარწერებით სახელებისა (№-517). მე-14-15 საუკ. უნდა იყოს.

26. ხატი ჯვარცმისა, ლამაზი, ოქროთ დაფერილი ვერცხლისა, ნაჭედი, 18X15 სანტ. წარწერა : წ-ღ ქე; ქვემოდ, ჯვარცმულის ორივე მხარეს, ღვთის მშობლის და იოანე ნათლის მცემელის მაგიერ, წარმოდგენილია ორი წმიდა გიორგი, რომაული

საომარი ტანისამოსით, ფარით და მარცხენა მკლავზე და მახვილით მხარზე; ორივეს ერთგვარი წარწერა აქვს: წ-დ გ-ი. აშიები ლამაზად არის შემკობილი ბალახოვანის ორნამენტით. ქვემოდ ყოფილა ორ-სტრიქონიანი წარწერა; დარჩენილია შუა ნაწილი, პირველი სტრიქონიდან: „... ცმაო ქესო“... მეორე სტრიქონიდან: „... ომან ან“.. უნდა ყოფილიყო ალბათ: [ჯვარ]ცმაო ქრისტესო [შეიწყალე] ... ომან, ამინ. ხატი მე-12-13 საუკ. უნდა იყოს. (172-505).

27. **ფერადებით დახატული ხატი მაცხოვრისა (?)**, 29X21 სანტ. ფერადები გადასულია; შესანიშნავი ხელობის აშიები ფურცლოვანის მოკაზმულობით; ნიშბი სამი ქვით ყოფილა შემკობილი; დარჩენილია ერთი. ნიშბის ზემოდ, მოგრძო ოთხკუთხედში ბერძნული წარწერა ყოფილა, ეხლა გადასული. ქვემო აშიაზე ყოფილა სამ-სტრიქონიანი წარწერა; დარჩენილია თავი და ბოლო; შუა, უმეტესი ნაწილი, დაღუპულია:

ქ ნებსით : ვნებ. . . ზა რა  
ი მიძნა : ჯორცი . . ბი შენ  
მსგვსდ : ავზაკი . . . მღ ნე მე

უკანასკნელი სტრიქონი უნდა იკითხებოდეს:

„შენ მსგავსად ავაზაკისა მიმიღენ მე“.

ხატი მე-12 საუკ. უნდა იყოს (17268-505).

28. **ხატი მაცხოვრისა**, 16X12 სანტ. პირის სახე ფერადებით ყოფილა დახატული, ფერადები გადასულია. პერანგი და აშიები ლამაზი, ნაზი ხელობისა, მე-12-13 საუკ. ოქროსია. მაცხოვრის ფიგურა წელსზევითია, მაკურთხევლის მარჯვენით და სახარებით; წარწერა სახელისა ბერძნულია. ქვემოდ აშიაზე წარწერა:

ქ . ლო : შემწე ეყვ ამერიჯიბს : ბშქნს : (ბაქრამე, გვ. 116). (არ არის გადაღებული).

29. **ხატი მაცხოვრისა**, ვერცხლისა, ნაჭედი, 20X15 სანტ. მაცხოვარი ტახტოსანია ჩვეულებრივის პოზით. წარწერა: ძჃ ქე. ეზო და აშიები შემკობილია ბალახოვანად. ნიშბი ჯვარის სახედ არის. მე-16-17 საუკ. უნდა იყოს. (№-507).

30. **ხატი მაცხოვრისა**, ვერცხლისა, ოქროთ დაფერილი, 18X14 სანტ. წარწერით: „მცხოვრი“. მაცხოვარი ტახტოსანია, ჩვეულებრივის პოზით. მაგრამ ერთობ ტლანქი ნახელავია, მე-18-19 საუკ. (17270-507?).

31. **ხატი მაცხოვრისა**, ვერცხლისა, 17X15 სანტ. ბერძნულის წარწერით სახელისა C-X (sic) X-C. ტლანქი ხელობისა არის, მე-18 საუკუნ. (გადაღებული არ არის).

32. **ხატი მაცხოვრისა**, 15X11 სანტ. პირის სახე ფერადებით ყოფილა დახატული, მაგრამ ფერადები სულ გადასულია; პერანგი და აშიები ვერცხლის არის; მაცხოვარი წელსზევითია, ჩვეულებრივი პოზით. წარწერა სახელისა ბერძნულია. ხელობა ლამაზია. მე-13-14 საუკ. (გადაღებულია სხვებთან ერთად).

33. ხატი ჯვარცმისა, ვერცხლისა, 17,5X15 სანტ. წარწერით: „ჯრცმად ქესა“. ტლანქი ხელობისა არის (არ არის გადაღებული).

34. ხატი წმიდისა ზაქარიასი, ვერცხლისა, ნაჭედი, 17X13 სანტ. წმიდანი წელს ზევით არის წარმოდგენილი, საცეცხლურის მსგავსი ჭურჭელით, რომელიც ნეკზე დაუკიდია. ზემო ნაწილი დიდი ნიშისა დაფარულია წერტილების მსგავსად შემკობილის აშიით. წარწერა: „წი ზქრი“. მე-17 საუკ. ხელობა უნდა იყოს (გადაღებულია სხვებთან ერთად).

35. ხატი წა გიორგისა, ვერცხლისა, ნაჭედი, 44X43 სანტ. მხედარი სრულის ტანით არის ქვეითად წარმოდგენილი, შუბით და ფარით. ეზო სადაა. აშიები ბალახოვანის შემკობილებისაა, ლამაზი, რვა მედალიონით წმიდათა. ხელობა მე-15 - 16 საუკ. უნდა იყოს. (№17286).

36. ხატი წა გიორგისა, ვერცხლისა, ნაჭედი, 18X16 სანტ. მხედარი წარმოდგენილია სრულის ტანით, რომაულ სამხედრო ტანისამოსში, შუბით და ფარით. წარწერა: წა გ.ი. (ასო ბ-ნ უკულმა არის). აშია ფოლაქების მსგავსად შემკობილი, ტლანქია, როგორც თვით ხატი. მე-18-19 საუკ. (X 17271).

37. ხატი წა გიორგისა, ვერცხლისა, ნაჭედი, 36X25 სანტ. მხედარი წარმოდგენილია სრულის ტანით, შუბით და ფარით; უკან, წელზე მახვილი ჰკიდია. წარწერა: წი გ.ი. ხელობა ტლანქია, მე-18 საუკ. ხოლო აშიები, პალმეტების სახით შემკობილი ლამაზია და ეკუთვნის კლასიკურ ხანას. ქვემო აშიაზე წარწერა (№17280):

ქ : წო : გგი : გ რსო : შეიწლ : ჯვი : სყორს :

ესე იგი: წმიდაო გიორგი გერისაო, შეიწყალე ჯევი საყორის. (შეადარე დ. ბაქრაძე, გვ. 117).

38. ხატი წა გიორგისა, ვერცხლისა, ნაჭედი, 19,5X18 სანტ. მხედარი წარმოდგენილია სრულის ტანით, რელიეფით, შუბით და ფარით; წელზე, უკან მახვილი ჰკიდია. წარწერა: წა გ.ი. აშია ლამაზი ნაძვის კინკრიჟის მსგავსად შემკობილი, მე-16 -17 საუკ. (№17269-506?).

39. ხატი წა გიორგისა, ოქროთ დაფერილი ვერცხლისა, ნაჭედი, 21X16 სანტ. ფრიად დაზიანებულია. მხედარი გაჭენებული ცხენით არის წარმოდგენილი. ვეშაპს გმირავს. წარწერა: წი გ.ი. აშია გვარიანია (№17283-520?).

40. ხატი ღვთის მშობლისა ჩჩვილედ, წელსზევითი, 32,5X25,5 სანტ. ყოფილა ფერადებით დახატული, მაგრამ ფერადები გადასულია; დარჩენილია დიდი ნიშბი მოოქრული ვერცხლისა, წერტილებიანი წრეებით შემკობილი, ბალახოვანის მორთულობით (№ - 509). მე-15-16 საუკ. უნდა იყოს.

41. პატარა ხატი ღვთის მშობლისა, ოქროსა, 2,6X2,6 სანტ. ლამაზი ხელობისა, მე-12-13 საუკ. (არ არის გადაღებული).



42. ხატი მთავარ ანგელოზ მიქაელისა, ოქროთი დაფერილი ვერცხლისა, 41X30,5 სანტ. მთავარ ანგელოზი სრულის ტანით არის წარმოდგენილი, ლაზარუმით და ბურთით. წარწერა: წი მი-ლ. სახე დაზიანებულია. ეზო ბალახოვანად შემკობილია. აშიები ნაწილობრივ რომბ-ლურსმული, ნაწილობრივ ბროწეულის ყვავილების მსგავსად. ერთი დროისა არ არის და უთავბოლოდ არის დაკერებული. ზემო აშია თავის მედალიონით გვერდზე უნდა ყოფილიყო, რომ მედალიონის სურათი პირდაპირ მდგარიყო. (№17272). აშიებზე ორი მედალიონია დაცული; მე-17-18 საუკ. უნდა იყოს.

43. ხატი მთავარ ანგელოზ მიქაელისა, უფრო პატარა, მაგრამ უკეთესი ხელობისა, ვიდრე წინა ხატი, ოქროთ დაფერილი ვერცხლისა, ნაჭედი; მთავარ ანგელოზი წარმოდგენილია სრულის ტანით, ბიზანტიური სამეფო კარის ტანისამოსით, შუბით და ბურთით. წარწერა: წი მი-ლ. აშიები რომბ-ლურსმული, სადა სიმრგვალებით (№17290). მე-14-15 საუკ. უნდა იყოს.

44. ხატი ორ მიქელ მთავარ ანგელოზისა, ვერცხლისა, ნაჭედი, 28X12 სანტ. ბაწრულად შემოფარგლულ ორს ოთხკუთხედში წარმოდგენილია თითოეულში ცალ-ცალკე ერთი და იმავე ყაიდის ფიგურა მთავარ ანგელოზის მიქაელისა, სრულის ტანით, გრაგნილით ხელში, და წარწერა: ზემოდ: წ-ა მ-ქლ. აშიები ზემოდ და ქვემოდ რომბ-ლურსმულია, აქეთ-იქით ნახევარი სიმრგვალებისგან შესდგება. მე-18 საუკ. ხელობა უნდა იყოს. (№ 17269).

45. სრულიად ასეთივე ორ მიქელ მთავარ ანგელოზისა ხატი, ვერცხლისა, მაგრამ უფრო პატარა, 20X17,5 სანტ. (№17283).

46. პატარა, ოქროს ხატი მთავარ ანგელოზ გაბრიელისა, 5,5X4 სანტ. ტლანქი ხელობის არის (არ არის გადაღებული).

47. ხატი ორი მხედარისა, 17X12 სანტ. ფერადებით დახატული ყოფილა; ფერადები გადასულია; დარჩენილია სრულად ლამაზი ნიმუხები და აშიები, ლამაზად შემკობილი; მე-13-14 საუკ. ქვემოდ, აშიაზე წარწერა კარგად ვერ ირჩევა (№-508):  
წ-მო თე (?) და გონისფა (გუნისფა ?).

48. ხატი ჯვარცმისა, ვერცხლისა, ნაჭედი, 17,5X15 სანტ. წარწერით: „ჯრცმაჲ ქესა“, ტლანქი ხელობისა, (გადმოღებული არ არის).

49. ხატი ფერადებით დახატული გარდამოხსნისა, რთული კომპოზიციისა, 49X40 სანტ. ფერადები დაზიანებულია. ქვემოდ, კუბოში ჩასვენების სურათია. მხატვრობა მაინცდამაინც ლამაზი არ არის. აშიები ოქროთი დაფერილი ვერცხლისა შემკობილია ბროწეულის ყვავილების მსგავსი მორთულობით, ორმაგად.. ლამაზი ნახელავია. ქვემოდ: სანახევროდ გადასული წარწერა:

ღისა სტო კცთ . . თ-ს ჯრცმლო  
მწ ფრლ გნ დღთრთ დჩს

ფალვსა ხლისად .

ესე იგი: „ღმრთისა სიტყვაო, კაცთათჳს ჯვარცმულო, მწემფარველ გუექმენ დედითურთ დაჩის ფალვეს სახლისად“ (?). ეს ორი სიტყვა გამოუცნობელი რჩება (არ არის გადმოღებული).

50. **სამი უბრალო ხის ჯვარი**, შექმნილი ვერცხლის ფირფიტებით (არ არის გადმოღებული).

51. **ხატი წა კვირიკესი**, ოქროსი, 21X14,5 სანტ. წარწერით: წი კე. ნიმბი და ქვემო ნაწილი ტანისა გაფუჭებულია. აშიები ლამაზია, რომბ-ლურსმული, მე-14 საუკ. უნდა იყოს. (№-520). ქვემოდ წარწერი ნაწყვეტია:

... „მეოხ ექმ“ . ამას ქვემოდ ... „ნილს“..

52. **ხატი წა კვირიკესი**, წელსზევითი, ოქროთი დაფერილი ვერცხლისა, 12X16 სანტ. წარწერით: წი კე. აშიები ოქროს ბასმისაგან შესდგება, წერტილებიანის შემკობილობით. მე-16 საუკ. უნდა იყოს (№ 17270).

53. **ხატი წა გიორგისა**, 16,5X13 სანტ. ვერცხლისა; ლამაზი ხელობისა; მხედარი ფეხოსანია, ფართო მარცხენა მკლავზე და მახვილით მხარზე; წარწერა : წა გ-ი. მე-14 საუკუნის უნდა იყოს. (№17271-508).

54. **ხატი ორთა წმიდათა მხედართა**, ოქროთი დაფერილი ვერცხლისა; ორთავე წარმოდგენილია ფეხით, ერთი ფართო და მახვილით, მეორე ფართო და შუბით, რომაულ საომარი ტანისამოსებით; აშიები წერტილების მსგავსი გრეხილებისაგან შესდგება. მე-14 საუკ. უნდა იყოს. (№17271-508).

55. **ხატი წა გიორგისა**, პატარა; ყოფილა ფერადებით დახატული; ფერადები გადასულია; მხედარი ცხენით ყოფილა წარმოდგენილი; ნიმბი და აშიები თხელი ოქროს ბასმისა ლამაზია (№17270-507), მე-14 საუკ. უნდა იყოს.

56. ასეთივე **ხატი წა თეოდორესი** (?), ვერცხლისა; მხედარი ფეხოსანია, შუბით და ფართო; დაზიანებულია. აშიები ბასმისა ლურსმულ-რომბული; მე-16 საუკუნის უნდა იყოს (№17283-520?).

57. **ვერცხლის ფირფიტა**, რომელზედაც წარმოდგენილია, შუაში, ოთხკუთხედში მხედარი ცხენით, გვირგვინოსანის მგმირავი, და ორი სხვა ფიგურა აქეთ-იქით; ტლანქი ხელობისა, მე-18-19 საუკუნისა (იქვე, №17283-520).

58. **დროშა ფარჩისა**, 27X26 სანტ. ხეტარზე, რომელიც ჯვართთა თავდება ზემოდ, ოთხივე ნაწილზე ფარჩისა გამოსახულია წა კვირიკე, მაგრამ არა მაინცდამაინც ლამაზად. (არ არის გადმოღებული).

59. **ლაბარუმი ვერცხლისა**, 26X20 სანტ., რომელზედაც წარმოდგენილია წა გიორგი, ჩვეულებრივის რიგისა. (არ არის გადმოღებული).

60. **ორი დიდი, მაღალი და ერთობ მძიმე შანდალი**, ანუ საღრჩოლებელი ბრინჯაოსი; ერთი გატეხილია. ესენი საღრჩოლებლადაც იხმარებოდენ წინა დროში; თითოეული რამოდენიმე მუხლისაგან შესდგება მსგავსად დოქებისა თუ ქოთნებისა (№17305).

61. **როდინი მასსიური, სპილენძისა**, რვა წაღნაგოვანი, სიმაღლით 13 სანტ. შემკობილია წაღნაგებში მსხალის მსგავსი გამობურცული ჯირყვლებით და ორის მხეცის (შეიძლება ლომის) თავით ყურეებში. ეხლა ამას როდინად ხმარობენ, მაგრამ, შესაძლოა, წინეთ საღრჩოლებლადაც იხმარებოდა, აქემენიდთა დროის უნდა იყოს. (№17266).

62. **ვაზა** ცილინდრის მსგავსი, სპილენძისა; ზემო ნაწილი მოტეხილია; შემკობილია არაბესკებით. (იქვე, №17266).

63. **ჩარდახი ხატებისა**, მაღალ ფეხებზე, 137 სანტ. სიმაღლით და 15 ს. განით. ფეხები ანუ წვრილი სვეტები ხისაა, ვერცხლის მოჩუქურთმებულის ფურცლით შეპერწილი; თითოეული იყოფა ორ მუხლად ვერცხლის ბურთით ანუ ვაშლით. წინა პირი და ცილინდრული გვირგვინი ზემოდ ოქროთი არის დაფერილი; წინა პირზე სვეტების თავები შემკობილია ფიგურებით, შუაში: ვედრებისა, წა გიორგისა და წა დიმიტრისა; მეორე მხარეს: მარტო წა გიორგის ფიგურებია. ცილინდრული გვირგვინი, მიტრის მსგავსი, შემკობილია სხვა წმიდათა ფიგურებით. ეს ნივთი დაშლილი იყო და ჩვენ მოვიყვანეთ რიგში და გადმოვიღეთ ფოტოგრაფიულად (№17267 და უვაროვისა, გვ. 130, ტაბ XXXI, 59).

64. **თასი** ვერცხლისა, დიდი, ჯამის მსგავსი; ფსკერზე წარწერა აქვს მხედრული:

ქ : ეს : თასი : პატასა მიქელადისა .

გარე პირზე აწერია:

„ხოსია ახვლედიანის არის“. (დ. ბაქრაძე, გვ. 118).

ხოსია ახვლედიანი, კარგად ცნობილი ქართულ ისტორიაში, იყო თანამედროვე იმერეთის მეფის ბაგრატ მეოთხისა, მეორე ნახევარში მე-17 საუკ. ის არის მკვლელი დედოფლის ნესტან დარეჯანისა.

65. **ორმოცი სპილენძის და ვერცხლის ჯამი**; ზოგიერთებს შემკობილებაც აქვს.

66. ერთი სპილენძის **ჯამი** სომხურის წარწერით, რომლის თარგმანი გრ. უვაროვისას აქვს მოყვანილი (გვ. 117):

ხოსროვის მე აფატიმ.

67. **დოქი ანუ ლაგინა**, ყვითელი სპილენძისა, თვალწარმტაცი სილამაზისა, 9 1/2 ვერშოკი სიმაღლით. ტანი მოგრძო აქვს; ყელი – მაღალი და ვიწრო, თავდება ნავისებური ტუჩით. სახელური, ცოტა მოხრილი, შემკობილია თეთრი, მოსხო, მძივის

მსგავსი ორნამენტით, ზემოდ შეერთებულია პირთან და ქვემოდ ჩამოშვებულია თითქმის შუა წელამდის დოქისა და თავდება ცხენის თავის ქანდაკებით, და არა ირმის თავისა, როგორც ფიქრობს გრ. უვაროვისა (გვ. 139). (ფოტოგრაფია ნომერი 17303). მუცელი დოქისა გამშვენიერებულია ნაჭედი შემკობილობით, ფურცლებისაგან შემდგარი რომბებისა, რომელნიც შიგნით ამოვსებულია შტოებით აყვავებული ბროწეულისა; ორი დიდი და მშვენიერად გამოსული ჩვენი ფოტოგრაფია ამ დოქისა №№ 17302 და 17303 გვაძლევს საშუალებას უფრო სწორი წარმოდგენა ვიქონიოთ ამ შესანიშნავ ხელოვნების ნივთზე აღმოსავლური ყადისა, ვიდრე გრ. უვაროვისაგან გამოცემული ერთი სურათი, თუმცა თავის თავად არა ცუდი (გვ. 139, სურ. 60).

68. **დოქი დიდი**, სპილენძისა; მუცელი დიდი აქვს, მაგრამ, ყელი მაღალი, ზემოდ გაფართოებული. სახელური ამისა საუცხოო ლამაზია, მრგვალი; შიგ ჩაჭრილი ნახვრეტებით. სახელური პირს ზემოდაც გრძელდება და თავდება ლამაზი ფიალით ანუ ვაზით, რომელიც შემკობილია ასეთისავე ჩაჭრილი ნახვრეტებით. (იხ. ფოტ. №17265). ეს დიდი დოქი არც ერთ მკვლევარს არ უნახავს. იმ სკივრში აღმოჩნდა, რომელიც ჩვენ პირველად გავახსენებინეთ.

69. **დოქი ფაიანსისა**, შემკობილი მცენარეების შტოებით და ყვავილებით (იხ. № 17293). ძირი მისი კიდევ მეტად შემკობილია მცენარეების შტოებით და ფურცლებით. (№ 17294).

70. **ცხენის სახე ფაიანსისა**, უნაგირით; თავი და ფეხები მომტკრეული აქვს. უნაგირი შემკობილია, აგრეთვე ასლიც (ყაჯარი). (№17293).

71. **სასაკმევლე ნაკერი ფარჩისა**; გვერდზე აქვს ნაკერი ფარშევანგის სურათები, ხოლო შუაში დრაკონი გერალდიური რიგისა. (№17294).

72. **საცეცხლური ბრინჯაოსი**, რელიეფით გამოხატული სახეებით წმიდათა, სირიულის რიგისა (№17295).

73. **საცეცხლური სპილენძისა**, საცერის მსგავსი თავით (იქვე, №17295).

74. **ცული ბრინჯაოსი**, კელტის რიგისა, სადა. (იქვე, №17295), ამოღებული უნდა იყოს ძველი საფლავიდან.

75. **ქინძისთავი** თმისა, ბრინჯაოსი, ფარშევანგის გაშლილი კუდის მსგავსი თავით. ესეც უსათუოდ ამოღებულია ძველი საფლავიდან (იქვე, №17295).

76. **სპილენძის ფირფიტა**, პირამიდის სახისა, იეროგლიფების მსგავსი ნიშნებით (იქვე, №17295).

77. **რკინის მოკაუჭებული დანა** (იქვე). ესეც საფლავიდან უნდა იყოს ამოღებული.

78. ლახტი რკინისა (№17296).

79. სამი შვილდი ხისა და ოთხი სხვა და სხვა ფორმის ისარი. (იქვე, №17296). ხე ერთის შვილდისა შემკობილია ძვლის ჭდეებით.

80. ზარი გატეხილი, ხუცურის წარწერით:

წ : ლ ო : და წ ო : კურიკე შეეწიე : ორსავე შინა :  
ცხორებასა : კელმწიფისა : შვილსა . მონა : ზონსა .  
თეკლას : რნ შემოგწირა : ზარი : ესე : ამინ.

უქარაგმოდ:

წ. ღმერთო და წმიდაო კურიკე, შეეწიე ორსავე შინა  
ცხორებასა კელმწიფისა შვილსა მონაზონსა თეკლას,  
რომელმან შემოგწირა ზარი ესე, ამინ.  
(შეადარე ბაქრაძე, გვ. 116).

81. დ. ბაქრაძეს უნახავს ამ ეკლესიაში ერთი სპილენძის ჯამი, მხედრულის წარწერით: (გვ. 115):

ქ : სვეტის ცხოველი არის . ისიმც რისხვის (sic) ვინც მოიპაროს.  
ჩვენ ეს ჯამი არ გვინახავს.

82. ნილაზი (მასკა) ბრინჯაოსი, გორგონის სახით, რომელიც კარზე ყოფილა მიჭედილი (გრაფ. უვაროვისა, გვ. 172). ჩვენ ეს არ შეგვინიშნავს.

83. სადღესასწაულო ნუსხა ხუცურით დაწერილი ქაღალდზე, ყდით; ბოლო აკლია. შიგნით ყდის ფიცარზე სწრია:

ქ : კარისა : დეკანოზის : დავითისა : შეონდოს : ღ-თმან :  
კუხბასიანი . მთავარ ანგელოზო ჳიდურისაო : მეუხ : ექ-  
მენ : წინაშე : ღ-თისა : დავითსა : ბერსა : დეკანოზსა :  
კონო ბესიანსა : დღესა : განკითხვისასა : ამენ : კირი-  
ელეისონ.

ხელის მიხედვით ხელნაწერი უნდა ეკუთვნოდეს მე-16-17 საუკუნეს.

84. ტიბიკონი იერუსალიმის ეკლესიისა, ანუ ეგრედ წოდებული დიდი კანონი, ხელნაწერი ეტრატზე დიდი ფორმატისა, 34X27 სანტ. დაწერილია ასომთავრულით ორ სვეტად; ტექსტის ზომაა, აშიების გამოკლებით, 28X18,5 სანტ. დაცულია მხოლოდ ნაწილი ხელნაწერისა; თავი და ბოლო აკლია; მრავალი ფურცლებისაგან მხოლოდ ნაწყვეტებია დარჩენილი. შუაში ემჩნევა შემდეგ დროში დამატებული ეტრატის ფურცლები დაწერილი იმის მსგავსი ხელით, რომლითაც დაწერილია ადიშის სახარება 897 წლისა. ეს გარემოება და პალეოგრაფიული ხასიათი წერისა საშუალებას იძლევიან ხელნაწერის დროს განმარტებისა, დაახლოვებით არა უგვიანეს მეცხრე საუკუნის მეორე ნახევრისა. თუ 897 წლის ახლო ხანს ხელნაწერი უკვე ფურცლებ

დაკარგული იყო, ის წინეთ უნდა ყოფილიყო გადაწერილი. შენახულ ფურცლებზე ხელნაწერისა მხატვრობა არ არის, მხოლოდ ერთ ადგილას კინოვარით დახატულია ფარშევანგები და სხვა ფრინველები; ამას გარდა კიდევ ორი დრაკონი. ქვემოთ ამისა არის გადამწერის შემდეგი ანდერძი:

დბმ შ`ხდა ღ`სძლ-ო წ`ო დაეს  
როჯლა კანონი საზამთ  
როდ ჳელითა ჭიქაოჯრისა  
ეთა : მიჯსენ მე ო`ო საშინე  
ლისა მის განკითხვისაგ`ნ  
და შწყლე მონაჲ შ`ნი მიქლ  
და დამცევ ამას საწოჯთ  
როსა და მას სკნსა ა`ნ:

ამრიგად, ხელნაწერის გადამწერი არის მიქელ ანუ მიქაელ ჭიქაური; ის თავის თავს კიდევ იხსენიებს მეორე ადგილას შემდეგ რიგად: ო`ო :: შ`წყლე :: მნ`ჲ შენი : მიქლ:

ამ ხელნაწერის შესახებ საუბარს აღარ გავაგრძელებთ და ჩვენ მიერ ამოწერილ სხვა ადგილებს ხელნაწერისა ვუშვებთ, ვინაიდან მისი ტექსტი, ლატალის ხელნაწერთან ერთდ, გამოცემული და განმარტებული აქვს პროფ. კ. კეკელიძეს თავის საყურადღებო შრომაში, რუსულს ენაზე: „იერუსალიმსკი კანონარ VII ვეკა“, თბილისი, 1912 წ. კ. კეკელიძე იყო სვანეთში 1911 წელს, ერთის წლის შემდეგ ჩვენი ექსპედიციისა. ცნობა, ბესარიონ ნიჟარაძის სიტყვებზე დამყარებული, ვითომც ეს ხელნაწერი არავის ენახოს და რას შეიცავდა, ცნობილი არ ყოფილიყოს, სწორი არ არის. ჩვენ ხელნაწერი არა თუ ვნახეთ, არამედ ორი ადგილი ფოტოგრაფიულად გადმოვიღეთ, ერთი ის, სადაც მხატვრობა და ანდერძია, მეორე სხვა. ნომრებს აქ ვერ ვუჩვენებთ, ვინაიდან ეხლა ხელთ არა გვაქვს. ბ-ნ კ. ინგოროყვას აქვს გადაცემული და ის მათ უჩვენებს თავის გამოკვლევაში: „ძველი ქართული წარმართული კალენდარი“, საქ. მუზეუმის მოამბე, VI , გვ. 411. გვინდოდა მთლად გადმოგველო ტექსტი, მაგრამ ფირფიტები არ გვეყო.

ეს ხელნაწერი, როგორც მოვიხსენიეთ, ჩაკეტილი იყო ზანდუკში, რომელიც საკურთხეველში იდგა. ჩვეულებრივად დიდ უარზე იყვნენ პაპები მისი გახსნისა, მაგრამ ჩვენ დავაჯერეთ და ვაიძულეთ გაეხსნათ. ამ საქმეში დიდათ დაგვეხმარა ბესარიონ ნიჟარაძის შვილი, კუკური. ჩვენ ვთხოვეთ და ბესარიონ ნიჟარაძე დაგვიპირდა, რომ ის შეეცდებოდა ამ ხელნაწერის და ორი კიდევ სხვა ამგვარი ხელნაწერის, ლატალისა და წვირმისა, დროებით თბილისში ჩამოტანას შესასწავლად, მაგრამ ეს აღარ მოხერხდა, მეტადრე, როდესაც კ. კეკელიძე თვით გაემგზავრა სვანეთში მათი ტექსტების გადმოსაწერად.

გრაფინია უვაროვისა აღნიშნავს კალას ეკლესიაში ორ ხელნაწერს, ვითომც სახარებას, ერთს ეტრატზე, დიდს, უთავბოლოს და გაფუჭებულს, მე-12 საუკ. მეორეს ბომბიციანაზე, უფრო ახალი დროისა. ესენი ჩვენ არ გვინახავს და არც დ. ბაქრაძეს აქვს აღნიშნული.

## სოფელი ჯე.

სოფელი ჯე გაშენებულია მთის ძირში. ამ სოფელში პატარა ქვის ეკლესია არის, წმიდა ბარბალესი (სვანურად: ბარბალ). აღმოსავლეთის კედელი შემკობილია სამი კამარით, რომელნიც ფართო პილიასტრებზე არიან დამყარებულნი. კანკელი ქვისაა, სამის კამარით. ეკლესია სულ მოხატულია. აქ საკურთხეველის კონქში მაცხოვარია; დასავლეთის კედელზე ღვთის მშობლის მიძინება, ჯვარცმა და აღდგომა ქრისტესი; ჩრდილოეთის და სამხრეთის კედლებზე: ლამაზი ფრესკებია წმ. ბარბალესი, წმ. ეკატერინესი და მთავარ ანგელოზთა, სრულის ტანით. ნივთებით ეს ეკლესია მდიდარი არაა:

1. **ხატი წა კვირიკესი** და არა წი-სა ბარბალესი, როგორც ჰგონებდა უვაროვისა (გვ. 172), ვინაიდან სახელი ცხადათ სწერია: წი კე; ოქროთ დაფერილი ვერცხლისა, ნაჭედი, 22,5X15,5 სანტ. აშიები უჯრედებად დაყოფილია; ზურგზე ვერცხლის ფურცელი აქვს გადაკრული და ზედ ჯვარია გამოყვანილი. ხელობა ტლანქია.

2. **ჯვარი ხისა**, გამოსასვენებელი, ხის ტარით, 35X35 სანტ. შემერწილია ვერცხლის ფირფიტებით; დამყარებულია ხეტარზედ ვერცხლის ბურთის საშუალებით. პირველ გვერდზე გამოხატულია ჯვარცმა ოთხი მედალიონით წ-თა ყველა მხარის ბოლოებში ჯვარისა; ქვემო მედალიონი გაფუჭებულია. წარწერები, როგორც ჯვარცმულის, ყოველ მხრით, ისე მედალიონებისა, ვულგარული ხუცურია და მასთან თავუკუდმა ასოებით; ამიტომ ძნელი გასარჩევია (№17277). ეს წარწერა გადმოღებული აქვს, როგორც ბარტოლომეის (გვ. 168, დამატება №22ა), ისე დ. ბაქრაძეს (გვ. 114, დამატება №36). ჩვენი ფოტოგრაფია, რასაკვირველია, უფრო სწორ საშუალებას მისცემს მკვლევარს წარწერის ამოშიფრვისათვის. წარწერის წაკითხვა ვერც ჩვენ შევსძელით.

ჯვარის მეორე გვერდზე ჯვარცმა წარმოდგენილია, აგრეთვე ოთხი მედალიონით ბოლოებში. ხელობა ტლანქია, მე-18 საუკ. (№17278).

3. **კალენდრა**, ანუ წინაწარმეტყველებანი იმის მიხედვით, თუ რომელი კვირეულის დღეს გათენდება ახალი წელი, და პასხალიონი; პატარა ტანის ხელნაწერი ეტრატზე, 16,5X15 სანტ. სულ დაშლილი და გაფუჭებულია.

4. ხელნაწერი ეტრატზე, **პალიმსესტი**, ნუსხა ხუცურით ორ სვეტად; ახალი ტექსტი შინაარსით ტიბიკონი ანუ პარაკლიტონი არის, რომელიც შეიცავს მწუხრისა და ცისკრის საგალობლებს; ყდაშია, მაგრამ ყდა მოცილებულია; ხელნაწერი სრულიად დაშლილია და ფრიად დაზიანებული; თავი და ბოლო აკლია; დარჩენილია სულ 138 ფურცელი. ამათში, 4 ფურცელზე, დიდრონი სურათებია; სურათები სიდიდით არაჩვეულებრივია მინიატურული ხელნაწერისათვის და მასთან დახატულია თვით ტექსტზე, გადურეცხელად, ამიტომ ესენი ხელნაწერის მინიატურებათ მის ტექსტთან დაკავშირებით არ ჩაითვლება, არამედ განცალკევებულ ნიმუშად ეკლესიის კედლების მხატვრობისათვის, როგორც განმარტებულია შ. ამირანაშვილის მიერ (იხ. „არილი“, ტფილ. 1925 წ. გვ. 25-46) სულ

8 სურათია, ვინაიდან სურათი 1-ელ გვერდზეც მოიპოვება და მეორეხედაც თითოეული ფურცლისა. აქ წარმოდგენილი არიან: ღვთის მშობელი, იოანე ნათლის მცემელი, ლუკა მოციქული, იოანე მოციქული, მთავარ ანგელოზი მიქელ; შემდეგ კიდევ ღვთის მშობელი და იოანე, პეტრე (? სახელი არა სჩანს) და პავლე.

ძველი ტექსტი ხელნაწერისა ზერელედ არის გადარეცხილი და ძველი ასომთავრული ტექსტი საკმაოდ კარგად მოსჩანს. ამან ჩვენ დიდათ დაგვანტერესა და ვინაიდან დრო არ გვქონდა იქ გაგვეჩია ზოგიერთი ადგილები ძველი ტექსტისა, გამოვითხოვეთ მისი წამოღება, მაგრამ მთელად არ მოგვცეს, არამედ ნახევარი, სულ 55 ფურცელი, მათ შორის მხატვრობიანი ფურცლებიც. მეორე ნახევარის ჩამოტანა თბილისში ბლალოჩინ ბესარიონ ნიჟარაძემ დაგვირდა, მაგრამ ჩვენ დროს ვეღარ მოახერხა. ჩვენ მიერ ჩამოტანილი ნაწილი ხელნაწერისა სხვა ხელნაწერებთან და ნივთებთან ერთად გადავეცით საქ. საისტ. და საეთნ. საზოგადოების მუზეუმს, №1329. ეხლა ეს ხელნაწერი შესწავლილია პროფ. აკ. შანიძის მიერ. ძველი ტექსტი ქიმიურად აღდგენილია და გამოცემული (იხ. მისი „ჰამეტი ტექსტები და მათი მნიშვნელობა ქართული ენის ისტორიისათვის“, „ტფილისის უნივერსიტეტის მოამბე“, III, გვ. 354-388). ხოლო სურათები გამოცემულია შ. ამირანაშვილის მიერ (იხ. მისი: „ქართული კედლის მხატვრობის დასურათებული დედნის ფრაგმენტები“, „არილი“, ტფილისი, 1925, გვ. 25-45).

ამრიგად ეს ოთხი სურათებიანი ფურცელი, რომელიც ჩემს შემდეგ ბიბლიოთეკის №2065 არის აღნიშნული, ეკუთვნის ხელნაწერს №1329. როგორც აკაკი შანიძის წერილიდან ვტყობილობთ, ეხლა სვანეთში დარჩენილი ნაწილიც ხელნაწერისა ჩამოუტანიათ თბილისში. ეს სამივე ნაწილი ერთი ნომრით უნდა აღინიშნოს.

ახლად ქიმიურად აღდგენილი ძველი ტექსტი შინაარსით შეიცავს იერუსალიმის განჩინების და განწესების წიგნს, უფრო ძველს ვარიანტს, ვიდრე კ. კეკელიძის გამოცემაშია და აკ. შანიძის განმარტებით უნდა ეკუთვნოდეს მერვე საუკუნეს.

### სოფელი იფრარი.

სოფელ იფრარში, ენგურის მარჯვენა კიდეზე, არის მთავარ ანგელოზთა პატარა ეკლესია, თლილი ქვისაგან ნაშენი, ერთის შესავალით დასავლეთისაგან და ორის ფანჯრით, აღმოსავლეთით და დასავლეთით. შიგნით და ზემო ნაწილში გარედაც კეკელესია შემკობილია მშვენიერის და საკმაოდ კარგად დაცულის ფრესკებით მე-11 საუკუნისა; სამხრეთის კედელზე, გარედან, კარგად არის შენახული კომპოზიცია ვედრებისა მთავარ ანგელოზებითურთ, ორივე მხარეს, და ასომთავრულის წარწერებით, გარდა იესო ქრისტესი, რომელსაც ჩვეულებრივი ბერძნული წარწერა აქვს, სხვებზე ასე სწერია: დ და ღთისა, წ და ინე ნთლისმცემლი, წ და გბრლ, წ და მქლ, შიგნით, საკურთხევლის კონქში ვედრებაა; სამხრეთის კედელზე: ღვთის მშობელი: დ და :ღთსაა, და ანა, ღვთის მშობლის დედა: ანა დ დაა ყლდ წ დისა ღთს მშობლისაა; წ და თეოდორე : წ და თე. დასავლეთის კედელზე: წ და ბარბარა, წ და ეკატერინა. ზემოდ, თაღებზე: შობა ქრისტესი, ნათლის ღება, მთავარ ანგელოზი მიქელ, მთავარ



ანგელოზი გაბრიელ; ჩრდილოეთის კედელზე: წი გიორგი ცხენით, გმირავს გვირგვინოსანს და მთავარ ანგელოზი მიქაელ წარწერით:

მთვ ანგელოზი მქლ გამოოჯჩნდა : ისონანისა მსა შნა რჟმს მოსრნა წრმრთნი.

კანკელი ქვისაა, სამის კამარით; სვეტებიანი კამარების ზემოდ კანკელის კედელი მოხატულია; აქ წელსზევითნი ფრესკებით წარმოდგენილნი არიან: წა ბარბარა, წ ივლიტა, წდ დემეტრე და წდ სტეფანე. კანკელის გრეხილზე („კარნიზზე“) არის საყურადღებო წარწერა:

1. ქ სახელითა : ღთისათა : მოიხატა და შეიმკო წმიდად ესე ეკლესიად იფრარმის (sic) ჳევისათა : სალოცველად დიდთა : და მცრთა : შვ ღთა : და მომავალთა : მათთა : და : ყ ღთა : მიცველ ზლთა : მთთისა :
2. წმ დნო მ თვრ ანგ ღოზნო : შნ : ორითავე ცხორებითითა ან რ. . . [დასაბა]მთ გნთა წელთა ჳგ : ქრნიკნსა : ტივ : ჳელითა : თე : მეფისა : მხტვრი სიითა (sic) : ღო მო-იხსენე სასფელთა : შეთ[ა].

უქარაგმოდ:

სახელითა ღმრთისათა მოიხატა და შეიმკო წმიდად ესე ეკლესიად იფრარმის ჳევისათა სალოცველად დიდთა და მცრთა შემავალთა<sup>1</sup> და მომავალთა მათთა და ყოველთა მიცვალეზულთა მათთისა, წმიდანო მთავარანგელოზნო, შეი წყალენ ორითავე ცხორებითა, ამინ. . . (დასაბა)მითგანთა წელთა : ჳგ, ქრონიკონსა: ტივ : ჳელითა თეოდორე მეფისა მხატვრისითა. ღმერთო მოიხსენე სასუფეველთა შენთა. ქორონიკონი უდრის 1096 წელს. (780+316=1096);

ამასვე უდრის დასაბამითგანაც წელთ აღრიცხვა ქართულის სათვალავით (6.700 -5.604 =1096). იმ დროს საქართველოს მეფე იყო დავით დიდი აღმაშენებელი და თეოდორეც მისი მხატვარი იქნებოდა.

ბარტოლომეის ეს ეკლესია არ უნახავს. დ. ბაქრაძე, თუმცა ამბობს, რომ ეკლესიის კედლები შიგნით და გარედ შემკობილია ფრესკებითო, მაგრამ არც ერთ ფრესკას და არც მის წარწერას არ იხსენიებს (გვ. 114 -115).

ა. ხახანაშვილიც არ უნდა ყოფილიყო ამ ეკლესიაში, ვინაიდან მას და მის წარწერებს სრულიად არ იხსენიებს (გვ. 36).

გრაფ. უვაროვისას შეუნიშნავს კანკელის წარწერა და ამბობს: წარწერა უჩვენებს, რომ კანკელი მე-16 საუკუნეში არის დახატულიო ( – გვ. 78).

საჭიროა აღვნიშნოთ, რომ ამ ეკლესიის გაშინჯვის დროს დიდი წვიმა

---

1 ჩვენ ვკითხულობთ „შემავალთა“, მაგრამ შესაძლოა წავიკითხოთ კიდევ: „შვილთა“.

დაგვესწრო, ეკრლესიაში ბნელოდა და წარწერა ცუდათ ჩანდა.

ეკლესიაში ჩვენ ვნახეთ:

1. **ჯვარი დიდი ხისა**, კანკელის საწინავე, სიმაღლით 1 მეტრი და 16 სანტ. და 80 სანტ. განით. შექმნილია ვერცხლის ფირფიტებით, რომლებზედაც ტლანქი სახეებია წმიდათა; მათ შორის ორი მაცხოვარია; ზემოდ ოთხი მთავარ ანგელოზი, ორი წმიდა გიორგი და სხვა მრავალი. უმბოს ირგვლივ ოთხი წმიდა გიორგია, ზემოდ და ქვემოდ ცხენით, მარჯვნივ და მარცხნივ ფეხით. მარცხენა ფრთაზე ჯვარცმაა მთავარ ანგელოზებითურთ ორივე მხარეს. აქვე წმიდა გიორგი ფეხოსანი. მარჯვენა ფრთაზე ხუთი სურათია; მათ შორის ორი მთავარ ანგელოზია ხელებაპყრობილი (№ - 674?).

2. **ხატი კარედი ღვთის მშობლისა**, 11X8,5 სანტ. ხატი ყოფილა ფერადებით ნახატი; ფერადები დაზიანებულია; შემოსილობა ოქროსია, ნაზი და ლამაზი, ვაზის მსგავსი შემკობილობით (№17263). შუა ნაწილში წარმოდგენილია ღვთის მშობელი ჩხვილედით, ბერძნულის წარწერით სახელისა. მარჯვნივ მის ქვემოდ დაჩოქილია მვედრებელი კაცი, როგორც ეტყობა, მეფე, რომლის ზემოდ წარწერაა დაზიანებული; ნაკლულ ასოებს აზრით ვუმატებთ ფრჩხილებში (წარწერა არც ერთ მკვლევარს არ მოჰყავს).

დედაო ღვთისაო  
შე მ-[მკ]ბლი  
შენ[ი მ-ფე] დ-თ .

დედაო ღმრთისაო,  
შეიწყალე მამკობელი  
შენი (მეფე) დავითი.

ფრთებზე, შიგნიდან, წარმოდგენილნი არიან, მარცხნივ: იოანე ნათლის მცემელი: „წ-ღ : ი-ნ[ე] ნთლ“. ამის სურათი გაფუჭებულია; მარჯვნივ: „წ-ღ : ი-ნე : მხრბლ“. ამის სურათი საკმაოდ კარგად არის დაცული. (№17263). სურათები გარედან კარებისა და მათი მორთულობა სრულიად განადგურებულია (№17264). მეორე გვერდზე ხატისა, კუთხეებში, ლამაზად ნაჭედი ხლართულებია და შუაში, წერტილებიან ლამაზ წრეში, ასომთავრული წარწერა:

ქ მ :. წო :  
ღ-თის მშობელ  
ო : მეოხ გჳქმენ :  
მწ-ე : ძესა : შენსა : მო-  
სავთა : შენთა : ავი  
[თ] : და მეჳლლესა : ჩე  
მსა : გ-ონც  
ასა :.

ჴი წმიდაო  
ღმრთის მშობელო,  
მეოხ გუექმენ  
წინაშე ძესა შენსა მო-  
სავთა შენთა დავი-  
თს და მეჳლლესა ჩე-  
მსა გუანც  
ასა.

ამ წარწერაში მე-4 სტრიქონში, ჯგუფში: მწ-ე : ასო მ შეცდომით უნდა იყოს მიმატებული. ეს იქიდან სჩანს, რომ შემდეგ ორ ასოს შუა პატივია „წ-ე“ და ნიშნავს „წინაშე“-ს. რომ ეს ჯგუფი „მწ-ე“-ს ნიშნავდეს, მაშინ ამის წინ „და“ იქნებოდა და შემდეგ სიტყვა „წინაშე“ მაინც უნდა ყოფილიყო მოყვანილი. ასო ჳ ჩვეულებრივად უ-ის მაგიერ არის ხმარებული; ვინაიდან აქ გამოშვებულად იგულისხმება ო, ხოლო

სიტყვაში „გონც“ გამოშვებულია ჯ. სიტყვების მაგიერ „ძესა შენსა“ უნდა ყოფილიყო ჩვეულებრივად: „ძისა შენისა“.

ჩვენი აზრით, ამ წარწერაში მოხსენებული დავით არის მეფე დავით მეხუთე, გიორგი ლაშას ძე, თამარ მეფის შვილის შვილი; მისი მეორე ცოლი იყო გუანცა, რაჭის ერისთავის კახაბერის ქალი. გუანცა პირველად ცოლად ჰყავდა ათაბეგს ავაგს, შემდეგ დაქვრივებისა, ის მისთხვდა დავით მეფეს 1252 წელს. გუანცა გარდაიცვალა 1263 წელს (იხ. Brossete H.G. t. I. p. 568, n. 4). მაშასადამე, ჩვენი ხატი და მისი წარწერა დამზადებულია 1252-1263 წლებს შუა.

3. ხატი წა გიორგისა, ვერცხლისა, ნაჭედი, 23X17 სანტ. მთავარ მოწამე მდგომარეა; მარჯვენა ხელში შუბი უჭირავს, მარცხენა ფარზე აქვს დადებული. საომარი ტანისამოსის ზევით გრძელი მოსასხამი აცვია. წარწერა: წი გ.ი. აშია ბალახბულახის სახით არის შემკობილი გრეხილით შემოზღუდულ სიმრგვალებით. მე-16 ასუკუნეს უნდა ეკუთვნოდეს (№17260).

3. ხატი წა გიორგისა, ვერცხლისა, ნაჭედი, 23,5X18 სანტ. მხედარი მდგომარეა იმავე რიგით, როგორც წინა ხატი. წარწერა: წა გ.გი ლსორის. აშია რომბ-ლურსმული. ხატი მე-16 საუკ. უნდა ეკუთვნოდეს (№12260).

შემოკლებულს სიტყვაში ლსორის არ ვიცით, რა იგულისხმება (ლასორის თუ სხვა), მაგრამ შეუძლებელია აქ ვიგულისხმოთ: ილორის.

5. ხატი წა გიორგისა, ვერცხლისა, ნაჭედი; მხედარი წარმოდგენილია ცხენით, გვირგვინოსანს გმირავს; შუბის თავი ჯვართ არის მოცული. წარწერა: წა გ.ი. აშია ზემოდ და ქვემოდ რომბ-ლურსმული; მარჯვნივ და მარცხნივ ელიპსოიდები ასეთივე წრეებში. კუთხეებში მედალიონები წ-თა; ზემოდ ღვთის მშობლისა და იოანე ნათლის მცემლისა; ქვემოდ ღვთის მშობელი და იოანე ღვთის მეტყველი. ხელობა მოიტლანქებს. (№17262).

6. ხატი მაცხოვრისა, ვერცხლისა, ნაჭედი, 16,5X13 სანტ. ბერძნულის წარწერით სახელისა. მაცხოვარი მდგომარეა, სახარებით და მაკურთხევლის მარჯვენით, სამღვდელო სამოსელით. აშია საცერის მსგავსი, შემოზღუდულია კიდე ფოლაქის მსგავსი წრეებით; მარჯვნივ ორი თვალი უზის. ხელობა მოტლანქოა, მე-16 -17 საუკუნისა. (№17261).

7. ხატი მაცხოვრისა, ვერცხლისა, ნაჭედი, 18,5X13 სანტ. მაცხოვარი მაღალ ტახტზე მჯდომარეა; მარჯვენა ხელით ჯვარს სწერს, მარცხენაში სახარება აქვს. აშიები მოსხო წერტილების მსგავსი წრით არის შემოვლებული. წარწერა ასომთავრულია: ძ<sup>ჴ</sup> ქ<sup>ე</sup>. ნიშბი ჯვარის სახედ აქვს. ხელობა მე-17-18 საუკ. უნდა იყოს. №17261).

8. ხატი მაცხოვრისა, ტახტზე მჯდომარე ჩვეულებრივის რიგით, ვერცხლისა, ნაჭედი; ნიშბი დიდის წერტილებით შემოფარგლული. სახე მხცოვანი კაცისა; წარწერა სახელისა ბერძნულად. ტლანქი ხელობისა, მე-18 საუკ. (№17262).

9. ვერცხლის ფირფიტა მაცხოვრის სახით, წელსზევითი 10,5X8,5 სანტ. (იქვე №17262).

10. სამი უბრალო ფირფიტის ხატი: დ<sup>ა</sup> ლ<sup>ს</sup>დ, სრულის ტანით, წ<sup>ა</sup>დ გ<sup>ი</sup> წელსზევითი, და მაცხოვარი წელსზევითი; მდარე ხელობისა, მე-18 საუკ. (იქვე. №17262, ზემო რიგში).

11. ფერადებიანი ხატი ვედრებისა, ფიცარზე, ადგილობრივი, მოტლანქო ხელობისა, არა უადრეს მე-18 საუკ.

12. ფერადებით დახატული ხატი მთავარ ანგელოზ მიქაელისა, ძელზე; უკეთესი ნახელავია, ვიდრე წინა ხატი; არა უადრეს მე-17 საუკუნისა.

### სოფელი ხალდე.

სოფ. მაღლობზეა გაშენებული. როდესაც ბაქრაძე იყო იქ, მაშინ იქ ჯერ კიდევ ძველი ეკლესია არსებობდა მაცხოვრისა. მან ყურადღება მიაქცია ფრესკებს, რომლის შესახებ სწერს: სამხრეთის კედელზე წარმოდგენილნი არიან მთელი რიგი წმიდათა; ზოგნი მათგანი ცხენებზე სხედან და გაბრწყინებულნი არიან სინათლით თავების ირგვლივ; სხვები თოფებით არიან; მამაკაცი ზოგნი წვერებით, ზოგნი უწვეროდ. საზოგადოთ რაოგორც მამაკაცები, ისე დედაკაცები შავის საბურავით არიან და გვირგვინებით. ომია, ზოგი მკვდარია და მიწაზე არიან გაფრთხობილნი. წარწერა: წ<sup>ა</sup>დ გ<sup>ი</sup>. აქა ესთუმრა: წ<sup>ა</sup>დ გ<sup>ი</sup> : ნეოფასთესა. (დ. ბაქრაძე, გვ. 115). ამის მეტს ამ ეკლესიის შესახებ დ. ბაქრაძე არაფერს არ ამბობს.

ეხლა ძველი ეკლესია აღარ არის. ის რუსებმა დაანგრიეს ზარბაზნით 1876 წელს, როდესაც სვანები აჯანყდნ და ხალდეს კოშკებში გამაგრდნ. რუსებმა კოშკები აიღეს, ძველი ეკლესიის ადგილას ეხლა ახალი ქვის ეკლესია არის, მასში რამოდენიმე ტლანქი ხელობის ხატია მცირე ღირებულებისა:

1. ხატი მაცხოვრისა, ვერცხლისა, ნაჭედია, 50X39 სანტ. წარწერით: დ<sup>ე</sup> ქ<sup>რე</sup>. ხელობა ტლანქია.

2. ხატი მაცხოვრისა, ვერცხლისა, ნაჭედი, 47X32 სანტ. წარწერით ბერძნულად და ქართულად: ქ<sup>ე</sup> (ე მობრუნებულია). ხელობა ცოტა უკეთესია, ვიდრე წინა ხატისა.

3. ხატი მაცხოვრისა, წელსზევითი, 28X21 სანტ. ნაჭედი, ტლანქი ხელობისა, ამიები რომბ-ლურსმული კარგია და სხვა ხატისა უნდა იყოს.

4. ხატი წ<sup>ა</sup> გიორგისა, ვერცხლისა, ნაჭედი, 28X19 სანტ. მთავარ ანგელოზებითურთ ორივე მხარეს; წარწერა: წ<sup>ა</sup>დ გ<sup>ი</sup>. ტლანქი ხელობისაა.

5. ხატი ღვთის მშობლისა, წელსზევითი, ვერცხლისა, ნაჭედი, 22X15 სანტ. წარწერით: დ<sup>ი</sup> ღ<sup>თსა</sup>ი. სხვებს სჯობია, მაგრამ მაინც დაბალი ხელობისა არის.

6. ხატი წ გიორგისა, ოქროსი, ნაჭედი, 14X11 სანტ. წარწერით: წ დ გ ილორსა. მხედარი წარმოდგენილია ფეხით, რომაულ საომარ ტანისამოსით, შუბით და ფარით. კარგი ხელობის არის, მაგრამ ფრიად დაზიანებულია.

7. ასეთივე ხატი წის გიორგისა, ოქროთი დაფერილ ვერცხლის, 12X9,5 სანტ. წარწერით: წ დ გ ი. დიდათ დაზიანებულია.

8. ხატი მთავარ ანგელოზ გაბრიელისა, ტლანქი ხელობისა, ვერცხლისა, 11X8 სანტ. წარწერით: ქ. გაბრიელ თავარაგლზი. და შემდეგ.:  
შე შესტრ/ობი/ლი გამ/იდგა/ნი ამინ.

9. ხატი ღვთის მშობლისა ჩხვილედი, ვერცხლისა, რელიეფით, 6,5X6 სანტ. ხელობა უკეთესია, ვიდრე წინა ხატისა.

10. ხატი წა თეოდორესი, ძეწკვით და ჯვარით, 9X6,5 სანტ. ტლანქი ნაჭედი.

11. ორი ხის ჯვარი, შუა ზომისა, 80 სანტ. სიმაღლით, შეძერწილი ვერცხლის ფირფიტებით, ფრიად ტლანქი ხელობისა.

12. ხატი წა გიორგისა, ვერცხლისა, ნაჭედი, 17X12 სანტ. წარწერით: წ ი გ ი. მოტლანქო ხელობისაა.

13. ორი ვერცხლის ხატი, შედგენილი სხვა და სხვა ჯვრიდან მოხსნილ ფირფიტებისაგან. ტლანქი ხელობისაა.

### იფარის თემი

იფარის თემში შედიან სოფლები: ნაკიპარი, ზეგანი, აწი, ბოგრეში, იფარი, წვირმი, იელი და ადიში. (წინეთ წვირმი და ადიში ცალკე თემებს შეადგენდენ)

### სოფელი ზეგანი.

სოფელი ზეგანის საზოგადო სახე, სოფელ წვირმიდან გადმოღებული, იხ. ფოტოგრაფია №17474. აქ არის პატარა ეკლესია მთავარ ანგელოზთა; აშენებულია უბრალო ქვისაგან; ეკვტერები ჰქონია სამივე მხრით, გარდა აღმოსავლეთისა, მაგრამ სამხრეთის ეკვტერი ჩანგრეულია. შესავალი ერთი აქვს, დასავლეთით; ფანჯარა ორი, აღმოსავლეთით და დასავლეთით. დახურულია ყავრით. კანკელი ხისაა, მაგრამ ძველია და ქვისას მოგვაგონებს თავის ფორმით; ხუთი კამარა აქვს; საკურთხეველში შესასვლელი მარტო ერთი კარია შუაში; სვეტები კამარებისა წვრილია და შემკობილი ჩუქურთმებით. ეკლესიაში დაცულია:

1. **კანკელის წინ სადგომი ჯვარი**, შუა ტანისა, 105X54,4 სანტ. შექმნილია ოქროთი დაფერილი ვერცხლის ფირფიტებით, ლამაზი ხელობისა, რომელნიც შემკობილნი არიან ბალახოვანის მორთულობით და წთა სახეებით: ზემოდ მთავარ ანგელოზი მიქაელ, სრულის ტანით, ლაბარუმით და ბურთით, წარწერით: მიქაელ ანგელოზი, ქვემოდ: წმიდა გრიგოლ, სრულის ტანით: წი გრიგოლ, და წა გიორგი, ცხენოსანი, ვეშაპს გმირავს. უმბო წარმოგვიდგენს მზის თვალს; მის მარცხნივ არის მედალიონში წმ კ ტრე; მარჯვენა და მარცხენა ფრთის ბოლოებში ჯვარისა მთავარ ანგელოზებია; მარჯვენას აწერია; წმ გბრლ. ჯვარი მშვენივრად არის დაცული (№17224). არ უნდა იყოს უგვიანეს მე-14 საუკუნისა.

2. **ასეთივე ჯვარი**, 146X87 სანტ. ისეთივე ხელობისაა, როგორც წინა ჯვარი, მაგრამ უფრო ცუდათ არის შენახული. ქვემო მთელი ნაწილის და მარცხენა ფრთის ფირფიტები მოძარცულია. ზემოდ წარმოდგენილია ვედრება; მის ქვემოდ მთავარ ანგელოზი, სრულის ტანით, საზომით და ბურთით; ამას ქვემოდ მაცხოვარი, აგრეთვე სრულის ტანით; მარჯვენა დაზიანებულ ფრთაზე მთავარ ანგელოზი და ლუკა მახარობელი: წმ ლუკა (№17225).

3. ამ ჯვართან ერთად გადმოღებულია (ქვემო ნაწილზე) პატარა **სპილენძის ხატი მესვეტის ფიგურით**, მისი ორი თანამდგმურით და ზემოდ ორი მთავარ ანგელოზით.

4. **ხატი წა გიორგისა**, ოქროთი დაფერილი ვერცხლისა, ნაჭედი, 17,5X13 სანტ. (№17222). მხედარი ფეხოსანია, რომაულ საომარ ტანისამოსით, შუბით და ფარით. ფონი რომბ-ლურსმულია, აშია ბალახოვანი. წარწერა: წი გი ქშთისა. (ბაქ. გვ. 110). ქვემოდ სხვა წარწერა:

ქ წო გ ი მფარველ ექნ მოსავ  
შენსა მნუკვვს და ძეთა ჩემთა .

შემკობელის სახელი შეიძლება იყოს მანუკვი. სხვა ნათელია. მე-16 საუკუნის უნდა იყოს.

5. **ხატი მაცხოვრისა**, ოქროთ დაფერილი ვერცხლისა, ნაჭედი, (№ იქვე, №17222). მაცხოვარი ტახტოსანია, ჯვარის სახის ნიშნით და ზედ სამი ძვირფასი ქვით. მარჯვენა ხელით აკურთხებს, მარცხენა მუხლზედ დადებულ სახარებაზე უძევს. მაცხოვარი ფართო და მძიმე მოსასხამშია, რომლიდანაც ძლივს გამოაქვს ხელები. შემკობილ აშიებზე მარცხნივ და მარჯვნივ მედალიონებში, წარმოდგენილნი არიან: ღვთის მშობელი და იოანე; ზემო და ქვემო აშიები მოძარცულია. ხატი უნდა იყოს მე-15-16 საუკუნისა.

6. **ხატი მაცხოვრისა**, ოქროთ დაფერილი ვერცხლისა, ნაჭედი, 29X22 სანტ. მაცხოვარი წარმოდგენილია მუხლების ზემოთი ტანით, მაკურთხეველის მარჯვენით და სახარებით, წარწერა სახელისა ბერძნულია I-C CX (sic). ნიშნი ჯვარის სახისა

არის. ეზო და აშიები ბალახოვანი შემკობილობით არის მორთული. (№17220). უნდა ეკუთვნოდეს მე-15-16 საუკუნეს.

7. ხატი წა გიორგისა, ოქროთ დაფერილი ვერცხლისა, ნაჭედი, 31X23 სანტ. მხედარი ცხენოსანია, გმირავს ადამიანს. წელიდან ჩამოშვებულია დიდი ხმალი, თმა ხუჭუჭი აქვს. მოსასხამი მხედრისა უკან იშლება ჰაერში. ეზო ვაზის შტოების მსგავსად არის შემკობილი. აშია არა აქვს. ხატი მე-16 საუკუნის უნდა იყოს (№17221).

8. ხატი წა ბარბარესი, ვერცხლისა, ნაჭედი 29X24 სანტ. წა ბარბარე წარმოდგენილია სრულის ტანით, ბიზანტიური სადარბაზო ტანისამოსით, ჯვარით ხელში და ნიშბით. ეზო ტალღისებური ორნამენტით არის შემკობილი. აშიები რომბ-ლურსმულია, მარჯვნივ და მარცხნივ აკლია. მარცხენა აშიაზე ერთი წმიდანი სრულის ტანით არის წარმოდგენილი, ქვემოდ ღვთის მშობელია ჩჩვილედით. წარწერა სახელისა: წბ ბვ (sic). ხელობა ტლანქია, მე-17-18 საუკუნის უნდა იყოს. (№17219).

9. ხატი მთავარ ანგელოზისა (?), წამლით დახატული, 47,5X36 სანტ. წელსზევითი; მარჯვენა ხელში უჭირავს დიდი ბურთი, მარცხენაში ბზის ტოტი. პირის სახე ქართველი ქალისა აქვს და შეიძლება სურათი ღვთის მშობლის ხატად მიგვედო, რომ მთავარ ანგელოზის ნიშნებით არ იყოს წარმოდგენილი. არავითარი წარწერა არა აქვს. ხელობა შედარებით ახალია. აშიები სხვა და სხვა ფრაგმენტებიდან არის შემდგარი, საზოგადოთ რომბ-ლურსმული; ზემოდ აშია ვერცხლისა არის, სხვა კედრით მოოქრულია. მარჯვნივ წარწერა სახელისა სხვა ხატს ეკუთვნის ვინაიდან სწერია: ქე. მარცხენა აშიაზე ჩვენ ვხედავთ წა გრიგორის ფიგურას, სრულის ტანით და წარწერით: წ-ღ გრიგოლ. ჩვენი ფოტოგრაფია №17617 (რუსული წარწერა ფოტოსი სინამდვილეს არ შეესაბამება) გატეხილი ფირფიტიდან არის შესრულებული.

### სოფელი წვირში.

სოფელი მაღალ მთაზეა გაშენებული. მისი სახე იხ. №№17477, 17480. აქვე ხარებშებმული მარხილი თივისა. აქედან იშლება საუცხოო პანორამა მწვერვალ თეთნულდისა (ფოტ. №17475), და კიდევ სოფელი ზეგანისა (იხ. №17474). მშვენიერად მოსჩანს აქედან აგრეთვე მწვერვალი უშბა (იხ. №17473, აქვე სოფლები ბოგრეში და ნაკიპარი).

სოფელ წვირში რამოდენიმე ეკლესია არის. პირველი ეკლესია მაცხოვრისა, ქვისაგან აშენებული, ბაზილიკური რიგისაა (№№17478-17479); მას ეკვტერები უვლის სამი კედრით, უბრალო ქვებისა. დასავლეთის მხრით, ზემოდ, პატარა სამრეკლო აქვს. ეკლესია წინათ მოხატული ყოფილა, მაგრამ ფრესკები სულ მოშლილი და გაფუჭებულია; ნაშთები ცოტა ემჩნევა. ეკლესიაში ჩვენ ვნახეთ:

1. **ჯვარი** კანკელის წინ სადგამი, სიმაღლით სამ არშინზე მეტი, შეპერწილი ოქროთ დაფერილი ვერცხლის ფირფიტებით ზემოდ, ხოლო უბრალო ვერცხლის ფირფიტებით ქვემოდ. მათზე წარმოდგენილნი ფიგურები წმიდათა არა დიდის ხელოვნებით არიან შესრულებულნი (№17246). ამათში უფრო საყურადღებოა სამი ფირფიტა: ერთი ზემოდ, ვედრების სურათით; ქვემოდ მთავარ ანგელოზთა. უმბოს ირგვლივ, რომელიც მზის თვალს გამოხატავს, წარმოდგენილნი არიან მკერდს-ზევითნი ფიგურები ღვთის მშობლისა, იოანესი და ორთა მოციქულთა. სხვა ფირფიტებზე მრავალჯერ განმეორებულია ფიგურები მაცხოვრისა და მთავარ ანგელოზთა.

2. **ასეთივე ჯვარი**, ამავე ზომის, შეპერწილი ოქროთი დაფერილი ფირფიტებით, ტლანქი ხელობისა (№17245). ზემოდ და ქვემოდ უმბოსა, რომელიც მზის თვალს წარმოგვიდგენს, მოთავსებულია წა გიორგი ცხენით, მემირავი კაცისა გვირგვინოსნისა. სულ ზემოდ ჯვარცმას; ბოლოებში ჯვარისა: წა გიორგი ცხენით. სხვა ფირფიტებზე: წა გიორგი, წა დიმიტრი და წა თეოდორე და სხ. სურათი შეად. უვაროვისა, ტ. XXII, 38.

3. **ასეთივე ჯვარი და ასეთივე ზომის**, მაგრამ უფრო ვიწრო და ქუდიანი, ანუ მიტრიანი (№17247), შეპერწილია ოქროთ დაფერილი ვერცხლის ფირფიტებით, ერთი დროისა და ერთი ხელობისა. ამით ეს ჯვარი ემსგავსება სოფელ სუპის ეკლესიის ჯვარს. ამ ჯვარზე პატარა წელსზევითნი ფიგურები მაცხოვრისა და ქერუბიმთა ერთი ერთმანეთს ეცვლებიან გამობერვილი ფირფიტებით, რომლებზედაც წარმოდგენილნი არიან ჯვრები, და მხოლოდ ქვემო ნაწილზე ჩვენ გვხვდება ორი ფიგურა მთელის ტანით მთავარ ანგელოზ მიქელისა და წა გიორგისა. მთავარ ანგელოზი გრძელ ბიზანტიურ ტანისამოსშია, ჯვარით და ბურთით ხელთა; ხოლო წა გიორგი შუბით და ფარით. სურათი იხ. აგრეთვე უვაროვისა, ტ. XXII, 38.

4. **ჯვარი**, შუა ზომისა, 118X67 სანტ. შეპერწილი ოქროთ დაფერილი ვერცხლის ფირფიტებით; ზემოდ და შუაში ვერცხლი მომარცულია (№17228). ქვემოდ ოთხი წელსზევითი ფიგურაა მაცხოვრისა; მარჯვენა და მარცხენა ცოტა დაზიანებულ ფრთებზე მოსჩანან: მთავარ ანგელოზი, ღვთის მშობელი და ორი მაცხოვარი; ხელობა დაბალია.

5. **ასეთივე ჯვარი**, 81X54 სანტ. შეპერწილია ოქროთი დაფერილი ფირფიტებით, უკეთესი ხელობისა, ვიდრე წინა ჯვარი. უმბო მზის თვალის სახისა შემკობილია შუაში ძვირფასი ქვით (№17229). ზემოდ არის ფიგურები ვედრებისა, მთავარ ანგელოზისა და მაცხოვრისა. ქვემოდ: ერთი ფიგურა, სრულის ტანით, დაზარალებულია; დაცულია მაცხოვარი და სხვა წელსზევითნი ფიგურები; მარჯვენა და მარცხენა ფრთებზე: მაცხოვარი ტახტოსანი, მთავარ ანგელოზნი და სხვა.

6. **ასეთივე ხელობის ჯვარი**, 112X68 სანტ. შეპერწილი ოქროთი დაფერილი ვერცხლის ფირფიტებით, ერთი ხელობისა; საკმაოდ კარგი ნახელავია (№17230). უმბო წარმოადგენს მზის თვალს; მარჯვენა და მარცხენა ფრთებზე თითო ფიგურაა ვედრებისა და თითო ფიგურა მთავარ ანგელოზისა; ზემოდ ვედრება; მის ქვემოდ



მთავარ ანგელოზი წელსზევითი და მაცხოვარი სრულის ტანით. ქვემოთ: სამი მაცხოვარი წელსზევითნი და წმიდა გიორგი, ფეხოსანი, სრულის ტანით. სურათი შეად. უვაროვის, ტ. XXII, 38.

7. ხატი წა იაკობისი, ძმისა უფლისა, 27,5 X17,5 სანტ. ოქროთი დაფერილი ვერცხლისა, ნაჭედი, კარგი და ნაზი ქართული ხელობისა, მე-13 საუკ. ეზო ბალახოვანი მორთულობით არის შემკული, აშიები წნულია, მაგრამ ქვემო ნაწილი დარღვეულია და საზოგადოთ ხატი ცუდათ არის დაცული. წარწერა სახელისა; წმ იკბ ძმ ოფლ. მეორე გვერდზე, კუთხეებში ბალახოვანი შემკობილობაა, ხოლო შუაში ჯვარის ირგვლივ, წარწერა (№17234):

წ მ : წ ო : იაკობ : ძმა	ში წმიდაო იაკობ, ძმაო
ო : ოფლისაო : რომელმან	უფლისაო, რომელმან
გიწოდა : ძმა	გიწოდა ძმად
დ : წ ე : ისა : მეოჯ მექმენ :	წინაშე მისა, მეოხ ექმენ
დღესა განკითხვისასა : მოსა	დღესა განკითხვისასა მოსა-
ვსა : შენსა : ქამქმს : ტგრ	ვსა შენსა ქამქამს ტიგ-
იანის ძესა .:	რიანის (ანუ ტიგრანის) ძესა.

წარწერა ხელით გადმოღებული აქვს ბარტოლომეის, ტაბ. . II, №16. ბაქრადეს რუსული თარგმანი მოჰყავს ბარტოლომეის მიხედვით (გვ. 110).

8. ხატი მაცხოვრისა კარედი, 22X15 სანტ. ვერცხლისა; გარეთ კარებზე, ზემოდ აწერია: [წ] მ : პ ტე : (მარცხნივ), წ მ : პ ლე : (მარჯვნივ), მაგრამ ფიგურები ამათი წარმოდგენილი არ არის. კარები სადათ არის დატოვებული (№17231); როდესაც კარებს გააღებთ, თქვენ წარმოგიდგებათ სამივე ნაწილი ხატისა, ფერადებით დახატული, მშვენიერის სურათებით, რომელნიც მოვლებულნი არიან ირგვლივ მარგალიტების მძივებით და ოქროზე ნაჭედი შემკობილობით ეზოთა და აშიათა (№17242). შუაში, ზემოდ, კამარის ქვეშ მაცხოვარია წელსზევითი, ბერძნულის წარწერით სახელისა. მაცხოვრის ქვეშ პატარა ხატია ღვთის მშობლისა, წელსზევითი, როგორც ეტყობა ჩჩვილადი (სახეები ეხლა სულ გადასულია), ბერძნულის წარწერით სახელისა. ამ ხატის მარცხნივ და მარჯვნივ, სრულის ტანით წარმოდგენილნი არიან წარწერებით, ზემოდ: წ მ ეკტირნა .: (მარცხნივ), წ მ : მრინა (მარჯვნივ). ამ ღვთის მშობლის ხატის გამოღება შეიძლება, ვინაიდან ის ჩადგმულია კარედში; მის ზურგზე წარწერაა ასომთავრული (იხ. №17231):

დ ღო : ღთის	დედაო ღმრთისა-
ო : შეიდრე :	ო, შეივედრე
სული : თე	სული თე-
კლასი	კლასი,
ამინ .:	ამინ.

ეს წარწერა, ჩვენის აზრით, შემდეგ დროის არის და არა თანამედროვე კარედი ხატისა. ამას მოწმობს პალეოგრაფიული ხასიათი წარწერისა და მოხსენება თეკლასი, რომელსაც თავის სახელი ამ ხატზე ერთ ადგილზე ხატის დიდ წარწერაშიაც მოუთავსებია.

კარებზე შიგნით წარმოდგენილნი არიან, მარცხნივ დედა ღვთისა ბერძნულის წარწერით სახელისა. აქ ფერადები უკეთ არის დაცული. მარჯვნივ იოანე ნათლის მცემელი, აგრეთვე ბერძნულის წარწერით. ეზო და აშიები ამ სურათებისა შემკობილია საუცხოო ბალახოვანი მორთულობით. გრაფ. უვაროვისას ვერ უნახავს მარჯვენა ფრთა ამ კარედი ხატისა, აგრეთვე ვერ გაუგია, რომ მაცხოვარის ქვეშ, შუაში, ღვთის მშობლის ხატია, თუმცა ბერძნული წარწერა ამას ცხად ჰყოფს (უვაროვისა, გვ. 121). ჩვენ მოვნახეთ და ვიპოვეთ მარჯვენა ფრთაც ამ შესანიშნავი ხატისა, მივაკარით თავის ადგილზე და ისე გადმოვიღეთ სურათი (№17242). მეორე გვერდზე ხატისა ვერცხლის ფურცელზე კუთხეებში წარმოდგენილია ნაჭედი ბალახოვანი ხლართულები, შუაში ჯვარის ირგვლივ წარწერაა (№17232), რომლის მარცხენა ქვემო ნაწილი, ეხლა სულ მოძარცულია; დ. ბაქრაძის დროს, როგორც სჩანს, უფრო მეტად ყოფილა დაცული (იხ. გვ. 114 და დამატება №34).

მთლად აღდგენა წარწერისა შეუძლებელია, მაგრამ თუ მივიღებთ სახეში დ. ბაქრაძის გადმოღებულ ტაბულაზე დაცულ ასოებს და ზოგს აზრით დავუმატებთ (ამათ ფრჩხილებში ვათავსებთ), დაახლოებით წარწერა შეიძლება ასე წამოვიდგინოთ:

: ქ : მცხვრო : და : ღთო :  
ჩვენო : და : ყოლნო : წმი  
და                               ნო :  
მ[ისნო] : რლთა : სადიდეზლად  
[და საოხად სლსა] ჩმისა [სე]ვმკვე : ხა  
[ტი] : ესე . ცოტა[აი]სა (?) : ნვითთა  
შემკობი[ლი] . . . ტილ(?) : საოხ  
დ : სლს[ა გო]რგსლი  
[სა] ან .

უქარაგმოდ:

„მაცხოვარო და ღმერთო ჩვენო და ყოვენლო წმიდანო მ(ისნო), რომელთა სადიდეზლად (და საოხად სულისა) ჩემისა (შე)ვაძვე ხა(ტი) ესე ცოტ(აი)სა (?) ნივითთა შემკობი(ლი). . . საოხად სულის(ა) (გო)რგასლის(სა), ამინ“.

ხატი ამ წარწერით მე-12 საუკუნის უნდა იყოს.

ჯვარის გამოხატულებას თავში ამ წარწერისა უზის ოთხი ბერძნული ასო სახელისა; მარჯვენა ორ ასოს შემდეგ არის ასომთავრული ასო ძ, რომელიც უნდა გულისხმობდეს შემოკლებულად გადმოცემულს სიტყვას: „ძელი“.

ჯვარის ჰორიზონტალურ ნაწილზე (№17232) სხვა ხელით და უფრო წვრილის ასომთავრულით შემდეგი წარწერაა:

თეკლს : შნდ .: მცხოხრო (sic).

უკანასკნელ სიტყვაში ასო ხ შეცდომით არის განმეორებული 3-ს მაგიერ, წარწერა უნდა წავიკითხოთ: „თეკლას შეუნდვენ, მაცხოვარო“.

ამრიგად, ჩვენს ხატს აქვს ორი მერმინდელი წარწერა თეკლასი. ხოლო ეს უცნობი თეკლა ის „წელმწიფის შვილი მონაზონი თეკლა“ უნდა იყოს, რომელიც იხსენიება კალას ეკლესიის ზარის წარწერაში და რომელიც ნაჩვენებია ზემოდ, №80-ს ქვეშ კალას ნივთების აღწერისა (იხ. ზემოდ, გვ. 203).

9. **ხატი მაცხოვრისა**, თავი ხატი ეკლესიისა, ოქროთი დაფერილი ვერცხლისა, ნაჭედი, 42X36,5 სანტ. მაცხოვარი ტახტზე მჯდომარეა, ჩვეულებრივის სახით. ნიშნი ჯვარის სახისა; ორივე კედრით უწერია სახელი ბერძნულად და ქართულად (ივ) (ვ მობრუნებულია) ქე; აქეთ-იქით მაცხოვრისა მედალიონებში: ღვთის მშობელი და იოანე, წარწერებით: „დ დ ო-, წ ი ი ე ნთლმსცემი“. ღვთის მშობლის ქვემოდ: წ ი გ ი, ნათლის მცემლის ქვემოდ: წ ი დ ტ რ ი. აშიები შიგნით ბალახოვანის ორნამენტით არის შემკობილი, ხოლო გარე აშია ფართო და რომბ-ლურსმულია, სამ-სამ მედალიონით ზემოდ და ქვემოდ; ზემო მედალიონებში არის ფიგურები ღვთის მშობლისა და მთავარ ანგელოზთა; ქვემოდ: „წ თ ე, წ მ ბ რ ბ, წ მ ბ ას ლ დ“. მარჯვენა და მარცხენა აშიებზე: „წ მ პ ე, წ მ პ ვ ლ ე“. ხელობა ამ გარეგანი აშიებისა მოტლანქოა; თვით ხატისა უკეთესია, არა უგვიანეს მე-15-16 საუკუნისა (№17243).

10. **ხატი წა გიორგისა**, ვერცხლისა, ნაჭედი; მთავარ მოწამე ცხენოსანია, ადამიანს გმირავს, რომელსაც წაწვეტიანებული ქუდი ახურავს და თავის ხმალი მიწაზე დაუგდია. ზემოდ აწერია: წ ი გ ი. აშიები განიერი რომბ-ლურსმულია, ოთხი მედალიონით; ოთხივეში წ ა გ ი ო რ გ ი ა, წარწერით: წ ი გ ი. ხატი უნდა ეკუთვნოდეს მე-16-17 საუკუნეს (№17233).

11. **ხატი მთავარ ანგელოზთა მიქელ და გაბრიელისა**, ოქროთი დაფერილი ვერცხლისა, ნაჭედი, 44X42,5 სანტ. (№17244). მთავარ ანგელოზნი წარმოდგენილნი არიან წყვილად, მთელის ტანით, მდიდრულ საომარ ტანისამოსით. ერთ ხელში ლაბარუმები აქვთ. მეორეში ბურთები, რომელნიც ერთი მეორისთვის მიუდვიათ გაწვდილი ხელებით. წარწერები სახელებისა ბერძნული და ქართულია. ეს ხატი ესე იგი შუა ნაწილი, ფიგურები მთავარ ანგელოზთა, სრული განმეორებაა ჩუკულის ეკლესიის ხატისა №16860, რომელიც ჩვენ თავის ადგილას აღვწერეთ, ხოლო აქ არ არის შინაგანი აშია ბროწეულის ყვავილების ორნამენტით და აგრეთვე ის საუცხოო ბრტყელი გარეგანი აშია, რომელიც ჩუკულის ხატს აქვს. აქ აშია რომბ-ლურსმულია მედალიონებით წ თ ა, ტლანქი ხელობისა. ზემოდ და ქვემოდ: სამ-სამი წ ა გ ი ო რ გ ი, სრულის ტანით, შუბით და ფართით; გვერდებზე წელსზევითნი ფიგურები მთავარ ანგელოზთა. საყურადღებო ის არის, რომ გრაფ. უვაროვის ჩუკულის მთავარ ანგელოზთა სურათზედაც (ტაბულა XXX, სურ. 49) აშიები რომბ-ლურსმულია, მაგრამ განმეორება არ არის ამ ჩვენი ხატისა, ვინაიდან იქ, უვაროვის სურათზე, ზემოდ, შუაში მაცხოვარია მთავარ ანგელოზებითურთ აქეთ-იქით, ხოლო გვერდების აშიებზე წ ა გ ი ო რ გ ი და წ ა დ ი მ ი ტ რ ი. ამიტომ შეუძლებელია ვიფიქროთ, რომ გრ. უვაროვისა შეცდა და წვირმის ხატი ჩუკულისად მიიღო; არამედ უნდა ვიფიქროთ, რომ ჩუკულის ხატი გრ. უვაროვის შემდეგ ჩასვეს ხელმეორედ ან თავის ან სხვა საუცხოო ჩარჩოში. წვირმის ხატი კოპიო არის ჩუკულის ხატისა.

12. **ხატი წა გიორგისა**; ამოჭრილია რელიეფით ხეზე, წმიდა გიორგი წარმოდგენილია ცხენით, გმირავს ადამიანს შუბით (№17241). ეს ფიგური უსათუოდ სარჩული იყო ოქროს წ ი ს გ ი ო რ გ ი ს ხ ა ტ ი ს ა და როდესაც პერანგი შემოაცალეს, დარჩა გაშიშვლებული; ამიტომ ტყვილად ფიქრობს გრაფ. უვაროვისა, თითქო ეს არ იყოს მატრიცა, სარჩული, ნაჭედი ხატისა (გვ. 102). რომ ეს მართლა სარჩული იყო ნაჭედი ხატისა, ამას მოწმობს თავდაპირველად ის გარემოება, რომ ორ ადგილას ხატზე

შერჩენილია სულ პატარა ნაწყვეტები ოქროს ფირფიტებისა. შემდეგ უფრო დანამდვილებით ამას მოწმობს ერთი წმიდა გიორგის ხატის აღწერილობა პოლ. ბარტოლომეისა, რომელიც მას უნახავს წვირმის წმიდის გიორგის ეკლესიაში; ამ ეკლესიაზე საუბარი ქვემოთ გვექნება. აქ უნდა აღვნიშნოთ, რომ ეხლა ეს ეკლესია გაუქმებულია; იქ არავითარი ნივთი აღარ არის; ბარტოლომეის დროს, როგორც ეტყობა, ეს თავი ეკლესია ყოფილა სოფლისა. ის ამბობს: თავ ეკლესიაში წვირმის საზოგადოებისა წა გიორგის სახელობისა არის რამოდენიმე ხატი თავის მორთულობით და პერანგებით, პირველი ადგილი უჭირავს თავ ხატს ეკლესიისა (ესე იგი წა გიორგის ხატს), რომელზედაც განმეორებულია ისეთივე სურათი დამხობილი გვირგვინოსანისა, როგორც აღწერილი იყო ივარის საყდარში, ხოლო აქ არ არის მოხსენებული სახელი დიოკლეტიანესი, და არც არშაკიდების ქუდია, არამედ კბილოვანი გვირგვინია მოგრძო ჩანჩხურებით, როგორც ბიზანტიურ ფულებზეა მე-12 საუკუნისა. დაბლა ვერცხლის ეზოზე ამოჭრილია წარწერა, რომელიც მოთავსებულია ტაბულა I, № 15 (აქ მას მოჰყავს თარგმანი ბროსესი ამ წარწერისა). ბროსესს თარგმანიდან სჩანს, რომ მას ამ წარწერაში შემდეგი სიტყვები ამოუკითხავს:

„წმიდაო გიორგი ქაშვეთისაო, მეოხ და მფარველ ეყავ მამკობსა შენსა ჯიქამესა“.  
(ბარტ. გვ. 179). ჩვენ ბარტოლომეის მიერ გადმოღებულს წარწერას ასე ვკითხულობთ:

წმიდაო გიორგი ქაშუ-  
ეთისაო, მეოხ და მფარვ-  
ელ მეყავ  
მამკობსა შენს(ა)  
ჯიქამეს ხუ-  
ცესსა მიქელს.

დ. ბაქრაძეს, როგორც ეტყობა, ეს ხატი არ უნახავს; ის უჩვენებს ბარტოლომეის მიერ გადმოღებულს წარწერას და მოჰყავს მისი რუსული თარგმანი, რომლიდანაც სჩანს, რომ მას სიტყვა „ხუცესი“ მიუმატებია ბროსესს წაკითხულისათვის (ბაქრაძე, გვ. 110), ხოლო სიტყვა „მიქელი“ გამოუშვია. ბარტოლომეის აღწერილობა სრულად უდგება ჩვენს ხატს. ხის მატრიცაზე წა გიორგი ისეა წარმოდგენილი, როგორც ნაკიპარის (ბარტოლომეით: ივარის) ხატზე. ის გრძელი ჩანჩხურები, რომელზედაც ლაპარაკობს ბარტოლომეი, ემჩნევა მატრიცაზე. ცხადია, ხატი გაშიშვლებულია ბარტოლომეის შემდეგ და ის წარწერაც დაკარგულა, რომელიც, საბედნიეროდ, ბარტოლომეის გადმოუღია. ხატი მე-12-13 საუკ. უნდა იყოს.

**13. ხატი ქრისტეს აღდგომისა** ანუ ჯოჯოხეთის წარტყვენისა, ნაქსოვი ფარჩაზე, უბრალო ხის ჩარჩოთი, 57X45 სანტ. (№17236). მაცხოვარი ჯვარის მსგავსი ნიშნით სდგას შემუსვრილ ჯოჯოხეთის კარებზე და გამოჰყავს იქიდან ადამი, ადამს უკან ევა მოსჩანს; მარცხენა ხელში მაცხოვარს გრძელი რვაფრთიანი ჯვარი უჭირავს; მარჯვნივ, ქვის შენობაზე სდგანან: მეფე და დედოფალი, ვედრების პოზით; მათ უკან: იოანე ნათლის მცემელი (?) უნდა იყოს მაკურთხველის მარჯვენით; ზემოდ, ნიშნის აქეთ-იქით ბერძნული წარწერაა სახელისა, ესე იგი აღდგომა (ანასტაზის). ქვემო ნაწილი ხატისა მომპალია; სახე ქრისტესი დაზიანებულია მას შემდეგ, რაც გრაფ. უვაროვისამ ნახა და აღწერა (გვ. 124, გაბ. XXXVI, ნახ. 63); მის ფოტოგრაფიაზე

მაცხოვრის სურათი არ არის დაზიანებული. თუმცა სხვა მხრივ, საზოგადოთ, ჩვენი ფოტოგრაფია უკეთესია.

გ. დ. ფილიმონოვის აზრით, ხატი ბერძნული ხელობისაა, მე-12 საუკ. გრაფ. უვაროვისა ამ ხატს დასავლეთ ევროპის ხელოვნებას მიაწერს, მაგრამ დროს გარკვევას არ კისრულობს (გვ. 124).

14. **პატარა ხატი წა გიორგისა**, 12X10 სანტ. სახე და წელსზევითი დახატული ყოფილა წამლით, მაგრამ ფერადები გადასულია; მორთულობა ოქროსია; სანახევროდ ისიც დაზიანებულია. ნიმბი მოვლილია წვრილი მარგალიტის მძივით. წარწერა: „წ-ღ გ-ი ზღდრისა“ (იქვე, №17235). შუაში ამოტეხილია; აზრით მიმატებულს სიტყვებს და ასოებს ფრჩხილებში ვაქცევთ:

წო გი	წმინდაო გიორგი
ზღდრ[ისაო] მეოხ და	ზღუდრ(ისაო), მეოხ და
მფარ[ველ მექ]მენ .:	მფარ(ველ მექ)მენ
დღესა გნ	დღესა გან-
კითხ[ვისასა] წე ღთს	კითხ(ვისასა) წინაშე ღმრთი-
ა : აჯა [ს ძ] ესა :ბიბილ	სა აჯა (ს ძე)სა ბიბილ-
ს : ამინ :	ს(ა), ამინ.

ხატი კლასიკური დროსი არის, მე-12-13 საუკუნისა.

15. **პატარა ხატი წა გიორგისა**, ოქროთი დაფერილი ვერცხლისა, 11X8,5 სანტ. ნაჭედი. მხედარი წარმოდგენილია სრულის ტანით, შუბით და ფარით. წარწერა: „წ-ღ გ-ი ქშთსა“; ხელობა დაბალია, მე-16-17 საუკ. (იქვე, № 17235).

16. **პატარა ხატი ღვთის მშობლისა ჩჩვილედი**, ოქროთ დაფერილი ვერცხლისა, 6X5 სანტ. წარწერით: დ-და ღ-სა. აშიები გაყოფილია უჯრედებად; მარტო მარჯვენა ნაწილია დარჩენილი. ხელობა მოტლანქოა, მე-18 საუკ. (იხ. იქვე №17235).

17. **ხატი მაცხოვრისა**, წელსზევითი, ვერცხლისა, ნაჭედი, დაზიანებულია. მე-17 საუკ. უნდა ეკუთვნოდეს. (იხ. იქვე, №17235).

18. **საგალობელი**. ხელნაწერი ეტრატზე, 25X17 სანტ. ნაწერია წვრილის, ნუსხა ხუცურის ხელით, ერთ სვეტად, 22 სტრიქონი სვეტზე. თავი და ბოლო აკლია; ფურცლებიც აქა-იქ არეულია, მაგრამ საერთოდ ხელნაწერი გვარიანად არის დაცული. ხელი წააგავს მიქელ მოდრეკილის ხელნაწერის საგალობელს წერაკითხვის საზოგადოებისა. გადამწერი ვიღაც გიორგია, რომელიც თავის თავს იხსენიებს სინგურით მინაწერში: „წ-ხო : ორმეოცნო შე-თ გ-ი:“. ანუ კიდევ : „წ-ხო მოწამენო შწყლეთ გ ოგი“. თავი ხელნაწერისა ეხლა ორ ფურცელს იქით იპოვება:

. . . სი დსდბლ-ნი ; წინა კრეკეთ : ვ-ე : ქ-ე : შბ-მდე :  
ით-ნენ : ყ-თა : დღეთა : ო-ო : ღ-ღდყ-სა და აქბსა .:  
აღვიხელინსა . და აღვივსენითსა ; ანგელზთა დღეს წინა

უვიდოდეს ძალნი. . .

14 იანვარს წმიდა ნინოს დღესასწაულის დღეს იკითხება:

იანვარსა : იდ : ნეტარისა დედისა ნინოჲსი რომლისა მიერ მოეცა ნათელი ქრისტიანობისაჲ ქართლსა . უგლ-ბსა : დ : გ : ი : უგალობთ ოა რნ გან. . .

მოვედით უგალობდეთ შესხმათ ქებისათათა მკნესა ნინოს ტძრსა მას წა . ვადიდებდეთ გალობითა ახლითა . იხარებს ეკლესიაჲ, და გონიერად დღესასწაულობს დღეს კსენებასა ნინოჲსსა ბრწყინვალედ ქებითა შვილთა თვისთა თანა დღეს ნათლითა საღმრთოდთა განვნათლდეთ მორწმუნენო სიხარულითა .

**ეკლესია წმიდისა გიორგისა.** მესამე ეკლესია წვირმის სოფლისა, როგორც მოვიხსენიე, არის წა გიორგის სახელზე აშენებული. ეკლესია ქვისაა, პატარა; კანკელის ქვემო ნაწილი არშინ ნახევარი სიმაღლით ქვისაგან არის ნაშენი; ზემოდ ხისა არის სამი კამარით და ხისავე პატარა სვეტებით; თაროები ხატებისათვის ხისაა, მიშენებული კანკელზე. შიგნით ეკლესია მოხატული ყოფილა, მაგრამ ფრესკები გაფუჭებულია და შემჭვარტლული. აშენებელი, თუ უკეთ ვსთქვათ, მოთავე ეკლესიის მოხატვისა წარმოდგენილი ყოფილა ფრესკით დასავლეთის კედელზე; ის ქართულ ტანისამოსშია, თავზე ქუდი ახურავს, სკუფიის მსგავსი, რომელიც შემკობილია ჯვარის სახედ მარგალიტებით; მარჯვნივ სანახევროდ გადასული წარწერაა, რომელშიაც მე ამოვიკითხე შემდეგი უცნობი სიტყვები:

სახელითა ღმრთისა  
თა : მოიხატა : წი :  
ესე : ეკლესიაჲ :  
გუხაფათის ჳე  
ლითა ზვიადისა  
ჯელოსნობასა  
პაიშსა (?) . . .

სახელითა ღმრთისა-  
თა მოიხატა წმიდაი  
ესე ეკლესიაჲ  
გუხაფათის ჳე-  
ლითა ზვიადისა.  
ჯელოსნობასა  
პაიშისა (?) . . .

მარცხნივ მეორე წარწერაა, რომელიც უფრო გაფუჭებულია და უფრო ძნელი გასარჩევი; მე საეჭვოდ ვკითხულობ:

ესე არს თ[ავა]დი აარონ. . .

ტრაპეზი, რასაკვირველია, ეკლესიაში აღმოსავლეთის კედელზეა მიშენებული და მას ზემოდ და ფანჯრის ქვემოდ, კედელზე დახატულია მაცხოვრის თავი.

როგორც მოვიხსენიეთ, ეხლა ეს ეკლესია მიტოვებულია, მასში არავითარი ნივთი არ არის; ხოლო ბარტოლომეის დროს ეს ყოფილა თავი ეკლესია სოფლისა და მასში უნახავს მას ის წა გიორგის დიდი ხატი, ოქროთი შექერწილი, რომელიც დღეს გაშიშვლებულია და რომელიც ზემოდ მოვიხსენიეთ ბარტოლომეის მიერ გადმოღებულის წარწერით. აგრეთვე აქვე აქვს მას აღნიშნული მეორე ხატი: წა იაკობისი, ძმისა უფლისა (იხ. გვ. 179), რომელზედაც ზემოდ გვქონდა საუბარი.

**ეკლესია მთავარ ანგელოზთა.** მეოთხე ეკლესია წვირმის სოფლისა არის მთავარ ანგელოზთა ეკლესია; ესეც პატარა ეკლესია არის, თლილის ქვით ნაშენი. კანკელი

ლამაზი აქვს, ქვისა, სამ-კამარიანი; ფანჯრებით თითო, აღმოსავლეთით და დასავლეთით. სარტყელი თაღისა დამყარებულია ფართო და ძლიერად გამოშვერილ პილიასტრებზე სამხრეთის და ჩრდილოეთის კედლებისა; საკურთხეველში ორი ღრმა მრგვალი უბეა (ნიში). ტრაპეზი ამ ეკლესიაში არ ყოფილა; ტრაპეზის მაგიერობას სწევდა ფანჯრის ქვემო ნაწილის სიბრტყე. არავითარი ნივთი ეკლესიაში დღეს აღარ არის, თუ სახეში არ მივიღებთ მოძარცული ხატების და ჯვრების ფიგურებს და აყალო მიწისაგან გამოქანდაკებულ თავებს ცხვრისა და ხარისა.

### სოფელი იელი.

სოფელი ლამაზია. ამ სოფელში ოთხი ეკლესია არის. პირველი ეკლესია წა გიორგისა, პატარა, ქვისაგან ნაშენი, ერთის შესავალით დასავლეთით; ფანჯარა თითო, აღმოსავლეთით და დასავლეთით. კანკელი ქვისა, სამის კამარით. ეკლესიაში მოიპოვება:

1. **ჯვარი ხისა**, კანკელის წინ დასადგამი, შუა ზომისა, 92X52,5 სანტ. შექმნილია ჩვეულებრივად ოქროთი დაფერილი ვერცხლის ფირფიტებით. ფიგურები ფირფიტებისა შემდეგ რიგს მისდევენ: ზემოდ მაცხოვარი ტახტოსანი; ქვემოდ: სრულის ტანით ღვთის მშობელი და იოანე ნათლის მცემელი იმ სახით, რა სახითაც ვედრებაში არიან ხოლმე წარმოდგენილნი, წარწერებით: „ღ-დი ღ-ს, წ-ი ი-ე“; სულ ქვემოდ მთავარ ანგელოზი, სრულის ტანით, ლაბარუმით და ბურთით; ამას ზემოდ წ-ე ანდრია, სრულის ტანით; მარჯვენა და მარცხენა ფრთებზე: მაცხოვარი ტახტოსანი; ბერძნულის წარწერით, მაცხოვარი წელსზევითი: ი-ჴ ქ-ე წ-ე მ-თე და იოანე ღვთის მეტყველი. შუა ფირფიტაზე: წ-ე ი-ე, და მთავარ ანგელოზი; უმბოს ადგილს ერთი ძვირფასი თვალია და მის ქვემოდ წმიდანი მკერდსზევითი, მრგვალ მედალიონში (№17238).

2. **ხატი წა გიორგისა**, ოქროთი დაფერილი ვერცხლისა, ნაჭედი, 14X6,5 სანტ. მხედარი ფეხოსანია, შუბით და ფართით; ფართან ჩამოშვეებული ხმალიც არის; წარწერა: წ-ე გ-ი. ხელობა ტლანქია (№17239). მეორე გვერდზე წარწერა სულ დამახინჯებულია. პარალელურად ჩვენ მოგვყავს ტექსტი, როგორც უნდა ყოფილიყო წარწერა, აზრის მიხედვით.

წ-ე : მოწმთა მთვ  
რო : მკნეო გ-ი  
მეოხმ დ  
მფრლსა : სუ  
მბთ მსვთა  
ხტსა : შნსს  
სმდვლ (?).

წმიდაო მოწამეთა მთავ-  
არო მკნეო გიორგი,  
მეოხ (მეყავ) და  
მფარველ სასუ-  
ებით მოსავთა  
ხატისა შენისასა  
სამადავლ(ეს?).

3. **ოქროს ხატი წა გიორგისა**, ლამაზი ხელობისა, მაგრამ ფრიად დაზიანებული, ნაჭედი, 12X8,5 სანტ. წმიდანი წარმოდგენილია სრულის ტანით; მარცხენა ხელი ფარზე აქვს დადებული. აშიები ვარსკვლავების მსგავსად არის შემკობილი; მარცხენა

აშია მოძარცვულია; ხატი დაზარალებულია (იქვე, №17239). ხელობა ლამაზია, მე-12-13 საუკ. ქვემოდ შერყვნილი წარწერაა:

ქ წო გ ო მეოხ ეყავ  
მოსავსა შენსა გ ოის (?)

უკანასკნელი სიტყვა წაბღალულია და მისი კითხვა საეჭვოა.

4. **პატარა ხატი იოანე ღვთის მეტყველისა**, სრულის ტანით წარმოდგენილი, ვერცხლისა, ნაჭედი, 10X7 სანტ. მოტლანქო ხელობისა; აშიები მოოქრულია და უკეთესი ხელობის არის (იქვე, №17239).

5. **ცული საომარი**, ფოლადისა, ოქროს ჭდეებით შემკობილი; ყურის თავში ორივე მხრით მხეცის გამოსახულობა არის, ვგონებ, ვეფხისა; სიმაღლე ცულისა 21 სანტ. განი ბოლოსი – 25 სანტ. ეს ცული საუცხოო რამაა თავის დარგში და მე პირველად მხვდება სვანეთში. ეს ეკლესიაში როდი აქვთ დაცული, არამედ დაკიდულია გარედ, კარების შესავალთან. გადმოღებულია დიდ ჯვართან ერთად (იხ. №17238). ტარი არა აქვს. ეს ცული უნდა იყოს ხელისუფალთა წინ სატარებელი.

6. **ბუკი ანუ საყვირი**, დიდი, სპილენძისა, ჩვეულებრივი.

მეორე ეკლესია სოფელ იელში არის **ეკლესია იოანე წინამორბედისა**. ეკლესია ძველია, ქვისაგან აშენებული, ჩვეულებრივი რიგისა. კანკელი ქვემოთ ქვისაგან არის აგებული, ზემოდ ხისაგან, სამი კამარით. ამ ეკლესიაში არის დაცული:

1. **ხატი მაცხოვრისა**, ოქროთი დაფერილი ვერცხლისა, ნაჭედი, 42X30 სანტ. დაზარალებულია (№17248). მაცხოვარი ტახტზე მჯდომარეა, ჩვეულებრივის პოზით და მუთაქით. ნიშბი დიდი ჯვარის სახისა; წარწერა სახელის ბერძნულია, მაგრამ ასო ორივე შემთხვევაში შებრუნებულია. ტახტი მოჩუქურთმებულია. აშიები ორმაგი ბროწეულის ყვავილების მსგავსად შემკობილი; ქვემოდ აშია მოძარცვულია. ზემო აშიაზე ვედრებაა წარმოდგენილი; მარჯვნივ და მარცხნივ ღვთის მშობელი და იოანე, სრულის ტანით. იოანეს ფიგურა მოშლილია. ხელობა ტლანქია მიბაძვა კარგი დროის ხატისა, მაგრამ არა მიზან-მიღწეული. მე-17 საუკ. უნდა იყოს.

2. **ხატი პატარა, ღვთის მშობლისა**, ჩჩვილეთი, წელსზევითი, ოქროსი, 14X11 სანტ. კარგი ხელობისა; წარწერა სახელისა ბერძნულია; ქვემოდ წარწერა აქვს (№ 17250):

ყლდ : წმდო : ღმრთს : მშბლო : და : მც

მეოხ ექმენ რატს ძითურთ, ამინ.

ესე იგი: ყოვლად წმიდაო ღმრთის მშობელო და მაცხოვარო, მეოხ ექმენ რატის ძითურთ, ამინ.

2ბ. ამავე ფოტოგრაფიაზე, ზემოდ, მარჯვნივ არის ხატი პატარა, ვერცხლისა, წელსზევითი წმიდანისა; სახელი არ უწერია; ხელები გულზე აქვს გაშლილი ვედრებისათვის. ხელობა კარგია.

3. **ხატი პატარა, ღვთის მშობლისა**, ჩჩვილეთი, 10X8 სანტ. ყოფილა ფერადის წამლით დახატული, მაგრამ ფერადები გადასულია; აშიები და ნიშბი ოქროსია,



წნული და ფრიად ლამაზი ხელობისა, მე-12-13 საუკ. ხოლო ქვემო აშია შემდეგი დროისაა, ლურსმული, ვერცხლისა. წარწერა სახელისა ბერძნულია. ამ ხატის მეორე გვერდის წარწერა ჩვენ ცალკე ვიპოვეთ, ოქროს ფირფიტაზე და იკითხება ასე:

ქ, ჯელთ ა	ჯელთა აღ-
ღვიპყრობ : შე	ვიპყრობ შენ-
ნდა მომართ წო : ღ-ღს	და მომართ წმიდაო ღმრთის
[მ]შუბელო (sic) და ჯელთა	(მ)შუბელო, და ჯელთა
შენთა : რლი გიტჯრთა	შენითა რომელი გიტჯრთა-
ვს : მსდა მიმართ მეჯხ	ვს მისდა მიმართ მეუხ(sic).
მეყავ : მამკობსა	მეყავ მამკობსა
შენსა : მჯეც	შენსა მჯეცის-
ის : ძესა :	ძესა .

4. **ხატი მაცხოვრისა 24X19 სანტ.** ყოფილა ფერადებით დახატული, მაგრამ ფერადები გადასულია. ნიშნი დიდი ბალახის მსგავსად შემკობილია; აშიები რომბ-ლურსმულია წთა მედალიონები ტლანქი ხელობისა (№17249). ქვემოდ მოსჩანს ნაშთი ხუცურის წარწერისა, რომელიც აღარ იკითხება.

5. **ხატი მაცხოვრისა, ტახტოსნისა, ვერცხლისა, 22X15 სანტ.** ბერძნული წარწერით სახელისა; აშიები ფოლაქებისა მსგავსად არის შემკობილი; ტლანქი ხელობისაა (იქვე, №17249).

6. **ხატი მთავარ ანგელოზ მიქაელისა, წ-ღ მქლ, ვერცხლისა, ნაჭედი, 21X16 სანტ.** მთავარ ანგელოზი სრულის ტანით არის წარმოდგენილი, ბიზანტიურ საკარო ტანისამოსში, ლაბარუმით და ბურთით; აშიები ლამაზი ბალახოვანი, მე-16 საუკ. უნდა იყოს, (იქვე, №17249).

7. **ხატი მთავარ ანგელოზ გაბრიელისა, ვერცხლისა, ნაჭედი, 22X18 სანტ.** ასეთივე ხელობისა და რიგისა, როგორც წინა ხატი (№17250).

8. **ხატი წა გიორგისა, ვერცხლისა, ნაჭედი, 24X19 სანტ.** წმიდანი ფეხოსანია, შუბით და ფარით. ეზო შემკობილია რომბ-ლურსმული მორთულობით; წარწერა: წ-ღ გ-ი. ტლანქი ხელობისაა (№17249).

9. პატარა ვერცხლის **ხატი ღვთის მშობლისა** ჩჩვილუდი, 11X8 სანტ. დაზიანებულია, მაგრამ არა ცუდი ხელობის ყოფილა (№17237).

10. პატარა **ხატი მთავარ ანგელოზ მიქაელისა, მ-ქლ, ვერცხლისა, ტლანქი ხელობისა.** ეს წინად ალბად ჯვარის ფირფიტას შეადგენდა (№17237). მეორე გვერდზე წარწერა აქვს, მაგრამ ეს ამ ხატს არ ეკუთვნის, არამედ სხვა წა გიორგის ხატს. წარწერა (იქვე, № 17237) იკითხება ასე:

ქ : წო : გი : ზღ                      წმიდაო გიორგი ზღუდ-

დრისა : მეო	რისაო, მეოხ
ხ : მქმნ : მკბსა	მექმენ მამკობსა
შნსა : ჯონა	შენსა ჯონარ-
რსი : ასათი	სი ასათი-
ანსა :	ანსა.

11. ხატი წამლით დახატული მაცხოვრისა, წარწერით: წ-დ იესო, სახარებით ხელში, რომელზედაც აწერია: მე ვარ ნათელი სოფლისა. . . ახალი ხელობა არის.

12. წამლით დახატული ხატი წა გიორგისა, 52X38 სანტ. დახატულია ხეზე; არა ცუდი ხელობისა, მე-18 საუკ.

13. პატარა, ღვთის მშობლის ხატი, ვერცხლისა, ნაჭედი, 11X9 სანტ. წარწერით: დ-დ ღ-ღ.

14. ვერცხლის ფირფიტა, რომელიც დიდი ჯვარის შესაძერწად ყოფილა გამზადებული და რომელზედაც წარმოდგენილნი არიან ფიგურები: მაცხოვრისა (სამი), ღვთის მშობლისა (ოთხი), წა გიორგისა და სხვა. ტლანქი ხელობისაა.

15. დოქი, ფართო, ლამაზი, სპილენძისა, 25 სანტ. სიმაღლით, ორის მოჩუქურთმებულის სახელურით და ვიწრო ყელით. ორივე მხრით შემკობილია ნაჭედი მორთულობით, სტილიზაციით მცენარეთა და შიგ მონავარდე ცხოველთა ფიგურებით. (№17251).

16. საგალობელნი, დასდებელნი და ძლისპირნი ღვთის მშობლისანი; ხელნაწერი ეტრატზე, მე-11 საუკ. ნაწერია ნუსხა ხუცურით. დაზიანებულია. დაცულია სულ 41 რვეული; რვეულში 8 ფურცელია. ტექსტი არ არის ერთის ხელით ნაწერი; მასში სულ ცოტა, ორი სხვა და სხვა ხელი გაირჩევა. ტექსტის ხელით მინაწერნი:

ღ-ბ ჰ-ნდა სამეზაო წ-ო ძალითა ქე-სითა განსრულდეს  
წელიწადისა თავნი.

წ-ნო მ-წმნო მეოხ ეყვენით ს-ლსა : მ-მისა : მქ-ლისა : და  
ს-ლსა : კე-სსა : და ს- ლსა : ძვანესა : და ს- ლსა ზ-ქრსა :  
წ-ე ღ-თისა : ა-ნ:.

მეორე ადგილას:

ს-ხლითა ღ-თისაძთა განსროვლდეს ძლისპირნი და ღ-თის  
მშობლისანი : წ-ო ღ-თის მშობელ მეოხ ეყავ სლსა  
მ-ქლისა სლსა კ-ესა . მოძღვართა და მზდელთა ჩემთასა.  
ქ-ე შე ს-ლი ზ-ქრსი მწერალისა ამ-ნ.

17. საგალობელნი, ხელნაწერი, 24X16 სნტ. ქაღალდზე; ნუსხა ხუცურით, ერთ სვეტად, თავი და ბოლო აკლია; ხელი მე-17 საუკუნის არის.

18. **ჟამის წირვა**, ხელნაწერი ქალაქში; თავი და ბოლო აკლია; ისედაც სულ დაშლილია; მე-18 საუკ.

შენიშვნა: ჩვენს დროში იელში მარტო ეს ხელნაწერები იყო, ხოლო აღ. ხახანაშვილი იქ ნახულ ხელნაწერებს ასე მოკლედ აღნიშნავს:

1) საგალობელნი ეტრატზე მე-13-14 საუკ. 2) ეტრატის გრაგნილი ჟამის წირვისა იმ განსხვავებით, რომ მასში არ არის: კათაკმეველნო უფლისა მიმართ ვილოცოთ, 3) კრებული ლოცვათა ნაკლულოვანი, პალიმფსესტი; ეტყობა აბონოსათვის (?), 4) სახარება ნაკლულოვანი, ეტრატზე in 8, მე-12 –13 საუკ. (იხ. ხახანაშვილი, გვ. 23).

მესამე ეკლესია იელის საზოგადოებისა არის **წმინდა კვირიკეს ეკლესია**. ეკლესია ნატეხი ქვითაა აშენებული, ჩვეულებრივია; აღმოსავლეთის კედელი ორი მოჭრილი ჯვარით და პასკებით არის შემკობილი. კანკელი ქვისაა, სამი კამარით. ამ ეკლესიაში ჩვენ ვნახეთ:

1. **დიდი ხის ჯვარი**, კანკელის წინ დამყარებული, ქვის კვარცხლბეკზე; შედგენილია ოქროთი დაფერილი ვერცხლის ფირფიტებით, კარგი ხელობისა. მათზე წარმოდგენილი არიან: ზემოდ მთავარ ანგელოზი და მაცხოვარი, სრულის ტანით; ქვემოდ: მთავარ ანგელოზნი, წელსზევითნი, და მოციქულნი; შემდეგ კიდევ: მთავარ ანგელოზნი და მოციქულნი და სხვა.

2. **ხატი მაცხოვრისა**, ოქროთ დაფერილი ვერცხლისა; ხელობა საკმაოდ კარგია, მაგრამ ერთობ დაზიანებულია.

მეოთხე ეკლესია იელის სოფლისა არის **ეკლესია მაცხოვრისა**. ეს შტატის ეკლესია არის. იგი თლილის ქვისაგან არის აშენებული, მაშინ როდესაც ყველა სხვა ეკლესიები ამ სოფლისა უბრალო, მოტეხილი ფილაქანის ქვისაგან არიან ნაშენნი. ბაზილიკური რიგისაა. წინეთ ჰქონებია ეკვტერები სამის მხრით, რომელნიც ეხლა სულ მოშლილია. საკურთხეველი გარედ გამოდის სამ დიდ წახნაგოვანად. შესავალი აქვს მარტო დასავლეთიდან; ფანჯარა აღმოსავლეთიდან და დასავლეთიდან. კანკელი ქვისაა, სამი დიდი კამარით. სვეტებს აღსავალი კარისას აქვს ოთხკუთხედი თავები. თითოეულ წახნაგში სვეტის თავისა არის ამოჭრილი ნახვრეტი და შიგ ჩასმული ხის სასანთლე. ეკლესია სულ მოხატული ყოფილა, მაგრამ მხატვრობიდან ბევრი აღარ დარჩენილა. საკურთხეველში კიდევ კარგად ემჩნევა მაცხოვარი და ეკლესიათა მამები. ეკლესიაში მოიპოვება:

1. **ხატი მაცხოვრისა**, ვერცხლისა, გამოხერვით განჭედილი, ლამაზი ხელობისა, 34X26 სანტ. (№172326). მაცხოვარი ტახტზე ზის მუთაქით, მარჯვენა ხელით აკურთხებს, მარცხენა დაუდვია სახარებაზე, რომელიც მარცხენა მუხლზე უძევს. ყდა სახარებისა ვარსკვლავის მსგავსად არის შემკობილი, ჯვარით შუაში. ტახტი მოჩუქურთმებულია. ნიშბი ჯვარის სახისა არის. წარწერა სახელისა: ქაო ქე. აშიები რომბ-ლურსმულია; მარცხენა და ქვემო ნაწილი მოძარცვულია; სხვებზე ოთხი მრგვალი მედალიონია. ზემოდ ვედრება, მარჯვენაზე ორი მოციქული. ხატი მე-14 საუკ. უნდა იყოს. ქვემოდ, ორივე მხარეს უწერია:

მოჭა  
ხატი

მოიჭედა  
ხატი

ესე	ესე
ჯეთა	ჯელითა
თე	თეოდორე
გლავას	გლავას-
მი-ა .	მისაფთა.

2. ხატი მაცხოვრისა, ოქროთი დაფერილი ვერცხლისა, ნაჭედი, უკეთესი ხელობისა, ვიდრე წინა ხატი, 27X17 სანტ. (იქვე, № 17226). მაცხოვარი ტახტზე ზის, მუთაქით, მაკურთხეველის მარჯვენით და სახარებით; წარწერა ბერძნული აქვს. ტახტი მოჩუქურთმებულია. კიდევ უფრო ლამაზად და ორიგინალურად მოჩუქურთმებულია აშიები, რომლებშიაც წთა მედალიონებია; ზემოდ ვედრებაა, მაგრამ, შუაში, მაცხოვრის მაგიერ ტახტის შემზადებაა წარმოდგენილი, წარწერით: ძ-ლი ჭ-ტი. (ეს ჯვარი ორივეს მხარეს სწერია). მარცხნივ: დ-ფ ღ-თსაჲ, ხოლო მარჯვნივ იოანე. ქვემოდ, შუაში წ-ა თე; მარჯვნივ ყოფილა წ-ი დ-ი, მაგრამ მოშლილია; აქეთ-იქით, გვერდებზე: პეტრე და პავლე: წ-ი პ-ე. ხატი უნდა იყოს მე-13-14 საუკუნისა.

3. ხატი კარედი ვედრებისა, 12,5X10 სანტ. სურათები ყოფილა წამლით დახატული, მაგრამ ეხლა მოშლილია; მორთულობა ოქროსია (№17240). კარებზე, გარედან წარმოდგენილნი არიან პეტრე და პავლე. შიგნით, შუაში მაცხოვარი წელსზევითი, ბერძნულის წარწერით, კარებზე, შიგნით: დედა ღთსა და ი-ნე ნათლისმცემელი. ეზო ბალახოვანი შემკობილობისა არის, არა უგვიანეს მე-15-16 საუკუნისა. მეორე გვერდზე წარწერა, ირგვლივ თორმეტ-ფრთიანი ჯვარისა (№17252):

ქ მაცხოვარო და დედაო ღმ თისაო დ ნათლის მ ცე მლო წმდნო პეტრ ე დ პვლე მეოხ და მფარ ვლ მ ეყვ მმკბს შენა იო ვნს თუთსა შვ ლსა ჩმს ივნეს.	მაცხოვარო და დედაო ღმრთი- საო და ნათელის მცე- მელო, წმიდანო პეტ- რე და პავლე, მეოხ და მფარველ მე- ყავ მამკობსა შენსა იო- ვანეს, თუთასა, სვილ- სა ჩემსა ივანეს.
--	---

4. ხატი წ-სა ბარბარესი, ოქროთი დაფერილის ვერცხლისა, ნაჭედი, 17X14 სანტ. წმიდანი წარმოდგენილია წელს ზევით, ჯვარით მარჯვენა ხელში, სავედრებელად გამზადებულის მარცხენა ხელით; ნიმბის აქეთ-იქით წარწერაა: წ-ჲ ბ-ბრა. აშიები შემკობილია ბროწეულის ყვავილების მსგავსად და მედალიონებით, რომლებშიც წარმოდგენილნი არიან: ზემოდ ვედრება, აქეთ-იქით: წ-ჲ გ-ი, წ-ჲ დ-ი; დაბლა: კოზმან და დამიანე, და კიდევ ერთი წმიდანი. ყველა სურათები წელსზევითია და კარგად გამოხატული. არა უგვიანეს მე-14 საუკ. (№17240).

5. ხატი ღვთის მშობლისა ჩჩვილედ, ვერცხლისა, ნაჭედი, 1ხ14,5 სანტ. ღვთის მშობელი ტახტზე მჯდომარეა, დიდის ნიმბით. თავსაბური ღვთის მშობლისა

ჩამოგრძელებულია კისრამდის არა ჩვეულებრივად. ფიგურა მოტლანქოა. წარწერა დიდრონის ასოებით: წი დი სმლი(?)ქსი (= წმიდაი დადაი ღვთის მშობელი ქრისტესი). აშიები ბროწეულის ყვავილების მსგავსად არის შემკობილი და უძველესი უნდა იყოს ხატისა; თვით ხატი მე-16-17 საუკ. (№17223). მეორე გვერდზე რვა-ფრთიანი ჯვარის ირგვლივ წარწერაა (№17253):

ქ დედაო :	დედაო
ღმთის	ღმრთისა
აო : მეოხ დ .: მფრველ .:	ო, მეოხ და მფარველ
გექმნ: აბზგი	გუექმენ აბუგი-
ანსა : ნგრგს :მეულლესა : ჩე	ანსა ნაგარგის (?), მეულლესა ჩემ
მსა .: აღნათს დ შვილთა : ჩგ	სა აღნათს და შვილთა ჩვენ-
თა : ნან	თა ნან
... ირზ .	... ირზ .

6. ხატი ღვთის მშობლისა, ჩჩვილელი, ვერცხლისა; წარწერა სახელისა ბერძნულია; ტლანქი ხელობისაა.

7. საცეცხლური ბრინჯაოსი, ძველი, სირიული რიგისა; ზედ გამოქანდაკებულია სცენები სახარებიდან (№17227).

8. პატარა, ძველი ზარი (იქვე №17227).

9. ბრინჯაოს ცული, კელტის ტიპისა, დიდი; ამოღებულია უთუოდ ძველი საფლავიდან, (იქვე №17227).

### სოფელი ადიში.

სოფელ ადიშში, როგორც მოვიხსენიეთ, ჩვენ არ ვყოფილვართ, მაგრამ იქ ცნობილია ორი ეკლესია. ერთი მაცხოვრისა, შიგ სოფელში, მეორე წმიდის გიორგისა მაღლობზე, ამის მახლობლად, მდინარე ადიშ-ჭალის მაღალ კლდოვან ნაპირზედ. ბარტოლომეის აჩვენეს ნანგრევები ალექსანდრე მეფის ციხე-დაბარზისა და უთხრეს: ალექსანდრე მეფე ყოველ ზაფხულს მოდიოდა აქ, ჰკრებდა ბეგარას და მიდიოდა სხვა მის სამფლობელოებშიო. ეს სასახლე სხვა აქაურ ციხე-კომპებიდან მხოლოდ ფართო სარკმელებით განირჩევაო, – დასძენს ბარტოლომეი. საზოგადოთ, ბარტოლომეის სიტყვით, სვანებს შენახული აქვთ გარდმო ცემა მარტო ორს მეფეზე: თამარზე და ალექსანდრეზე. თამარით გამოსახავენ თავის კეთილდღეობას, ალექსანდრეთი – შევიწროებას. გრაფინია უვაროვისა უფრო გარკვევით ამბობს: „გადმოცემით, ამ ციხე-კომპში ცხოვრობდა კახეთის მეფე ალექსანდრეო, რომლის ქალი იგუმენიათ (დედათა მამასახლისად) იყო კალას კვირიკე და ივლიტას მონასტერში“-ო. (გვ. 38). თუ მართლა ამ ლეგენდას აქვს რაიმე რეალური საფუძველი, ეს უნდა ყოფილიყო კახეთის მეფე.

კახეთის მეფეზე ეს თქმულება გადაიტანეს ალბათ იმის გამო, რომ კახეთის მეფემ ალექსანდრე მეორემ გაამდიდრა სვანეთის ეკლესიები თავის შეწირული ზარებით. ერთ-ერთი ასეთი ზარი ადიშის ეკლესიაშიც მოიპოვება და მისი ასომთავრული წარწერა გადმოღებული აქვს ბარტოლომეის (იხ. ტაბ. III, №33) და იკითხება ასე:

„ჩვენ მეფემან პატრონმან ალექსანდრე  
შევსწირეთ სვანეთის ადიშის ტაძარს ზარი  
ესე ჩვენთვის სადღეგრძელოდ, გასამარჯვებე  
ლად და ცოდვათა ჩვენთა შესანდობელად, ამინ.“

თქმულება მეფის ასულის დედათა მონასტრის ილუმენიად ყოფნის შესახებ მართალი უნდა იყოს, ვინაიდან რამოდენიმე წარწერა იხსენიებს მონაზონს მეფის ასულს თეკლას (იხ. ზემოდ წვირმის მაცხოვრის ეკლესიის ნივთების აღწერა №8).

მაცხოვრის ეკლესიის დიდს კანკელის საწინავე ჯვარზე ადიშში ბარტოლომეის შეუნიშნავს და გადმოუღია ასომთავრული წარწერა (იხილე ტაბ. III, №32), მაგრამ მეორე სტრიქონი წარწერისა ვერ არის ჯეროვანად გადმოღებული, ყოველ შემთხვევაში, ბროსეს წაკითხვა ამ სტრიქონისა მცდარია (იქვე, ბარტოლომეი, გვ. 233, №13). ჩვენ ამ წარწერას შეუმოკლებლად ასე ვკითხულობთ:

„ქ. წმიდაო თევდორე, მეოჯ ეყავ წინაშე  
ქრისტესა ლიპარტიანის ძესა, ამინ.“

ერთს დაზიანებულს წარწერაში სოფელ ცხუმარის ეკლესიისა, რომელიც აღწერილია ჩვენს მიერ, მე-5 ნომრით ხსენებული ეკლესიის ნივთებისა, იხსენიება ოქრო-მჭედელი გიორგი ლიპარტის ძე. იქნებ, იგივე ოქრომჭედელი იხსენიებოდეს ამ წარწერაშიც.

გრაფინია უვაროვისა უჩვენებს ადიშის მაცხოვრის ეკლესიაში, გარდა ამ ჯვარისა, ზარისა და ცნობილის ადიშის სახარებისა, ორს ნაჭედს ხატს მაცხოვრისას, ნაკლები ღირსებისა, ვედრების ღვთის მშობლის ხატს, წამლით დახატულს, მაგრამ ფერადებ გადასულს, მშვენიერის ოქროს მორთულობით და წმიდათა ფიგურებით აშიებზე, და სანახევროდ დაკარგულის ნაჭედის წარწერით. ამას გარდა იქ ყოფილა კიდევ სამი, წამლით დახატული ხატი უვარგისი ხელობისა (იხ. უვაროვისა, გვ. 174). სამწუხაროდ, არც ერთი ხატის სურათი მას არ მოჰყავს. და არც ის ვიცით, რას შეიცავს ის ნაკლები წარწერა ღვთის მშობლის ხატისა. განსვენებულს გიორგი ნიკოლაძეს ჰქონდა, როგორც ვიცით, გადმოღებული ეს ხატები, მაგრამ ჩვენ მისი ფოტოგრაფიები არა გვაქვს.

### სოფელი ნაკიფარი.

ნაკიფარი იელის ქვემოთ ძევს, მაღლობზე გაშენებული და ერთი საუკეთესო სოფელია ივარის თემისა. აქ არის კანცელარია და სკოლა. ძველი ეკლესიაც ამ სოფლისა, რომლის ირგვლივ გაშენებულია სოფელი, ერთი საუკეთესოთაგანია სვანეთში. საზოგადო სახე ამ სოფლისა და მის გვერდით მდებარე ბოგრემისა კარგად მოსჩანს ჩვენს ფოტოგრაფიებზე, რომელნიც სოფელ წვირმიდან არიან გადაღებულნი (იხილ. №17475 და 17483). ახლობელი სახე ორი კომპისა და სხვა შენობათა იხ. ფოტ. № 17483. ამ ფოტოგრაფიაზე მოსჩანს აგრეთვე ახალი გუმბათიანი მონასტერი,

გაშენებული ბერი თეოფანეს მიერ, ზემოდ, ტყით შემოსილ მთაზე, პირისპირ ამ სოფლისა; ბერი თეოფანე ჩემი მოგზაურობის დროს კიდევ ცოცხალი იყო, ხოლო სულ დასაპყრებული.

ეკლესია ნაკიპარისა წმიდის გიორგის სახელზეა აშენებული თლილის ქვისაგან (№17482). ეს არის ჩვეულებრივი სვანური ბაზილიკის რიგის ეკლესია, რომელსაც სამი მხრით მიშენებული აქვს ეკვტერები. ეკვტერები გაერთიანებული არიან და ახდენენ შთაბეჭდილებას გალერეისა, რომელიც ეკლესიას უვლის სამხრეთით, დასავლეთით და ჩრდილოეთით. შესავალი აქვს ეკლესიას და ეკვტერებს დასავლეთით და სამხრეთით; ფანჯრები, თითო აღმოსავლეთით, დასავლეთით და სამხრეთით. (გეგმა მისი იხ. გრ. უვაროვისა, გვ. 68).

გრაფინია უვაროვის აზრით, ჩრდილოეთის ეკვტერი შემდეგ არის მიშენებული. ჩვენი აზრით, ყველა ეკვტერები ერთად არის მიშენებული, მაგრამ დიდი ხნის შემდეგ ეკლესიის აშენებისა. ნათალი ქვები ეკლესიისა უკეთესია, ვიდრე ეკვტერებისა. ამას გარდა, აღმოსავლეთით ეკვტერებს არავითარი შემკობილობა არა აქვს, ხოლო თვით ეკლესიის აღმოსავლეთის კედელი არა მომრგვალებით, არამედ ბრტყლად გამოსული გარედ, არის შემკობილი, თუმცა არა მდიდრულად. ეს კედელი ოთხი ფართო პილიასტრის საშუალებით, რომელნიც საძირკვლამდის არ ჩამოდიან, გაყოფილია სამ კამარად. შუა კამარაში ვიწრო ფანჯარაა; მის ზემოდ ირმის თავის ქანდაკებაა; მარცხენა კამარაში არის სახეები ლომისა ან ვეფხისა და ცხვრის თავი; ზემოდ, კარნიზი ეკლესიისა შემკობილია წამლით დახატული წმიდათა თავების ფიგურებით. ნიშნები ამ თავების გრაფ. უვაროვისას მიუღია ვარსკვლავის მსგავს შემკობილებად კარნიზისა (გვ. 68). წამლით დახატული ფიგურებით წმიდათა არა თუ ამ მხარეს არის, არამედ ყველა მხარეს ეკლესიისა, ზემო ნაწილში, სახურავის ქვეშ. სახე ეკლესიისა იხ. ფოტ. №17482 და უვაროვისა ტაბ. XIV, 24. ეკლესია დახურულია ყავრით.

კანკელი ქვისაა, მაღალი, სამი კამარით და ოთხი მისი პატარა სვეტით; სვეტის თავები ლამაზებია. თალი ეკლესიისა დამყარებულია ორ სარტყელზე; ამათში ერთი დიდია, მეორე პატარა და ეს უწევს მარტო თალის დასაწყისამდის.

შიგნით კედლები სულ მოხატული ყოფილა; ეხლა მხატვრობა დაზიანებულია, მაგრამ საზოგადოთ, საკმაოდ დაცული.

საკურთხეველის კონქში კარგად მოსჩანს იესო ქრისტე, მშვენიერად მორთულ ტახტზე, წინამდგომებითურთ; ქვემოთ: ეკლესიის მამებია. დასავლეთის კედელზე არის სცენები წა გიორგის წვალებიდან, ურმის თვალზე დაკვრა და სხვა, დიოკლეტიანე მეფის თანდასწრებით, რომელიც ტახტზე ზის. ჩრდილოეთის კედელზე ნათლისღებაა; მის ქვემოთ: წა გიორგი და წა თეოდორე, ცხენოსანნი. ეკლესიაში დაცულია:

1. ხატი წა გიორგისა, ოქროთი დაფერილი ვერცხლისა, ძლიერის გამობერვით ნაჭედი, 50X40,5 სანტ. (იხ. №17254). მთავარ მოწამე წარმოდგენილია ცხენით. ცხენი კარგი ჯიშისაა, მაგრამ მისი მორთულობა არ არის მდიდრული. თვით წა გიორგი მდიდრულად მორთულ ჯავშანშია, რომლის ზემოდ მოსასხამი აქვს. ეს მოსასხამი ფართოდ იშლება მის ზურგს უკან ჰაერში. ფეხზე მაღალი წალები აცვია. თმა ხუჭუჭებად აქვს დაყოფილი. წრე სიწმიდისა, თავის ირგვლივ, გრეხილიანია. მხედარი შუბით გმირავს დეოკლეტიანე მეფეს, რომლის ჩაცმულობა ისეთივეა,

როგორც წა გიორგისა, ხოლო მას მოსასხამი არა აქვს და თავზე ძვირფასი თვლებით შემკობილი გვირგვინი ახურავს არშაკიდთა მეფეების რიგისა. აქვე მიწაზე გამხვართულ მეფესთან ძევს მისი მრგვალი ფარი და მოგრძო ხმალი, რომელიც ხელიდან გავარდნია. მეფის თავთან წარწერაა:

დეოკლიტი / ანე : მეფე : / უმჯულო .

მეფის ზემოდ მეორე წარწერა:

ქ მოიჭედა : ხატი : ესე : წიდისა : გ<sup>-</sup>დასა : იფარისა : ჩმ

გნ : მარუშის : მიერ : სალოცველად : და : სახსრა

დ : სლისა : ჩემსა : დღესა : მას : განკითხვისასა :

ჩემითა ოქროითა : და : ვერცხლი

თა : –

დეოკლიტიანეს ფეხების ქვემოდ გაგრძელება ამ წარწერისა :

ჯელითა : / ასან / : ოქრო / მჭედლისაი / თა .:

ფართო აშიები გარშემო შემკობილია ბალახოვანი მორთულობით და მრგვალი მედალიონებით წმიდათა ზემოდ: მაცხოვარი მთავარ ანგელოზებითურთ; ქვემოდ: წ<sup>-</sup>ე დიმიტრი, წ<sup>-</sup>ე თე, წ<sup>-</sup>ე კე (კვირიკე); აქეთ-იქით: წ<sup>-</sup>ე ბასილი, წ<sup>-</sup>ე გრიგოლი. ხელობა მედალიონებისა და აშიებისა ვერ არის მაინცდამაინც ლამაზი. ხატი უნდა ეკუთვნოდეს მე-14 საუკუნეს.

2. **ხატი წა გიორგისა**, ოქროთი დაფერილი ვერცხლისა, ნაჭედი, 41X33,5 სანტ. წა გიორგი ცხენით არის წარმოდგენილი, ისეთივე ჩაცმულობით, როგორც წინა ხატი, შუბით გამირავს გვირგვინოსანს, რომლის ფეხებისაკენ ფარი ძევს. ხელობა ტლანქია; დაცულიც ცუდათ არის; ქვემო და ზემო აშია აკლია; მარჯვენა აშის ცოტა ზემო ნაწილია დარჩენილი; პირის სახე გიორგისა და ქვემო ნაწილი ხატისა მოწყვეტილია; მარცხენა დაცულია. აშია ბალახოვანია და მასში ერთი მედალიონია წმიდანისა, ტლანქი. ასეთივეა ზემოდ კუთხეში მთავარ ანგელოზის მედალიონიც. წარწერა სახელისა: წ<sup>-</sup>ე გ<sup>-</sup>ი. ქვემოდ ვულგარული ხუცურით სწერია:

მოიჭედა : ჯელითა : ასნ : გელოსით[ა]

ესე იგი: „მოიჭედა ხელითა ასან გელოვანისითა“. რასაკვირველია, ეს ის ასანი არ არის, რომელიც წინა ხატის წარწერაში იხსენიება, მაგრამ უეჭველია, ეს ხატი წინა ხატის მიბადვით არის განჭედილი, ხელოვნების დაცემის ხანაში. ხატი მე-17 საუკუნის უნდა იყოს. (№17256).

3. **ხატი წა გიორგისა**, ოქროთი დაფერილი ვერცხლისა. ნაჭედი, 56,5X43,5 სანტ. ქვემო ნაწილზე ხატისა წარმოდგენილია მთავარ მოწამე ცხენით, რომელიც კაცს გამირავს შუბით. ზემოდ ვედრებაა სამს მედალიონში განაწილებული; მოგრძო და ზემოთ მომრგვალებულ მედალიონში: ქრისტე წელსზევითი, წარწერით: ი<sup>-</sup>ჰ ქე. აქეთ-იქით, მრგვალ მედალიონებში: ღვთის მშობელი და იოანე ნათლის მცემელი, წარწერებით: ქ დდ<sup>-</sup>ე ლ<sup>-</sup>ე წ<sup>-</sup>ე ნე. აშიები ბალახოვანი შემკობილობით არის მოცული, ტლანქი ფიგურები წმიდათა; მათ შორის სამი ფიგურა მაცხოვრისა არის, ტახტოსანი; ხუთი წმიდათა მხედართა; ქვემო აშია აკლია; ქვემოდ: ვულგარული ხუცურით ვკითხულობთ:



წო გ-დ იფარსო                      წმიდაო გიორგი იფარისაო,  
შე ფაჯნ                                    შეიწყალე ფარიჯანიანი (?)  
და მეფენდ ან.                            და მეფენი. ამინ.

ხელობა ტლანქია და უნდა ეკუთვნოდეს მე-17-18 საუკუნეს (№17258).

4. ხატი წა გიორგისა, ოქროთი დაფერილი ვერცხლისა, ნაჭედი, 55,5X43 სანტ. წმიდანი ფეხოსანია. სრულის ტანით, აბჯართ და მოსასხამით; მარჯვენა ხელში შუბი უჭირავს, მარცხენა ფარზე დაუდვია. თმები ხუჭუჭებად აქვს დაწყობილი; წრე თავისა დიდია, გრეხილიანი, წარწერა: წ-დ გ-დ აშიები ფართოა, რომბ-ლურსმული, ოთხკუთხედი მედალიონებით წმიდათა. ზემოდ ვედრება; აქეთ-იქით: წ-დ პვლე, წ-დ მათე; ქვემოდ: წ-დ ანდრია, წ-დ პეტრე და წ-დ მარკოზ. ქვემოდ კიდევ წარწერაა:

წ-დ : გ-დ მეკეყა                      წმიდაო გიორგი, მეოხ ეყა-  
ვი : სულსა : ბედ                      ვი სულსა ბე-  
ანისასა                                    დანისასა

(დ. ბაქრაძე, გვ. 112).

ბედანი ანუ ბედიანი დადიანების სახელია და გვხვდება მე-13 საუკ. წარწერებში, მაგრამ ხელობა ხატისა უფრო გვიანია. ამიტომ შესაძლოა აქ საუბარი იყოს იმ ბედანზე ანუ ბედიანზე, რომელიც მოხსენებულია როგორც მეფე მეგრელიისა ტრაპიზონის იმპერატორის დავითის წერილში 1495 წლისა ბურგუნდიის დუკის მიმართ (Brosset, Additions, p. 408).

ხატი უნდა ეკუთვნოდეს მე-15 საუკ. (№17257).

5. ხატი მაცხოვრისა, ვერცხლისა, ნაჭედი, 50X43 სანტ. მაცხოვარი წარმოდგენილია წელსზევით. მაკურთხეველის მარჯვენით და სახარებით მარცხენა ხელში. დიდი ჯვარის სახე ნიშნი მოჩუქურთმებულია. ეზო ვაზოვანის მორთულობით არის შემკობილი. აშიები ორმაგი, ბროწეულის ყვავილების მსგავსად მოკაზმული, შემკობილია რვა ტლანქი ხელობის მრგვალი მედალიონით წმიდათა. წარწერა სახელისა: დ-ჰ კ-ქ-ე. ხატი უნდა ეკუთვნოდეს მე-15 საუკუნეს. (№17255).

6. ხატი მთავარ ანგელოზ მიქაელისა, წელსზევითი, ვერცხლით ნაჭედი, 17X14 სანტ. მთავარ ანგელოზი წარმოდგენილია საზომით მარჯვენა ხელში და ბურთით მარცხენაში; წარწერა: წ-დ მ-ქლ. აშიები ტალღისებური ბალახით და ფოლაქოვანი შემკობილობით არის მორთული. ზემო აშიაზე სწერია:

ქ. მთვრნგელზ : მეზრდსა. . .  
ქვემოდ მეორე წარწერაა:  
ქ. წო მთავარანგელოზ : მეზრდსა. შეენდენ  
ბერსა : გულბანსა : ამნ.

ესე იგი: „წმიდაო მთავარ ანგელოზო მეზრისა, შევუნდვენ ბერსა გულბანსა (ანუ გულბიანსა), ამინ“. დ. ბაქრაძეს (გვ. 112). ვერ გაურჩევია სიტყვა „მეზრისა“. ხატი მე-15-16 საუკ. უნდა იყოს. (№17259).

7. ხატი მთავარ ანგელოზ მიქაელისა, ვერცხლით ნაჭედი, 27X21 სანტ. წარწერით: ქ წი მ ქლ. მთავარ ანგელოზი წელსზევითია, ვერცხლის ფირფიტაზე წარმოდგენილი, საზომით და ბურთით; ნიმში დიდი აქვს (№17259). ხელობა სუსტია, მე-16-17 ს.

8. ოქროთი დაფერილი ფირფიტა მაცხოვრის გამოხატულობით ტახტზე და წარწერით: დ ჳ ქ ზ. 22X18,5 სანტ. მაცხოვარი ფოლაქოვან წრეშია; ეზო სიმრგვალებით არის შემკობილი და აშიები ნახევარი სიმრგვალებით. (№17259). ფრიად ტლანქი ხელობისაა, მე-18-19 საუკ.

9. სრულიად ასეთივე ფირფიტა, მაგრამ უფრო პატარა, 17,5X10,5 სანტ. (იქვე, №17259).

10. ვერცხლის პატარ ხატი მთავარ ანგელოზისა, 14X10,5 სანტ. ტლანქი ხელობისა, (იქვე, № 17259).

11. ხატი წა პავლესი, ვერცხლისა, 15X5 სანტ. წარწერით: წ-ღ პ-ლე. წმიდანი სრულის ტანით არის წარმოდგენილი და ნიმშით. მე-17 საუკ. უნდა იყოს, (იქვე, № 17259).

12. პატარა ხატი იესო ქრისტესი, რომელსაც ადამი გამოჰყავს ჯოჯოხეთიდან, 5X5 სანტ. კალიდან არის გაკეთებული; ტლანქი ხელობისაა (იქვე, №17259).

13. პერანგი პატარა ხატისა, წა ბარბარესი, ვერცხლისა, შემკობილია რვა ძვირფასი ქვით და ლამაზის ბროწეულის ყვავილების მსგავსი აშიებით, 23X18 სანტ. მე-13-14 საუკუნისა.

14. სამი დიდი, წამლით დახატული ხატი, ახალი და ტლანქი ადგილობრივი ხელობისა; მაგალითად: წა გიორგის ხატი ფიცარზე დახატული, ახალგაზრდა ქალურის სახით და დიდრონის თვალებით, მისამჩნევი იქნებოდა ჩვენთვის ღვთის მშობლის ხატად, რომ არ ეწეროს: წ-ღ გ-ი.

15. თასი ოქროსი, პატარა, 10 სანტ. დიამეტრისა; სრულიად სადაა.

16. ათი ვერცხლის, სულ სადა თასი.

17. ორი ვერცხლის სასმისი (კოვში); ერთი მსხალის მსგავსი სახეებით არის შემკობილი.

18. ვერცხლის თასი, შემკობილია ზარნიშოანი სახეებით, ზამზახის მსგავსად.

19. ვერცხლის ლამბაქი, მხედრულის წარწერით:

ქ . ეს : ნალბაქი :. გდებუაძი : ქალის : მარიამის : არის :

შენიშვნა: 1874 წლის მოკლე აღწერილობაში ამ ეკლესიის ჭურჭელი ასეა აღწერილი:

ოქროს თასი 39 1/2 მისხალი.  
ოთხი ვერცხლის და ფარის ძეწკვები 5 გირვანქა.  
ჯამთასი 1 გირვანქა და 17 მისხალი.  
ყურიანი ჯამი 93 მისხალი.  
ყურიანი ბადია 85 მისხალი.  
ბადია 75 მისხალი.  
ბადია 73 მისხალი.  
ჯამთასი 54 მისხალი.  
თასი 48 მისხალი.  
ჯამთასი 44 მისხალი.  
ჯამთასი 44 მისხალი.  
ნალბაქი 42 მისხალი.  
ჯამთასი 39 მისხალი.  
თასი 35 მისხალი.  
თასი 32 მისხალი.  
ჯამთასი 31 მისხალი.

20. დ. ბაქრაძე (გვ. 111) და გრაფ. უვაროვისა (გვ. 172) უჩვენებენ ამ ეკლესიის სიაში კიდევ პატარა ოქროს ხატს **წ. გიორგისა**, რომელიც წამლით დახატული ყოფილა, მხოლოდ დარჩენილა ნაწილი შესამოსელისა, წარწერით: წ-ე გ-ი ზღდრ. და მეორე გვერდის ვერცხლის ფირფიტაზე ყოფილა წარწერა:

ქ. ქო : გ-ი : ზღდრისაო  
მეოხ დ მფრველ  
გვემენ : მოსავს  
ა : მმკობსა : ხატსა  
[შ]ნისასა : ჩენ : მო  
[სა]ვთა : შენთა  
[დ]დღესა : მას : გნ  
[კი]თხვისასა : ამნ

ფრჩხილების ასოები ჩვენგან არის მიმატებული. სწორედ სრულიად ასეთი პატარა ოქროს ხატი წმიდის გიორგისა, დაზარალებული და ასეთივე წარწერით ჩვენ ვიპოვეთ წვირმის მაცხოვრის ეკლესიაში, ხოლო იქ წარწერაში სახელი და გვარიც არის მოხსენებული ხატის შემკობელისა: აწას მე ბიბილი (იხ. ზემოდ: წვირმის ხატების აღწერილობა, №14).

21. დ. ბაქრაძე იხენიებს კიდევ წარწერას ჯვარზე, რომელიც მას გადმოუღია ხელით, მაგრამ არ იკითხება (იხ. გვ. 111, დამატება № 35).

22. კონდაკი ქალაღზე, ნუსხა ხუცურის ხელით დაწერილი, მე-17 საუკუნისა.

23. მეორე კონდაკი, აგრეთვე ქალაქში დაწერილი ნუსხა ხუცურით, მე-16 საუკუნისა; თავი და ბოლო აკლია.

24. გალობანი წი-სა ღვთის მშობლისანი, ეტრატზე დაწერილი ნუსხა ხუცურით; თავი და ბოლო აკლია; სულ გაფუჭებულია.

25. ბარტოლომეიმ ამ ეკლესიაში ნახა ოქროს ხატი ვედრების ღვთის მშობლისა. ბერძნულის წარწერით ზურგზე და ეს წარწერა გადმოიღო (იხ. გვ. 172, ტაბ. I, №12, დამატება II, გვ. 226-227). გრაფ. უვაროვისამ ეს ხატი ნახა ბერ თეოფანესთან, რომელსაც ეს ხატი და ზოგი სხვებიც წაეღო ნაკიპარის ეკლესიიდან (უვაროვისა, გვ. 109). ხატი ლამაზი ნახელავი ყოფილა, შემკობილი მარგალიტებით. ბერძნული წარწერა სხოლასტიკურის ენითაა დაწერილი; ბარტოლომეის თარგმანში გამოდის, თითქოს შემკობელი ხატისა იყოს ვიღაც მარიამი (გვ. 173, 227), მაგრამ პამიალოვსკის წაკითხვით, რომელიც გრაფ. უვაროვისას მოჰყავს (გვ. 109). ხატის შემკობელის სახელი სრულიად არ იხსენიება. მარიამში ღვთის მშობელი იგულისხმება და არა შემკობელი. ხატს ბარტოლომეი აკუთვნებს მე-14-15 საუკუნეს. აღსანიშნავია ღვთის მშობელის სახელი წარწერაში ქართულის ფორმით არის მოყვანილი: „მარიამ“ და არა ბერძნულის.

26. ამავე თეოფანესთან ყოფილა ხატი წა ბარბარესი, ნაზი ხელობისა. წმიდანი წარმოდგენილი ყოფილა წელსზევით, გამობერვით, ჯვართ ხელში. აშია შემკობილი ბროწეულის ყვავილების მსგავსად და რვა მედალიონით (გრაფ. უვაროვისა, გვ. 110).

მესამე ხატი, რომელიც ყოფილა თეოფანე ბერთან, არის მაცხოვრის ხატი, ხუთი ვერშოკი სიმაღლით, 3 1/2 ვერშოკი განით. როგორც ხატი, ისე აშიები კარგი ნახელავია. აშიებზე წარმოდგენილია მედალიონებში ფიგურები პეტრე და პავლესი; ზემოდ ტახტის გამზადება, ქვემოდ: წ-ა თეოდორე. თავის წრე შემკობილი ყოფილა ფირუზით. (უვაროვისა, გვ. 103).

თეოფანე ბერთან ამას გარდა, ა. ხახანაშვილის ცნობით (გვ. 22-23) ყოფილა შემდეგი ხელნაწერები:

1) ჟამნი ეტრატზე (?), 508 გვერდი, გადაწერილი 1755 წელს ტფილისში მღვდელ ნიკოლოზ ჩაჩიკაშვილის მიერ. 2) წმიდათა ცხოვრება, ქალაქში, მე-14-15 საუკ. სხვათა შორის აქ ყოფილა ცხოვრება პეტრე მაიუმელისა; ხელნაწერში იხსენიება ვიღაც გრიგოლი, ალბათ გადამწერი: „ცოდვილსა გრიგოლს შს ღწ“. აქ ყოფილა კიდევ აპოკრიფი „სარტყელისათვის ღ-ის მშობლისა აღწერილი მაქსიმე აღმსარებლის მიერ“. 3) სვინაქსარი, ქალაქში, მე-16 საუკ. მინაწერით: „ღო და წო მოწამეო, რანიც სვინაქსარში სწერია, მიეც ძლევა და დაუმორჩილნე მტერთა (?) მეფესა ალექსანდრეს“ (?). ა. ხახანაშვილის აზრით, აქ მოხსენებული ალექსანდრე კახეთის მეფეა, მაგრამ უფრო საფიქრებელია, აქ ერთ-ერთი იმერეთის ალექსანდრე მეფე იგულისხმებოდეს.

## მუჯალის თემი

ამ თემს შეადგენს სოფლები: ჩვაბიანი, ჟაბეში, ჩალდაში.

### სოფელი ჩვაბიანი.

ამ სოფლის საზოგადო სახე იხ. ფოტო №17469 და 17471. სოფელში ორი ეკლესია არის. ერთი მთავარ ანგელოზის მიქაელისა, ქვით ნაშენი, ჩვეულებრივი, რომელშიაც მოიპოვება:

1. ხატი წის ანდრიასი, წარწერით: წ-ა ანა, ოქროთი დაფერილი ვერცხლით ნაჭედი, 33X24 სანტ. დაზიანებულია; წმიდანი წარმოდგენილია ტახტზე მჯდომარედ, თუმცა ტახტი არ სჩანს; ამას ფარავს იგი თავის კორპუსით და ფართო მძიმე ტანისამოსით; მარცხენა ხელში ყდიანი სახარება უჭირავს, მარჯვენა წელზე უდვია. თავის ირგვლივ ორი ერთობ დიდი წრეა; წვერი კიკინებად აქვს დაყოფილი; გამოხატულობა ორიგინალურია. ნიშბი შემკობილი ყოფილა მარგალიტის მძივებით; ეხლა დარჩენილია ოთხი მარცვალი (№17180). ეზო ტლაქნი ფოთლოვანი მორთულობით არის შემკობილი. აშია არა აქვს. ხატი უნდა ეკუთვნოდეს მე-16-17 საუკუნეს.

2. წარწერა ვერცხლის ფირფიტაზე წა იოანე ნათლის მცემლის ხატისა. ეს წარწერა ჩვენ ცალკე ვიპოვნეთ ძველ სხვა და სხვა ნალექებში და წინა ხატის ქვემოთ მოვაქციეთ; გვეგონა ამის იყო, ერთის შეხედვით, მაგრამ შინაარსი უჩვენებს, რომ სხვა ხატი ყოფილა (№17180). წარწერა იკითხება ასე:

[სი]ნანულისა : ჯა : მქადაგებელო : ნთლი[ს]  
მცელო : ქესო . მეოხ ექმენ : სასოებთ : მვედრებელ[სა]  
თქს : ფუთუთას : გრყნ-სა : და ძეთა : მისთა : ა-[ნ].  
ასო ო და უ წარწერაში ერთგვარად არის დაწერილი.  
უქარაგმოდ:

„სინანულისა ჯმისა მქადაგებელო, ნათლის მცემელო ქრისტესო, მეოხ ექმენ სასოებით მვედრებელსა თქუენსა ფუთუთას გარაყანსა და ძეთა მისთა, ამინ“.

შეადარე დ. ბაქრაძე, გვ. 107.

3. პატარა ოქროს ხატი წს გიორგისა, 8, 5X7 სანტ. წამლით დახატული ყოფილა, მაგრამ წამალი გადასულია, დარჩენილია შემოსილობა და აშიები ნაზი, ლამაზი ნახელავი. შესამოსელის პირები მარგალიტის მძივებით ყოფილა შემკობილი (№ 17178); მეორე გვერდზე წარწერაა (№17179):

წო გი : გურგე	წმიდაო გიორგი გურგე-
ნეულ-სო მეზხ და	ნეულისაო, მეუხ და
მფრველ გუეყ	მფარველ გუეყავ
ვ მოსავსა : შენ	მოსავსა შენ-
სა : გ-ის და ნ	სა გიორგის და ნი-
კლოზს	კლოზს.

4. **ხატი ღვთის მშობლისა;** წინა პირიდან მარტო შიშველი ფიცარია დაცული; მეორე გვერდის ვერცხლის ფირფიტაზე, 10,7X5 სანტ. წარწერა (№17179) უცნობი:

ვედრებისა : ღმთ	ვედრებისა ღმრ-
[ის მშო]ბელო : მეოხ დ მ	თის მშობელო, მეოხ და
ფრვლ მეყვ მსავსა :	მფარველ მეყავ მოსავსა
[შ]ნსა :დაღნდრიძე	შენსა დაღნდრიძე-
[სა] გელსა : და მეულ	სა გელასა და მეულ-
[ლე]სა : ჩემსა ; ქულსა : და შ	ლესა ჩემსა ქულსა და
[ვილ]თა : ჩენტა : ამნ.	შვილთა ჩვენთა, ამინ.

5. პატარა **ჯვარცმის ხატი**, ოქროთი დაფერილი ვერცხლისა, (№17178), 11,5X10, 5 სანტ. კარგი ხელობისა, მაგრამ სანახევროდ მოშლილი. ჯვარცმიდან მარტო ფეხები და მარჯვენა ხელია დარჩენილი და წინამდგომი ღვთის მშობელი. ზემოდ უწერია:

იესო [ქრი]სტე მეკვ[ე ჰურ]თა. ქვემო აშიაზე : ჯრცმთა :  
შნთა : [მოიხსე]ნე სლი ჩმ. ესე იგი: „ჯვარცმათა შენთა მოიხსენე სული ჩემი“.

6. პატარა **ხატი წა გიორგისა**, 11X8,5 სანტ. ლამაზი ხელობისა, მაგრამ წინა პირი მოშლილია. დარჩენილია ნიშბი და აშიები წარწერა: წი გი მრვლ სწლთ მომქმედი. (№ 17175)

7. **ხატი მაცხოვრისა**, ვერცხლით ნაჭედი, 25X17 სანტ. მაცხოვარი ტახტოსანია, სახარებით და მაკურთხველის მარჯვენით (№17178); ნიშბი ჯვარის სახედ აქვს. წარწერა ბერძნული. აშიები ორ ფოლაქოვან წრეებს შორის დაყოფილია უჯრედებად. მე-16-17 საუკ. უნდა ეკუთვნოდეს.

8. **ხატი მაცხოვრისა**, ვერცხლით ნაჭედი, 19X15 სანტ. მაცხოვარი წელსზევითია, ჩვეულებრივი ნიშნებით და წარწერით: იო ქრტე (№17178). მის ქვემოდ, მედალიონში სხვა წმიდანია; წარწერა არა აქვს. ხელობა ტლანქია, მე-18 საუკუნისა.

9. **ჯვარი გამოსასვენებელი**, ვერცხლისა, ნაჭედი, 32X21 სანტ. წინა პირზე ჯვარცმაა წარწერით: იო ქე. ფრთების ბოლოში მედალიონები წმიდათა უწარწეროდ; ზემოდ: წა გიორგი, ცხენით (№17179). ხელობა ტლანქია, მე-18-19 საუკ. მეორე მხარს ვერცხლი მოძარცულია.

10. ვერცხლის სამი პატარა **ხატი ღვთის მშობლისა** ჩხვილედი, წელსზევითი, (№ 17175). ერთ მათგანს აწერია სახელი ბერძნულად. ხელობა ტლანქია. მეორე გვერდზე ჯვარია წერტილებით გამოხატული და ვულგარული მხედრული წარწერა, ძნელი გასარჩევია (№17179).

11. დ. ბაქრაძეს უნახავს ზურგი მოცილებული წმიდის გიორგის ხატისა (გვ. 107), წარწერით (მოგვეყავს შეუმოკლებლად):

წმიდაო გიორგი მსუჯუნისაო (sic), მეოხ ექმენი მოჩსა (sic) (უნდა იყოს: მოსავსა) შენსა ჯალვს (ჯალვას).

12. დიდი ხის ჯვარი, კანკელის წინ დასადგმელი; ეხლა სულ გაშიშვლებულია, მაგრამ ზოგი მისი ვერცხლის ფირფიტები ჩვენ ვიპოვნეთ სხვა და სხვა ნამტვრევებში და გადმოვიღეთ ერთად. იხ. ფოტ. №17176. ამათში ერთი მთავარ ანგელოზის გაბრიელის ფიგურა მარჯვენა მხარეს, ქვემოდ, საუცხოო ნაზი და ლამაზი ხელობის არის, მე-12 საუკუნისა, წარწერით: წ-ა გბ-რლ. ეს სამჯერ არის განმეორებული ზემოდ და ქვემოდ. ზემო და ქვემო აშიები საუცხოო ნახელავია ორმაგის ბროწეულის ყვავილების მსგავსი ორნამენტით შემკობილი.

სხვა ფირფიტები ამაზე ნაკლებია ხელობით და ზოგი კიდევ ტლანქია. ამათ შორის უკეთეს შთაბეჭდილებას ახდენს ორი წელზევითი გამოხატულობა მთავარ ანგელოზთა, სრულიად ერთგვარი (მარჯვნივ ზემოდ), წარწერებით: წ-ა მიქლ, წ-ა გბ-ლ; განყოფილი არიან ყვავილებით ჯვარის სახედ.

ამას გარდა კიდევ ორი მაცხოვრის სახეა სრულის ტანით წარმოდგენილი, წარწერებით: იჰ ქე.

ერთი მაცხოვარი (შუაში, ზემოდ) ტახტზე მჯდომარეა. ბერძნულის წარწერით სახელისა; სუსტი ხელობისაა. ერთი წ-ა გიორგი სრულის ტანით, შუბით და ფარით; ორი მთავარ ანგელოზი ქვემოდ, მარცხნივ, ფრიად ტლანქი და მათ ქვემოდ: წ-ა გიორგი ცხენით, ადამიანს გმირავს.

13. ხის შანდალ-კანდელი. ამას საფუძვლად უძევს ოთხკუთხედი ფიცარი, ოთხკუთხედი სვეტით შუაში, რომელზედაც ჯვარის სახედ გადადიან კამარები. ოთხივე მხარეს ფიცარს კიდევ მიმაგრებული აქვს ხის შტოები. ყოველა ეს ნაწილები კანდელისა მოხატულია და შემკობილი ჩაჭრილი შემკობილობით; ძირითადი ოთხკუთხედის ფიცრის მორთულობა და მოხატულობა კარგად ჩანს მეორე ჩვენს ნიმუშზე. იხ. ფოტ. №17174. ზემოდ, შუაში და ყოველ მხრეს თითქო ხის შტოებზე მიმაგრებულია ხისავე ქანდაკებანი მტრედთა. სულ 15 მტრედი უნდა ყოფილიყო, მაგრამ დაცულია მხოლოდ შვიდი. დ. ბაქრაძე ამ ნივთს გალიად იხსენიებს, მაგრამ ეს შანდალ-კანდელია და ჩამოკიდებულია საზოგადოთ კანკელის წინ. ასი წლის მღვდელმა მარგიანმა, წინეთ პაპად ნამყოფმა, გადმომცა, რომ ნათლის დების დღეს ეს კანდელი იორდანზე მიაქვთ და უამისოდ შეუძლებელია წყლის კურთხევა. მთელი ასეთი კანდელი მე ვერსად ვნახე, მაგრამ ამ მათი ნაწილები და ნაკლული ცალები ბევრ სვანეთის ეკლესიაშია. ჩვენი ცალი ერთი საუკეთესო ნიმუშია; ამათზე მიაწებებდენ ხოლმე თაფლის სანთლებს, ხან პატარა ფიალებს შემოსდგამდენ ზეთით და ამიტომ ვეძახით შანდალ-კანდელებს (იხ. ფოტ. (№17181).

#### 4. ხის ყუთი, ოქროთი დაფერილი ვერცხლის შემკობილობით (№7175).

მეორე ეკლესია ჩვაბიანის სოფლისა არის ძველი ეკლესია, თლილის ქვისაგან ნაშენი მაცხოვრისა. ეს არის მოდიდო ეკლესია ბაზილიკურის რიგისა, რომელსაც ეკვტერები ჰქონია სამივე მხარეს; სახე ამისა იხ. ფოტო №17470 და №17465. ჩრდილოეთის ეკვტერი მოუშლიათ და ამ მხარეს ეხლა აუშენებიათ ახალი სამრეკლო. შესავალი სამი აქვს, სამი ეკვტერის მიხედვით; სამხრეთის შესავალი რამოდენიმედ ზემოდ შემკობილია, იხ. ფოტო. №17464. ფანჯრები ხუთია, ორი სამხრეთით და თითო სხვა კედრით. შიგნით ეკლესია მოხატული ყოფილა, მაგრამ მხატვრობა სულ

გაფუჭებულია და გამჭვარტლული; საკმაოდ კარგად ემჩნევა მხოლოდ საკურთხეველის კონქში მაცხოვრის ფრესკა მოციქულებითურთ. კანკელი ძველია, ქვისა, ხუთი კამარით. ეს ეკლესია საყურადღებოა მასში დაცული მოხარატული ხის ავეჯით. აქ ჩვენ ვნახეთ:

1. **ხატი, დიდი**, წამლით დახატული, **ღვთის მშობლისა**, 80X62 სანტ. არა ცუდი ნახელავი, მაგრამ გაფუჭებული. არც ისე მაინცდამაინც ძველია.

2. სამი **სავარძელი**, მოჩუქურთმებული ხისა (სვანური „საკურცხილ“). ერთი: იხ. ფოტ. №17174. მეორე და მესამე: №17177, ზემოდ, მარჯვნივ და მარცხნივ. ესენი რამოდენიმედ განსხვავდებიან იმათგან, რომელთ სურათები გ. ჩიტაიას მოჰყავს თავის სტატიაში: „სვანური საკურცხილ“ (საქ. მუზეუმის მოამბე, II, გვ. 85-110).

3. **სკივრი ხისა**, მოხარატებული, იხ. ფოტო №17177, მარცხნივ, ქვემოდ.

4. **ხის შანდალ-კანდელები**, იქ. №17177, საწიგნის თავზე. მტრედების ქანდაკებანი მოცილებული აქვს და ისე ჰყრია ეკლესიაში; ამ შანდალ-კანდელების ხის ძირი, იხ. ფოტ. №17174.

5. **საწიგნე ხისა**, რომელზედაც შანდალ-კანდელები აწყვია; იქვე №17177.

6. ორი **ლახტი**, ექვს-ექვს ფრთიანი; იქვე, №17177.

7. **ზარი**, 27 სატნ. სიმაღლით; მისი დიამეტრი უდრის 34 სანტ. მხედრულის წარწერით:

ქ. ესე ზარი შემოგწირე (sic) ჩუენ კახეთის  
ველმწიფემან .: პატრონმან .: ალექსანდრემ .:  
წმიდა .: მაცხოვარს ჩუენად .: გასამარჯვებლა  
დ : და სადღეგრძელოდ ამინ:.

(შეადარე დ. ბაქრაძე, გვ. 107-108).

8. **გრაგნილი ეტრატისა**, რომელიც შეიცავს ჟამის წირვას იოანე ოქროპირისა და ბასილ დიდისა; დაწერილია ნუსხა ხუცურით; ფრიად გასვრილია, შემჭვარტლული და დაზიანებული.

9. ეხლა აღარ არის, მაგრამ დ. ბაქრაძის დროს აქ ყოფილა **ეტრატის სახარება**, რომელის შესახებ დ. ბაქრაძე სწერს (გვ. 108):

სახარება ეტრატზე ნაწერი ხუცურად. მისი არაბესკები და სათაურები ლამაზია. მარკოზის სახარების ბოლოს იკითხება:

ლოცვა ყოველ (ალბათ იქნებოდა: ლოცვა ყავთ ყოველთა) გიორგი ბერისათვის. დაიწერა მთასა საკვრველსა თორნესა წმიდისა სკმეონისასა. ღმერთმან შეუწდევნე ბასილსა დეკანოზსა; დიდად მილუაწა. თქვენცა აკურთხეთ.

ლუკას სახარების ბოლოს:



მას ჟამსად დაიწერა ესე ოთხთავი ოდეს ანტიოქია სომეხთა ადღეს, ლოცვა ყავთ გიორგი ბერისათჳს ამისსა

მადლსა და გლბ (sic) ეხმარების.

იოანეს სახარების ბოლოს:

მე გიორგი ბერი ლოცვას მომიხსენეთ და მშობელნი ჩემნი<sup>1</sup>.

---

<sup>1</sup> ბერი ბაქრაძე ასე იხსენიებს ამ სახარებას: „მუჟალის მაცხოვრის ეკლესიაში არს სახარება ესრეთ წარწერით: „მას ჟამსა დაიწერა სახარება ესე ოთხთავი, ოდეს ანტიოხია სომეხთა აიღეს. აღიწერა ხელითა გიორგი ბერისა შავმთასა (შუამთასა?) კალიპოს“.

დ. ბაქრაძე ამ ამონაწერების შესახებ სამართლიანად შენიშნავს, რომ აქ მოხსენებული გიორგი ბერი გიორგი მთაწმინდელია (1068 წ.).

შენიშვნა: ა. ხახანაშვილს ეს სახარება თითქო უნახავს, მაგრამ პირველი ორი მინაწერი მასში აღარ ყოფილა. მესამე მინაწერს ბაქრაძეს ასე უსწორებს: „გი ბრსა გლახ მწარედ ცოდვილსა ულოცე მკითხველი ღთისათ-ს“. ამას გარდა ის უჩვენებს კიდევ ამგვარ მინაწერს: „წო მრკზ მხრბლო მხ ეყვ გი ბრსა ფრიად (აჯდ?) ცოდვილსა“, (გვ. 18). მე არ მგონია, დ. ბაქრაძეს ასე შეეცვალოს მესამე მინაწერი, ამიტომ საფიქრებელია, ხახანაშვილის ნახული სახარება სხვა სახარება იყო და არა ის, რომელსაც ბაქრაძე აგვიწერს.

### სოფელი ჟაბეში.

ამ ლამაზი სოფლის, ჟაბეშის სახე იხილე ფოტოგრაფია №17467 და №17468. მაცხოვრის ქვის ეკლესია სოფლისა ძველია, საკმაოდ ფართო, ნაშენია თლილის შირიმის ქვისაგან; საკურთხეველი გამოდის გარედ სამ-წახნაგოვანად. დასავლეთის კედელი კამარებით არის შემკობილი. ეკვტერები აქვს სამივე მხრით. ეკლესია ერთობ დაძველებულია და ინგრევა. კანკელი ქვისაა, სამის კამარით. კანკელის წინ ოთხ-კუთხედ ქვის კვარცხლბეკზე ამართულია ხის დიდი ჯვარი, საჟენ-ნახევარი სიმაღლით, მაგრამ სულ შიშველია, ვერცხლის ფირფიტები მოუძარცვავთ. ირგვლივ, ეკლესიის კანკელის წინ, გამართულია მოჩუქურთმებული ძელი, რომელიც დიდ ჯვარსაც ეკვრის, და ამ ძელზე ჩარჩოებია მიმაგრებული ხატებისათვის, მაგრამ ყველა ხატის შემკობილობა მოძარცვულია და მარტო უამრავი ხატის ფიცრებია დღეს ჩვენს თვალს წინ.

საკურთხეველის კედელში ორი ღრმა უბეა, საიდანაც შესავალია სამალავში, საკურთხეველის თადის ზემოდ ეკლესია მოხატული ყოფილა ლამაზი ფრესკებით. მათი ნარჩენი ბევრ ადგილას მოსჩანს. საკურთხეველში მოსჩანან მაცხოვარი და ეკლესიის მამები; სამხრეთის კედელზე ჯვარცმა და ჯოჯობეთის წარტყვენა, საიდანაც ქრისტეს გამოჰყავს ადამი; აქვე არის აგრეთვე ღვთის მშობლის მიძინება.

დასავლეთის კედელზე მეორედ მოსვლაა წარმოდგენილი. მოსჩანს იესო ქრისტე, ტახტზე მჯდომარე, წარწერით: ი-ჴ ქე. ეხლა ეკლესიაში მოიპოვება მხოლოდ:

1. ხატი არა დიდი წა გიორგისა, ოქროთი დაფერილი ვერცხლით ნაჭედი, მოლამაზო ხელობისა, მაგრამ სანახევროდ მოშლილი.

2. ხის შანდალ-კანდელი მტრედებითურთ, ეხლა დაშლილი.

3. ზარი ჩამოკიდებული ხის ქანდარაზე, ხუცური წარწერით:

ქ : შევსწირე მეფემან ალექსანდრე  
მცხოვრსა მუჟალისასა  
გასამარჯვებლად და სადღეგრძელოდ  
ჩნდა ან

შევსწირე მეფემან ალექსანდრე  
მაცხოვარსა მუჟალისასა  
გასამარჯვებლად და სადღეგრძელოდ  
ჩუენდა, ამინ.

(დ. ბაქრაძე, გვ. 109)

4. დ. ბაქრაძის დროს აქ ყოფილა ტყავის სახარება (დ. ბაქრაძე, გვ. 109), რომლის ბოლოს წერებულა:

„სამებაო ერთარსებაო. . . იხსენ სატანჯველთაგან გიორგი ამის აღმწერელი“.

ეს გიორგიც დ. ბაქრაძეს მიაჩნია გიორგი მთაწმინდელად.

ჟაბეშში ჩვენს დროს მღვდელი იყო ღრმა მოხუცებული, მაგრამ კიდევ მხნე მოძღვარი გიორგი მარგიანი, რომელიც წინეთ, როგორც მოვიხსენიეთ, პაპი ყოფილა.

### სოფელი ჩალდაში.

ამ სოფლის პატარა ქვის ჩვეულებრივ ეკლესიაში ჩვენ ვნახეთ მხოლოდ:

1. გამოსასვენებელი ჯვარი, შეძერწილი ვერცხლის ნაჭრებით, ერთობ ტლანქი ხელობისა; ჯვარცმულის სახე არ არის გამოხატული, არამედ მხოლოდ თავები მთავარ ანგელოზთა, წერტილებით წრით და წარწერებით: წ-ღ მ-ქლ, წ-ღ გ-ზრ (№17208). ზემოდ და ქვემოდ ნაჭრები აკლია. ქვემოდ ხუცური ვულგარული წარწერაა:

„ოქრო მქედელი იოანე ნიგულდანი. მან ქნა ესე პატიოსანი, შ-ნს ღთნ“. ესე იგი:

„ოქრო მქედელი იონა ნიგულდანი. მან ქნა ესე პატიოსანი, შეუნდვეს ღმერთმან“.

მეორე გვერდზე (№17209) ასეთივე ვულგარული წარწერაა:

ქ ქე შე გრიგოლ სილანიანი . ო მს მეუღლესა შ ნ

როშმენაქს შეუნდოს ღმერთმან გოხოძა მ წრლსაც შ ნს

ღ ნ დ ბშნ შნდნ ღმერთმან ამინ.

შეუმოკლებლად შეასძლოა ასე წაკითხვა:

„ქრისტე, შეიწყალე გრიგოლ სილანიანი, უფალო მის მეუღლესა შეუნდვენ. რომენაქს შეუნდოს ღმერთმან, გოხოდა მწერალსაც შეუნდოს ღმერთმან, და ბემქენს (ანუ დაბეშან?) შეუნდვენ ღმერთმან, ამინ.“.

## მულაყის თემი

მულაყის თემი შესდგება სოფლებიდან: ღობრი, ზარდლაში, ჟამუში, მუშკიერი, ლახირი, ჩოლაში.

**ღობრი და ზარდლაში** ერთ სოფელს შეადგენენ. ამ სოფლის ეკლესია დაენგრიათ და ახალს აშენებდენ ჩვენი იქ ყოფნის დროს. ძველი ეკლესია წაზარბარეს სახელზე ყოფილა აშენებული; აქ ჩვენ ვნახეთ:

1. ზარი, არა დიდი, რომელზედაც მხედრულად სწერია:  
ქ. შემოგწირე .: ჩვენ .: მეფეთ .: მეფემან .: ჳელმწი-  
ფემან .: პატრონმა .: ალექსანდრე .: თქუენ .: სვანეთის .:  
ღობრის-ზარდლიშის .: მთავარანგელოზსა .: მცირე .:  
შემოსაწირავი .: ზარი .: ესე .: მეფობისა .: ჩუენისა .:  
წარსამართებლად .: დღეთა .: ჩუენტა .: სადღეგრძელოდ .:  
და ცოდვათა .: ჩუენტვის .: შესანდობელად .: ამინ .:  
(შეადარე დ. ბაქრაძე, გვ. 100).

2. თავი ხატი ეკლესიისა წაზარბარესი გადაეტანათ დროებით მუშკირში და ჩვენ იქ ვნახეთ. შემოსილობა ამ ხატისა ოქროსია, ნაჭედი, 23X17 სანტ. სახე წმიდანისა მოშლილია; ეხო ხატისა ბალახოვანად არის შემკული; ამიები რომბ-ლურსმული ქვემოდ და მარცხნივ მოშლილია; ოთხ შერჩენილ მედალიონში წთა ფიგურები არ არის, არამედ ხაზები. წარწერა წი ბ-ბლე (№17167). დ. ბაქრაძის დროს ეს ხატი პატარა სახატე კიდობანში ყოფილა ჩასვენებული, სპილენძის ძეწკვით, რომელზედაც მიბმული ყოფილა ორი შავი ფული.

აქ არისო, სწერს დ. ბაქრაძე, გალია ხისა ფრინველების სახეებით და კვერცხებით (გვ. 100). ასეთ ვითომდა გალიებს დ. ბაქრაძე სხვა ეკლესიებშიაც იხსენიებს, მაგრამ, როგორც ჩვენ აღვნიშნეთ, ესენი გალიებს კი არ წარმოადგენენ, არამედ შანდალ-კანდელებს.

დ. ბაქრაძე (გვ. 101) ამ ეკლესიაში იხსენიებს კიდევ კონდაკს, ქალაღზე დაწერილს, რომელიც შეიცავდა ჟამის წირვას იოანე ოქროპირისა, ბასილი დიდისა და გრიგოლ ღვითს მეტყველისა, მაგრამ მე იქ ეს კონდაკი ვეღარ ვნახე და არც არავინ იცოდა, თუ რა ბედი ეწია. კონდაკს ჰქონდა მინაწერი:

უწყოდეთ, რამეთუ ესე ლოცვანი არა აქუსთ ბერძენთა და რუსთა, არამედ საქართველოსა შინა თქმულ არს.

ამისთვის არც ჩვენ დაუტევეთ. . . ღმერთო შეიწყალე  
ცოდვილი მონა ღუთისაჲ პეტრე მღვდელი ორსავე სო-  
ფელსა შინა, ამინ.

### სოფელი მუშკიერი.

სოფელი მუშკიერის პატარა ქვის ეკლესიაში, გარდა ზარდლაშიდან  
გადმოტანილის წა ბარბარეს ხატისა, ჩვენ ვნახეთ:

1. ხატი წა ანდრიასი, ვერცხლისა, 15X10,5 სანტ. წმიდანი წარმოდგენილია წელს  
ზევით, წარწერით: წა ადრია. სახე წმიდანისა მხცოვანია, დიდის ნიმბით. ეზო და  
აშიები დიდრონი ფოლაქების მსგავსად ყოფილა მორთული, მაგრამ ეხლა  
დაზიანებულია. აშია მარტო ზემოდ არის შერჩენილი. ხელობა ტლანქია, მე-17-18  
საუკ. (№17168).

2. ორი პატარა ვერცხლის ხატი, ერთი ზომისა და ერთი ხელობისა, 6,5X4,5 სანტ.  
მოჭედილია ფიცარზე, რომელსაც სახელური აქვს და რომელიც წინეთ ალბათ ბოყერს  
შეადგენდა. ერთს ხატზე წარმოდგენილია ჯვარცმა წინამდგომებითურთ, ღვთის  
მშობელით და იოანეთი, და წარწერით: იოქე. მეორეზე ღვთის მშობელია სრულის  
ტანით, ჩჩვილად, აგრეთვე თანამდგომებითურთ. წარწერა არა აქვს (№17168).  
უქველად ეს ორი ხატი წინეთ ერთ პანაგიას შეადგენდა და შემდეგ გაუყვიათ და  
ცალ-ცალკე მიუკრავთ ძელზე.

### სოფელი ჟამუში.

ამ სოფლის ეკლესია მაცხოვრისა, კარგი თლილის ქვისაგან ნაშენი,  
ჩვეულებრივია, მაგრამ სხვებზე მაღალი. მასში მოიპოვება:

1. ჯვარი, კანკელის წინ დასადგამი, სამი არშინი და 10 ვერშოკი სიმაღლით და  
ერთი არშინი და 10,5 ვერშოკი განით, შექმნილი ვერცხლის ფირფიტებით,  
რომლებზედაც არა რელიეფით წარმოდგენილნი არიან წმიდათა სახეები ტლანქი  
ხელობისა (№17166). ექვს ფირფიტაზე მთავარ ანგელოზია. ოთხზე წა გიორგი. სხვა  
ზემოდ, მარჯვნივ და მარცხნივ, აკლია.

2. თავი ხატი მაცხოვრისა, ოქროთი დაფერილისა, ნაქედი. 48,5X35,5, სანტ.  
(№17161). მაცხოვარი ტახტოსანია, მარჯვენა ხელით აკურთხებს, მარცხენით გაშლილ  
სახარებას იკავებს, მარცხენა მუხლზე დადებული. სახარებაზე აწერია: მე ვარ ::  
ნათელი :: სოფლისა :: რომელი :: შემომიდგეს მე :: არა ვიდოდეს :: ბნელსა არამედ ::  
...დიდი ნიმბი თავზე, ჯვარის სახედ, ირგვლივ შემკობილია ძვირფასი ქვებით; აქეთ-  
იქით ნიმბისა წარწერა სახელისა დიდრონის ლამაზი ასომთავრულით: იჴ ქე.  
მარჯვნივ და მარცხნივ წარწერებისა თითო ძვირფასი ქვა არის. ეზო და აშიები  
შემკობილია ვენახის და ბალახის მსგავსი ხლართულებით. ქვემოდ, ორივე მხარეს

ტახტისა დგანან სავედრებელად გაწვდილის ხელებით. მარცხნივ მეფე, მარჯვნივ დედოფალი ბიზანტიურის ტანისამოსებით და გვირგვინებით. მეფის თავზე სწერია:

მფთ მფე გ გ (მეფეთ მეფე გიორგი).

დედოფლის თავზე:

დედოფლთ დედოფალი რუსუდან.

დედოფლის ფეხების ქეშ:

ამისი ოქრმჭლი . ივ ნე.

ზემოთ აშიაზე, შუაში არის შემზადება ტახტისა; კუთხეებში: წელზევითნი სურათები ღვთის მშობლისა და იოანე ნათლის მცემელისა. გვერდების აშიებზე, ზემოდან, პარალელურად მარცხნივ და მარჯვნივ: წ ა გ ი და წ ი დე მ რ ე; შემდეგ: ყოვლად წმინდ(ა) და იოვანე ნათლის მცემელი; ქვემოდ კიდევ: [წ ა] თევდრე და წ ა თ ე კ რ ვ ლ ი. ქვემო აშიაზე წარწერაა ასომთავული:

ადიდნეს ; ღ ნ მ ფ თ : მ ფ ე : გ ი : დ ფ ლ თ : დ ფ ლ ი .

რუს დ ნ : დ : ძ ე : მ თ ი : ბ გ რ ტ : . რ

ო ლ თ ა : შ ე ა მ კ ვ ე ს : ხ ტ ი : ე ს ე : მ ც ხ ვ რ ი ს ა : . მ უ ლ ს ა :

ს ა დ ლ გ მ ლ დ : ც ვ თ ა : მ თ თ : მ ს დ ბ ლ დ .

უქარაგმოდ:

„ადიდნეს ღმერთმან მეფეთ მეფე გიორგი და დედოფალთ დედოფალი რუსუდან და ძე მათი ბაგრატ, რომელთა შეამკვეს ხატი ესე მაცხოვრისა მულაყისა სადღეგრძელოდ, ცოდვათა მათთა შესანდობლად“.

აქ მოხსენებული გიორგი არის იმერეთის მეფე გიორგი მეორე, რომლის პირველი ცოლი იყო რუსუდან შერვაშიძის ასული. რუსუდანისაგან გიორგის ჰყავდა შვილები ბაგრატ და ლევან. რუსუდანი გათხოვდა 1563 წელს. გარდაიცვალა 1578 წელს. მამასადაძე, ხატი გაკეთებულია 1563-1578 წლებს შუა.

**3. ხატი მაცხოვრისა,** ოქროთი დაფერილი ვერცხლისა, ნაჭედი, 58X42 სანტ. სრულად ისეთი რიგისა და ხელობისა, როგორც წინა ხატი და, როგორც ეტყობა, იმავე ოქრომჭედლის ნამუშევარი (№17160). ეს სჩანს წარწერის ასოების მსგავსებიდანაც; ხოლო ეს ხატი უფორ სადაა; ეზო და აშიები ხლართულებით შემკობილი არ არის; ტახტის ზემო სვეტები ერთობ მაღალია და ზემოდ კუმტულებით თავდება. ქრისტეს ფეხები ნოხზე როდი უდევს, როგორც პირველ ხატზე, არამედ ოთხკუთხედ სკამზე. ჯვარის სახის ნიშნს მარტო ერთი ძვირფასი ქვა უზის. წარწერა: მაცხოვრი (sic). მაცხოვარი ზის ტახტზე ორმაგი წვრილის მუთაქებით; პირველ ხატზე მუთაქა გრძელია. ზემოთ აშიაზე წარმოდგენილია წელზევითნი სურათები ვედრებისა, პეტრესი და პავლესი, წარწერებით: მაცხოვარი, ყვლდ წმნდ, იო ე ნათლის მცემელი, პ ე. გვერდებზე: მიქელ, გაბრიელ მთავარ ანგელოზი, იო ნე ნათლის მცემელი, წ ი გ ი, წ ი დე მ რ ე. ქვემოდ წარწერა ასომთავრული:

ღ ო : . და : . მ ც ხ რ ო : . მ უ ლ ა ხ ი ს ა ო : . მ ც ვ ე ლ : . და მ ფ ა რ -

ვე ლ : . ე ქ მ ე ნ : . ო რ თ ა ვ ე : ც ხ ო რ ე ბ ა თ ა : მ ა ჭ ა ვ ა რ ი ა ნ ს ი ა

(sic) : . გ ე დ ე ო ნ ს : . ა მ ი ნ : . წ ო : . და : . მ ა ც ხ რ ო : . მ უ ლ ა -

ხ ი ს ა ო : . გ ა ნ ა ძ ლ ი ე რ ე : . მ ე ფ ე თ : . მ ე ფ ო ბ ა : პ ა ტ რ ო ნ ი ს : .

გ ი ო რ

გ ი ს ა : . დ ე დ ო ფ ა ლ თ : . დ ე დ ო ფ ა ლ ი : . პ ა ტ რ ო ნ ი : . თ ა მ ა რ : .

ძ ე თ ა : . მ ი ს ს ა : . ა ლ ე ქ ს ა ნ დ რ ე ს : . . . .

შეუმკობლად:

„ღმერთო და მაცხოვარო მულახისაო, მცველ და მფარველ ექმენ ორთავე ცხორებათა მაჭავარიანსა გედეონს, ამინ“.

„ღმერთო და მაცხოვარო მულახისაო, განადლიერე მეფეთ მეფობა პატრონის გიორგისა, დედოფალთ დედოფალ პატრონი თამარ, ძეთა მისსა ალექსანდრეს“ . . .

ფორმა მაჭავარიანსია მაჭავარიანსა-ს მაგიერ ამომჭრელის შეცდომით აიხსნება. ფორმა პატონი უჩვენებს, მგონი, რომ ამომჭრელი წარწერისა მეგრული იყო, თუმცა სხვა შემთხვევაში პატრონი სწერია. მრავლობითი რიცხვი ძეთა უჩვენებს, რომ დამწერელს აზრად ჰქონია სხვა შვილებიც დაესახელებია მეფისა და დედოფლისა, მაგრამ ადგილი არა ჰყოფნია, ან უფრო საფიქრებელია, მეხუთე სტრიქონი არ შენახულა. ასოები ო და უ გამოსახულობით ერთგვარია.

დედოფალი თამარ მეორე ცოლია იმავე იმერეთის მეფის გიორგი მეორისა, რომელი მეფეც პირველ წარწერაშია მოხსენებული. თამარ იყო ასული შარმაზან დიასამიძისა. ვინაიდან პირველი ცოლი გიორგისა გარდაიცვალა 1678 წელს, ხოლო გიორგიმ იმეფა 1685 წლებს შორის. მუხლმოდრეკილნი ფიგურები მაცხოვრის ფეხებთან ჩვენს ხატზე არ მოიპოვება, როგორც შეცდომით უჩვენებს გრაფ. უვაროვისა (გვ. 175). ალ ხახანაშვილს ამ ხატის წარწერაც პირველ ხატისათვის მიუკუთვნებია (გვ. 36).

**4. ხატი ღვთის მშობლისა** ჩჩვილედნი, ვერცხლით ნაჭედი, 91X56,5 სანტ. აშიები რომბლ-ლურსმულია და მოყვითლული (№17159). ღვთის მშობელი ტახტზე ზის ძითურთ; ტახტის ზურგი მაღალია, გრებილის მსგავსად შემკობილი. მარცხენა ხელით იჭერს ქრისტეს ყრმას, რომელიც მარცხენა მუხლზე უზის; მარჯვენა ხელი გულზე აქვს მიდებული. ქრისტეს მარცხენა ხელში გრაგნილი აქვს, მარჯვენა ჯვარის საწერად აუწევია ყელამდის დედისა. ხელობა დაბალია, მე-17 საუკუნისა. წმიდათა სურათები აშიებზე უფრო კარგის ხელობისა არის და ეტყობა აშიები სხვა უკეთესი ხატიდან არის აღებული. ზემო აშიაზე წარმოდგენილნი არიან: ი-ო ქე და მთავარ ანგელოზნი, წ-ა მქლ, წ-ა გბრლ. ქვემოდ: წი პ-ვლე, წი ნკლ. გვერდებზე: ქვემოდ მთავარ ანგელოზნი სრულის ტანით, საზომებით და ბურთებით; ზემოდ ორი ქრისტე სახარებებით და მაკურთხევლის მარჯვენა ხელებით. პირველს აწერია: ერთ არსებაი; მეორეს: წ-ა სამებაი. ქვემოდ წარწერაა ასომთავრული:

ქ. მე ფრიად ცოდვილმა ლომკაცმა კუჭაიძემა და თანა მეცხედრემან მთმა ჯაფარიძისა ასულმა კაკონამან და შვილთა ჩვენთა რომელმა შევამკვე ეკათი ესე ყოვლად წმიდისა სთა გორა მეოჯ და მექმნი ჩვენ ცოდვსა ამას ღმერთო შეუნევ ცდენი მსი ქარულალის შვილსა.

ასოები ო და უ ერთგვარად გამოხატული არის ამ წარწერაში, ამიტომ ძნელია თქმა, როგორ უნდა წავიკითხოთ. ზოგიერთი სიტყვები: ჯგუფი „სთა გორა“ უნდა ნიშნავდეს „სამთა-გორისა“. საზოგადოთ, წარწერა სინტაქსიურადაც შეუსაბამოა. უქარაგმოდ უნდა წავიკითხოთ ასე:

მე ფრიად ცოდვილმა ლომკაცმა კუჭაიძემა<sup>1</sup> და თანამეცხედრემან მათმა ჯაფარიძის ასულმა კაკონამან და შვილთა ჩვენთა, რომელთა შევამკვე (უნდა იყოს: რომელთა შევამკვეთ) ეკათი ეს ყოვლა(დ) წმიდის(ა) სამთაგორისა (ანუ სუანთაგორისა), მეოჯ და მექმენი (უნდა იყოს: მეოხ მექმენით) ჩუნ ცოდვილსა ამას

(უნდა იყოს: ცოდვილთა ამათ). ღმერთო, შეუნდეც ცოდვანი მისნი ქაროლალის (ანუ ქარულალის) შვილსა.

დ. ბაქრაძის დროს ეს ხატი დაფარებული ყოფილა წითელი ხავერდით და ამ ხავერდის წარწერა მას გადმოუღია, (იხ. მისი დამატება, №31). ჩვენ ეს საბურავი არ გვინახავს, არც გრაფ. უვაროვისას, მაგრამ წარწერის შინაარსით სჩანს, რომ ეს უბრალო საბურავი არ ყოფილა, არამედ **დროშა ოქრო-ქსოვილის ხავერდისა**. ბაქრაძის გადმოღებულ წარწერას ჩვენ ასე ვკითხულობთ, ქარაგმების გახსნით:

„ჩუენ კუჭაიძემან ქაიხოსრო შემოგწირე ხატი, მაცხოვარო მულახისაო, და ბუკი კარგი. შემიწყალე შენს მადლსა, ამინ. სხუად (?) დროშა ესე ოქროქსოვილის ხავერდისა შეიწირე და გაგვიმარჯვე“!

5. **ხატი წა გიორგისა**, ოქროთი დაფერილი ვერცხლისა, ნაჭედი, 2719 სანტ. მიხედარი წარმოდგენილია ცხენით, კაცს გმირავს შუბით, რომელსაც თავის საომარი იარაღები დაუყრია: ხმალი, ფარი და მუზარადი. ეზო ბალახოვანად არის შემკობილი; შიები რომბ-ლურსმული. წარწერა სახელისა:

წი გ·ი. ქვემოდ: ვულგარული წარწრა (№17167):

წა :. გ·ი :. მეოხ : და მფარველ :. ექმენ : კუჭ

[ა]იძეს :. ლომკაცსა . თანა : მეცხედრესა :

[მი]სა : ჯფრიძის . ქალსა :. კაკონს :. შვ

[ილსა] მთსა :. შემწე :. დ მწყლე :. ექმენ :. დღე

[სა გ]ანკითხვისასა :. ამინ.

წმიდა გიორგი, მეოხ და მფარველ ექმენ კუჭ-  
(ა)იძეს ლომკაცსა და თანამეცხედრესა  
მისა ჯაფრიძის ქალსა კაკონს, შვ(ილ-  
სა) მათსა შემწე და მოწყალე ექმენ დღ-  
(სა გ)ანკითხვისასა, ამინ.

---

1 ეს სიტყვა დედანში ნათლად არ იკითხება, მაგრამ რომ აქ კუჭაიძემა უნდა წავიკითხოთ, ეს სჩანს ფრიად გარკვეულად ქვემოდ მოყვანილს გადასაფარებელის ანუ დროშის წარწერიდან.

ეს წარწერა გადმოღებული აქვს ბარტოლომეის (ტაბ. III, №29) და მისი მიხედვით ბროსსე კითხულობს: „კუგიძეს ლომკაცსა“. (ბარტოლომეი, გვ. 203, 204). ბარტოლომეის ტაბულით სხვანაირად არც შეიძლება და წაკითხვა, მაგრამ ბარტოლომეის ასლი სწორი არ არის. უკანასკნელი ასო პირველი სტრიქონისა გამოხატულობით ხუცურ ასოს ზ-ს მოგვაგონებს უფრო, ვიდრე ლ-ს მაგრამ ლ-სადაც შეიძლება მივიღოთ, დ. ბაქრაძესაც ლ-ად მიუღია; ის კითხულობს „კულნიძეს ლომკაცს“ (გვ. 101); ასე სჩანს მისი რუსული თარგმანიდან, მაგრამ აქ კორექტურული შეცდომა უნდა იყოს და ბაქრაძეს უნდა წაეკითხოს: „კულიძეს ლომკაცს“; ასეთი წაკითხვა მისაღებია დედნის მიხედვით (იხ. №17167), მაგრამ ჩვენ გვგონია აქ ან შეცდომაა დამწერლისა, ანდა უკანასკნელი ასო პირველი სტრიქონისა შებრუნებულად სწერია, რაც ხშირია ქართულ ვულგარულ წარწერებში; თუ ამ ასოს მოვაბრუნებთ, მაშინ შეიძლება ის ჭ-თ მივიღოთ. ასე თუ ისე ჩვენ ვკითხულობთ:

„კუჭაიძეს ლომკაცს“. რომ ეს წაკითხვა სწორია, ამას ცხად ჰყოფს წინათ მოყვანილი წარწერები ღვთის მშობლის ხატისა და ფარდისა ანუ დროშისა. ჩვენს წარწერაში ასომთავრულ ასოებში ზოგჯერ ნუსხური ასოები ურევია, მაგალითად: ასო ო ორს შემთხვევაში: პირველ სტრიქონში „მეობ“ და მეორე სტრიქონში „ლომკაცს“; ხოლო პირველი სტრიქონის უკანსკნელ სიტყვაში „კუჭ“, უ-ნი სამკბილიანი ნუსხა ხუცურია. და ეს ჩვენ გვშველის, რომ წინა წარწერებშიც „კუჭაიძე“ წავიკითხოთ და არა „კოჭაიძე“, როგორც კითხულობენ ბროსე და დ. ბაქრაძე (გვ. 105). ეს და ამის წინ აღწერილი ღვთის მშობლის ხატი ერთი და იმავე ოქრომჭედლის ხელობა უნდა იყოს.

6. **ოქროს პანაგია**, 6,5X5,5 სანტ. (№17167). ერთ გვერდზე გამოხატულია წა-გიორგი, ცხენით, რომელიც გამირავს შუბით ვეშაპს; ირგვლივ წარწარაა:

: წ : გ ო ი : / გ უ მ ა რ / ჯ ე : ა ლ / ბ უ ლ ა ს / ი ო ს ე ლ - ი ა ნ / ს .

ესე იგ: „წმიდაო გიორგი, გაუმარჯვე აღბულას იოსელიანს“.

მეორე გვერდზე წარმოდგენილია ღვთის მშობელი წელს ზევით, ჩჩვილედით, წარწერით: : ყ დ :: წ ა :: ღ მ რ თ ის :: მ შ ო ბ ე ლ ი . ქ რ ის ტ ე ზ ე : ი ჳ ქ ე . ხ ე ლ ო ბ ა ს ა კ მ ა ო დ კ ა რ გ ი ა , მ ე - 1 6 ს ა უ კ უ ი ს ა .

7. **სურა ვერცხლისა**, ვიწრო გრძელი ყელით, 42 სანტ. სიმაღლით (№17165). მუცელი ბურთის მსგავსი აქვს, სადა; ხოლო ყელზე პატარა გრეხილის მსგავსი შემკობილება აქვს. მუცლის ზემოდ მხედრული წარწერა არის, რომელიც ჩვენს ფოტოგრაფიაზე მქრალად არის გამოსული, მაგრამ გადმოღებული აქვს ბარტოლომეის (ტაბ. III, №31). წარწერა იკითხება ასე (ნაკლულ ასოებს წარწერისას ფრჩხილებში ვსამთ):

ქ :: შ ე მ ო გ წ ი რ ე თ : ჩ ვ ე ნ : მ ე ფ ე თ : მ ე ფ ე მ ა ნ : პ ა ტ რ ო ნ მ ა ნ :  
ბ ა გ რ ა ტ : და : თ ა ნ ა : მ ე ც ხ ე დ რ ე მ ა ნ : ჩ ვ ე ნ მ ა ნ : დ ე დ ო -  
ფ ა ლ მ ა ნ : პ ა ტ რ ო ნ მ ა : თ ა მ ( ა ) რ : ს უ რ ა : ე ს ე : ხ ე ლ მ წ ი -  
ფ ო ბ ის ა : ჩ ვ ე ნ ის ა : წ ( ა ) რ ს ( ა ) მ ( ა ) რ თ ე ბ ლ ( ა ) დ : მ ( ა ) ც ხ ო -  
ვ ა რ ს : მ უ ლ ა ყ თ ა ს : ქ კ ს : ს ა მ ს : ო რ მ ( ო ) ც და : თ ხ უ თ -  
მ ე ტ ს ა .

ქორონიკონი უდრის 1667 წელს. ბროსე სიტყვა „სურის“ მაგიერ კითხულობს „სფერა“ (ბარტოლომეი, გვ. 235). დ. ბაქრაძეს კარგად აქვს წაკითხული (გვ. 102). სურას ქვემო ნაწილზე უწერია:

ქ. ბატონიშვილის თინ(ა)თინის.

წარწერაში მოხსენებული მეფე ბაგრატ არის იმერეთის მეფე ბაგრატ IV (1680-1680). თამარ არის მისი მეორე ცოლი, ძმის წული ქართლის მეფის ვახტანგ მეხუთისა, ისტორიაში „ცბიერად“ წოდებული. თინათინ არის ბაგრატ მეოთხეს ასული, ლევან მეოთხეს დადიანის მეუღლე, რომელიც დაქვრივების შემდეგ მონაზონად ეკურთხა და ვახტანგ მეექვსეს რუსეთში გაჰყვა 1724 წელს.

8. **დიდი ვერცხლის ბადია**, რომლის დიამეტრი უდრის 27,5 სანტიმ. შიგნით, შუაში, ღრმად ამოჭრილი ჯვარის სახის შემკობილობაა, ფრიად ლამაზი ხელობისა. ჯვარის ფრთებს შორის ოთხი მედალიონია ლამაზი სპარსულის ყაიდის მილანქრისა; ირგვლივ უვლის წრე ორმაგის სარტყელით, შემკობილი ოთხის დიდრონი და რვა



პატარა ძვირფასი ქვით. ამას გარდა თვით ჯვარის ფრთებზე დაცულია ოთხი ძვირფასი ქვა (№17162).

9. მეორე ასეთი **ვერცხლის ბადია**, ორის სახელურით, ვერცხლის ბეჭედების სახისა; დიამეტრი ბადიისა 38 სანტ. შიგნით, შუა გულში ესეც შემკობილია ღრმად ამოჭრილი და ამოზურცული ორნამენტით, რომელსაც უზის სამი მედალიონი, სპარსული ყაიდის მინანქრისა და ოთხი ძვირფასი ქვა, რომელთაგანაც ორი დაკარგულა (№17163).

10. **დიდი ვერცხლის აზარფეშა**, ჩვეულებრივი ქართული ხელობისა; შემკობილია სევადით მეორე გვერდზე (№17165).

11. **ვერცხლის ჯამი**, ჩვეულებრივი, სადა (იქვე, №17165).

12. **ორი სარტყელი**, ვერცხლისა, სვანური (იქვე, №17165).

13. **ფარი სპილენძისა**, მრგვალი, მშვენიერი ხელობისა, ოქროთი გამოყვანილი სახეებით პატარა დოქებისა და ვაზებისა, არაბულის წარწერებით (№17164).

### სოფელი ლახირი.

სოფელი ლახირი ლამაზი არის, მთის ფერდობზე გაშენებული; მისი სახე კომპლექსურით იხ. ფოტოგრ. №17463, 17459, 17472, 17460, 17461, 17458, 17462. ბაქრამის დროს ლახირში იყო ძველი ეკლესია თლილის ქვისაგან აშენებული. ეხლა ეს მოუშლიათ და მის ადგილას აუშენებიათ 1894 წელს ახალი **ეკლესია იოანე ღვთისმეტყველის სახელზე**. ამ ეკლესიაში, როგორც გადმომცეს, გადმოუტანიათ ხატები მთავარ ანგელოზის გაბრიელის ეკლესიიდან, რომელიც ზევით მთის წვერზე, ტყის მახლობლად ყოფილა. ეხლა ეკლესიაში მოიპოვება:

1. **ჯვარი გამოსასვენებელი**, ოქროთი დაფერილი ვერცხლისა, ნაჭედი, 28X20 სანტ. დაზიანებული და დაბალი ხელობისა (№17171). პირველ გვერდზე წარმოდგენილია ჯვარცმა ბერძნულის წარწერით სახელისა. თავი ქრისტესი ეხლა მოშლილია; ოთხივე ფრთის ბოლოს ჯვარისა მომრგვალო მედალიონებში წარმოდგენილნი არიან მთავარ ანგელოზნი ზემოდ და ქვემოდ; ზემოთი დაზიანებულია; მარცხნივ და მარჯვნივ არიან: დედა ღმთისა და იოანე მხლი. ქრისტეს ფეხებს ქვეშ ადამის თავია. მეორე გვერდზე შუაში და ყველა ფრთის ბოლოს დიდრონ სიმრგვალებში ჯვრებია ლამაზად შემკობილი ხლართულებით, ხოლო დანარჩენი ნაწილი ლამაზ ასომთავრულ წარწერას უჭერია (№17172):

ძელო ცხ  
რებსო : მ

ძელო ცხო-  
რებისაო, მე-

ეობ დ მე	ობ და მფარ-
რვლ მქმ	ველ მექ -
ენ : მმკო	მენ მამკობ-
ბსა შნს :	სა შენსა
ქლბაქნ	ქელბაქიან-
სა სირმონს	სა სირმონს
დ შვლ სა	და შვილსა
ჩემსა მქლს	ჩემსა მიქელს
დ შვლთ მს .	და შვილთა მის.

დ. ბაქრაძეს ეს ჯვარი უნახავს ლახირის მეორე ეკლესიაში ღვთის მშობლისა (გვ. 106). ჯვარი მე-16-17 საუკ. უნდა იყოს.

2. **ხატი ღვთის მშობლისა**, ვერცხლით ნაჭედი, 31X26 სანტ. ფრიად ტლანქი ხელობისა, მე-18-19 საუკუნისა (№ 17170). ღვთის მშობელი წელსზევითია, ჩჩვილედ, წარწერით: დდა ღთ. სახე ძისა დიდის ჯვარისა სახის ნიშბით ერთობ უშნო და მახინჯია, ღვთის მშობლის დიდ თავის წრის ზემოდ ქრისტეა წარმოდგენილი, მკერდსზევითი, წარწერით: იჴ :: ქე. აქეთ-იქით ღვთის მშობლისა, ზემოდ მთავარ ანგელოზებია, სრულის ტანით და წარწერებით: მქლ, გზრლ. ქვემოდ ვულგარული წარწერა:

ყდ :: წო :: ღთის :: მშბლო :: მეობ  
 ექმენ :: იოსელიანს :: ჯიბე  
 რდის :: დღეს :: გნკითხვი  
 სასა :: მს ::

ყოვლად წმიდაო ღმრთის მშობელო, მეობ  
 ექმენ იოსელიანს ჯიბე-  
 რდის დღეს განკითხვი-  
 სასა მას.

3. სრულიად ასეთივე ტლანქი ხელობის **ხატი ღვთის მშობლისა**, წელსზევითი, ჩჩვილედ, 26X16 სანტ. (№17169). აქაც, ზემოდ, ორივე მხარეს მთავარ ანგელოზებია სრულის ტანით. აშია არა აქვს, ხოლო უვლის წრე წერტილებისა; მე-18-19 საუკ. უნდა იყოს.

4. **ხატი მაცხოვრისა**, წამლით დახატული წინა მდგომეებითურთ და მოციქულებით, 31X26 სანტ. რუსული ხელობის არის, არა ცუდი.

5. **ზარი**, 30 სანტ. სიმაღლით და 31 სანტ. დიამეტრით. ქვემოდ მხედრული წარწერა აქვს;

ქ :: ჩუენ : ღთივ :: გვირგვინოსანმან :: მეფეთ :: მეფე-  
 მან : პატრონმან :: ალექსანდრე : შემოგწირე :: ზარი ::  
 ესე : სუანეთს :: მთავარანგელოზთ :: ჩუენად :: სად-  
 დღეგრძელოდ :: და გასამარჯვებთა (sic) :: და :: მეფო-  
 ბისა :: ჩუენისა : წასამართებლად :: მი (sic) ამინ:  
 (შეადარე დ. ბაქრაძე, გ. 106).

6. კონდაკი ხელნაწერი ნუსხა ხუცურით, შეიცავს ჟამის წირვას იოანე ოქროპირისა და ბასილის დიდისა; თავი და ბოლო აკლია; ყდაშია; მე-17 საუკუნის უნდა იყოს. მინაწერი ტექსტის ხელით:

„ქ ლ ო შ ე ფ დ ც დ ვ ლ ი მ ო ნ ა ღ ე პ ე მ ღ დ ლ ი ბ ა ღ ნ ი ა -  
ს ა შ ვ ი ლ ი .“.

ასეთივე წარწერა სხვა ადგილსაც არის. ბოლოს: ლოცვანი ერის განტევებისა.

7. ლახირის სოფელში არის კიდევ მეორე ძველი ეკლესია წა ბარბარესი, ჩვეულებრივი სვანური ტიპისა, თლილის ქვისაგან ნაშენი. კანკელი ქვის აქვს, ერთის კარით. არც ერთი მთელი ხატი ამ ეკლესიაში არ არის, სამაგიეროდ აქ არის აუარებელი ძელები ხატებისა და ჯვრებისა სულ მოძარცვულები. ტრაპეზზე იდვა დიდი ჩალის ქუდი, რომელიც ადგილობრივი გადმოცემით თავზე ეხურა სარდალს დიდი სულთანის ჯარისას, რომელიც სვანებმა დაამარცხეს. ქუდის დიამეტრი უდრის 51 სანტ. (სურათი მისი იხ. №17173). ამის გარდა ტრაპეზზე ბევრი მარცვლები იყო კრიალოსანისა და სხვა და სხვა ფერის ქვის კენჭები.

### სოფელი ჩოლაში.

სოფელ ჩოლაშში პატარა და ჩვეულებრივი ეკლესია არის წმიდა ბარბარესი. მასში საყურადღებო არაფერი არის. სოფელში ჩვენ დავესწარიტ დიდ დღესასწაულს 15 აგვისტოს. ეს დღესასწაული მიცვალებულთა დღესასწაულია, მათი მოგონების და პატივისცემისათვის არის დანიშნული. ოჯახი ამზადებს საუკეთესო საჭმელებს, გამოაქვთ სასაფლაოზე, დააწყობენ სუფრაზე ან თვით განსვენებულის საფლავზე, ან მის ახლოს. ყველა სუფრა პაპმა (ანუ ეხლა მღვდელმა) უნდა აკურთხოს. სახლში ამ დღეს არავინ არ რჩება, ყველა სასაფლაოზეა გამოსული და ჯგუფ-ჯგუფად თავმოყრილი თავიანთ მკვდრების სასაფლაოებთან. ვერასოდეს ვერ ნახავთ ასე ერთად შეყრილს მთელ მოსახლეობას, ამიტომ ეს სცენები საჭმელების კურთხევისა და სვანთა ნაირ-ნაირ ჯგუფებისა თავიანთი მარაგით გადმოვიღეთ რვა ფირფიტაზე (იხ. ფოტ. 17531-17538). სუფრას აკურთხებდა უხუცესი მღვდელი მარგიანი, რომელიც წინეთ პაპი ყოფილა (იხ. ფოტო № 17537).

### მესტიის თემი

მესტიის თემში შედიან შემდეგი სოფლები: სეტი, ლეხტანი, ლანჩვანი, ლაგამი. მესტიის თემს უჭირავს შუა ადგილი ზემო სვანეთისა და საუკეთესო თემად ითვლება. მდებარეობა ფრიად ლამაზია; ხეობა აქ უფრო ფართოა, სწორი ადგილები მეტია. სოფელი **სეტი** თავის მდიდარი ეკლესიით შეადგენს ცენტრს თემისა. ჩვენი ექსპედიციის დროს აქ ცხოვრობდა ბლადოჩინი სვანეთის ეკლესიებისა ბესარიონ ნიჟარაძე.

საზოგადო სახე ამ სოფლისა, მისი კოშკები, ზოგიერთი სახლები და ადგილები, იხილე ფოტოგრაფია №№ 17429, 17435, 17430, 17432, 17433, 17621. ერთობ ლამაზია აგრეთვე ამ თემის სოფელი ლანჩვანი; იხ. ფოტ. №17436. ეთნოგრაფიული მასალისათვის გამოსადეგია სურათები ხარ-კამეჩისა და მარხილებისა; იხ. ფოტ. №№ 17521, 17522. აგრეთვე სვანის ქალების ტიპები და მათ მიერ ძაფების სტვა; იხ. №17520 და აგრეთვე ბავშვის მოვლა და ძუძუს წოვება; იხ. №17519.

**სოფელი სეტის ეკლესია წმიდის გიორგისა ახალია**, მაგრამ აშენებული ძველი ეკლესიის ადგილზე და მის ზღუდეში. ბარტოლომეის და დ. ბაქრაძის დროს აქ ჯერ კიდევ ძველი ეკლესია არსებობდა. დ. ბაქრაძე სწერს: სეტის ეკლესიას ზღუდე აქვს და კედლებზე მხატვრობა; ის საკმაოდ დიდია, მაგრამ ყველაზე მეტად დაზიანებული. უვაროვის დროს ძველი ეკლესია აღარ იყო და მისი ნივთები გადატანილი იყო ლაგამის ეკლესიაში, ნაწილობრივ კოშკში ინახებოდა. ეხლა ნივთები ინახება ახალ ეკლესიაში, რომელიც საკმაოდ დიდია და გვარიანი. ძველი გალავანი დაცულია; ეკლესიასთან კოშკია; ხოლო მეორე კოშკი სამრეკლოდ არის გამოყენებული, იხ. ფოტ. №17431; მაგრამ ზარები ეხლა ეკლესიის კარის ბჭეზე ჰკიდია.

ბერნოვილის ცნობით, ძველი სეტის ეკლესიის სიგრძე ყოფილა შიგნით 20 ანუ 25 მეტრი, განი 8 და 9 მეტრი. კანკელს სამი კარი ჰქონია და ორი ფანჯარა (ესე იგი კამარა); გარე კედლებზე საყურადღებო არაფერი ყოფილა; შიგნით ფრესკები სულ გამქრალა (ბერნოვილი, გვ. 133-134). ა. სტოიანოვი უფრო მეტს ცნობებს იძლევა ძველი ეკლესიის შესახებ. მისი გადმოცემით, ეს ეკლესია ყველაზე მაღალი ყოფილა მთელს სვანეთში და კოშკის სახე ჰქონია. ეკლესია ორსართულიანი ყოფილა; მეორე სართულში ნივთები ინახებოდა და იქ არავის არ უშვებდენ, გარდა პაპისა. საკურთხეველში, მარჯვნივ, ყოფილა ფანჯარა. ამაზე მიადგამდენ ხის კიბეს და ამ ფანჯრიდან შედიოდენ მეორე სართულში (გვ. 286-293). ეტყობა, ეს ყოფილა ნივთების სამალავი, ჩვეულებრივი ქართული ეკლესიისათვის, მაგრამ იშვიათი სვანეთში. აქ ნივთებს კოშკებში ინახავდენ ხოლმე.

მესტიის ძველი ეკლესია წინად მონასტერი ყოფილა და მონასტრად არის მოხსენებული წარწერებში. ბლადოჩინი ქუთათელაძის სიტყვით (გადმოცემულია დ. ბაქრაძის მიერ). აქ ეპისკოპოზიც მჯდარა. ეკლესიაში ინახება:

1. **თავი ხატი წა გიორგისა**, ოქროთი დაფერილი ვერცხლისა, 64X54 სანტ. წმიდა გიორგი ცხენოსანია, დიდის გამობერვით განჭედული; შუბით გმირავს გვირგვინოსანს (№16916). ცხენი დიდია, მძიმე, შეკაზმული პატარა უნაგირით, ასალით და ვიწრო უზანგით; საძუე, სამკერდე და ავშარა ფოლაქოვანად არის შემკობილი. ხუჭუჭებად დაყოფილი თმა სახეზედაც ჩამოუდის, წრე თავისა მოდიდოა, ტანზე ჯავშანი აცვია; მას ზევით მოსასხამი, რომელიც მის უკან ჰაერში იშლება. ფეხზე მაღალი წაღები აცვია, რომელნიც თავდებიან ვიწრო წვერებით.

მარცხენა მკლავზე ფარი მოუგდია, რომელიც ორმაგი ორნამენტით არის ნაჭედი. თავის წრის მარცხნივ ასომთავრულით სწერია:

წ ე გ ი ს ტ ა (წმიდაა გიორგი სეტისა).

მარჯვნივ მხოლოდ:

წ ე გ ი.

ეს ორი წარწერა ერთის ხელით როდია; პირველი ლამაზია, გრავიურით გამოყვანილი, მეორე: პუნქტირებით არის შესრულებული და მერმინდელი უნდა იყოს.

ჩარჩო ხატისა ნაჭედია და გამშვენებული ორმაგი ბროწეულის ყვავილების ორნამენტით და აგრეთვე წმიდათა ფიგურებით. ზემოდ ვედრებაა, რომლის შუაში ქრისტე წელს ზევითი ემმანუელის სახით არის წარმოდგენილი, წარწერით: ი ვ ქ ე. ღვთის მშობელს აწერია: დ დ ღ ღ თ ს ა; ხოლო იოანეს : იოვანე.

მარჯვნივ და მარცხნივ ჩარჩოებზე წარმოდგენილი არიან სრულის ტანით: წ ა დ ი მ ი ტ რ ი (მარცხნივ) და წ ა თ ე ო დ ო რ ე (მარჯვნივ), უწარწეროდ, შუბებით და თავიანთი ცხენებით ხელში.

ქვემო ნაწილი ჩარჩოსი მოშლილია; აქ კუთხეებში მთავარ ანგელოზები უნდა ყოფილ იყვნენ, ვინაიდან მარცხენა კუთხეში მოსჩანს წარწერის ნაშთი სახელისა: ლ მ თ. – [მიქაე]ლ ანუ [გაბრიე]ლ მთ[ავარანგელოზი]. მაგრამ შეიძლება, ეხლანდელი ნაშთები ქვემო ჩარჩოსი ამ ხატს არ ეკუთვნოდეს.

ბარტოლომეის და ბაქრაძის დროს ამ ჩარჩოს ქვემო ნაწილზე წარწერა ყოფილა; ორთავე ღირსეულთ მკვლევართ ეს წარწერა გადმოუღიათ ხელით (იხ. ბარტოლომეი, ტაბ. II, №24; ბაქრაძე, დამატება №28). ზოგი სტრიქონები და ასოები ბარტოლომეის ტაბულაზე უფრო კარგად არის გადმოღებული, ზოგი ბაქრაძისაზე. ბაქრაძე ამბობს, წარწერის გარჩევა მე ვერ შევსძელიო. თუ დ. ბაქრაძემ ვერ შესძლო წარწერის გარჩევა, ბარტოლომეის მიერ გადმოღებული წარწერების გამრჩევი მ. ბროსსე აბა რაღას შესძლებდა! ასე რომ წარწერა დარჩა გაურჩეველი. გრ. უვაროვისა აცხადებს, რომ მან სრლებით ვერ იპოვნა კვალი წარწერისა, თუმცა ფირფიტა, რომელზედაც ის ყოფილა ამოტიხრული, დარჩენილია ხატის ქვემო (უვაროვისა, გვ. 112-113). ჩვენ ეს წარწერა ვიპოვნეთ, მაგრამ არა განცალკევებულად, არამედ ამავე ეკლესიის მაცხოვრის ხატის ქვემოდ (იხ. ფოტ. № 16915), რომლის აღწერა ქვემოდ მოგვყავს.

პირველად მე მეგონა, ბარტოლომეიმ შეცდომით მაცხოვრის ხატის წარწერა წმიდის გიორგის ხატს მიაწერა-მეთქი, მაგრამ როდესაც ამას იმეორებს დ. ბაქრაძე, ეს მოსაზრება ჰქრება, მით უმეტეს, რომ ბაქრაძე ჯე უჩვენებს ამ ხატის სახელის წარწერას და შემდეგ შენიშნავს, წარწერა კიდევ ქვემო აშიაზე არისო და უჩვენებს თავის გადმოღებულს ფაქსიმილეს (გამ. №28). ამრიგად, უეჭველი ხდება, რომ ჩვენს წმიდის გიორგის ხატს ის წარწერა მართლა ჰქონია, რომელიც ბარტოლომეის და ბაქრაძეს გადმოუღიათ. ამიტომ უნდა ვიფიქროთ, რომ წარწერის ფირფიტა ბაქრაძის შემდეგ მოვარდნილა და ის მაცხოვრის ხატის ქვემოდ მიუჭედიათ. ამას კიდევ ერთი გარემოება უფრო ამტკიცებს: ზომით ეს წარწერა სრულიად ეგუება წმიდის გიორგის ხატს და მის აშიის სიბრტყეს, ხოლო მაცხოვრის ხატს უფრო ვიწრო აშია აქვს (იხ. № 16915). ეს გარემოება, რომ წარწერა ამ ხატს არ ეკუთვნის, უვაროვისამაც შენიშნა (გვ. 111-112), მაგრამ ის არ უჩვენებს, თუ რომელ ხატს ეკუთვნის.

შეიძლებოდა კიდევ გვეფიქრა, რომ ამ ორ ხატს სრულიად ერთგვარი წარწერა ჰქონდათ, მაგრამ ესეც მიუღებელია, ვინაიდან არც ბარტოლომეი და არც დ. ბაქრაძე

წარწერიან მაცხოვრის ხატს არ იხსენიებენ სრულებით. შეუძლებელია, არც ერთს მათგანს არ შეენიშნა ასე დიდი ხატის წარწერა, რომ იგი მართლა ყოფილიყო.

ეხლა გადავიდეთ თვით წარწერის განხილვაზე.

წარწერა ხუთ-სტრიქონიანი მოქცეულია ორ მრგვალ მედალიონს შუა წმიდათა, რომელთაც წარწერები სახელთა არა აქვთ. ამ მედალიონებს ბოლოები აკლია, უფრო დიდი მარჯვენა მხარეს, უფრო ნაკლები მარცხენას. ამ უკანასკნელის დარჩენილი ნაწილი უჩვენებს, რომ ბოლოებში შემკობილობა ყოფილა ბროწეულის ყვავილების მსგავსად, ისე როგორც წმიდის გიორგის ხატზეა სამივე შენახულ მხარეს. ამგვარად, ვერცხლის ნაჭერი უფრო გრძელი ყოფილა, ვიდრე ეხლა არის. ასომთავრული წარწერა საკმაოდ ვულგარული, იმავე ხასიათის არის, რაც ზემოდ ქრისტეს მედალიონს აქვს წის გიორგის ხატისა. წარწერას ჩვენ ასე ვკითხულობთ (იხ. №16915):

ქ ესე ; წმიდაჲ ხატჲ  
შეიქნა : კეცხემიანისა  
მამასახლდობასა  
ქნა ათას სამას ოც  
და მეათესა.

ესე წმიდაჲ ხატი  
შეიქმნა კეცხემიანისა  
მამასახლისობასა,  
ქრონიკონს ათას სამას ოც-  
და მეათესა.

ამრიგად, ჩვენის წაკითხვით, ამ წარწერის თარიღი უდრის 1330 წელს. წელთა აღრიცხვა ქართულის ციკლოვანი ქრონიკონით კი არ არის ნაჩვენები, არამედ ქრისტესით. ასო *დ*-ს ხმარება *ი*-ს მაგიერ ჩვეულებრივია, მეტადრე სვანურს წარწერებში. საკვირველია, რომ ვიღაცას უვაროვისათვის გადაუცია, როგორც რუსული თარგმანიდან სჩანს, თითქოს იქ ეწეროს: „მაცხოვარო ცხოველ მყოფელო, მეოხ ეყავ“ (გვ. 111-112).

**2 . ხატი მაცხოვრისა**, ოქროთი დაფერილის ვერცხლით, ნაჭედი, 57X46,5 სანტ. (№16915). მაცხოვარი წელსზევითია; მარჯვენა ხელით ის ჯვარს სწერს და ამისათვის შეერთებული აქვს სამი თითი, ისე რომ საჩვენებელი და შუა თითი თავისუფალი რჩებიან. მარცხენა ხელში სახარება უჭირავს. სახარების ყდა ვარსკვლავის მსგავსად არის შემკობილი ამობურცული ფიგურებით. ნიშნი დიდია ჯვარის სახისა. თვალები მაცხოვრისა ფართოა. სამოსელი ერთობ ხშირად დანაოჭებულია, თითქო დასერილიაო. წარწერა სახელისა: *დჷ ქჷ*. ჩარჩო შემკობილია ბროწეულის ყვავილების მსგავსად, ანუ მისტიური ვარდებით და შიგ მედალიონებია წმიდათა; ზემოდ ტახტის შემზადება არის, არა ჩვეულებრივი, სამი ტლანქი ფიგურით, აღმოსავლური მაღალი წვეტიანი ქუდებით. მარჯვნივ და მარცხნივ თითო მედალიონი. მედალიონებს წარწერა არა აქვს. ქვემოდ დაცული წარწერა ორ მრგვალ მედალიონს შუა, უკვე გავარჩიეთ, ეკუთვნის ზემოდ აღწერილ წის გიორგის ხატს. მიუხედავად ამისა, ხატი ჩვენის აზრით, მე-14-15 საუკუნეს უნდა ეკუთვნოდეს.

**3. ჯვარი დიდი ხისა**, შეძერწილია ოქროთი დაფერილი ვერცხლის ფირფიტებით, ჯეროვანი ხელობისა, რომლებზედაც წარმოდგენილნი არიან სცენები წმიდა გიორგის წვალებისა და მხოლოდ ერთ დიდ ფირფიტაზე ბოლოში მოიპოვება ლამაზი ნახელავი ფიგურა მთავარ ანგელოზ გაბრიელისა, სრულის ტანით და

წარწერით: წ-დ გ-ბრლ. (№17922). ყველა სცენებს წარწერა აქვს და თავიდან დაწყებული შემდეგ რიგს მისდევენ:

წ-დსა გ-ის ცემა, წ-დ გ-ი ურმის თვალსა ზედა დაკლული (resp. დაკრული), წ-ს გ-ს ხოვ(რე)ტად (შუაში); ამის ქვემოდ: წ-ა გ-ი კირსა შიგან დგას. წ-დ გ-ი საპყრობილესა შიგან. მარცხენა ფრთაზე: წ-დ გ-ი ქველისსა მისსა განუყოფს გლახაკთა; წ-დ გ-ი, მეფე დეოკლეტიანე (მეფე ტახტზე ზის); მარჯვენა ფრთაზე: წ-დ ღლჯკერი რომლისა კარი აღდგა; წ-დ ღლჯკერი, წ-ის ღლჯკერის თავი კუჯთა (sic). მეორე გვერდი ჯვარისა შემკობილია ნაზი ნახელავი ბროწეულის ყვავილების ორნამენტით. ჯვარი მე-13-14 საუკუნეს უნდა ეკუთვნოდეს.

4. ხატი მთავარ ანგელოზ გაბრიელისა, ოქროსი, ნაჭედი, ტურფა ქართული ხელობისა (№16923). მთავარ ანგელოზი წარმოდგენილია სრულის ტანით, მდიდრულ ბიზანტიურ სამეფო ტანისამოსში; ზურგს უკან მოსჩანს გრძელი ფრთები; თავი პატარა აქვს, ხუჭუჭებად დაყოფილი თმის შემოვლებით; მარჯვენა ხელში ბურთი აქვს (სფერო); მარცხენაში ლაბარუმი; მრგვალი თავის წრის ორივე მხარეს ვარსკვლავების მსგავს „დრობნიცებში“ წარწერა სახელისა: წ-დ გ-ბლ. ეზო შემკობილია ბალახოვანად. ჩარჩო ხატისა ფართოა, შემკობილი საუცხოო ბროწეულის ყვავილების მსგავსი ორნამენტით და გამობერილი დიდი სადა მედალიონებით. ქვემოდ სამ-სტრიქონიანი ასომთავრული წარწერაა, რომელსაც ბარტოლომეი არ იხსენიებს, დ. ბაქრაძეს ხელით გადმოუღია, მაგრამ ვერ გაურჩევია (იხ. გვ. 97. დამატება №29); ა. ხახანაშვილი არჩევს, მაგრამ არა სრულად და შენიშნავს, აზრი წარწერისა ბნელიაო; მე მხოლოდ გავარჩიეო შემდეგი: მოიჭედა ხატი ესე. . ხელით ოქრომჭედელისათა (გვ. 37). ჩვენ სრულად ვარჩევთ წარწერას, რომელიც იყოფა ორ ნაწილად შუაში ამობურცული დიდი სიმრგვალით:

მარცხენა ნაწილი:

ქ . წო : გლ : შ-ე შნსა : წ-ე

შემომ-ვნი : მოიჭედ

ა : აბარმადობასა : ი

მარჯვენა ნაწილი:

ნასსა : ნაცლობასა : მ

წლა : ჭურასასა :

ჯელითა : ოქრომჭსა : თად-დს : ძისა[თა] .

ესე იგი:

„წმიდაო გაბრიელ, შეიწყალე შენსა წინაშე შემომავალნი. მოიჭედა აბარმადობასა ინასასა (ანუ იონასასა), ნაცლობასა (=ნაცვლობასა) მიქელა ჭურასასა, ჯელითა ოქრომჭედლისა თადიდის (ანუ თავდიდის) ძისა[თა]“.

აბარმადი იგივეა, რაც აბრამადი, ესე იგი ნაზირი (იხ. ჩუბინაშვილის ლექსიკონი). ხატი უნდა ეკუთვნოდეს მე-12-13 საუკ.

5. ხატი ღვთის მშობლისა, კარედი, სიმაღლით 10 <sup>3</sup>/<sub>4</sub> ვერშოკი, განით 10 ვერშოკი; შუა ნაწილი კარედისა ოთხკუთხედი ფიცარია, შესანიშნავად მოჩუქურთმებულის ოქროს ბასმით მოცული; ზემო ნაწილში კამარაა; შუაში ჩადგმულია წელსზევითი ხატი ღვთის მშობლისა, ჩვილელი, 21X17 სანტ. ბერძნულის წარწერით სახელისა, შემკობილი ძვირფასი ქვებით. პირის სახეები წმიდათა ყველა წამლით არის დახატული, მაგრამ შემოსილობა ოქროსია. ღვთის მშობლის ზემოდ, კამარას ქვეშ, მაცხოვარია მკერდსზევითი, წარწერით: I-C (sic); კამარის ზემოდ ტახტის

შემზადებაა. მარჯვნივ და მარცხნივ ღვთის მშობელს უკმევენ მშვენიერ პოზით წარმოდგენილნი მთავარ ანგელოზები: მარცხნივ – გაბრიელ, წარწერით: გაბრიელ; მარჯვნივ: მიქაელ. ქვემოდ გამოხატულნი არიან წელზევითნი: წ-მ მარინა და წ-მ ბარბარე. კარებზე ყოფილან წარმოდგენილნი: ზემოდ ქერუბიმები ლაბარუმებით, რომლებზედაც უწერია: წმიდა არს, წმიდა არს; და ქვემოდ მარცხენა კარზე წ-მ თე ტირონი და წ-ი დიმიტრი. მარჯვენა კარიდან ნახევარი დაკარგულია; დარჩენილზე წარმოდგენილია; თ-ე სტრატილუტი. საერთოდ ხელობა ამ ხატისა ისეთი ნაზი, ლამაზი და თვალწარმტაცია, რომ ყველა მნახველი აღტაცებაში მოჰყავს. პირველად ეს ხატი ხელით გადმოიხატა და თავის შრომაში გამოსცა ბერნოვილმა (გვ. 196); შემდეგ დაწვრილებით აღწერა და მისი ფოტოგრაფია გამოსცა გრ. უვაროვისამ (გვ. 121-122, ტაბ. XXXVII). ჩვენი ფოტოგრაფია ბევრად სჯობია უვაროვისას (იხ. №16921).

შუა ნაწილზე, ქვემოდ სამ-სტიქონიანი წარწერაა, სანახევროდ წნულის ასოებით შესრულებული. ამ წარწერას დ. ბაქრაძე სრულიად არ იხსენიებს; ბარტოლომეის გადმოუღია შეცდომებით და ამიტომ ბროსეს მას ნაწილობრივ არჩევს მხოლოდ; ა. ხახანაშვილი სრულად არჩევს წარწერას, მაგრამ შეცდომებით (გვ. 17).

დაზიანებული სიტყვების აღდგენა, რასაკვირველია, ძნელია, მაგრამ ასეთი სიტყვები არც ბევრია. აზრით მიმატებულს ასოებს და სიტყვებს ჩვენ ფრჩხილებში ვსვამთ და მთელ წარწერას ასე ვკითხულობთ:

ქ : ყოვლად წო : დედოფალო : ღ-თის : მშობელო :  
რომელსა : გეტჯრ  
თა : ღ-თი : მეოხ : ეყვენით : წ-ე : ძისა : და ღ-თისა :  
ჩუენისა : სულისა ვახტანგისა : და მარინესა : რომელთა  
[თვს შევამკეთ] ბრძანებითა ; მ-თათა : ხატი : შენი :  
ვ-რდნ : ინასარიძემ : და ძმათა ჩემთა : ი-ნე : ინასარ :  
სადირ : გ-ბლ ; და ბემ[ქენ].

ქარაგმების გახსნით:

„ყოვლად წმიდაო დედოფალო, ღმრთის მშობელო, რომელსა გეტჯრთა ღმერთი, მეოხ ეყვენით წინაშე ძისა და ღმრთისა ჩუენისა სულსა ვახტანგისა და მარინესა, რომელთა(თვს შევამკეთ) ბრძანებითა მათითა ხატი შენი ვარდან ინასარიძემან და ძმათა ჩემთა, იოანე, ინასარ, სადირ, გაბრიელ (ან გრიგოლ?) და ბემ[ქენ]“.

გრ. უვაროვისას ხატი მიაჩნია ბიზანტიურ ხელოვნების ნაშთად მე-12 საუკ. გარდა შიგ ჩადგმული ღვთის მშობლის ხატისა, კამარას ზემოდ მორთულობისა და წარწერისა, რომელთაც ქართულ ხელოვნებას მიაწერს (გვერდი 121-122), ნ. კონდაკოვის აზრით, ხატი ეკუთვნის მეცამეტე-მეთოთხმეტე საუკუნეს (იხ. მისი იკონოგრაფია ბოლომატერია, ტ. II, გვ. 266). ჩვენის აზრით, ეს მთლად ქართული ხელოვნების ნაშთია მე-12-13 საუკუნისა<sup>1</sup>.

<sup>1</sup> ბარტოლომეის აზრით (გვ. 195) ამ წარწერაში მოხსენებულს ვახტანგის სახელს მოუცია საბაზი ლეგენდისათვის, რომელიც მოჰყავს ბატონიშვილს ვახუშტის თავის გეოგრაფიაში, ვითომც სეტის ეკლესიაში ინახებოდეს საგანძური მცხეთის ეკლესიისა, რომელიც ვახტანგ გორგასალს უნდა მოეტანოს ინდოეთიდან. ვახუშტი სწერს (იხ. ბროსეს გამოცემა, გვ. 410):

„ოდისის აღმოსავლეთით არის ეცერი (ეწერი). აქა არს ეკლესია სვეტად (სეტად) წოდებული, სახიზარი სვეტიცხოველის სამკაულ-საუნჯისა, რომელსა შინა იტყვიან სვეტის ცხოველის კანკელის ყოფას დღესაცა, რომელი მოილო გორგასალ ინდოეთიდან, წითლის იაგუნდის ქმნილი, არამედ



საჩინოდ არიან აწცა ხატნი და ჯუარნი ოქრო-ვერცხლისანი და მოოჭვილნი ქვითა მრავალნი და პატიოსანნი, დიდნი და მცირენი, რომელთა ზედა აქუსთ სასოება და პატივსცემენ. არამედ უმჯობესი ხატი უბიათ მეწკვით ოქროსათი და იტყვიან, უკეთუ აუშვათ, დალექვას ყოველსავე აქა მყოფთა ხატ-ჯვართა”.

საკვირველია, რომ ბერი ბაქრაძეც ვახუშტის სიტყვებით იწყებს თავის აღწერილობას ანუ „მოგზაურობას სვანეთში”, 1864 წლისა. ის წერს:

„სოფელსა სვანეთისა ბეროს უწოდებენ, ეკლესიასა მათსა, სეტისას, რომელსა შინა დახიზნული ყოფილა კანკელი მცხეთის ეკლესიისა (რომელიცა მოუტანია კანკელი იგი მკირფასი თველებისა ინდოეთით ვახტანგ მეფეს გორგასლანს); ხოლო ესე ეკლესია არს გაუქმებული და არა რა იპოვების სრულიად. მეორე ეკლესია არს მაცხოვრისა, რომელშიაც არს დახატული კედლები საშუალის ხელოვნებითა”.

სეტის ეკლესია მესტიის თემს ეკუთვნის და არა ბეროსა. ეს კარგად იცოდა ბერმა ბაქრაძემ, მაგრამ ის მაინც ვახუშტის სიტყვებს იმეორებს. ამიტომ უნდა ვიფიქროთ, რომ ბეროს თემში მართლაც ყოფილა ეკლესია, რომლის შესახებ ასეთი ლეგენდა იყო გავრცელებული. მართლაც, ა. სტოიანოვი სწერს თავის მოგზაურობაში (გვ. 371): „ჩვენ გავიარეთ **ბაღვდანარ** სოფლის ახლოს და შევედით **სეპ**-ის ეკლესიაში, რომელიც ყველაზე დიდია მთელს თემში. გადმოცემით, ამ ეკლესიის კანკელი მთელად იაგუნდისა მოტანილი იყო ინდოეთიდან, მაგრამ იოსებს (შესაძლებელია თვით ბეროს მცხოვრებთ) გაუძარცვავთ საყდარი”. ალბათ ეს ეკლესია აქვს სახეში ბერს ბაქრაძეს, მით უმეტეს, რომ იქ კიდევ მეორე ეკლესიას აღნიშნავს.

**6. ჯვარი ხისა.** კანკელის წინ დასადგმელი, შუა ზომისა, 75X42 სანტ. მაცხოვარი წარმოდგენილია წელს ზევით ჩვეულებრივად, სახარებით და მაკურთხეველის მარჯვენით. ნიშბი დიდი აქვს ჯვარის სახისა, რომლის ორივე მხარეს ჯერ ბერძნული წარწერაა სახელისა და მათ ქვემოდ, ორივე მხარეს, ჯვარია გამოსახული, ლურსმის თავების მსგავსი ორნამენტით. ჩარჩო შემკობილია რომბებით და რვა მედალიონით წმიდათა, რომელთა შორის ზემოდ ვედრებაა, ქვემოდ: წმ ლუკა, წმ ეკატერინე და წმ გბრიელ (მთავარ ანგელოზი), იოანე და გაბრიელი სრულის ტანით, მავედრებელის პოზით არიან წარმოდგენილნი. ხელობა მე-16-17 საუკ. უნდა იყოს (№16911).

**7. ხატი მაცხოვრისა,** ვერცხლისა, ნაჭედი, 41X31 სანტ. მაცხოვარი წარმოდგენილია წელს ზევით ჩვეულებრივად, სახარებით და მაკურთხეველის მარჯვენით; ნიშბი დიდი აქვს, ჯვარის სახისა. რომლის ორთავე მხარეს ჯერ ბერძნული წარწერაა სახელისა და მათ ქვემოდ, ორივე მხარეს, ჯვარი გამოსახული ლურსმის თავების მსგავსი ორნამენტით. ჩარჩო შემკობილია რომბებით და რვა მედალიონით წმიდათა, რომელთა შორის ზემოდ ვედრებაა, ქვემოდ: წმ ლუკა, წმ ეკატერინე და წმ პეტრე; მარცხნივ: წმ იე; მარჯვნივ: წმ გბრიელ (მთავარ ანგელოზი), იოანე და გაბრიელი სრულის ტანით, მავედრებელის პოზით არიან წარმოდგენილნი; ხელობა მე-16-17 საუკ. უნდა იყოს (№16911).

**8. ხატი მაცხოვრისა,** ვერცხლისა, ნაჭედი, 20X15 სანტ. მაცხოვარი წელს ზევითა, ჩვეულებრივი ნიშნებით. ირგვლივ ხატი შემკობილია ვარსკვლავების მსგავსი ფოლაქებით და ოთხი მედალიონით წმიდათა; მათ შორის ზემოდ, როგორც ვედრებაში, წარმოდგენილნი არიან: ღვთის მშობელი და იოანე, მაგრამ შუაში ქრისტე კი არ არის, არამედ წრე ვარსკვლავების შიგ მოქცეული დიდი ვარსკვლავით ანუ მზით. ქვემოდ არის ორი წა გიორგი. ხელობა დაბალია, მე-18 საუკ. (№16910)

9. **ჯვარი** ვერცხლისა, წნულის სახისა; ფორმა აქვს წმიდის გიორგის სამხედრო ჯვარისა; შემკობილია სამი ამავე სახის ჯვართი და ორის ქერუბიმით და სერაფიმით; მეორე გვერდზედაც ასეთი შემკობილობაა; 24,5X25,5 სანტ.

10. **სამწერობელნი**, 42X44 სანტ. გაკეთებულია ხისაგან ჯვარის სახედ და შედგენილია ოქროთი დაფერილი ნაჭედი ვერცხლით (№16920). შუაში წარმოდგენილი არიან მწირველნი: წ<sup>ა</sup> გრიგოლ და წ<sup>ა</sup> ნიკოლოზ, წარწერებით: წ<sup>ა</sup> გრიგლ, წ<sup>ა</sup> ნიკოლოზ. აქეთ-იქით ტრაპეზისა, რომელზედაც ჯვარია დასვენებული, ქვემოდ შემზადებული ტახტი მოსჩანს. ეკლესიის მამები თითქო აღსავლის კარებიდან გამოიყურებიან და ჯვარს სწერენ ერს; აქეთ-იქით მათი თანამწირველნი მთავარ ანგელოზებია: მიქელ და გაბრიელ, რომელთაც გამოაქვთ წირვის იარაღები (დიდი გამოსვლაა წარმოდგენილი); ზემოდ შემზადებული ტახტია წარწერით: I C X C და ორი ექვს-ფრთიანი ქერუბიმით აქეთ-იქით; ქვემოდ წინასწარმეტყველი ისაია, მთავარ ანგელოზებითურთ.

მეორე გვერდზე, შუაში და მარცხნივ, იგივეა, რაც პირველ გვერდზე, მხოლოდ ზემოდ ანგელოზთ მიაქვთ ცაში თორმეტ-ფრთიანი ჯვარი. ქვემოდ ექვს-ფრთიანი ქერუბიმია (№16917). ამ სამწერობელს ხელი აკლია.

11. **მეორე სამწერობელნი**, ვერცხლისა, ნაჭედი, 45X44 სანტ. ვერცხლის ტარით (№ 16918). შუაში გამოსახულია ექვს-ფრთიანი ქერუბიმი, ტეტრამორფით ფრთებს შუა; მარჯვნივ, მარცხნივ და ზემოდ მისა მწირველნი მთავარ ანგელოზებია, რომელთაც გამოაქვთ ბარძიმი, ჯვარი, გვირგვინი და სამწერობელნი; ქვემოდ ორი მთავარ ანგელოზი. მეორე გვერდზე იგივე ფიგურები, ხოლო ზემოდ მთავარ ანგელოზებს გვირგვინი არ გამოაქვთ (16919).

გრაფინია უვაროვისა ამ სამწერლობლებს ადარებს გელათისას და პოულობს მათ შორის მსგავსებას (გვ. 134, ტაბ. XL). საერთოდ ეს მართალია, მაგრამ გელათისაზე წმიდა ნიკოლოზი არ გვხვდება და არც წინასწარმეტყველი ისაია. გელათის სამწერლობლებს მე-16 საუკუნეს მიაწერენ და ესენიც მე-16 საუკუნის უნდა იყოს.

12. **დროშა**, რომლის ტარი თავდება ზემოდ ფართო შუბით, რომელიც ვერცხლიდან არის ჩამოსხმული და მასთან ოქროთია დაფერილი (იხ. ფოტო №16908 და 16909). ხეტარი დროშისა ზემოდ ნაწილზე შედგენილია ოქროთი დაფერილი თხელი ვერცხლის ფურცლით, ბასმით (იხ. ფოტ. №16913 და აგრეთვე №16908-909). ამაზე ჩამოკიდებულია მატერიიდან შეკერილი ლომის სახე და როცა ცხენოსან კაცს ეს დროშა უკავია ხელში და ცხენი გაჩქარებით, თოხარით მიჰყას, ან აჭენებს, მატერია იშლება ჰაერში ლომის სახით (იხ. უვაროვისა, გვ. 131-134, სურათი, 46, 47). მატერია, რომლიდანაც კერავდენ ლომის სახეს, ეტყობა, ხშირად იცვლებოდა. ბარტოლომეის დროს ის ნაფლეთებს შეიცავდა ხოლმე; მამასადაამე, ის დიდი ხნის ყოფილა; უვაროვის დროს ის აბრეშუმის მატერიიდან იყო გაკეთებული; ჩვენ დროს კი სულ უბრალო, ბამბის ყვითელ მატერიიდან იყო შეკერილი (იხ. ფოტ. №16913). მაგრამ ჩვენ მოვიკითხეთ წინანდელი დროშაც. ვნახეთ და ჩამოვიტანეთ ტფილისში და გადავეცით საისტორიო და საეთნოგრაფიო საზოგადოების მუზეუმს.

დროშის ძვირფას ნაწილს შეადგენს, რასაკვირველია, დროშის თავი, სიგრძით 23 სანტ. განით, ქვემო ნაწილთან 12 სანტ. თავი ხეტარზე ჩამოსაცმელი ლულით და მისი

გაგრძელების ბრტყელი ზოლით იყოფა ორ ნაწილად; ორივე ნაწილზე ერთი პირისა წარმოდგენილი არიან ფიგურები, მარცხნივ: წა იოანე ლატალისა, წარწერით, მსხვილი ასომთავრულით: წა იონა ლატრისა (sic), (იხ. ფოტო №16908); მარჯვნივ : წმიდა გიორგი სეტისა, წარწერით: წა გი სეტისა.

წმიდა გიორგი წარმოდგენილია რომაულ საომარი ტანისამოსით, შუბით და ფარით, გრძელი მოსასხამით და ხმლით წელს უკან. ნიშბი, როგორც იოანესი, ისე ამისი წერტილებიანი წრისაგან არის.

სიტყვა „ლატარი“ ეხლანდელი „ლატალის“ მაგიერად გვხვდება ლატალის ეკლესიების წარწერებშიაც. მეორე პირის მარჯვენა ნაწილზე დროშის თავისა წარმოდგენილია ფიგურა უღრის მთავარ ანგელოზისა, წარწერით: მთავარ-ანგელოზი უღრისა (იხ. ფოტო №16909). მთავარ ანგელოზი გამოწყობილია რომაულ საომარ ტანისამოსში ფრთებით უკან, სრულის ტანით, მარჯვენა ხელით მხარზე გადებულს ამოწვდილ ხმალს იკავებს, მარცხენა ხელი წელზე ჩამოკიდებულ ხმლის ქარქაშზე დაუდვია. მარცხენა ნაწილი მეორე პირისა უკავია ასომთავრულ წარწერას, რომელიც ჩამოგრძელებულია თავიდან ბოლომდის (იხ. იგივე ფოტოგრაფია). ჩვენს ფოტოგრაფიაზე წარწერა მშვენიერად მოსჩანს და მისი შემოწმება ადვილია. ეს საჭიროა, ვინაიდან მის რუსულ თარგმანში და გაგებაში ბევრი შეუსაბამობა ჩადენილი მკვლევართა მიერ. წარწერა იკითხება ასე:

ქ	ქ.
უბე	უბედ-
დნიე	ნიერ-
რნ :	რენ
ღთ	ღმერთ-
მნ : ერთო	მან ერთო-
ბილსა : ჯ	ბილსა ჯე-
ევსა : ბე	ვსა ბედ-
დნიერსა :	ნიერისა
სუნთისასა :	სუნთეთისასა
ლომი : და დრ	ლომი და დრო-
შის თავი :	შის თავი
დროშიშურთ	დროშითურთ,
თ : ჩემ დიდისა .	ჩემ დიდისა
მონასტრისა :	მონასტრისა
წნრისა : გ-გლ	წინამძღუარისა გრიგოლ
კოპსძისა	კოპსძისა-
გან : მოჯ	გან მოჯ-
სენენ (sic)	სენე-
ბული.	ბული.

ეს წარწერა გადმოღებული აქვს ბარტოლომეის (იხ. ტაბ. II. №25), მაგრამ მის წაკითხვაში ბროსესს შეცდომები მოსვლია (იხ. ბარტოლომეი, გვ. 231), სიტყვა „სუნთეთისასა“ წაკითხულში გამოშვებულია. გამოშვებულია ეს სიტყვა ალ. ხახანაშვილის ტექსტშიც (გვ. 37). დ. ბაქრაძე ბარტოლომეის უჩვენებს, წარწერა არ მოჰყავს და რუსული თარგმანი მცდარია (გვ. 97).

წარწერიდან და დროშის თავის ფიგურებიდან ცხადათ სჩანს: სამი ხევი სვანეთისა, ლატალისა, სეტისა და უღრისა გაერთიანებულან საერთო მიზნებისათვის და ამ გაერთიანების აღსანიშნავად სეტის მონასტრის წინამძღვარს გრიგოლ კოპასძეს გაუკეთებია და შეუწირავს ლომი და დროშის თავი დროშითურთ. ამ დროშის თავზე მას გამოუხატავს მფარველნი ანუ პატრონნი თითოეული ხევისა, ესე იგი წა გიორგი სეტისა, წა იონა წინასწარმეტყველი ლატალისა და მთავარ ანგელოზი უღრისა. ამათ სახელობაზე არის აშენებული თავი ეკლესიები ამ ხევებისა.

უღრის ხევად იგულისხმება, როგორც სამართლიანად აღნიშნა ბროსსემ, უსათუოდ ლენჯერის ჰევი, ვინაიდან ეს ჰევი მდებარეობს სეტის და ლატალის ხევთა შუა და უამისოდ ლატალისა და სეტის გაერთიანება შეუძლებელი იქნებოდა.

თუ გაერთიანების სიმბოლოს წარმოადგენენ მფარველნი წმიდანნი ხევებისა, ლომი, გრიგოლ კოპასძის შეწირული, იქნებოდ სიმბოლო გაერთიანებული ძალისა, მათი სიმხნისა და ძლიერებისა. უნდა ვიფიქროთ, ეს ლომის ფიგურა იყო ჩამოსხმული ვერცხლიდან. სვანეთში ჩვენ არ გვინახავს ცხოველის ჩამოსხმული ქანდაკება, მაგრამ საქართველოს სხვა ადგილებში კი გვხვდება. ერთი ასეთი საუცხოო ცხვრის ქანდაკება ვერცხლისა იკოთის ეკლესიიდან ჩვენ კიდეც გამოვეცით (იხ. ჩვენი არქეოლოგიური მოგზაურობანი და შენიშვნანი, რუსულ ენაზე, წიგნი V , გვ. 66).

გრიგოლის მიერ შეწირულ ლომს ჩვენამდის არ მოუღწევია, მაგრამ წარწერის შინაარსი ცხადჰყოფს, რომ ასეთი ლომის ქანდაკება არსებულა. მკვლევართ კი ყველას ასე გაუგიათ, თითქო **ლომის ჰევი** ყოფილ იყოს სახელი შეერთებული სამი ჰევისა (ბაქრაძე, გვ. 97; ხახანაშვილი, გვ. 37; გრ. უვაროვისა, გვ. 132). გრ. უვაროვისა სწერს დ. ბაქრაძის და შანშიევის მიხედვით:

ხსენებული დროშა დიდათ მიჩნეულია ადგილობრივი სვანების მიერ; მას განსაკუთრებული პირი ჰყავს მიჩნეული შესანახად და გამოსატანად. სვანების გადმოცემით ეს დროშა თამარ მეფის მიერ არის მათდამი ნაანდერძევი. წელიწადში ერთხელ **ულიშობას**, ესე იგი, წმიდა ელიას დღეს, გამოიტანენ მას და ერთი ცხენოსანი ამ დროშით ჩამოიარს მთელს სოფელს; თუ ამ დროს მატერიის ლომი კარგად გაიბერება, გაიშლება და ლომის სახე კარგად გამოჩნდება, ეს დიდი ბედნიერების და კარგი მოსავლის მომასწავებელია ( შანშიევი, მცირე შენიშვნები სვანეთში მოგზაურობიდან, ზაფხულში 1885 წ. რუსულ ენაზე, გვ. 129).

13. **დოქი** ანუ **თუნგი**, ვერცხლისა, შესანიშნავი ხელობისა, 5 გირვანქა წონით, 40 სანტ. სიმაღლით (იხ. ფოტო. № 16923).. სახელური დოქისა მაღალია, სადა, მაგრამ ზედ უზის საუცხოოდ გამოქანდაკებული მხევი, მგელ-კაცა (ლეოპარდი), რომელიც პირდაღებული და კისერ-წაშვერილი მიიპარება წყლისაკენ (სახე უფრო გარკვეულად იხ. ფ. №16931-16933). ფსკერი დოქისა ცოტა ჩაღრმავებულია შიგ ჩაჭრილი მსხლის მსგავსი ფიგურებით და ირგვლივ კუბიკური წარწერა უვლის (იხ. ფოტ. №16921). მუცელი დოქისა საზოგადოთ სადა დიდია და სამი მხრით შემკობილია ოქროთი მოყვითლულ „დროზნიცებით“, რომელშიაც მშვენიერი ნახელავი სირინოზების სახეებია წარმოდგენილი. ერთ მათგანში ორი სირინოზია მოთავსებული, დანარჩენ ორში თითო (იხ. ფოტ. №№ 17616 და 17615). ზემო ნაწილზე დოქისა ხელოვნურად გამობერვით განჭედილს და მოყვითლულ აშიაზე არაბესკებში წარმოდგენილნი არიან ძაღლები, რომელნიც მისდევენ ლეოპარდებს (იხ. ფოტ. №16923). ყელი დოქისა მაღალია, აგრეთვე მაღალის და არაბესკებით შემკობილის ტუჩით ამ ყელზედაც სამის

მხრით ოქროთი მოყვითლულ „დროზნიცებში“ მოთავსებულია თითო სირინოზი (იხ. ფოტ. №№16931-16934). იქ, სადაც დოქის მუცელი ყელზე გადადის, პატარა მოჩუქურთმებული სარტყელია; ცოტა უფრო ზემოდ მეორე სარტყელია არაბესკებით და კუბიკური წარწერებით. ასეთივე სარტყელი მოიპოვება კიდევ სულ ზემოდ, ყელის დასასრულს (იხ. ფოტ. №№16923, 16931-16934). უვაროვის სიტყვით, რომელსაც ეს დოქი დაწვრილებით აღწერილი აქვს (გვ. 139. ტაბ. XLI, №№71, 72). კუბიკური წარწერები არ უჩვენებენ არც თარიღს, არც ისტორიულ სახელებს, არამედ შეიცავენ ჩვეულებრივ სურვილებს ბედნიერებისა, სიმართლისა, სიმდიდრისა, ძალისა და სიმხნისა მისი პატრონისათვის.

სვანები ამ შესანიშნავ დოქს თამარ მეფის შემოწირულად სთვლიან და სხვა ჭურჭლებთან ერთად კოშკში ინახავენ. რვა კარგად გამოსული ფოტოგრაფია ამ დოქისა საკმაოდ გვაძლევს წარმოდგენას მის დეტალებზე. ეს დოქ-თუნგი უნდა ჰქონდეს სახეში ბერს ბაქრამეს, როდესაც სწერს: დიდი თუნგი წვერიანი, ვერცხლისა, 5 გირვანქა.

14. **დოქი ვერცხლისა**, 39,5 სანტ. სიმაღლით, მე-12 საუკუნის ქართული ხელობისა (№16926). ფეხი დოქისა მომაღლოა და დასერილი კოვზების მსგავსად და მოყვითლული; მუცელი მრგვალი აქვს, შემკობილი სამი „დროზნიცით“, რომელნიც მოცულნი არიან ნაზი სევადის ორნამენტით. იქ, სადაც მუცელი ყელზე გადადის, ოქროთი დაფერილი სარტყელია, ნაჭედი, ზოლებით შემკობილი. ყელი მაღალი აქვს; პირი ფართო, რომელს უვლის ვიწრო ლამაზი სარტყელი. ხელი მსხვილი აქვს და მაღალი, ნაწილობრივ მოყვითლული და შემკობილი წახნაგებით. სახელური უერთდება დოქს ლომის ანუ ვეფხის პირით. პირის ქვემოდ სევადით გამოყვანილია დიდი ასომთავრულით წარწერა, რომელიც არ იყო შემჩნეული ბარტოლომეის, ბაქრამის, უვაროვის და ხახანაშვილის მიერ. წარწერა ჩვენ გადმოვიღეთ ოთხ ფირფიტაზე (იხ. ფოტ. №№ 16927- 16930). ის იკითხება ასე:

: ქ : ღთნ : უბდ ორნ : ღთსა : სწორსა : მფთა : მფსა :  
გის : მწს : ამრსა : ქვთრსგნ.

ესე იგი: ღმერთმან უბედნიერენ ღმრთისა სწორსა მეფეთ მეფესა გიორგის მიწისა ამირასა ქავთარისაგან.

აქ საუბარია მეფე გიორგი მესამეზე, თამარ მეფის მამაზე, (1156-1184) და ეპიტეტი ღვთის სწორი მას ეკუთვნის. ამირა ქავთარ ცნობილი არ არის ჩვენს წყაროებში, მაგრამ გიორგი მესამის დროს იხსენიება ერთი ქავთარ მეჯინბეთუხუცესი. შესაძლებელია ის შემდეგ გახდა ამირად ქართლისა ან ტფილისისა (H.G.I.p. 399) ეს დოქი აქვს სახეში ბერს ბაქრამეს, როდესაც სწერს: დიდი თუნგი ვერცხლისა, გიორგი მეფისა, 4 გირვანქა.

ამის და წინა დოქის სურათები მოთავსებულია აგრეთვე ალბომში „ვასტოჩნოე სერებრო“, პეტერბურგი, 1909 წ. ტაბ. LXXIII, 129, 130. ამას გარდა ერთ-ერთ ტფილისის პერიოდულ გამოცემაში მოთავსებული იყო სურათი უკანასკნელი დოქისა და ჯეროვანად განმარტებული მისი წარწერაც. სამწუხაროდ, ეს გამოცემა ეხლა ხელში არა გვაქვს, არც მისი სათაური გვახსოვს და არც ავტორის გვარი. ავტორი ჩვენს შემდეგ ყოფილა მესტიაში და ამბობდა, თითქო მის მეტს წარწერა არავის შეენიშნოს, მაგრამ, როგორც მკიხველი ხედავს, ჩვენ წარწერა არა თუ შევნიშნეთ,

არამედ მის გადმოღებას ოთხი „ფირფიტა“ მოვანდომეთ. ეს სურათები უკვე იყო ჩვენს უნივერსიტეტში და მუზეუმებში, მანამ ავტორი მესტიაში გაემგზავრებოდა.

15. ჩაფი ანუ ჩაყვა, ვერცხლისა, ორი პატარა სახელურით, ფეხებიანი, 23X26 სანტ. მოყვანილობა ჩაფისა ფრინველს მოგვაგონებს. ქვემო ნაწილზე ნაჭედი გამობერვილი შემკობილობა აქვს მსხალის მსგავსი სახეებისა, ხოლო ზემოდ ნაჭედი ორნამენტალური სარტყელი. სახელურზე ერთი ლალი უზის. საერთოდ ლამაზი ნახელავია (იხ. ფოტ. №17023); ფსკერზე გარედან მხედრული წარწერა აქვს (№16935):

: ჩუენ : მეფეთ : მეფემ და : კელმწიფემ დადიანმან :  
პატრონმან : ვამეყ : დედოფალთ : დეოდფალმან ბა-  
ტონმა : ელენემ შემოგწირეთ : ჩაყვა : ესე შენ : წმიდა :  
გიორგის : სეტისას : ჩვენდა სადღეგრძელოდ და გასა-  
მარჯვებლად : შვილების : ჩვენის : აღსაზრდელად.

ამ წარწერაში მოხსენებული ვამეყ არის ვამეყ მესამე, დადიანი, ძე გიორგი ლიპარტელიანისა. ის მემკვიდრე იყო ლევან მეორე დადიანისა, მაგრამ გაძევებულ იქმნა სამეგრელოდან ქართლის მეფე ვახტანგ მეხუთის მიერ და გადაიხვეწა სვანეთში, სადაც მოკლულ იქმნა 1660 ანუ 1661 წელს (H. G. II. I liv. p.p. 274-280. Chroniques Geor. p.p. 86. . 87). ამაზე უფრო ვრცელი მისი წარწერა არის ამგვარსავე, მაგრამ უფრო დიდს ჩაყვაზე, რომელიც ჩვენ ვნახეთ ოთარ დადეშქელიანის სახლში, ეწერში. ამის შესახებ ქვემოთ იქნება საუბარი. ბერი ბაქრაძე სწერს: დიდი ჩაფი ვერცხლისა რუსუდან დედოფლისა (?), 5 ¼ გირვანქა. აქ თუ სხვა ჩაფი არ იგულისხმება, მაშინ რუსუდან დედოფლის სახელი შეცდომით უნდა იყოს მოყვანილი.

16. სრულიად ასეთივე მეორე დიდი ჩაყვა ანუ ჩაფი, 26X23 სანტ. განირჩევა პირველიდან მხოლოდ შემკობილობის ხასიათით ზემო სარტყელისა (იხ. ფოტ. № 16936). ეს უნდა ჰქონდეს სახეში ბერს ბაქრაძეს, როდესაც სწერს: დიდი ბადია, 4 გირვანქა. სახელური ბატის ნისკარტს ჩამოჰგავს.

17. მესამე ასეთივე ჩაყვა, 24X 19 სანტ. უფრო სადაა, ვიდრე პირველი ორი.

18. სასანთლე ვერცხლისა, სადა მსგავსი ყირამალად დამდგარი საყვირისა, 27 სანტ. სიმაღლით (იხ. ფოტ. № 16939). ირგვლივ აქვს მხედრული წარწერა:

ქ : ესე სასანთლეს (sic) დეის მამა ჯოლიას არის შემდეგ:

შემოგწირეთ : ჩვენ : მეფეთ მეფემ : პატრონმან : ბაგ-  
გრატ და თანა : მეცხედრემან : ჩუენმა დედოფალმან :.  
ბატონმან : თამარ სასანთლე ესე :. ხელმწიფობისა ჩვე-  
ნისა : წარსამართებლად :. წმიდას :. გიორგის . სე-  
ტისას :. ქრ-ს : სამას :. ორმოცდა :. თერთმეტსა :.

ქორონიკონი უდრის 1663 წელს. აქ მოხსენებული მეფე ბაგრატ არის იმერეთის მეფე ბაგრატ მეოთხე (1661-1680), თამარი, კონსტანტინე მუხრან-ბატონის ასული, მანვე ამავე 1663 წელს შეირთო.

19. **საცეცხლური ბრინჯაოსი**, სირიული რიგისა, ტლანქი გამობერვილი სახეებით ახალი აღთქმის სცენებისა. ეს სცენები კარგად მოსჩანან ჩვენს სამს ფოტოგრაფიაზე, №№16937-16939.

20. **ზარი დიდი**, გატეხილი მხედრულის წარწერით (იხ. ფოტ. №16911).

ქ. ჩუენ :: ღთივ :: გუირგუინოსანმან :: მეფეთ :: მე-  
ფემან :: ბატონმან :: ალექსანდრე :: შემოგწირეთ :: მცი-  
რე :: შესაწირავი :: ზარი :: ესე :: თქუენ :: მოწამეთა ::  
მთავარსა :: წმიდას ; გიორგის :: სეტისას :: მეფობისა ::  
ჩუენისა :: წარსამართებლად :: და დღეთა :: ჩუენტა ::  
სადღეგრძელოდ :: ჰოი ; წმიდაო :: გიორგი :: მეოხ ::  
მცველ : და მფარველ :: გუექმენ :: აქაც :: და მას ::  
დღესა :: დიდსა :: განკითხვისასა :: წინაშე :: ღთისა ::  
ამინ.

21. **მეორე უმცროსი**, მაგრამ კარგად შენახული ზარი, იმავე ალექსანდრე მეფისა; ზარი შეწირულია სეტის მთავარ ანგელოზის ეკლესიისათვის, მაგრამ ინახება ამ წის გიორგის ეკლესიასთან. აქვს შემდეგი მხედრული წარწერა:

ქ. შემოგწირეთ თქუენ სუანეთის სეტისა მთავარანგე-  
ლოზსა ჩუენ მეფეთ მეფემან ალექსანდრემ ზარი ესე.  
შეიწირეთ წმიდანო მთავარანგელოზნო მცირე შემოსა-  
წირავი ესე მეფობისა ჩუენისა წასამართებლად და ცოდ-  
ვათა ჩუენტა შესანდობარად.

ყურადღების ღირსია, რომ წარწერებში ეხლანდელი თემის სახელი მესტია არ გვხვდება, არამედ ყოველთვის სეტი, წინეთ ალბათ სახელი მესტია არ არსებობდა და მთელი თემის ანუ ხეობი სახელი იყო სეტი.

22. ბარტოლომეის დროს ამ ეკლესიაში ინახებოდა **ლაგამი** უცხო ფორმისა, **ცული** მახვილოვანი ორივეს მხრით და **ფარი**. დეკანოზი (უკეთ ვსთქვათ, პაპი) ირწმუნებოდაო, ამბობს ბარტოლომეი, რომ ეს ლაგამი ოდესღაც თამარ მეფეს ეჭირა ხელშიო და მით ატარებდა ცხენსაო, ხოლო ცული მის წინ დაჰქონდათო. ფარზე ყოფილა ამოჭრილი რამოდენიმე სანახევროდ გადასული არაბული ლოცვები, უმნიშვნელო (იხ. ბარტოლომეი, გვ. 169). ეხლა არც ერთი ეს ნივთი აღარ არის.

23. უფრო სამწუხაროა მეორე ძვირფასი ნივთის დაკარგვა, რომელიც წინეთ ინახებოდა ამ ეკლესიაში. ეს იყო **ვერცხლიდან გამოქანდაკებული ანუ ჩამოსხმული სირინოზი**, რომლის წონა ყოფილა ბერი ბაქრაძის აღწერილობით, სამი გირვანქა. ის ასე იხსენიებს ამ ნივთს: სირინოზნი ვერცხლისა, სამი გირვანქა; ორივეს მხრით თავი ქალია და ბოლო თევზისა. ჩვენ დიდი მადლობელი უნდა ვიყოთ ბერნოვილისა, რომელსაც გადმოუხატავს ეს ნივთი და მოუქცევია მისი სურათი თავის გამოცემაში

(გვ. 137, სურათი 17). ამ სურათითაც ცხადათ სჩანს, თუ რა შესანიშნავი ხელოვნების ნივთი ყოფილა ეს სირინოზი; ბერნოვილის სიტყვით, მისი სიმაღლე ყოფილა 40 სანტ. ის სამართლიანად შენიშნავს, რომ თავი და თავის შემკულობა ამის ნამდვილი ქართული ხასიათის არისო. ეს ნივთი საკმევლის შესანახად ყოფილა განკუთვნილი.

24. ბერნოვილს უნახავს ამ ეკლესიაში კიდევ **ორი ვერცხლის ბარძიმი**, შემკობილი ორნამენტებით და მათი სურათი მოუთავსებია თავის შრომაში (გვ. 138). მისი აზრით, ესენი სამასი თუ ოთხასი წლის წინათ უნდა იყვნენ გაკეთებული. ჩვენის აზრით, კი ბევრად უფრო გვიანია. არც ეს ბარძიმები შენახულა ჩვენს დრომდის.

25. **სახარება**, 26X 22 სანტ. დაწერილი ეტრატზე კარგის ასომთავრულით ორ სვეტად, თითოეულ სვეტზე 19 სტრიქონია, ყდა ხისა აქვს, ტყავ-გადაკრული. ორივე მხარე ყდისა შემკობილია ჯვართ, რომელიც გამოყვანილია ვერცხლის ლურსმის თავების მაგვარად. ყდა დაზიანებულია, ფრუცლები არეული. შეიცავს 304 ფურცელს. ამას გარდა ოთხ ფურცელზე წარმოდგენილია კარგი ნახელავი ოთხი მახარობელის სურათი, ფერადის წამლებით დახტული. ესენი ყველა გადმოღებულია, (იხ. ფოტ. №№17183-17186). რვა ფურცელი (და არა შვიდი, როგორც ა. ხახანაშვილი ითვლის), უჭირავს ფერადებითვე საუცხოოდ შესრულებულს კანონებს (ესენიც გადმოღებულია, (იხ. ფოტ. №№17187-17194); ერთ ფურცელზე ასეთივე შემკობილი კამარა არის ორ სვეტზე დაყრდნობილი და ამ კამარის ქვეშ წარმოდგენილია ერთობ ლამაზი წნული ჯვარი წითელს ფონზე მცენარეებითურთ დაბლა. ჯვარი შესრულებულია მწვანე ფერადებით. ჩვენ ესეც გადმოვიღეთ (იხ. №17195). ერთი ფურცელი ამ სახარებიდან ამოჭრილი ჩვენ ვნახეთ ლატალის საზოგადოებაში მცხოვრებ სევასტი ჩარკვიანის ხელში; ამას ეს ჯიბეში უძევს, საფულეში, ოთხად დაკეცილი, და სულ თან დააქვს, რომ არვინ მოჰპაროს. ეს არის პირველი ფურცელი მე-21 რვეულისა. ამ ფურცლის ქვემო აშიაზე მერმინდელის ნუსხა ხუცურის ხელით სწერია:

„სეტისა წა ნდა გიორგის შემოგწირე მე თავადმა ზურამ  
ჩარკვიანმა ჯატი ესე მაცხოვრისა და შემიწყალე მონა  
შენი ამინ“.

როდესაც მე ვკითხე, თუ რად ამოიღო ეს ფურცელი სახარებიდან, მან მიპასუხა: ეს ჩემი თავადობის საბუთია და მე უნდა მქონდესო. ამაზე მესტიელებმა დასტური დამცესო. ჩარკვიანები აზნაურები იყვნენ და თავადებად საბუთებში არა სჩანან; შეიძლება მინაწერი ყალბი იყოს.

სახარების ტექსტი იწყება ევსების წერილით კარპიანესადმი. იოანეს სახარების ბოლოში წვრილის ნუსხა ხუცურის ხელით სწერია:

დ-ბ ღ-ა დაესრულა/ წ-დ ესე წიგნი სხრბისაჲ/ ო-ო ივ  
ქ-ე მოწყალეზიტა/შენითა : შეიწყალე : და ადი/დე სუ-  
ლიერად : მონაუ შენი/ მომგებელი წ-დისა ამის/ წიგ-  
ნისაჲ ილ-ნ იშხნელი ა-ნ/იყვნ :.

ხელნაწერის ბოლოს ვრცელი შესავალის შემდეგ არა ისტორიული შინაარსისა ვკითხულობთ:

რლისათსცა მე საწყალ/ობელმ-ნ და ყლთა შ-ს მკ/უი-  
დრთა სფ ლსთან/ კლულეევანმ-ნ და უნა/ნელმ-ნ გლა-



ხაკმნ ილა/რიონ ძემ მასორსმნ/ იშხნელ ეპისკო-  
პოზ/მან მოვიგე წ'დ ესე ო/თხთავი და აღვაწე/რიე ფა-  
სითა სრულე/ბითა რ'ფ დი, წადიერე/ბით სურვილი და  
სიყუარული მაქუნდა / ამისა მიმართ და შევი/ყუარენ  
თხრობანი ესე/ და ესეც მსგავსად ძალია ჩემისა რ'ლი  
პატი/ჟთა მ'თ ზემო ვსენებულ/თა დაჯსნასა გუაოწყებს/  
და კეთილთა მ'თ მქსნელისა / ჩ'ნისა მ'რ ყოფ'ლთა<sup>1</sup> გუ-  
ახარ'ბს/ და შერაჲ ვიყურე ვილუაწე / მოგებად და  
აღვწერე ლავრ/ასა შ'ა კ'ხლსა წ'დისა წინა მორბედისა  
იოვანესა ოშკს კლ'თა გლახ/კისა გბ'რლ გ'ის ძმის წუ-  
ლისაჲ/თა ქრონიკუნსა .: ს'ნ'გ .: სა .:/

სალოცველ'დ და სადიდებე/ლად ღ'თივ მ'რწმონეთა  
მ'ფთა / ჩ'ნთა ბგ'რტ კურაპალატისა/ და დ'დისა მათისა  
მ'რმ დედოფ/ლთა დედოფლისა ად'ნ ღ'ნ/ სალოცველად  
და სალხინებ/ლად საწყალობელისა ს'ლისა/ ჩემისა და  
სა[ლოცვლ'დ სულთა]/ თ'სთა ჩემთა ც'ცხლთა და  
მ'ცვ/ლებ'ლთასა და სალ'ცვე/ლ'დ ძმისა ჩემისა იოვა-  
ნესა/და შვილთა მისთა მასო/რის და გ'ისთ'ს აწ გვედ/-  
რები ყლთავე რ'ნი იმსახო/რებდეთ და აღმოიკიტიხვი/-  
დეთ წ'ა ამს წიგნსა ვსენე/ბულმცა ვარ წ'თა შ'ა ღ'ც/-  
ვთა თქნთა .: / აწ რადსაცა ვის მიზეზი/სა გზისა (sic)  
წ'დ ესე წიგნი ვის/თ'ნაცა მოიწიოს და შემო/გივრდეს  
(sic) და ჩემად ვეღარ / მოიწიოს და მე გამომა/ჯუას  
განა თო მე თვთ და / ოტეო ვის და მივსცე სა/ლოც-  
ველად ჩემდა და მას გამოა'ჯუას [კრულმცა] არს სიტყუ-  
ითა/ დაოსაბამოდსა ღ'თისაჲთა / ექუსთა კრებათა მად-  
ლითა / . . . ე : პტრიაქთა ჯ'ითა წ'თა მოციქუ/ლთა მ'დლი-  
თა იოვანე ქ'ართლისა : კ' : ჯ'ითა და / ვინცა ვინ ესე  
ჩემი დაწე/რილი საქმით აღასრულოს/ ჯ' დ აქუს ღ'თი-  
ასგ'ნ და ჩემ/გლახაკისაგ'ნ.: /

აწ გევედრებით ყლთა რ'ი / შმდგომით შ'დ ღირ(ს)  
იქმნეთ და / გ'ოლის ჳმა ყავთ პოვნად / სარგებელისა  
ნამოშავევისა / ამისგ'ნ ჩ'ნისა რ'მეშინის ნუ / უკუე  
და არღარა საძიებელ / იყო ამიერითგ'ნ დ'დი ესე სა-  
იდ / ომლოჲ ვსნის'დ ვინაჲთგ'ნ აწ / ვე უწყი ეს  
წ'წტყლბათა / აღსრულებ'დ და მიდრეკილ ა / რ დღე  
და შეურაცხს ოქრუჲ / სიწმიდე წ'ე მდებარე არს ძღ'ლთა / და  
მარგალიტი დაითრგუნვის ღ'რ / თ'ა მ'რ გ'რნა ოქრუჲ ოქრუჲ არ /  
ს და მარგალიტი ღ'რთ'ა მ'რღა თო /  
დაითრგუნვის იხილეთ გ'ნყო / ფილებ'დ შ'ს მრგ'ლტის  
და ღ'რთა / ყავთ ვსენებაჲ ჩ'ნი კ'თლი და მიით / უაღეთ  
გულის მოდგინებ'დ რ'ა / თ'ქნ და ჩ'ნ ნაყფ'რ ვიპ'ვნთ

---

1 უნდა იყოს: ყოველთა.

ოისა / ჩნისა იჲ ქსა მგამოჩინებსა მის / სა დზ  
თნა სამარადისოდ თმთ / ერთარსებითა სლისა წდი /  
სადთა უკუნი / თი ოკე / ან :

ეს ანდერძი შესავალითურთ ჩვენ სრულად გვაქვს ფოტოგრაფიულად  
გადმოღებული, იხ. №17182, 17207.

ამ სახარებას იხსენიებს ბარტოლომეი; ბაქრაძეს ნაწილობრივ აქვს ანდერძი  
გადმოწერილი და შეცდომით ოშკის მონასტრის მაგიერ ოპიზას კითხულობს (გვ. 98);  
ხახანაშვილს სრულად აქვს ტექსტი ანდერძისა მოყვანილი, მაგრამ შეცდომებით;  
ზოგიერთი სიტყვები მას გამოშვებული აქვს. ზოგიერთ ადგილებს ტექსტისა ის  
ადარებს სხვა ხელნაწერ სახარებათა ადგილებს (იხ. გვ. 9-13). ხელოვნების მხრით  
სახარება აღწერილი აქვს გრ. უვაროვისას (გვ. 149-150), ორი სურათით, ერთი იოანე  
მახარობელისა (სურ. 78) და მეორე კამარისა (სურ. 79).

26. დ. ბაქრაძე უჩვენებს სეტის ეკლესიაში პატარა ჯვარცმის ხატს, წარწერით (გვ.  
17);

ქ ჯუვრცმაო ქ	ჯუარცმაო ქ-
რისტესო : მეოხ	რისტესო, მეოხ
ექმენ : სას	ექმენ სას-
ოებით : მო	ოებით მო-
ქენესა : თქ	ქენესა თქ-
ვნსა : გუგა	ვენსა გუგა-
ელიგას :	ელიგას
უდარანსა : და : მღ	უდარანსა და მეულ-
ლსა : მსა : ლელას .	ლესა მისა ლელას.

ეს ხატი იქ აღარ მოიპოება.

ეს ხატი ჩვენ იქ არ გვინახავს, როგორც არ უნახას ეს გრაფინია უვაროვისას და ა.  
ხახანაშვილს, მაგრამ შემდეგ ბ. ნიჟარაძემ ტფილისში მოგვიტანა პატარა ვერცხლის  
მოოქრული ფირფიტა, რომელიც, ექვს გარეშე, შეადგენდა ზედა პირს პატარა  
სახარების ყდისა. აქ შუაში წარმოდგენილია ჯვარცმის ფიგურა წინამდგომებით,  
მარიამით და იოანეთი; თავი მაცხოვრისა დაზიანებულია, ოთხივე მხრით შუა  
ფირფიტას ახლავს მცირე ფირფიტები, რომელნიც ფარავდენ წინეთ ოთხივე მხარეს  
სახარების სისქისა და ამათზე მოყვანილია ზემო აღნიშნული წარწერა, ხოლო ეხლა ის  
ნაწილი, სადაც წერებულა მეშვიდე სტრიქონის ასოები: ელი, მოტეხილია. ამას გარდა,  
კუთხეებში ამ მცირე ფირფიტებისა წარმოდგენილია წელსზევითი ფიგურები  
წმიდათა; ამათში ქვემოდ, მარჯვენა კუთხეში, ღვთის მშობლის ფიგურა მთელად  
დაცულია, მარცხნივ, დაზარალებულია და მარჯვნივ ქვემო ნაწილი დაცული. ყველა  
ფიგურას ხელები გულზე აქვს გაშლილი სავედრებლად. ჯვარცმის ხატს მესტიაში  
ბერი ბაქრაძე იხსენიებს 1864 წლის აღწერაში ამ სახით:

„ხატი ჯვარცმისა მცირე, ოქროსი, შემკობილი გუგა გელიგას უდარანსა და  
მეუღლისა მისისა ლელუსაგან“.

ცხადია, ეს შეცდომით წაკითხულია, მაგრამ ეჭვი არ უნდა იყოს, რომ ორივე ავტორს ეს ჩვენ მიერ აღწერილი ფირფიტა აქვთ მიღებული ჯვარცმის ხატად. ხელობა მე-16 საუკუნის უნდა იყოს. ფოტოგრაფიული სურათი აღნიშნული ფირფიტისა ხელთა გვაქვს, მაგრამ ეს ერმაკოვის კოლექციაში არ შედის.

### სოფელი ლაღამი.

სოფელი ლაღამის ეკლესია მაცხოვრისა ძველია, თლილის შირიმის ქვისაგან აშენებული. ეს ეკლესია სხვებისაგან დიდათ განირჩევა. სულ ქვემოდ, მიწაში ამას სარდაფი აქვს, რომელიც საბერო სენაკსა ჰგავს და მართლაც, სვანების გადმოცემით, აქ ბერი ცხოვრობდა. აქედან თქვენ ადიხართ მეორე, უფრო ვრცელს ზალის მსგავს ოთახში, რომელიც თაღებით არის მოცული, მაგრამ ეს კიდევ ეკლესია არ არის, ამას საკურთხეველი არ ახლავს. ეკლესია არის იმ ზალის ზემოდ, პატარა; მას დასავლეთით ეკვტერი აქვს და აქედან არის შესავალი ეკლესიაში. ამნაირად, ეკლესია თითქო სამ-სართულიანია, მაგრამ ჩვენის აზრით, სამივე ნაწილი სხვა და სხვა დროს არის აშენებული და ამიტომ ერთი სახე არა აქვს. ეკლესიის ნაწილი თვალსაჩინოდ განირჩევა სხვა ნაწილებისაგან და ეტყობა, შემდეგ არის აშენებული. მთელი შენობა შემოზღუდულია გალავნით და ორი კოშკით; შენობა ირდილება მაღალი, ტოტებ-გაშლილი იფნის ხეებით (იხ. ფოტ. №17622). მარჯვნივ ეკვტერს მიშენებული აქვს ოთხ-კუთხედი ოთახი, რომელიც ეკლესიას არ უერთდება კარებით. კანკელი ძველია, ქვისა, მოხატული, სამი კამარით, ერთი შესავალი კარით, რომლის ორივე მხარეს პატარა სვეტებია; ხოლო კუთხეებში ნახევარი სვეტები. საკურთხეველში ორი პატარა უბეა. ერთი სარტყელი, რომელზედაც თალია დამყარებული, სამხრეთ და ჩრდილოეთ კედლებს ჰყოფს ორ-ორ კამარათ. ფანჯარა აქვს აღმოსავლეთით, დასავლეთით და სამხრეთით. ფრესკები ჰქონია ამ ეკლესიას არა თუ შიგნით, აგრეთვე გარეთაც, ზემო ნაწილში, მაგრამ ეხლა მოშლილია; შიგნით კედლები ორ რიგად არის გაყოფილი; ზემო ნაწილში უფრო მოსჩანან ფრესკები. საკურთხევლის კონქში მაცხოვარია; ჩრდილოეთის კედელზე, ზემოდ ყოფილა მიცვალება ღვთის მშობლისა, ვინაიდან აქ გავარჩიეთ წარწერა: აქა დედისა ღთისა მიცვალება. ამას ქვემოდ ყოფილა წარმოდგენილი აღმაშენებელი ეკლესიისა, სრულის ტანით, მაღალის ქუდით, ქართული ჭრელი ტანისამოსით და გრძელის სარტყელით, შედარებით ახალგაზრდა, მაგრამ წვერიანი. სამხრეთის კედელზე ეტყობა ფრესკების წარწერა: კვირიკე, აბერკი, წმ გიორგი. ა. სტოიანოვის დროს ფრესკები უკეთ ყოფილა დაცული (გვ. 392-393). ამ ეკლესიის გეგმა და განაკვეთი ჩვენ ხელთა გვაქვს. ეკლესიაში ინახება:

1. საუცხოო ხელობის ხატი სიმეონ მესვეტისა, ოქროთ დაფერილი ვერცხლით ნაჭედი, 36,5X23 სანტ. (იხ. 16924). შუა ნაწილში ხატისა ამართულია დასერილი სვეტი, დამყარებული კვარცხლბეკზე სამი საფეხურით; შუაში ეს სვეტი შემკობილია აკანთით და სვეტის თავი კორინთის რიგისაა, მშვენიერად შესრულებული. სვეტის თავზე წელსზევითი ფიგურაა სიმეონ მესვეტისა, წვერით და საბერო ბარტყულით თავზე, წამოსასხამით ტანზე და ასომთავრული

წარწერით : წ-დ ს-მნ ს-კრლ-თა მქდი. ხელები გაშლილი გულზე აქვს მიდებული, ლოცვის სახით. თავის ირგვლივ ორი დიდი წრე უვლის, შეერთებული სამ ადგილას ზოლით, ჯვარის სახით. ფიგურა ერთობ ლამაზია. მარცხნივ სვეტისა, ქვემოდ, საეპისკოპოზო ტანისამოსში გამოწყობილი მაღალი ფიგურაა წარმოდგენილი, სავედრებელად მიმართული ხელებით და წარწერით: „ანტი ც-გრლი“ ჩარჩო ხატისა შემკობილია ერთობ ლამაზი ნახელავი, გაშლილი ბროწეულის ყვავილების მსგავსი ორნამენტით და მედალიონებით წმიდათა. ზემოდ ვედრებაა, წარწერებით სახელებისა: ი-ჰ ქ-ე, დ-ა ლ-ა, წ-დ ი-ე; მარჯვნივ და მარცხნივ მთავარ ანგელოზნი: წ-დ გ-ბრლ, წ-დ მ-ქლ და პეტრე და პავლე: წ-დ პ-ე, წ-დ პ-ლე; ქვემოდ მოციქულნი: წ-დ მათე, წ-დ ლ-კა, და წ-დ გ-ი. მარჯვნივ თექვსმეტ-სტრიქონიანი წარწერა:

მე გლ-ხკმნ ან-  
 ტ-ნი ცვ-რლმ-ნი  
 შ-ხს ყფ-სა ჩ-მსა  
 მტ-ტ-ვრლი ად-გლ  
 ი ო-კ-რი ვნ-ჰდა  
 ვ-შნე და წ-ა სმ-ნს  
 შვ-სწრე და ხ-ტი  
 ესე შ-ვექმნ ეკლს  
 ამ-სა დაოსნე  
 ს-ჰსრდ სლ-სა ჩ-მისა  
 ვინცა კნინი ნ  
 მსხრბი ესე ჩ-ი შეც  
 ვლს წ-დ ს-მნ არსმ  
 ცა დ-სჯლი მ-სი წ-ე  
 ქ-ა დ-ლს მს გ-ნკი  
 თ-ვს-სა ამნ .

მე გლახაკმან ან-  
 ტონი ცაგარელმან იმ-  
 ხანს ყოფასა ჩემსა  
 მტ-ტ-ვ-რლი ადგილი  
 ოკერი ვნახე და  
 ვაშენე და წმიდასა სკმეონს  
 შევსწირე და ხატი  
 ესე შევქმენ, ეკლესია-  
 სა მისსა დავასუენე  
 სავსრად სულისა ჩემისა  
 ვინცა კნინი ნა-  
 მსახურები ესე ჩემი შეც-  
 ვალოს, წმიდაა სკმეონ არსმ-  
 ცა დამსჯელი მისი წინაშე  
 ქრისტესა დღესა მას განკი-  
 თხვისასა, ამინ.

ეს წარწერა პირველად ბარტოლომეიმ გადაიღო და ბროსსემ გაარჩია (ბარტოლომეი, გვ. 195, 230, ტაბ. IX, №23) შეცდომებით. საკვირველია, რომ დ. ბაქრაძეს და ა. ხახანაშვილს ლადამის ეკლესია არ უნახავთ. დ. ბაქრაძე ერთ ადგილას იხსენიებს ანტონ ცაგარელს, უჩვენებს ბარტოლომეის შრომას და ამბობს: წარწერა მე ვერ ვნახეო (გვ. 80).

ბერნოვილს ეს ხატი გადმოუხატავს (გვ. 135, ნახ. 14), მაგრამ სამწუხაროდ, არა ჯეროვანად; სიმეონ მესვეტისათვის ქრისტეს სახე მიუცია და ის ქრისტედ ხადის; ხოლო ანტონი ცაგარელი ვიღაც წმიდანად გამოჰყავს. ხელობას კი აღტაცებით იხსენიებს.

გრ. უვაროვისა ბარტოლომეის გადმოღებულ წარწერას უჩვენებს და შენიშნავს, რომ წარწერა ძნელი წასაკვიხიაო (გვ. 107). მან დაწვრილებით აღწერა ეს ხატი და გამოარკვია, რომ სვეტზე ქრისტე კი არ ზის, არმედ სიმეონ მესვეტე და გამოსცა ფოტოგრაფია ხატისა, მაგრამ არა ვარგი.

კვარცხლბეკის საფეხურზე ჯვარისა მოიპოება კიდევ მეორე წარწერა, რომელიც შეუმჩნეველი დარჩა მკვლევართა მიერ. წარწერა იკითხება ასე:

ქშე ფილიპე  
ოქრო მჭედელი ა  
წო სმნ შე ანტი

ქრისტე, შემეწყალე ფილიპე  
ოქრო მჭედელი, ამინ.  
წმიდაო სჯემონ, შეიწყალე ანტონი.

ამ რიგად, ეხლა ვიცით, რომ ხატი შეუკვეთია ანტონი ცაგერელს იშხანს ყოფნისა შინა; ხოლო გამჭედელი ყოფილა უებრო ოქრომჭედელი ფილიპე, წინამორბედი ბეშქენ და ბექა ოპიზართა. უნდა ვიფიქროთ, რომ ანტონი წინეთ ცაგერელი ყოფილა და შემდეგ გამხდარა იშხნელი, იშხნის ეპისკოპოზი ტაოში, და იმ დროს მოუგია ეს ხატი. იშხნის წარწერებში მოხსენებულია ორი ანტონი. ერთი მათგანი ყოფილა არქიეპისკოპოზი და განუახლებია იშხანის ეკლესია 11032 წელს. მეორე იშხნის ეპისკოპოზს ანტონის გიორგი II-ს დროს (1072-1089) განუახლებია კარის ბჭე იშხნის ტაძრისა<sup>1</sup>. ერთი ამათგანი უნდა იყოს მომგები ჩვენის ხატისა. ამრიგად, ხატი უნდა ეკუთვნოდეს მე-11 საუკუნეს და არა მე-12-ს, როგორც ფიქრობს გრ. უვაროვისა (გვ. 107).

2. **ხატი მაცხოვრისა**, ოქროთი დაფერილი ვერცხლისა, ნაჭედი, 79X59 სანტ. (№16941). მაცხოვარი ტახტოსანია, ჩვეულებრივის სახით და დიდის ჯვარის ნიშნით. წარწერა სახელისა: მცხრ. ეზო შემკობილია ვაზის შტოთა ორნამენტით. ჩარჩო წვრილის რომბ-ლურსმულის ორნამენტით და წმიდათა მედალიონებით. ზემოდ ვედრებაა, აქეთ-იქით მთავარ ანგელოზნი; ქვემო აშია მოშლილია. ქვემორე წარწერა:

ქ. მცხვრო შვნდნ. ცდნ. აქდს.

ესე იგი: მაცხოვარო შეუნდვენ ცოდვანი აქადარს.

ხატი უნდა იყოს მე-16-17 საუკუნისა.

3. **ხატი წა გიორგისა**, კარედი, სამი ფრთით; შუაში და შიგნით კარებზე წმიდათა სახეები ყოფილა წამლით დახატული. მაგრამ ეხლა სულ მოშლილია; ოქროს მოცულობა მათი, ლამაზი ხელობისა, დარჩენილია. შუაში ყოფილა წი გიორგი, წარწერით: წდ გ ი; მარცხენა ფრთაზე წა დიმიტრი: წდ დ ე; მარჯვენაზე: წდ თ ე (ასოები გადმოზრუნებულია). აშიები შემკობილია ლამაზი ბროწეულის ყვავილების მსგავსი ორნამენტით (იხ. ფოტ. №16950). გარეთ კარებზე წარმოდგენილნი არიან ნაჭედი მთავარ ანგელოზები, წელს ზევით; მარცხნივ მიქაელ, წარწერით: წდ :: მქელ მთვრნგზ. მიქელ საომარ ტანისამოსითაა, მარჯვენა ხელში მხარზე გადებული ხმალი უკავია; მარცხენა ხელი ხმლის ქარქაშზე უდევს: ნიშნი დიდი აქვს. მარჯვენა კარზე გაბრიელ მთავარ ანგელოზია, წარწერით: წდ გბრელ. ამას მარჯვენა ხელში საზომი აქვს, მარცხენაში – ბურთი, ზედ გამოსახული ჯვარით. ქვემოდ რვა-სტრიქონიანი წარწერაა (№16949):

მფარველ მექმენ მოსავსა შენსა

წო : გი მოხ დ მფრვლ  
მქმნ : მოსვა : შნსა  
ნამორაძეა გრი

წმიდაო გიორგი, მეოხ და  
მფარველ მექმენ მოსავსა შენსა  
ნამორაძესა გრი-

გოლს : დ მეკლესა  
ჩემსა : გა  
რნდხს : დ  
შვილთა :  
ჩენთა : ამნ

გოლს და მეულესა  
ჩემსა გა-  
რანდუხს და  
შვილთა  
ჩვენთა, ამინ.

ჩვენის აზრით, გარე ფიგურები და მორთულობა ამ კარედ-ხატისა არ არის უძველესი მე-16-17 საუკუნისა. ხოლო შინაგანი ნაწილი უფრო ძველი უნდა იყოს, ასე, რომ არა უგვიანეს მე-14 საუკ.

**4. ხატი წინასწარმეტყველი იონასი, კარედი, სამ-ფრთიანი 14,5X12 სანტ.** ყველა ფიგურები და ნაწილები ხატისა წამლით არის დახატული; შემკობილობა

1 ეს გამოირკვა ჩვენი ექსპედიციის დროს 1917 წელს.

მეტალისა არა აქვს. (№16940). შუა ნაწილში წარმოდგენილია წინასწარმეტყველი იონა დიდი ქარტით მარცხენა ხელში, რომელზედაც ბერძნული წარწერაა. მარცხნივ მის წინ დაჩოქილი მვედრებელი ბერია. კარებზე, შიგნიდან, წარმოდგენილნი არიან, მარცხნივ: წ-ა ნიკოლოზ, თეთრ სამღვდელმთავრო ტანისამოსით, რომელიც მარწყვის ფერის ჯვრებით არის შემკობილი; მარჯვნივ: იოანე ღვთის მეტყველი, გაშლილი წიგნით ხელში. წინა პირის მხატვრობა სულ მოშლილია. ეტყობა მხოლოდ, რომ აქ ყოფილა სცენები, იონას ნავიდან გადმოგდებისა და მისი ნიანგის მიერ შთანთქმისა. გრაფინია უვაროვისას ეს ხატი მიაჩნია ბიზანტიური ხელოვნების ნაშთად მე-11-12 საუკ. (გვ. 122).

**5. ხატი ღვთის მშობლისა, ჩჩვილედი, ოქროთ დაფერილის ვერცხლით ნაჭედი, 55X39,5 სანტ. (№16943).** ღვთის მშობელი წარმოდგენილია სრულის ტანით, ძითურთ მარცხენა ხელში: მარჯვენა გულზე აქვს დადებული, სამლოცველოდ; წარწერა: დ-და ღ-თის; ქრისტეზე ბერძნული წარწერაა სახელისა. ჩარჩო რომბ-ლურსმული ორნამენტისა შემკობილია 11-ფიგურიანი პატარა მედალიონებით და რვა დიდრონით, მაგრამ ესენი სადაა. პატარა მედალიონებში სულ მთავარ ანგელოზები არიან წარმოდგენილნი, ხოლო ერთში ზემოდ ღვთის მშობელი ჩჩვილედი. ეზო შემკობილია ფოლაქების მსგავსი რგოლებით ორივე მხარეს ღვთის მშობლისა. ხელობა მე-15-16 საუკუნის უნდა იყოს.

**6. ხატი მთავარ ანგელოზ მიქაელისა, ოქროთი დაფერილი ვერცხლისა, ნაჭედი, 23X18 სანტ. (№16948).** მთავარ ანგელოზი სრულის ტანით და ფრთებით არის წარმოდგენილი; მარჯვენა ხელში მხარზე გადებული ხმალი უჭირავს; მარცხენა ხმლის ქარქაშზე უძევს. აშია რომბ-ლურსმულია მედალიონებით, მაგრამ უსახოდ. ხატი დაზიანებულია; ზემოდ ორივე მხარეს თავისა ერთი სტრიქონი წარწერაა, რომელიც გაგრძელებულია ორ სტრიქონად ქვემოდ და იკითხება ასე:

წ-ო : მიქაელ :: შეიწყალე ::  
ერსთვთ :: ერისთ  
ვ :: კხბრ  
ო

წმიდაო მიქაელ, შეიწყალე  
ერისთავთ ერისთა-  
ვი კახაბერ-  
ო.

ერისთავთ ერისთავი კახაბერი შეიძლება იყოს ის კახაბერ ვარდანის ძე, რომელსაც თამარ მეფემ მიუბოძა მეჭურჭლეთ უხუცესობა, მაგრამ ხელობა ხატისა უფრო მე-14 საუკ. მოგვაგონებს, ვიდრე მე-12-ს.

7. ხატი წა გიორგისა, ვერცხლისა, ნაჭედი, 29X22,5 სანტ. მხედარი წარმოდგენილია სრულის ტანით, შუბით და ფარით და წარწერით: „წ. შმეწიე“... ალბათ გაგრძელება წარწერისა იყო ქვემო აშიაზე, რომელიც არ შენახულა (№ 16947). მარჯვნივ და მარცხნივ რომბ-ლურსმულ აშიებზე წარმოდგენილნი არიან სრულის ტანით, საომარ რომაულ ტანისამოსებით წმიდანნი მხედარნი; სახელები არ უწერიათ. ხატი მე-17 საუკ. უნდა იყოს.

8. ნაწილი ოქროთი დაფერილი ვერცხლის ხატისა, ნაჭედი, რომელზედაც დაცულია პატარა, მუხლებს ზევითი ფიგურა წა გიორგისა, შუბით და ფარით, რომაულ საომარ ტანისამოსით და წარწერით: წ-ა გ-ა. ზემოდ ორმაგი ბროწეულის ყვავილების ორნამენტია საუცხოო ხელობის (იქვე (№16947); უნდა ეკუთვნოდეს მე-12-13 საუკუნეს.

9. კარი კარედი ხატისა, მარჯვენა ნაწილი, ოქროთი დაფერილი ვერცხლისა, რომელზედაც გამოსახულია წა დიმიტრი სრულის ტანით, ამოწვდილი ხმლით და წარწერით: წ-ა დიმიტრი. (იქვე №16947). მე-17-18 საუკ.

10. ხატი ღვთის მშობლისა, წელსზევითი, ვერცხლისა, ნაჭედი, 18X14 სანტ. ნაწილობრივ მოშლილია, ფოლაქის მსგავსი სამ-რიგი აშიებით და შერეული ქართულ-ბერძნულ ასოების წარწერით სახელისა (იქვე, №16947). ხელობა ტლანქია, მე-17-18 საუკ.

11. ხატი წა გიორგისა, ვერცხლისა, ნაჭედი, 18X14,5 სანტ. მხედარი წარმოდგენილია მდგომარედ, შუბით და ფარით; აშია ფოლაქოვანია; წარწერა ზემოდ: წ-ა; ქვემოდ: გ-რ (ასოები გადმობრუნებულია); ერთობ ტლანქი ხელობის არის, მე-18-19 საუკ. (№16945).

12. ხატი მაცხოვრისა, ვერცხლისა, ნაჭედი, 19X15 სანტ. მაცხოვარი ტახტოსანია, ჩვეულებრივის ნიშნებით, ჯვარის სახის ნიშნით. აშიები ორ-ფოლაქოვან წრეში ყლორტების მსგავსად არის შემკობილი. წარწერა: ძვ (უკანასკნელი ასო გადმობრუნებულია) ქე. ტლანქი ხელობის არის, მე-18-19 საუკ. (იქვე, №16945).

13. ხატი წა გიორგისა, ვერცხლისა, 20X15 სანტ. ნაჭედი, წმიდანი წარმოდგენილია სულ ახალგაზრდათ; პირის სახე მოცულია ირგლივ კიკინებით; მარჯვენა ხელში შუბი უჭირავს, მარცხენა ფარზე აქვს დადებული. ეზო ხატისა

საცერის მსგავსად არის შემკობილი; აშიები შემკობილია რომბებით და ბალახებით და სადა მედალიონებით. საზოგადოთ არა ცუდი ნახელავია. წარწერა: წ-დ გ-ი. მე-16-17 საუკ. (იქვე, №16945).

14. ხატი წ-ა თეოდორესი, ვერცხლისა, 18X14 სანტ. მხედარი წარმოდგენილია სრულის ტანით, შუბით და ფარით; სახე ბებრისა აქვს; თმა ხუჭუჭად, აშია ბალახოვანია. ტლანქი ხელობისა (იქვე, №16945). წარწერა: წ-ი თედორე. მე-18 საუკ. უნდა იყოს.

15. ხატი მაცხოვრისა, ვერცხლისა, 17X12 სანტ. ნაჭედი; მაცხოვარი წარმოდგენილია სრულის ტანით, სამღვდლო ტანისამოსით და სახარებით ხელში. ნიშნი ჯვარის სახისაა. აშიები ორ-ფოლაქოვან წრეში დაყოფილია უჯრედებად ჰორიზონტალური ხაზებით; ეზო ხლართულებით არის მოცული (№16944). მე-13-14 საუკუნის უნდა იყოს.

16. ხატი წ-ა გიორგისა, ვერცხლისა, 16X12,5 სანტ. წმიდანი წარმოდგენილია სიმრგვალეში ცხენით; გმირავს ადამიანს; აშიები ფოლაქოვანი უჯრედებით არის დაყოფილი; მდარე ხელობისა (იქვე, №16944). მე-18 საუკუნისა.

17. ხატი ღვთის მშობლისა, მუხლსზევითი, ვერცხლისა, 19X14 სანტ. სავედრებლად აპყრობილის ხელებით და წარწერით: დ-დ ღ-დ. აშიები ბალახოვანი ორს ფოლაქოვან წრეში; ხელობა ტლანქია (იქვე №16944). მე-18 საუკ.

18. ხატი წ-ა გიორგისა, ვერცხლისა, ნაჭედი, 20X14 სანტ. მხედარი წარმოდგენილია ცხენით, შუბით გმირავს კაცს. აშიები ფოლაქოვანია; ხელობა ტლანქია, მე-18-19 საუკ. (იქვე, №16945).

19. ხატი მთავარ ანგელოზ მიქაელისა, ვერცხლისა, 12X11 სანტ. წარწერით: წ-დ მ-ქლ. მთავარ ანგელოზი წარმოდგენილია სრულის ტანით, ლაბარუმით და ბურთით; ხელობა ტლანქია (№16946); მე-18-19 საუკუნისა.

20. ხატი მთავარ ანგელოზისა, მარტო ერთის ლაბარუმით, უწარწეროთ, 12X9 სანტ. ვერცხლისა, ნაჭედი, რომბ-ლურსმული აშიებით; ტლანქია; მე-18-19 საუკუნისა. (იქვე, №16946).

21. ხატი ღვთის მშობლისა, ვერცხლისა, ნაჭედი, 10X9 სანტ. ღვთის მშობელი წელსზევითია, ჩჩვილედ, სახე გაფუჭებულია; აშიები ბალახოვანია; ხელობა დაბალია, მე-18 საუკ. (იქვე, №16946).

22. ხატი წ-ა გიორგისა, ვერცხლისა, მოყვითალო, 16X13 სანტ. აშიები ბალახოვანია; მხედარი გაჭენებულ ცხენიდან გმირავს ვეშაპს; გვარიანი ხელობისა არის; წარწერა: წმ-დი გიორგი მდდრ (მზღუდრისა?); ქართული, არა ცუდი ხელობისა, მე-16-17 საუკუნისა, (იქვე, №16946).



23. **ხატი ვედრებისა**, ოქროთი დაფერილი ვერცხლისა, ნაჭედი, ფიგურები ჩაჭრილია. სამივე ფიგურა სრულის ტანით არის წარმოდგენილი. მაცხოვარი შუაში მაკურთხეველის მარჯვენით და სახარებით მარცხენა ხელში; ღვთის მშობელი და იოანე მვედრებელის სახით. ხელობა მოტლანქოა (იქვე, №16946).

24. **სანაწილე ვერცხლისა**, 11X8 სანტ. სამი რიგი შემკობილებით და ჭადრაკულის აშიებით (იქვე, №16946).

25. **ნატეხი ხატისა**, ვერცხლისა, მოოქრული, რომელზედაც ყოფილა წარწერა დიდის რელიეფით და გრძელი ასომთავრულით: წ-ი (იქვე, №16946).

26. **ნაშთი მაცხოვრის ხატისა**, 36X24 სანტ. ფურცლოვანი შემკობილობით და წარწერით ბერძნულად სახელისა; მარჯვენა აშიაზე წარმოდგენილია წ-ა დიმიტრი. ცოტა ნაწილია დარჩენილი.

27. ვერცხლის **ფირფიტა** კარედის ხატისა, წ-ის გიორგის გამოსახულებით ცხენზე; ტლანქი ხელობისა.

28. წამლით დახატული **ხატი მთავარ ანგელოზისა**, სულ გადასულია, 16X10,5 სანტ. წარწერით: ჯიდურის მთვრნში.

29. წამლით დახატული **ხატი ღვთის მშობლისა**, 23X17 სანტ. ტილოზე; სულ გაფუჭებულია; მოსჩანს წარწერა სახელისა ბერძნულის ასოებით.

30. **ჯვარი გამოსასვენებელი**, ვერცხლისა, მოყვითლული, გატეხილი უკვე, 33X27 სანტ. პირველ გვერდზე ჯვარცმულია წარმოდგენილი. ბოლოებში მთავარ ანგელოზების მედალიონები (№16951); მეორე გვერდზე, შუაში, კარგი სახეა წ-ა გიორგისა, სრულის ტანით და წარწერით: წ-ა გ-ი და ორი დარჩენილი მედალიონით, მარცხნივ ღვთის მშობლისა, ზემოდ მაცხოვრისა (№16952).

31. ასეთივე მეორე **ჯვარი**, 37X34 სანტ. ჯვარცმულის სახით და ორი მედალიონით ზემოდ; უფრო დაზიანებულია და ცუდათ შენახული, ვიდრე პირველი (№16953).

32. **დიდი ჯვარი ხისა**, კანკელის წინ დასადგმელი, 102X40 სანტ. ეხლა დამყარებულია ზემოდ კანკელზე. შემერწილია ისეთი ვერცხლის ფირფიტებით, როგორც სეტის ამგვარივე ჯვარი; ტლანქი ხელობისა.

33. **ლახტი რკინისა**, ექვს-ფრთიანი.

მესამე ეკლესია მესტიის თემისა არის **ეკლესია მთავარანგელოზთა**; სოფელს, სადაც ეს ეკლესია არის, მარგიანს უწოდებენ. ეკლესია მაღალია, თლილის ქვით ნაშენი; ეტყობა წინეთ ეკვტერები ჰქონია, მაგრამ ეხლა მოშლილია; სხვაფრივ ეკლესია ჩვეულებრივი სვანური რიგისაა.

ეკლესიაში ჩვენ ვნახეთ:

1. **ჯვარი დიდი ხისა**, საკურთხევლის წინ სადგომი, სიმაღლით 141 სანტ. განით 75 სანტ. (№16964), შემერწილია ვერცხლის ფირფიტებით სხვა და სხვა ხელობისა; ამათში საუკეთესო ხელობის არის სამი ფირფიტა წმიდის გიორგის სურათით; ერთი უმბოს ქვემოდ სრულის ტანით წარმოდგენილი, შუბით მარჯვენა ხელში, ხოლო მარცხენა დაბჯენილი აქვს ხმალზე, ქარქაშით და ჩამოსაკიდი ღვედით. მეორე წა გიორგი ამას ქვემოდ, წელზევეითა, შუბით და ფართით; მესამე უმბოს ზემოდ არის აგრეთვე წელსზევეითი; ესეც ფართით არის, ხოლო მარჯვენა ხელში ამოწვდილი ხმალი უჭირავს მხარზე გადობილი. შუაში არის უმბო, მრგვალი და შემკობილი შიგნით; ოთხივე მხრით პატარა მედალიონები აქვს; მარჯვნივ და მარცხნივ ჩჩვილეთი ღვთის მშობლისა; ზემოდ და ქვემოდ, ვგონებ, მთავარ ანგელოზთა, – ყველა ეს უმბოიანად ერთ ფირფიტაზე არის წარმოდგენილი და ტლანქია. აგრეთვე სხვა ფირფიტებით მარჯვენა და მარცხენა ფრთებისა, რომლებზედაც წარმოდგენილნი არიან მთავარ ანგელოზნი, ღვთის მშობელი, წა გიორგი ცხენით.

2. **თავი ხატი** ეკლესიისა მთავარ ანგელოზთა მიქაელისა და გაბრიელისა, ოქროთი დაფერილი ვერცხლით ნაჭედი, 55X38 სანტ. მშვენიერი ხელობისა, მაგრამ სანახევროდ ყვავილების მსგავსად შემკობილი მარტო ზემოდაა დაცული ორი მედალიონით (№16962). მთავარ ანგელოზები ერთად სდგანან, ბიზანტიურ მდიდრულ საკარისკაცო ტანისამოსით და შეერთებულის ხელებით უკავიათ მაცხოვრის მრგვალი მედალიონი; მაცხოვარს სახელის წარწერა ბერძნული აქვს. ამ მედალიონის ზემოდ ორთავე ანგელოზთათვის სწერია: თ<sup>ა</sup>ვრ<sup>ა</sup>ნგ<sup>ე</sup>ლ<sup>ი</sup>ზი; ხოლო თითოეულს ცალკე აწერია: წ<sup>ა</sup> გ<sup>ა</sup>ბ<sup>რ</sup>ი<sup>ე</sup>ლ<sup>ი</sup>, წ<sup>ა</sup> მ<sup>ი</sup>ქ<sup>ა</sup>ე<sup>ლ</sup>. მათი პირის სახე მოცულია ტალღისებური თმებით, რომელნიც კვიკინებად ჩამოდიან კისრამდის. მათი შუბები ან შეიძლება საზომები სამყურად თავდებიან ზემოდ. თავთა წრეები დიდრონია. წარწერა დაბლა ჰქონია, მაგრამარ შენახულა; პატარა შერჩენილს ნაჭერზე, ქვემოდ აწერია: ... წყალობითა შენითა...

ხატი უნდა იყოს ქართული ხელობისა, მე-12-13 საუკუნისა.

3. **ხატი მაცხოვრისა**, ოქროთი დაფერილი ვერცხლისა, ნაჭედი, 51X40 სანტ. მაცხოვარი ტახტზე მჯდომარეა; მარჯვენა ხელით ჯვარს სწერს; მარცხენით იკავებს მუხლზე დადებულს გამლილ სახარებას, რომელზედაც ასომთავრულით სწერია: ქ. მე ვარ მეოვე დიდების : რ<sup>ე</sup>ლი შემომიდგეს : მე არა : ვიდოდეს : ბნელსა. აღსანიშნავია, რომ ეს ადგილი სახარებისა სხვებში იწყება ასე : მე ვარ ნათელი სოფლისა. . . სამწუხაროდ, ქვემო ნაწილი ტახტისა ეხლა სრულიად მოშლილია, დარჩენილია მხოლოდ ზურგი. ქრისტეს დიდი ნიშნი აქვს ჯვარის სახედ გაყოფილი სამ ოთხკუთხედში მოქცეულის ვარსკვლავების სახეებით, დანაოჭება შერჩენილი სამოსელის ნაწილისა ლამაზია; მაცხოვარს წვერი ხუჭუჭად აქვს დაყოფილი. ასეთიე თმა უვლის პირის სახეს და მხრებზე ჩამოუდის. ნიშნის აქეთ-იქით უწერია: ძ<sup>ე</sup>ო ქ<sup>რ</sup>ს<sup>ტ</sup>ე. აშიები შემკობილია სპარსული მისტიური ვარდებით; ქვემო ნაწილი სულ დაკარგულია; აშიებში ეხლა

დარჩენილია მხოლოდ სამი მედალიონი, ერთი ზემოდ მთავარ ანგელოზისა და თითო აქეთ-იქით, პეტრე და პავლესი ხუცური წარწერებით სახელებისა (№16961). ქვემოდ, მარცხნივ და მარჯვნივ ტახტისა შერჩენილია წარწერა:

მარცხნივ:

ქ ზი : მევე  
ვო : შემი  
წყალე : მე :  
ცოდვილი :  
ესე : დღესა :  
მას : განკი  
თხვისასა :  
ინე : დორ  
ობელსძე :

ში მეუფე-  
ვო, შემი-  
წყალე მე  
ცოდვილი  
ესე დღესა  
მას განკი-  
თხვისასა  
იოანე დორ-  
ობელისძე.

მარჯვნივ:

ქ კელითა  
მოიჭედ  
ა : გი : გვ  
აზავასი  
თა : -

კელითა  
მოიჭედა  
გიორგი გვა-  
ზავასი-  
თა.

მარცხენა ნაწილი წარწერისა დ. ბაქრაძეს აქვს მოყვანილი (გვ. 99-100); მარჯვენა მას არ შეუნიშნავს. საკვირველი კიდევ ის არის, რომ გარდა ამ წარწერისა და ზარის წარწერისა, რომელიც ჩვენ სეტის ეკლესიის აღწერილობაში მოვიყვანეთ, დ. ბაქრაძე ამ ეკლესიიდან არაფერს მეტს არ უჩვენებს. გრ. უვაროვისა სულ არ ყოფილა ამ ეკლესიაში და არც ერთს მის ნივთს არ აღნიშნავს. ეტყობა არც ა. ხახანაშვილს უნახავს ეს ეკლესია. ყოველ შემთხვევაში ამ ეკლესიიდან ის არაფერს არ უჩვენებს. ხატი უსათუოდ ქართული ხელობისა და უნდა ეკუთვნოდეს მე-13-14 საუკუნეს. აღსანიშნავია, რომ გვაზავას გვარში ოქრომჭედლობა მე-19 საუკუნემდის იყო შერჩენილი. ჩვენ სამეგრელოში ვნახეთ რამოდენიმე ხატი ამ გვარეულობის ოქრომჭედლის გაკეთებული.

4. **ხატი წა გიორგისა**, ვერცხლისა, ნაჭედი, 31X25 სანტ. მთავარ მოწამე კარგის ღონიერის ცხენითაა წარმოდგენილი, გვირგვინოსანს გმირავს შუბით. თმა ხუჭუჭად აქვს დაწყობილი. დიდი წრე თავის შემკობილია ხლართულებით; წარწერა სახელისა: წ<sup>ა</sup> გ<sup>ი</sup>. მორთულობა ცხენისა, სამუე, სამკერდე და სხვა შემკობილია ვერცხლის ფოლაქებით. ხელობა ლამაზია, არა უგვიანეს მე-14 საუკუნისა. ხატს ჩარჩო აღარ აქვს. (№16957).

5. **ხატი ღვთის მშობლისა**, ჩჩვილედი, 26X20 სანტ. ყოფილა წამლით დახატული, მხატვრობა მოშლილია; დაცულია მორთულობა ოქროსი; ზემო ნაწილი ეზოსი, ნიშბი და აშიები ფაქიზად და მხატვრულად ნამუშევარი მე-12-13

საუკუნისა (№16954), შემკობილი ბროწეულის ყვავილების მსგავსად და ლამაზის წარწერებით. სახელის წარწერა მაცხოვრისა ბერძნულია; ღვთის მშობლისაც ბერძნულად არის განზრახული, მაგრამ არეულია, პირველი ასო უფრო ასომთავრულით მოიპოვება ზემოდ, მარცხენა კუთხეში: „თეთრო/სნისა ღმრთი/ს მშობელი“. თეთროსნის ეკლესიის ნანგრევები ეხლაც მოიპოვება ბათუმის ოლქში, ქობულეთის მახლობლად. ქვემო აშიაზე ყოფილა სამ-სტრიქონიანი წარწერა, მაგრამ დაცულია ნახევარი, მარცხენა ნაწილი პირველი ორი სტრიქონისა და ცოტა ნაკლით მესამე სტრიქონი:

ქ ჩვილებრ : წიალთა : მ. . .

ოსა : სიტყვსა : ღთისათ : შინ : . . . . .

თ : მოსავ მამკობთ შენთა ჭარხალას ძესა გოგი და მეცხედრესა მისსა ნათ ლს ძეთა მისთა. . .

წარწერაში ნათლად არ სჩანს და არ ვიცით დანამდვილებით: ჭარხალაძე სწერია თუ დარჩალასძე. სხვა ცხადია, ჭარხალაძე მოსხენებულია ცნობილს ნარის ეკლესიის წარწერაში, ოსეთში. ხატი მე-12 საუკ. უნდა იყოს.

6. **ხატი ღვთის მშობლისა**, ჩჩვილეთი, 46X36 სანტ. ყოფილა წამლით დახატული, მაგრამ მხატვრობა ეხლა სულ მოშლილია, დარჩენილია ოქროთი დაფერილი ვერცხლის ნაჭედი მორთულობა, ნიმბი, ნაწილი ეზოისა და აშიები ლამაზი ქართული ხელობისა, მე-12-13 საუკუნისა (№16958). ნიმბი შემკობილი ყოფილა ხუთი ძვირფასი ქვით, დარჩენილია სამი. წარწერა ჯვარის მსგავს „როზეტკაში“: დ დ დ ეზო ვაზის რტოებით არის შემკობილი; აშიები ბროწეულის ყვავილების მსგავსად, მარჯვნივ და მარცხნივ აშიებზე სრულის ტანით წარმოდგენილნი არიან მთავარ ანგელოზნი, შუბით და ბურთით, ლამაზი ხელობისა; ქვემო აშია ბალახოვან შემკობილობით მერმინდელი დროისაა, სხვა ხატიდან აღებული. ზემო აშიაზე მარცხნივ დაცულია მედალიონში წელსზევითი ღვთის მშობელი, წარწერით: დ ად ღ ად. კუთხეები და მათი მედალიონები ზემო აშიას აკლია.

7. **ხატი წმიდა გიორგისა**, ვერცხლისა, ნაჭედი, 26X19 სანტ. წმიდანი წარმოდგენილია მდგომარედ, შუა ხნის კაცად, რომაულ საომარ ტანისამოში, შუბით მარჯვენა ხელში, მარცხენა დადებული აქვს მოგრძო ფარზე; წელზე ჩამოკიდებული აქვს ხმალი, ნიმბის ორივე მხარეს აწერია: წ დ გ ი. მთელი ფიგურა მოქცეულია დასერილს მაღალ ოთხკუთხედში. ზემოდ სამი მრგვალი მედალიონია წმიდათა; შუაში პატარა ვედრების ღვთის მშობლისა: დ დ ღ ი და წ ა თეოდორესი: წ ი თ ე. აშია არა აქვს. ხატი უნდა ეკუთვნოდეს მე-15-16 საუკუნეს. (№16954).

8. **ხატი წა გიორგისა**, ვერცხლისა, ნაჭედი, 25X12 სანტ. წმიდანი ცხენით არის წარმოდგენილი, ადამიანს გმირავს შუბით; ხელობა მოიტლანქებს; ხატი მოცულია ირგვლივ ვერცხლის ფოლაქებით წერტილიან წრეებში, რომელნიც ჰქმნიან მზეთა გამოხატულობას; ჩარჩო დიდია და პრტყელი, რომბ-ლურსმულად შემკობილი (ფოტოგრაფია არსებობს, მაგრამ ჩემს ეკზეპლიარს № არ უზის) მე-17-18 საუკუნეს უნდა ეკუთვნოდეს.

9. ხატი წა გიორგისა, ვერცხლისა, 23X19 სანტ. ნაჭედი; აშია რობმ-ლურსმული აქვს. წმიდანი ფეხოსანია, შუბით და ფართით; წარწერა: წ-დ გ-ი. ეზო შემკობილია ვაზოვანის ორნამენტით, ხელობა ტლანქია, მე-18-19 საუკუნისა (იხ. ამის წინ მოხსენებული ფოტოგრაფია, რომელზედა წა გიორგის ხატია).

10. წარწერა წმიდის გიორგის ხატის ზურგისა, რომლის პირველი პირი, ესე იგი თვით სახე ხატისა არ შენახულა, 11X8,5 სანტ. ასომთავრულით (იხ. ფოტ. №16960):

წო : გ-ი : მსჯუ	წმიდაო გიორგი მსუჯუ-
ნსაო : მეუხ ექ	ნისაო, მეუხ ექ-
მენ და მფარვე	მენ და მფარველ
ლ გიგს მაჭ	გიორგის მაჭა-
ავარიანსა : და	ვარიანსა და
შვილთა : ჩ	შვილთა ჩემ-
ემთა :	თა.

მსუჯუნა იგივე სუჯუნა სამეგრელოს ცნობილი სოფელია; მისი ეკლესიის და მასში დაცული ხატების აღწერა იხ. „ჩემი არხეოლოგიური მოგზაურობანი და შენიშვნანი“, წიგნი II, გვ. 22-31, და აგრეთვე „ხრისტიანსკი ვოსტოკ“, ტ. V, გვ. 40-50.

11. წარწერა, აგრეთვე ასომთავრული მეორე გვერდზე ერთის წმიდის გიორგის ხატისა, რომლის პირველი პირი არ შენახულა, 11X8 სანტ. (იხ. იგივე ფოტ. №16960). წარწერა იკითხება ასე:

ქ წ-დაო გო	წმიდაო გიორ-
რგი მეოხ მე	გი, მეოხ მე-
ყავ : და ფა	ყავ და ფარ-
რვ	ველ
ელ მამკაო	მამკობს
ბს <sup>1</sup> : შენსა : ზ	შენს ზჯი-
ჯინა რასა	ნარასა-
დს <sup>2</sup>	დას
და ძემსა ჩმს .	და ძესა ჩემსა.

12. დაცულია ფრიად ლამაზი ნახელავი ოქროს აშია ხატისა, რომელზედაც სწერია:

წო გ-ი შუე ჯინჯიხ : ჯინჭა-სძე  
ესე იგი: წმიდაო გიორგი, შეიწყალე ჯინჯიხ ჯინჭარასძე.

13. მეორე გვერდი მაცხოვრის ხატისა, რომლის პირველი პირი არ შენახულა, ვერცხლის ფირფიტა, 14X11 სანტ. რომელზედაც ასომთავრულით სწერია (იხ. ფოტ. №16960):

ქ რმლმნი : სიტყვით და  
ბდე : ყველივე : სი  
ტყაო : ღმრთო : ღმ  
თისაგან : გამსროლო :  
ღ ქ  
ლწლისაგან : ჯრც : შ  
სხმლო : ვმკბ : ხ-ტსა : შ  
ნსა : შლვა : ქრდია  
ნი რთა : ამს . წლი : ძი  
თრ[თ]ი მცვლდ  
ნთლი . ძისა : შნსა : მომ  
ფნე . ღმრთი : მშბლო .

რომელმან სიტყვით და-  
ბადე ყოველივე, სიტ-  
ყვაო ღმრთისაო, ღმრთ-  
საგან გამოსრულო  
და ქალ-  
წულისაგან ჯორც შეს-  
ხმულო, ვამკობ ხატსა შენ-  
სა შალვა ქურდია-  
ნი, რათა ამის წილ ძი-  
თურთი მცველ (მექმენ), და  
ნათელი ძისა შენისა მომ-  
ფინე, ღმრთი(ს) მშობელო.

უქარაგმოდ წაკითხვაში ჩვენ ხორცმეტ ასოებს ვუშვებთ; დამწერი მეგრელი უნდა იყოს, ვინაიდან მეგრელიზმებით აიხსნება ასეთი ფორმები: რომელმანი სიტყვით (რომელმან სიტყვით ანუ სიტყვითა), წილი (=წილ), ძითურთი (=ძითურთ); სიტყვის შემდეგ „მცველ“ გამოშვებულია „მექმენე“; სიტყვა „რათა“ შეიძლება წავიკითხოთ კიდევ, როგორც „რაფთა“, ძველ ტექსტებში ასე იკითხება ხოლმე.

14. სამი გამოსასვენებელი ჯვარი, შეპერწილი ვერცხლის ნაჭრებით, ტლანქი ხელობისა.

15. ხატი მიქელ მთავარ ანგელოზისა, ვერცხლისა, 16X12 სანტ. წარწერით: წ-  
დ მქლ; ტლანქი ხელობისა.

16. ხატი ხარებისა, ვერცხლისა, 26X18 სანტ. აშიებზე არის ექვსი დიდი და მთელი რიგი პატარა მედალიონებისა, ერთობ ტლანქი ხელობისა.

17. ხატი პატარა ღვთის მშობლისა, ვერცხლისა, წარწერით: ღ-დდ ღ-დ; 9,5X8 სანტ. ტლანქი ხელობის.

1 ა ამ სიტყვაში მეტია.

2 უკანასკნელი ასო შეიძლება ა-ნათაც მივიღოთ (იხ. ფოტოგრაფია).

18. პატარა ხატი წის გიორგისა და დიმიტრისა, სრულის ტანით, ვერცხლისა, 8X6 სანტ. ტლანქი ხელობისა.

19. ხატი ღვთის მშობლისა, ვერცხლისა, 19X15 სანტ. ზემოდ მაცხოვარია კიდევ წარმოდგენილი; ტლანქი ხელობისა.

20. ხატი ღვთის მშობლისა, ვერცხლისა, 11X9 სანტ. ღვთის მშობელი წელსზევითია, წარწერით: დედა ღ-თს. სხვებს სჯობია.

21. ხატი წის გიორგისა, ვერცხლისა, სრულის ტანით, შუბით და ფარით და წარწერით: წ-მ გ-ი. ტლანქია.

22. ჩვიდმეტი სხვა და სხვა ვერცხლის ფირფიტა და ხატები, უმეტესად სანახევროდ დაცული და ტლანქი ხელობისა. ამიტომ მათი ცალ-ცალკე აღნუსხვა არა ღირს.

№№ 14-22 გადმოღებული არ არის, ვინაიდან ტლანქი ხელობისაა და ცუდათ შენახული სინოტივესა და უსუფთაობის გამო.

მეორე ეკლესია მთავარ ანგელოზისა, ქვისაგან ნაშენი, ჩვეულებრივი სვანური რიგისა მოიპოება მესტიის წყლის პირას. ამ ეკლესიას არც ერთი მკვლევარი არ იხსენიებს. ეს მიტოვებული ეკლესია ჩვენ რომ ვნახეთ, ეკლესიაში წყალი იდგა. სხვა ნაძარცვ ხატებთა შორის აღმოჩნდა ორი საყურადღებო განძი:

23. ხატი წა გიორგისა, ოქროსი, ანუ უკეთ ვსთქვათ, მისი ნაშთები იოანე ვარდანისძის, სვანთა ერისთავის, წარწერით მე-12 საუკუნისა. ჩვენ უკვე განვიხილეთ ლაბეჭინის წის გიორგის ხატის განხილვის დროს.

24. ხატი კარედი, ვედრებისა, ფრიად საყურადღებო და იშვიათი, მაგრამ ცოტა დაზიანებული, 14X11,5 სანტ. (იხ. ფოტ. №16959). ეს კარედი ხატი სამ-ნაწილედია, ანუ ტრიპტიხონი, შუა ნაწილში, ხის ჩარჩოში ჩადგმულია სტიატიტზე ამოჭრილი ფიგურები ვედრებისა. სტიატიტი ოთხკუთხედია, ზემოდ მორგვალელებული, რომლის ნაწილი ეხლა მოტეხილია, მაგრამ, საბედნიეროდ, ფიგურები დარჩენილია; დაზიანებულია ცოტა ნიშბი ღვთის მშობლისა და თითქმის მთელად მაცხოვრისა. ამას გარდა, სტიატიტი გაბზარულია ცოტა ილინცურად. ამ სტიატიტის ნაჭერზე, შუაში, წარმოდგენილია, კამარას ქვეშ, სამი ფიგურა; შუაში ქრისტე, უფრო მაღლად დანარჩენი ორისა; მარჯვენა ხელით ის აკურთხებს, მარცხენაში გაშლილი სახარება უჭირავს. სახარებაზე ტექსტი ბერძნულად არის მოყვანილი, ისე როგორც სახელების წარწერები სამივე ფიგურისა. მარჯვნივ ქრისტესა წარმოდგენილია ღვთის მშობელი და მარცხნივ იოანე ნათლის მცემელი, ორთავე ხელები მიმართულნი ქრისტესაკენ ვედრების სახით. სამივე ფიგურა წარმოდგენილია სრულის ტანით; სამივე ნაზი ნახელავია და ლამაზი. კამარა ფიგურების როგორც აღვნიშნეთ, ეხლა სანახევროდ მოტეხილი, დამყრებულია ორ წვრილ და ნაზად მოჩუქურთმებულ სვეტზე, რომელნიც თავდებიან ლამაზის მოჩუქურთმებულის სვეტის თავებით. კარებზე წარმოდგენილი ყოფილან წამლით შნოიანად დახატულნი მოციქულნი, მარცხნივ: პეტრე, ასომთავრული წარწერით: პე; მარჯვნივ: პავლე: პლე. სახეები მოშლილია, ხოლო ოქროს შემკობილობა დაცულია. ხის ჩარჩოს შემკობილობა ნაზად ნახელავის ოქროს ბასმით, მოძარცვულია; ცოტა ნაწილი დარჩენილია მარცხენა მკედრით. წინა პირებზე კარებისა შემკობილობა, სამწუხაროდ, არ

შენახულა. მთელი ჩარჩო ხატისა კარებითურთ ქართული ხელოვნების არის, მე-12-13 საუკუნისა; ხოლო სტეატიტის ფიგურები ბიზანტიური ხელობის უნდა იყოს, მე-9-10 საუკუნისა.

გარდა ზემო აღნიშნულ ოთხი ეკლესიისა, მესტიის თემში კიდევ ორი ძველი ეკლესია მოიპოვება მიტოვებული და უნივთო. ერთი მათგანი, **ეკლესია მაცხოვრისა**, მთაზეა გაშენებული თლილის ქვისაგან. ეს ჩვეულებრივი სვანური რიგის ეკლესია არის ერთის კარით სამხრეთით და თითო სარკმელით აღმოსავლეთით და სამხრეთით. მის თავისებურ განსხვავებას სხვა ეკლესიებისაგან წარმოადგენს დიდი უბეები ანუ ნიშები მარჯვნივ და მარცხნივ საკურთხევლისა; ესენი ოთახს მოგაგონებენ და თავისი მრგვალი სარკმელები აქვთ. კედლებზე ეტყობა ძველი დიდრონი ფრესკები, მაგალითად, სამხრეთის კედელზე წარმოდგენილია ერთი წმიდანი სრულის ტანით. შუა თაღში ეკლესიისა რკინის კაკვია და ზედ ჩამოკიდებულია ჯაჭვით ქვები (კარდალი). გარე კედლები ეკლესიისა მოკაზმულია უბრალო პილიასტრებით.

მეექვსე ეკლესია ამ თემისა არის **ეკლესია ღვთის მშობლისა**, მაღალი, თლილის ქვისაგან ნაშენი. კანკელი ქვისა შენახულია, ჩვეულებრივი. ეკლესია მოხატული ყოფილა; ფრესკები ცუდათ დაცული; დასავლეთის კედელზე ეტყობა აღმაშენებლები ყოფილან წარმოდგენილნი ქართულის ტანისამოსით... აქ იკითხება წარწერა:

„მჯაფარალაის“... და კიდევ: „ასლანს შს ღ-ნ“.

ჯვარის სახეზე: ჯ-ი ქსი და კიდევ: იესო ქრისტეს სახელი ბერძნულად. ადგილობრივი გადმოცემით, ეკლესიის აღმაშენებელი იყო პაპი გიორგი ჩართულარი.

## მესტიაში გაშინჯული ხელნაწერები

მესტიაში, ბლალოჩინ ბესარიონ ნიჟარაძესთან ჩვენ ვნახეთ ხელნაწერები, რომელნიც სხვა და სხვა ეკლესიებიდან იყო მოტანილი.

1. ლაჰილის ეკლესიის ხელნაწერი, დიდი კანონი იერუსალიმის ეკლესიისა, რომლის სათაურია: „ესე განჩინებაჲ და განწესებაჲ მოძღვართა მიერ მართლ მორწმუნეთა რომელსა ჰყოფენ იწლმს“. ხელნაწერი ტყავისა, in folio 34X27 სანტ. დაწერილია ასომთავრულით მე-10 საუკუნისა, ორ სვეტად, 28 სტრიქონი სვეტზე. სათაურები სინგურით არის ნაწერი; ხელნაწერი დაშლილია, ფურცლები არეული; ზოგიერთი ფურცლისა მხოლოდ ნაფლეთებია, ერთი მერმინდელი ხელით მინაწერი უჩვენებს, რომ ხელნაწერში ყოფილა 413 ფურცელი; ეხლა უკანასკნელი რველი 49, რვეულში 8 ფურცელია. ნიშნებად იხმარება ორ-ორი წერტილი, მაგრამ არა ხშირად. ჩვენს შემდეგ გაემგზავრა სვანეთში სპეციალურად ამ ხელნაწერის შესასწავლად პროფ. კორნელი კეკელიძე და გამოსცა ეს წიგნი „იერუსალიმის კანონარის“ სახელით. ამიტომ ჩვენ აქ საუბარს



აღარ გავაგრძელებთ. შევნიშნავთ მხოლოდ, რომ ჩვენ ამ ძვირფასის ხელნაწერებიდან სანიმუშოდ სამი დიდი ფოტოგრაფიული სურათი გადმოვიღეთ, ორი გვერდი თითოზე. ეს გვადლევს საშუალებას წარმოდგენა ვიქონიოთ ხელნაწერის პალეოგრაფიულ ხასიათზე და მის მართლწერაზე (იხ. ფოტ. №№ 17203-17205). ამას გარდა ხელნაწერის აშეები, თუმცა ბევრ ალაგას წაჭრილია, მაგრამ დარჩენილებზე ბევრია ჩვეულებრივი სვანური თემთა და სოფელთა ერთმანეთ შორის დადებული პირობების წერილები და ზოგიერთ მათგანს ჩვენ აქ ვათავსებთ. კ. კეკელიძის გამოცემის მიზანში ეს არ შესულა; მინაწერები მხედრული ხელის მიხედვით მე-14-15 საუკუნეს ეკუთვნის უმეტეს შემთხვევაში:

1.

ქ : ესე ნიშანი და დაწერილი დაგიწერე და მოგაქსენე მე ივანე და ხციეგო გელოვანმა თქუენ წმიდას მთავარანგელოზსა და მისთა [კრე]ბულთა ლაი[ლის]. . ჰევთა მას[ჟამსა] ოდეს ჩემისა [ბატ]ონისა მიქელა . . . სა ნებითა მო . . . . რისა მთავარ ანგელოზსა და [მოგა]თვალეთ ჩუენი თავი შვილნი და რასაცა ჩუენი ჰქუიან მკვიდრად ვირე ჩუენი თემი იყოს . ამისსა წერასა ზედა ორი ადგილი მამული მოგეცით ვითაც თქუენსა ერთგულობასა ვხედვიდეთ მოცემასა და წყალობასა ბოლოი არ შეოქნათ . ეს ნიშანი მე ნიკოლოზს დამიწერია და მოწამეცა ვარ .

2.

ქ ესე ნიშანი . . . მე ივანე . . .  
[ჟამ]ის შემოსლვამა ქუეყანა დააშავა მოგანდევ ჩემი თავი და შვილნი ვითაც გამსახორებდეთ ჰგრეცა გუწყალობდით ამისთუის არც მიქელაის ძისა სამსახორსა მოცთებით. ესე ნიშანი მე ნიკოლოზს დამიწერია და მოწამეცა ვარ: –

3.

: ქ : ესე ნიშანი დაგიწერე და მოგაქსენე მე გ-ი (გორგი) როჩაგიანმა და ჩემთა შვილთა თქუენ წმიდას მთავარ ანგელოზს მხერისასა მას ჟამსა ოდეს ჰავისა ჟამისა შემოსლვამ ქუეყანაი დააშავა მოგანდევ ჩემი თავი და შვილნი ვითაც გამსახორებდეთ ჰგრეც გუწყალობდით . ესე ნიშანი მე ნიკოლოზ დამიწერია და მოწამეცა ვარ.

4.

ქ : სახელითა ღ-თსათა მამისა და ძისა და სულისა წმიდისაითა თავსმდეობითა და შუამდგომელობითა ყოვლად წმიდისა ღვთის მშობელისაითა პატიოსნისა და ცხოველ მყოფელისა ჯვარისაითა დაგიწერე დაწერილი ესე მე შოშქოფარ ქოცხიანმან

თქვენ წმიდასა მთავარანგელოზს მხერისასა და გთვლეს (sic) ჩემი სასახლე ჩემი მამოლი ტყე და ველი მთა და გორი საკმარი და ულკმარი (sic) გიბედნიეროს ღთმნ ჩემი მამი ბერი ვითა შეივედროთ ღთმან თქვენც შეგ(ი)ვ(ე)დროს . ამისნი მოწმენი ბ-ბას მაცხოვარი ღთისა წმიდანი მთავარანგელოზ ვარი მოხერისა . კაცთაგან ლაილასა სოფელი ერთობილი მტკიცე ესე ჩემგან და უქცეველები მე აბრამას დამიწერია და მოწამეცა ვარ.

5.

ქ სახელითა ღთსათა მამისა ძისა და სულისა წმიდისაითა დავწერეთ დაწერილი ესე და ნიშანი ჩუენ ერთობილმან ლაილაის ჳევმან დიდმა და მცირემა ეთმანერთისა ნებითა მას ჟამსა უდეს მესიანი ლატალის ჳევმან აჳყარა გინდა იგი გეკითგებოდეს და გინდა ვინ ხარჯი ოსამართლოდ რაიცხა ფათერაკი გინდა ლხინი მოჳყვეს სწორად პასუხის გამცემელნი და გარდამჳდელნი ვართ ჩუენ და ჩუენი ეკლესიანი და ჩუენი . . . მამულ . . . არმა გუარმა. . . (შემდეგ მოჳრილია).

6.

ქ : ესე დაწერილი და ნიშანი დაუწერეთ და დაუდევით ჩუენ ერთობილთა ლაილელთ ამას ჟამსა უდეს დეკანოზი სოვიანი და მოგრიანი ყანასა შიგან გზასა შეიცილნეს მერმე ჩუენ ლაილელთა ესრე გავაჩინეთ და უსულისა დეკანოზი არუდეს ემართლების შეცილებასა და რაი ღალა აიღოს მერმე მოგრიანი დაჳირვასა . . . . ურუნა და მოწამენი არიან მუნაზონი ლაზარე სარგის მესიანი, მიკმინე გვარამიანი ხიმიჯხაკი . . . დამიწერია და მოწამეცა ვარ ამა დაწერილისა.

7.

ქ წმიდაო მაცხოვარო მონა და მადიდებელი თქვენი აბნასარ შეიწყალე.

8.

მაცხოვრისა ლაჳილისა და მთავარ ანგელოზისა მხიერისა თაუსდედობითა და შუვამდგომელობითა დაუწერეთ და დაუდევით დაწერილი ესე ჩვენ ერთობილმან ლაჳილისა სოფელმან ერთმან ერთისა ნდომითა და დამოწმებითა მტკიცე და უქცეველი ყოილისა მიზეზისაგან უმიზეზოი მას ჟამსა ოდეს მრავალ მრავლისა უწესურსა საქმესა დაუხდენით ჳჩვენსა (sic) შიგა. მერმე გავიგონეთ და ესე ნიშანი დაუდევით ამა ირსა ზედა : აწ დღისითგან წაღმა რაიცა

მართლადა და ცხადად საერთოდ და სასოფლოდ არ სჩ(ა)ნდეს ჳჩვენსა ამარსა ნუ ვინ იქს სამტეროსა საქმესა და არცა გაუპირდებით არას მიზეზისათვის, არა ჳჩვენგან უკითხვად და დამოუწმობებლად ვინცა ჳქნას, მანცა გარდაიწადოს მისითა ღონითა. ამისნი მოწმენი სარგის მესანი, ამასაჯან შურეგინი, ხამიჯ ხაკანი, მიკმინე გვარამანი. მე გიორგის დამიწერია და მოწამეცა ვარ. (უზის ცამეტი ჳვარი).

9.

ქ. დაგიწერეთ ესე მტკიცე და ვუქცეველი ჩნ გვარამიანთ შნ გ-ი და ბაბან და მიჯელ ივანე, შნ გ-ი მას ჟამსა ოდეს ძმა ჩუენი ვაჩავი ომად დარჩა ჩნ ერთმანეთისა ნებითა კვრხილისა ყანა მისა საკოთრად და საკებად მივეცი ვირე სოფელი ესე დგეს შენი საკვები იყოს. . .

10.

ქ . მაცხოურისა ლაჰილისა თაუსდებობითა დაუწერეთ და დავდევით დაწერილი ესე ჩვენ ლაჰილისა სოფელმან უფროსმან და უმცირესმან ყველამ ერთმან ერთისა დამოწმებითა მტკიცე და უქცეველი ყოვლისა მიზეზისაგან უმიზეზოი მას ჟამსა ოდეს ქუჩუტასა საქმე გავიგონეთ ამა პირსა ზედა ვისაც შეძლოს ექუსი საკლავი ორ-ორი საცხურე, შვიდი ჩხაფოლე (?) და იმას დაუჯერდით, პური შანით მოვიტანოთ . ესე იმის ხელი დაგვიმტკიცებია ვინც შეშალოს შემცა იშლების სული და ჯორცი.

აქ კიდევ ერთი მოჭრილი სიგელისაგან დარჩენილია შემდეგ:

11.

. . . განასარს დამითულია ოთხასი ფარის ლარისა წიგნი ესე ცამეტისა. . .

2. წიგნი წამებისა წმიდისა გიორგისა და წმიდის თეოდორესი. ეს ხელნაწერი დ. ბაქრაძის დროს ეკუთვნოდა ზეგანის ეკლესიას, ივარის თემისა (იხ. დ. ბაქრაძე, გვ. 112). ხელნაწერი 18X12, 5 სანტ. დაწერილია ეტრატზე, ლამაზი ნუსხა ხუცურის ხელით. სათაური ასომთავრულით: **თა აპრილსა კგ წა/მეზაჲ წისა გ-სი რი/ აღწერა და თა და/ხვდა ყლსა სიმწნე/სა მი-სა მოწ-ფწ წი სა გ-ისი ბასიქარტოს.**

რუს იგი დაეპყრა კერპთ მსახურებასა ეშმაკისასა ყლი სუფელი იყო ბერძენთა ზ-ა მეფეწ რლსა სახელი ერქუა დიუნკლიტიანუზ. (მთელი ეს ტექსტი გადმოღებულია ფოტოგრაფიულად. იხ. №17216) ერთი მხედრული მინაწრი გვამცნევს:

„პატრონო ჩემო ლეონ მეფეო, ნეტარ მე რომ შენი დიდებაი ჰამოდ ყოფაი მესმის. აწ ამას მოგაცხენებ პატრონო ლეონ მეფეო ღმერთმან საჯერი მანდ მრალაი მოწყალებად კარგი ლაშქრობაი გაგიმარჯოს დასდურად (sic). და უთოდ (sic) შენ ლეონ პატრონსა ჩემი წყალობა გაგიმარჯოს ღმერთმან“.

აქ უნდა იგულისხმებოდეს ლევან მეორე დადიანი მე-17 საუკუნისა.

დასასრულს წმიდა გიორგის წამებისა, რომელსაც უჭირავს 50 ფურცელი, ტექსტის ხელით სწერია:

„წო გ-ი შე ვახტანგ ფარჯანიანი ან“.

შემდეგ იწყება: **წამებაჲ წსა თესი** (წითლითურთ). დასაწყისი:

მაქსიმიანეს და მაქსიმეს მეფეთა წარავლინნეს ყლსა ქყნასა საბრძანებელსა მ-თსა ყლნი რლნი ჰმსახურებდენ საღ-თუსა მას ღ-თის მსახურებასა შეშინებულთა საჭმელთა ჭამად რა ცხუვნდენ.

შემდეგ:

სასწაულნი წი-სა თე-სნი თავი ა . (სულ 11 თავი).

ბოლოს სწერია:

სახელითა მამისადათა ძისადათა და სლისა წი-სადათა მხე-ბითა წ-სა ღ-თის მშობ-ლისადათა და წი-სა იუანე ნათლის მცემელისადათა და წ-თა მთავარ ანგელოზთადათა და წ-თა მოციქულთა წწ-ტყლ და მღ-დელთ მოძღუართადათა და წ-თა მოწამეთა-თა წი-სა გი მთავარ მოწამისადათა და წი-სა თე მოწამისადათა მე გლახაკმ-ნ იუენე მესვეტემ-ნ აღვწერე წამებაჲ ესე წ-თა მოწამეთაჲ წი-სა გი-სი და წ-ი თე-სი და სსწ-ლნი სალოცველად აღიდენ ღ-ნ ვახტანგ ფარჯანიანისა და ღ-თივ მონიჭებულთა შვილთა მისთა ივ-ნესა და აბულახტარს<sup>1</sup>. აწ ვინ იკითხვიდეთ გ-ლსმოდგინედ ულოცვედით რ-ა ღ-ნ ერთობით აღიდნეს შვილნი და მშობელნი ნებასა ზ-ა მ-თსა ან.

დაიწერა სვეტსა ზ-ა ჭყუნდიდისასა :. აღ-ნ ღ-ნ მეფობასა : ბაგრატ კორაპალატისასა ინდიგტიუნსა : დ : ქრუნიკუნსა : ს : ნ : ა : ჯ-ლით იუვანე მესუეტისადათა. ღ-ნ დაგაჯერუს ლოცვა ყავთ.

მთელი ეს ბოლოსიტყვაობა გადმოღებულია, იხ. ფოტ. №№17216-17218.

შემდეგი დროის მინაწერი ხუცურად:

წ-ო გ-ი შე მიქაელ მონა შენი ორსავე ცხორებასა ამა საწუთროსა და მერმესა მას საუკუნესა ან.

თეოდორეს წამება შეიცავს სულ 69 ფურცელს.

3. რვა ცალი ჟამის წირვა იოანე ოქროპირისა და ბასილი დიდისა, ანუ კონდაკები; დაწერილია ეტრატის გრაგნილებზე ნუსხა ხუცურის ხელით; სიგრძე თითოეული გრაგნილისა არის ოთხიდან ხუთ არშინამდის; ხელი დაახლოებით მე-15 –17 საუკუნისა. თარიღი არც ერთს არ უზის. თითქმის ყველა მათგანი შემკობილია ერთს ან ორ ადგილას წ-თა სახეებით და ფერადებით შემკობილი ასომთავრულებით. ესენი ყველა გადმოღებულია ფოტოგრაფიულად. იხ. ფოტო №№17196-17201 და 17210-17215. ამათ შორის ერთს გრაგნილზე წარმოდგენილნი არიან კათაკმეველნი კარიკატურის ხასიათით, რომელნიც გადიან ეკლესიიდან. (ფოტ. №17199).

სხვებზე წარმოდგენილნი მხატვრობანი წ-თა კომპოზიციით ერთმანეთს დიდათ წააგავან, თუმცა სხვა და სხვა წმიდანია. ფიგურები ერთობ მოგრძოა, ყელი მაღალი, ნიშბი ვეებერთელა; ერთი მაცხოვრის სურათს შეიცავს (№17197), ვინაიდან მას ნიშბი ჯვარის სახედ აქვს და მარცხენა ხელში გრძელი ქარტა უჭირავს, რომელზედაც სწერია: მე ვარ ნათელი სოფლისა რომე . . . მეორე სურათს წმი-სა ნიშბს ქვეშ თავი ჭრელი ტურბანით აქვს მოკაზმული, მარჯვენა აწეულ ხელში შეკაზმული ასომთავრული კ-ნი უკავია, მარცხენაში ქარტა, რომელზედაც სწერია: წ-ე დანიელ : მესვეტე : ღ-ო : მე . . . (იხ. №17198). ერთ გრაგნილზე წარმოდგენილია : წ-ე ბასილი (იხ. №17200).

4. სახარება თარგმანი in folio, დიდი ტანისა, 54X25 სანტ. დაწერილია ეტრატზე ნუსხა ხუცურის ხელით ერთს სვეტად; ხელი ლამაზია მელანი შავი, სათაურები წითლურით. დაცული ტექსტი 25 თავს შეიცავს. ჯერ მოყვანილია სახარების სტიხები და შემდეგ თარგმანი. აშიებზე ხშირია განმარტებანი. გადამწერი არა სჩანს, მაგრამ ხელის მიხედვით თარგმანი ეკუთვნის მე-12-13 საუკ.

ამიაზე ერთ ადგილას ტექსტის ხელით მინაწერი:

ს-ლსა აკობის ძეს სფირნდონს (სპირიდონს?) შნდს ღ-ნ

არ ტექსტის ხელით მინაწერი:

ღ-თო შ-ე ცდვილი მხრბლი ჯერძა.

ღ-თო შ-ე ჩ-ი ძმობილი მათ კუარცხელია ა-ნ.

ეხლა ტექსტი იწყება სახარების სიტყვების თარგმანიდან:

მოვედით ჩემდა ყოველნი მაშრუალნი და ტვრთ მძიმე-  
ნი და მე განგისჯწნო. . .

თრგნ . მ-დით ჩ-და და ყ-ნი არა ესე ვინმე და იგი ა-დ ყ-ნი რ-ნი ხ-რთ ცოდვათაგ-ნ

---

1 ეს სამი სიტყვა თითქო შემდეგ იყოს მიწერილი, დ. ბაქრაძეს გამოშვებული აქვს (გვ. 112).

დამძიმებულ . რ-ნი ხ-რთ მწუხარებათგ-ნ შეპყრობილ. რ-ნიცა ხ-რთ ზრუნვათგ-ნ  
შეურვებულ.

5. **საგალობელი ეტრატზე in folio**, 29X23,5 სანტ, ნუსხა ხუცურით, მე-10-11 საუკ.  
ერთს სვეტზე, უყდოთ, თავი და ბოლო აკლია; ზოგიერთი სათაურები: იანვარსა ლა  
კვიროზ და დოვანედსი დს-ბლნი : ო-ო ღ-დატყსა : ჯ-დ : ა-თ-ა ფებერვალსა : ა : ეფრემისი :  
დს-დბლნი : ო-ო ღ-დატყსა ჯ-დ : ა :

6. **ჟამნი ქაღალდზე**; თავი და ბოლო აკლია, უყდოთ; დაწერილია ნუსხა ხუცური  
ხელით; მე-16-17 საუკუნისა; დაშლილი და გაფუჭებული.

7. **სახარება ეტრატზე**, 24X17 სანტ. უყდოთ; თავი და ბოლო არა აქვს; 129  
ფურცელი; დაწერილია ნუსხა ხუცურით; მახარობლების სურათები ყოფილა, ეხლა  
დაცულია მხოლოდ იოანე მახარობელისა; სხვა აკლია. ბოლოს უწერია:

სამებაო ერთ ღ-თბაო დღესა მ-ს დიდსა სასჯელისასა იქსენ სტნჯვლთგ-ნ  
სასტიკთა და საშინელთა : გ-ი ამის წიგნისა აღმწერელი მ-ხბითა წ-თა შ-ნთა  
ათორმეტთა მცქლთფთა : მ-ხბითა წ-ისა ღ-თის მშ-ბლისაფთა : და ყ-ლთა წ-თა : ზ-ცისა  
ძ-ლთთა : რ-ნი სათნო გეყვნეს :.

სამებად არსებით დაუბადებ-ლი ღ-თბით გამოუთქმელი ბ-ნბით მიუწდომელი  
სამ გუამოვნებით ცნობილი ერთ არსებით დ-ბლი ერთ ღ-თბად ერთ მთ-ვრობად ერთ  
მგ-ბდ სამებისა ერთა არსებისა და სფვდ მისი იყვნ ჩ-ნ ყ-თა ზ-ა ა-ნ.

შენიშვნა: ეს ის სახარება უნდა იყოს, რომელსაც უჩვენებს დ. ბაქრაძე (გვ. 109)  
მუჟალის მაცხოვრის ეკლესიაში და რომლის წარწერას გიორგი მთწმინდელის  
შესახებ ის მოკლედ იხსენიებს. ა. ხახანაშვილს მოჰყავს ჩვენ მიერ აღნიშნული ორი  
მინაწერი შეცდომებით (გვ. 18-19) და უმატებს კიდევ შემდეგ წარწერას მარკოზის  
სახარების ბოლოს: „დაესრულა (დაესრავლა?) მრკზის სხრბდ თავი. ცლზმურლი (?)  
აღიწერა ხუთას ოთხმოც მეათერთმეტესა წელსა ბრძანებითა ბე-სითა  
(ბესარიონისითა) ხოლო იკითხვის წ-თა მრხვათა“. არ ვიცით, ჩვენ ეს მინაწერი ვერ  
შევნიშნეთ, თუ ჩვენს დროს აღარ იყო, მაგრამ იმ სახით, რა სახითაც ეს ხახანაშვილს  
მოჰყავს, ეჭვებს იწვევს. აქ საზოგადო ფორმის მინაწერია ყველა სახარების ბოლოსი,

თუ რომელ წელს დაიწერა სახარება ქრისტეს ამალღების შემდეგ, რამდენ თავს და მუხლს შეიცავს და როდის იკითხება. ხახანაშვილი აქ ხედავს 591 ქორონიკონს ხელნაწრის გადაწერისას და მისი ანგარიშით მე-18 გვერდზე ეს ქორონიკონი უდრის 1229 წელს. მე-19 გვერდზე კი 1211 წელს უჩვენებს. ნამდვილად 591 ქორონიკონი უდრის 1371 წელს ( $780+591=1371$ ).

**8. სახარება ეტრატზე;** თავი და ბოლო არა აქვს, უყდო, 21X19 სანტ. ორ-სვეტად, ნუსხა ხუცურის ხელით. ხელნაწერი პალიმპსესტს წარმოადგენს. მარკოზის სახარების ბოლოს უწერია:

წნ ღთ შემოსილნო მმნო : ქს მოყმენო : ვინცა წა ამს სხრბსა და ლოცვასა იმსახურებდეთ ლოცვასა თქნსა მომიჯსენეთ ღთი სათს ფდ და მწარედ ცოდვილისა ამისა მწერალისა ათანასესთს, ვინ ჩმთს შნდობად ჰბრძანოთ ღნ თქნცა მოგაგოს აქა და მს სკნესა ან.

ეს სახარებაც მუჟალის თემის ეკლესიას ჰკუთვნება, მხოლოდ არ ვიცით რომელს. დ. ბაქრაძე მას არ იხსენიებს, მაგრამ ა. ხახანაშვილს აღნიშნული აქვს (გვ. 19).

შემდეგი დროის მინაწერი ხუცურით:

ღმრთისა, თავისიდეობით, მაცხოვარი ჟაბეშისა პირველი მოციქული ინე ქოჯმელანი . მულჩამაგიანი, მამისთვალ ჩამაგიანი(ი) და ჯუუნა საჰრანი : მქა ქოჯმელანი , ისო ჩამაგიანი და აჯუ ქუჯმელანი, აბუ საჰრიანი და ინე კორსიანი გიორგისაი იოსელიანი სრულ და ჟაბეშისა საფლი ესე ასრეი მოგიცია ვითამცა მაცხოვარი აღმაშენებლ იყო ვინ წინა დაუდგეს უშელოდ მახარობელისა იჰყარიანისა (?) სათიბი ლასგორელღაში მოგიცემია.

**9. სახარება ეტრატზე, 22X17,5 სანტ.** ნუსხა ხუცურის ხელით მე-12-13 საუკ. უყდოთ. ტექსტი დალაგებულია დღიურ საკითხავებად; თავი და ბოლო აკლია.

**10. სახარება ეტრატზე, 21X15 სანტ.** კარგი ნუსხა ხუცურის ხელით დაწერილი ორ სვეტად, წითლურის მეთაურის ასოებით, უყდო, თავი და ბოლო აკლია; ხელი მე-12 საუკ. უნდა იყოს. ბოლოში უწერია: გი ბრსა გლახ მწარედ ცოდვილისა ულოცე მკითხველო : ღთისა : თს . (აქ უნდა იგულისხმებოდეს გიორგი ათონელი).

**11. მრავალ თავი ანუ მსოფლიო წთა წამებანი,** რბილ ეტრატზე, უყდოთ; თავი და ბოლო აკლია, 18,5X16,5 სანტ. ნუსხა ხუცური ხელი მე-10-11 საუკუნისა, ერთ სვეტად. შეიცავს შემდეგ სტატიებს:

1) პირველი სტატიის ბოლო:

ხიგი აბრალეზდა თავსა თვსსა განძენებისა და ამჰარტავნებისა თვსისათს და არაჲ სარგებელი გეყო შნ ად და დაადგრა იგი უნაყოფოდ ვე აღსრულებამდე მისა რღისაჲ არს დბჲ უკნით უკე ან.

დასაწყისი:

ხოი-სა მიერ იგი სიხაროით ჰგიეს ყლსა ჟმს გლს ჰმა ყავთ შვილნუ ჩემნო რო ი მწე ჩნდა არს.

2) წიგნი ზარია (sic) პტრქისად რლი მიწერა ბაბილოვნით იწლდ მათა : რნი დაშთოვმილ იყუნეს ტყოვეობისაგ-ნ სძლისა მის : დაქურივებულსა ეკლესიისა სიუნისა და წდისა ქლქისა.

მერმინდელი მინაწერი:

მადლო წსა ზაქარიასა შე მიქაილ.

3) ოვწყებად ცხოველ მყოფელისა პატიოსნისა ჯდ ვრ ოვკმოილეს ბაბილოვნით იწმ-თ.

4) გნსოვნებად იოვანეწსი მოციქოვლისა და მატარებელისა თვსა აპრილსა კთ-სა.

5) წამებად წდისა იაკობისი ძმისა ოდ რლი დადგა იწლმს ეპისკოპოვზად.

6) წამებად წდისა სტფნწსი იწლმს პრვლ დკნსად.

7) პოვნად წდისა სტფნწსი.

8) მიცვალებად ნაწილთა წდისა სტფნწსთა.

9) თქმლი წდისა ეფრემისი მოძღუერისა მის კხოვლისა.

10) ნოვკბრსა ა წბდ წდისა არითადსი და კრებულისა მისისა ნებრა ქალაქსა ოვმერიხელთასა.

11) წამბდ წისა თევდორეწსი.

12) თსა აპრილსა კვ

წამებად წდისა გისი ჭემმარიტი.

13) თქმლი წდის ილარო ნ. . . (?)ხუცისად ჰრომისად კხვისა თვს ლოდისა ეკლესიისა, რომელ არს ტადარი წმიდისა მოწამისა გისი და უწყებად განგებისათვს წმიდისა ბასილისა კესარია კაბადუკიელ მთავარ ებისკპისა და ქეს მრწმუნოებისათვს.

14) თა ივლისა წამებად წდისა ქეფო (რწსი) და მოყუასთა მისთად.

ბოლოს:

და მოჰკუთეს თავი მისი თსა მირაკნისასა დლსა კოვრიაკესა ჟსა მსმსა . . .

15) წამებად წდისა ფუკადსი კანონმა რლი დღწ თვსა ბრძანოს ჰკითხე. დასაწყისი:

მოსვლასა მას მაცხოვრისა ჩნისაი ივ ქეწსსა.

16) გამომიებისათვს მელქიზედევისთვს.

17) თა ივლისა : წ : წმბდ წდისა პროკოპესი.

18) თა ოკდნბერსა იზ . საქმწ წთ კმზნ დამიანეთად და კორნებანი მათი

12. **ჟამნი ეტრატზე**, 19X15 სანტ. ნუსხა ხუცურის ხელით, მე-14 საუკ. თავი და ბოლო აკლია.

13. **კურთხევანი ქალაღზე**, 20X14 სანტ. ნუსხა ხუცურის ხელით; თავი და ბოლო აკლია, მე-17-18 საუკუნისა.

14. **სძლის პირნი ღვთისმშობლისანი** ქალაღზე, 14X10 სანტ. ნუსხა ხუცურის ხელით, მე-18 საუკ. თავი და ბოლო აკლია. უანასკნელი სამი ხელნაწერი მაცხოვარიშის ეკლესიიდან არის.

15. **ადიშის სახარება-ოთხთავი**. ერთ-ერთ მიზანს ჩვენი ექსპედიციისა შეადგენდა ფოტოგრაფიულად გადმოგველო მთლად ტექსტი უძველესი თარიღიანი

ადიშის სახარებისა, რაც ჯეროვნად იქმნა შესრულებული. სახარება 38X32 სანტ. დაწერილია მშვენიერის ასომთავრულით ეტრატზე ორ სვეტად და შეიცავს ეხლა 393 ფურცელს; ამათში არ შედის 5 პირველი ფურცელი, რომელზედაც მახარობელთა სურათები და კანონებია მოქცეული. რიცხვი გადმოღებული ტექსტის ფოტოგრაფიებისა არის 440. ეხლა, როგორც მოვიხსენიეთ, ეს სახარება მთელად არის გამოცემული მოსკოვის არქეოლოგიური საზოგადოების მიერ ფოტოტიპის საშუალებით (იხ. „მატერიალი პო არხეოლოგიი კავკაზა“, ტ. XIV). ვრცელს წინასიტყვაობაში (გვ. 7-24) ჩვენ მინაწერების და ბოლო სიტყვაობის განმარტებით გამოვარკვიეთ შემდეგი:

1. ჯუმათის მონასტრის (გურიაში) ყოფილ მამასახლის ნიკოლოზს უმოგზაურია კლარჯეთის მონასტრებში და იქიდან გამოუტანია ხუთი ხელნაწერი: ეს სახარება, მრავალ-თავი, კელთ-კანონი, მამათა წიგნი და კითხვა-მიგება. ამათ შორის ეს ჩვენი სახარება, კელთ-კანონი და მამათა წიგნი წამოუღია შატბერდის მონასტრისაგან. მინაწერი ნუსხა ხუცურით, სადაც ეს ამბავია მოხსენებული, ჩვენის აზრით, ეკუთვნის მე-17 საუკუნის მეორე ნახევარს. წარწერაში მოხსენებული მრავალ-თავი დაცული იყო გურიაში უდაბნოს მონასტერში; ეხლა ტფილისის მუზეუმშია. ხელთ-კანონი უნდა იყოს ერთ-ერთი სვანეთში დაცული იერუსალიმის დიდი კანონი.

2. ადიშის სახარება გადაწერილია შატბერდის მონასტერში, ამ მონასტრის მესამე წინამძღვრის სოფრონის თაოსნობით, 897 წელს. სოფრონი მისივე ხელით დაწერილს ბოლოსიტყვაობაში გარდაცვალებულად იხსენიებს მის მოწინავე წინამძღვრებს შატბერდის მონასტრისა, მამა გრიგოლს და მამა გაბრიელს. მამა გრიგოლი არის, ეჭვს გარეშე, გრიგოლ ხანძთელი, დამაარსებელი შატბერდის მონასტრისა და მისი პირველი წინამძღვარი, რომელიც გარდაიცვალა 861 წელს; ხოლო გაბრიელი უნდა იყოს მეორე წინამძღვარი და სოფრონი მესამე. ეს ის „დიდი სანატრელი მამაჲ სოფრონია, შატბერდის ეკლესიისა განახლებით აღმაშენებელი და უკუნისამდე გვრგვნი მისი“, რომელსაც იხსენიებს გიორგი მერჩული თავის გრიგოლ ხანძთელის ცხოვრების აღწერილობაში (გვ. ნბ). იმ დროის ბაგრატიონების მთავრებთა შორის, როგორც ცოცხალნი, მოხსენებულნი არიან ბოლოსიტყვაობაში: ადარნასე მეორე, რომელიც წინეთ ყოფილა კურაპალატი, შემდეგ გახდა ქართველთა მეფე (923 წ.); ეს არის მაშენებელი ბანის ეკლესიისა; შემდეგ მოხსენებულია შვილი ადარნასესი დავითი, რომელიც, როგორც სჩანს, 987 წელს ატარებდა ერისთავის ხარისხს, ხოლო მამის სიკვდილის შემდეგ გახდა ქართველთა მეფედ (923-937); სხვა ადარნასეს შვილების სახელები ტექსტში გაფუჭებულია. გარდაცვალებულ ბაგრატიონებთა შორის მოხსენებულნი არიან: არსენი, დავითი და აშოტი. ამათში დავითი არის მამა ადარნასე მეორისა, რომელიც მოკლულ იყო 881 წელს; აშოტი ძმა არის დავითისა, ბიძა ადარნასე მეორისა, რომელიც გარდაიცვალა 885 წელს, ხოლო არსენი, რა თქმა უნდა, იგივე ბაგრატიონი, ცნობილი არ არის არც სუმბატის ისტორიით და არც სხვა წყაროებით. ჩვენის მოსაზრებით, არსენი უნდა იყოს ბერობის სახელი ადარნასე პირველისა, რომელიც იყო ძმა დავითის და აშოტისა, მამასადამე, მეორე ბიძა ადარნასე მეორისა. ადარნასე პირველი, როგორც ეტყობა, ბოლო დროს ბერად შემდგარა არსენის სახელით. ის გარდაიცვალა 874 წელს<sup>1</sup>, ამრიგად გარდაცვალებულად მოხსენებულნი არიან მამა და ორი ბიძა (მეტი არც ჰყოლია) ადარნასე მეორისა; ამათ მოხსენებაში დაცულია ქრონოლოგიური რიგი გარდაცვალებისა: არსენი, იგივე ადარნასე პირველი (874 წ. ), დავითი(881 წ.), აშოტი



(გარდ. 885). განა შესაძლოა სოფრონს არ მოეხსენებინა მეორე გარდაცვალებული ბიძა ადარნასე მეორისა, რაკი მოიხსენია მამა მისი და ერთი ბიძა? ეს შეუძლებელია და ამიტომ ჩვენი მოსაზრება სწორი უნდა იყოს. ადიშის სახარების წინასიტყვაობაში ეს მოსაზრება არ იყო გატარებული.

3. სახარების გადამწერი არის ერთი მიქაელი, ხოლო მმოსელი (შემმოსველი, ყდის გამკეთებელი) არის მეორე მიქაელი – დიაკონი. ამის გაკეთებულ ყდას ჩვენამდე არ მოუღწევია, ეხლანდელი ყდა მერმინდელია და ამის გაკეთების დროს ზოგი ფურცლები აურევიათ, აქა-იქ ზოგი კიდევაც ჰკლებია. დრო გადაწერისა აღნიშნულია ასე: დასაბამითგანთა წელთა ხვა (6501), ქრონიკონსა რიზ (117), შობითგან უფლისა ჩუენისა იესუ ქრისტესით წელთა ჩა (1001). ქრონიკონი 117 უდრის 897 წელს (780+117=897). ამასვე უდრის ქართულის სათვალავით 6501 წელი (6501-5504=897), წელი ქრისტესით 1001 ამ თარიღს არ ეგუებოდა და მე მცდარად ჩავსთვალე, ხოლო განსვენებულმა ჩვენმა მეცნიერმა ნიკო მარმა სწორად მართო ეს მესამე თარიღი იცნო. მარრი ეყდნობოდა ზოგიერთ სიტყვებს და ფორმებს, რომელნიც მას ახალ ქართულის ნორმებად მიაჩნდა და მე-9 საუკუნის ტექსტში მათი არსებობა შეუძლებლად აღიარა. ჩვენ ეს უარყავით და ასეთი ფორმები აღვნიშნეთ მე-10 საუკუნის უტყუარ თარიღიან ტექსტშიც. შემდეგ კ. კეკელიძემ ეს მესამე თარიღი თავისებურად გაამართლა და შეუფარდა იმავე 897 წელს (იხ. „ტფილისის უნივერსიტეტის მოამბე“, II, გვ. 392-397). თავისი სტატია ავტორმა ასეთი სათაურით დაბეჭდა: „როდისაა გადაწერილი ადიშის სახარება?“. ეს სათაური გულისხმობს,

---

1 იხილეთ გენეალოგია ბაგრატიონებისა ივანე ჯავახიშვილის ისტორიაში.

თოთქოს წინეთ არ ყოფილ იყო გამორკვეული, როდის არის გადაწერილი ადიშის სახარება, მაგრამ ეს ასე არ არის. მოვუსმინოთ ისეთ ავტორიტეტულს მეცნიერს, როგორც არის ივანე ჯავახიშვილი. სწორედ იმავე ტომში, სადაც არის დაბეჭდილი კ. კეკელიძის სტატია, ივ. ჯავახიშვილი სწერს (გვ. 350): „ზოგიერთი იქ (ადიშის სახარებაში) ნახმარი სიტყვები და ფორმები ნ. მარს ახალ ქართულისად ჰქონდა გამოცხადებული, რომლის მსგავსი მე-9 ს. ხელნაწერში ნ. მარის აზრით არ შეიძლებოდა რომ ყოფილიყო. ე. თაყაიშვილმა ჯერ შატბერდ-ადიშის სახარებების ანდერძში მოხსენებული ისტორიული პირების მოღვაწეობის დროის გათვალისწინებით დაამტკიცა უცილობლად, რომ ამ ხელნაწერში ქართული ქრონიკონით აღნიშნული თარიღი იყო სწორე და ამის გამო იგი უეჭველია მე-9 ს-ში დაწერილი ძეგლია. შემდეგ იგივე საკითხი ე. თაყაიშვილმა ენის თვალსაზრისითაც განიხილა. თუ რამდენად შემცდარი იყო ნ. მარრი თავის მსჯელობის დროს ქართული ენის ძველი და ახალი ფორმების დახასიათებას რომ ცდილობდა, ე. თაყაიშვილმა იმავე შატბერდის (ადიშის) სახარების ფოტოტიპიური გამოცემის წინასიტყვაობაში გამოარკვია. მან ნ. მარრისაგან ახალ ქართულ ფორმებად და სიტყვებად ცნობილი ფორმა-სიტყვები მე-10 საუკუნის ხელნაწერში ამოკითხულ მაგალითებით ძველ ქართულში არსებულად ცხად-ჰყო. მაგრამ რათგან თვით ადიშის სახარებად ნ. მარს მე-11 საუკუნის დამდეგისად მიაჩნდა, ამგვარი საბუთი მას, რასაკვირველია, არ დააკმაყოფილებდა. მაინც სრულებით სამართლიანად ამბობდა ე.

თაყაიშვილი: ჩვენ ისე ნაკლებად გვაქვს ძველი, მე-9 საუკუნის ძეგლების ენა შესწავლილი, რომ რა არის ძველი და რაა ახალი, ჯერ ძნელი სათქმელია“.

აქედან ცხადდება, რომ საკითხი, როდის არის ადიშის სახარება გადაწერილი, გამორკვეული ყოფილა კეკელიძის სტატიის დაბეჭდვამდისაც. მაგრამ კ. კეკელიძეს უსათუოდ სამსახური მიუძღვის ადიშის სახარების მესამე თარიღის ახსნა-განმარტებაში. ამიტომაც სტატიას უფრო შეეფერებოდა სათაური: „განმარტება ადიშის სახარების მესამე თარიღისა“. ავტორი ჯერ მოიხსენიებს იმ ცნობილ ფაქტს, რომ საქართველოში ძველად სხვა და სხვა წელთ აღრიცხვა იყო ხმარებული: ერთი ქართული, რომელიც ქვეყნის გაჩენიდან ქრისტეს დაბადებამდე სთვლიდა 5604 წელს, მეორე – ბიზანტიური, რომელიც სთვლიდა 5508 წელს, მესამე – ალექსანდრიული, რომელიც ითვლიდა 5500 წელს, მეოთხე – პანდორესი, რომელიც ითვლიდა 5492 წელს. ამ რიგად ქართული სისტემა წინ ითვლის ბიზანტიურთან შედარებით 96 წელს, ალექსანდრიულთან შედარებით 104 წელს, ხოლო პანდორესთან შედარებით 112 წელს. ადიშის სახარებაში არის ნახმარი ალექსანდრიული სისტემა. ადიშის სახარება გადაწერილია „დასაბამითგანთა წელთა 6501, ქორონიკონსა 117, შობითგან ქრისტესა 1001“; ამ სამ თარიღში პირველი ორი გვაძლევს 897 წელს ( $6501 - 5604 = 780 + 117 = 897$ ). ამასვე გვაძლევს მესამეც, ქრისტესით 1001, ესე იგი 1001 წელი; მართლაც, 1) ჩვენ ვიცით, რომ ალექსანდრიულ ერასთან შედარებით ჩვენი ერა 104 წლის განსხვავებას გვაძლევს; მაშასადამე,  $1001 - 104 = 897$ ; 2) 1001 წელს გასულა ქვეყნის გაჩენიდან:  $5500 + 1001 = 6501$  წელიწადი, როგორც ამას თვით გადამწერიც აღნიშნავს; ამას რომ გამოვაკლოთ ჩვენებური სისტემით 5604 წელიწადი, მივიღებთ 897 წელს (იხ. ხსენებული სტატია, გვ. 396-397). ჩვენის აზრით, კ. კეკელიძემ აგვიხსნა, თუ საიდან წარმოსდგა შეცდომა ადიშის სახარებაში ქრისტესით 1001 წლის ჩვენებაში. აქ გადამწერს ის განსხვავება, რომელიც არსებობს ქართულ წელთაღრიცხვაში დასაბამითგან წლის ანგარიშში, გადმოუტანია ქრისტეს მოსვლიდან წლის აღრიცხვაშიც. რომ ეს სისტემა ჯეროვანი არა ყოფილა, ეს იქიდანაც სჩანს, რომ ეს არ დამყარებულა ქართულს წელთ აღრიცხვაში. ყოველ შემთხვევაში, მე-11 საუკუნიდან ქრისტესითგან წელთ აღრიცხვა ისეთია, როგორც ჩვენ ეხლა ვხმარობთ და არავითარი დამოკიდებულება არა აქვს დასაბამითგან წლის ანგარიშის განსხვავებასთან. ამას გარდა ჩვენს სახარებაში პირველი ორი თარიღი სწორ ქართულ სისტემას ემყარება, მხოლოდ მესამე ალექსანდრიულ სისტემას. ამგვარი, ასე ვთქვათ, ორმაგი ბუჭხალტერია ერთი და იგივე თარიღის აღსანიშნავად, მიუღებელია. სხვა ადგილას ჩვენ განმარტებული გვაქვს, როდის მივიღეთ ჩვენ ქორონიკონი ანუ 532-წლიანი ციკლი, რა უდევს სარჩულად ამ წელთ აღრიცხვის დაწყებას და რატომ წარმოიშვა განსხვავება დასაბამითგან წელთ აღრიცხვაში ჩვენს და სხვა სისტემებს შორის (იხ. **Georgica**, ტ. I, წიგნი 1, გვ. 9-27), ამიტომ ამაზე საუბარს არ გავაგრძელებ. ეხლა ასე თუ ისე, ყოველ მხრივ გამორკვეულია, რომ ადიშის სახარება 897 წელს არის გადაწერილი და დღემდე რჩება უძველეს თარიღიან სახარების ხელნაწერად. ეხლა, როდესაც პალიმფსესტებისაგან აღდგენილმა ძველი ტექსტების შესწავლამ მოგვცა ახალი და უძველესი ღირს შესანიშნავი მასალა ქართული ენის ევოლუციის შესასწავლად, როდესაც დადასტურებულია ხანმეტობა და ჰაემეტობა მე-V-VII საუკუნოების ტექსტებისა, ადიშის სახარების ტექსტი, რამდენადაც ჯერ შესწავლილია, ჰაემეტობის გადამავალ ტექსტად სჩანს (იხ. ი. ჯავახიშვილი: „ახლად აღმოჩენილი უძველესი ქართული ხელნაწერები და მათი მნიშვნელობა

მეცნიერებისათვის“, „ტფილისის უნივერსიტეტის მოამბე“, II, გვ. 313-391. ა. შანიძე. „ჰამეტობა ადიშის სახარებაში“, იქვე, გვ. 417-424; მისივე: „ჰამეტი ტექსტები და მათი მნიშვნელობა ქართული ენის ისტორიაში“, „უნივერსიტეტის მოამბე“, III, გვ. 354-388). დიდი მნიშვნელობა აქვს აგრეთვე ლექსიკურ მასალასაც ამ სახარებისა. ტექსტი მათეს და მარკოზის სახარებისა მხედრულის ასოებით, შენიშვნებით და ლათინურის თარგმანით, უკვე გამოცემულია, ფოტოტიპირი გამოცემის მიხედვით, რობერტ ბლეიკის მიერ (იხ. R. Graffin Patrologia Orientalis, tome XXIV – fascicule 1, tome XX – fascicule 3).

შენიშვნა: მესტიაში ბლალოჩინ ბესარიონ ნიჟარაძის სახლში იყო კიდევ ბევრი სხვა ხელნაწერი, მაგრამ სამწუხაროდ ჩვენ მოკლებული დავრჩით საშუალებას ისინი გაგვეჩინჯა, ვინაიდან ბესარიონი ერთი კვირით ვატაცის ეახლა და მისი დაბრუნების შემდეგ ჩვენ უკვე მულაყის თემში ვიყავით და დრო აღარ გვქონდა მესტიაში დავბრუნებულიყავით. ამას გარდა ჩვენ აქ არ მოგვყავს ნუსხა მრავალ-რიცხოვანი ხელნაწერებისა, რომელნიც საქართველოს საისტორიო და საეთნოგრაფიო მუზეუმის ფონდში შევიდა. ესენი მუზეუმის კატალოგშია აღნიშნული.

## ლენჯერის თემი

ლენჯერის თემში შედიან სოფლები: ნესგუნი, დემსია (ლემსია), ქაშვეთი, კაერი (?), სოლი, ლაშტხვერი, მუხელი.

### სოფელი ნესგუნი.

სოფელ ნესგუნში ძველი მაცხოვრის ეკლესია არის თლილის ქვისაგან აშენებული, საკმაოდ დიდი და ისე მაღალი, თითქოს ორ-სართულიანი არისო. შესავალი მას აქვს დასავლეთით და სამხრეთით; ფანჯარა ოთხი; ორი სამხრეთით და თითო აღმოსავლეთით და დასავლეთით. კანკელი გარედ გამოდის მრავალ-წახნაგოვანად (იხ. ფოტოგრაფია, ნომ. 17434). სამხრეთით ეკლესიას ჰქონია ეკვტერი, რომელიც ეხლა მოუცილებიათ. ეკლესია დახურულია ყავრით. აღმოსავლეთით, საკურთხევლის კედელზე სანახევროდ გადასული წარწერაა, რომელიც აღნიშნული არ არის ლიტერატურაში. წარწერა მგონი ასე იკითხება:

ქე შწყე ბზგნე .

მეორე წარწერა აგრეთვე ცუდათ შენახული მოიპოვება დასავლეთის კედელზე:

ქე შე მფე გი .

ესე იგი: ქრისტე, შეიწყალე მეფე გიორგი.

შიგნით ეკლესია მოხატული ყოფილა, მაგრამ ეხლა მხოლოდ ნიშნები შერჩენია ფრესკებისა. კანკელი ქვისაა და შედარებით მაღალია სვანეთის ეკლესიისათვის, შეიძლება მიტომ, რომ თვით ეკლესიაც მაღალია. კანკელი შესდგება სამი კამარისაგან, ორი სვეტით და ამდენისავე ნახევარი სვეტებით კიდევში; არშინ-ნახევრის სიმაღლეზე კამარები იწყება ხატებისათვის. ეკლესიაში დაცულია:

1. **დიდი ხის ჯვარი** კანკელის წინ სადგომი, მაგრამ ეხლა თვით კანკელზე დამყარებული, შექმნილი ჩვეულებრივად ვერცხლის ფირფიტებით წმიდათა სახეებით. ყველაზე უფრო დიდ ფირფიტაზე, ზემოდ, წარმოდგენილია სრულის ტანით ღვთის მშობელი ჩვილადი, წარწერით: დედა ღ:მრდ (sic); ესე იგი: დედა ღმრთისაჲ. ქვემოდ ამავე ფირფიტაზე წელსზევითი მაცხოვარია და კუთხეებში მზენი. ფირფიტა შემკობილია ბალახოვანი აშიებით. შუაში ჯვარისა არის უმბო მზის თვალის სახით; მის კუთხეებში, ზემოდ, ორ წა გიორგია ცხენოსანნი, გვირგვინოსანთა მგმირავები; ქვემოდ: წყვილი სურათია, ვგონებ, მთავარ ანგელოზთა. უმბოს აქეთ-იქით სამი ფიგურაა ღვთის მშობლისა, ჩვილედისა, წელსზევითი, ბერძნულის წარწერით სახელისა და შემკობილის აშიებით. ამათ იქით მთავარ ანგელოზებია; კუთხეებში ყოფილა კიდევ მაცხოვარი, დარჩენილია მხოლოდ მარცხენა ფრთაზე. ქვემო ფრთაზე ჯერ ღვთის მშობელია, წელსზევითი, ბერძნულის წარწერით და შემდეგ ამის ქვემოდ ეტრატზე დახატული ჯვარცმაა ერთის, იოანეს, წინადგომით და ეს ნახატი მიკრულია ჯვარზე. ერთი ფირფიტა ქვემოდ აკლია (იხ. ფოტ. №16973).

2. **მეორე ასეთივე ჯვარი**, ხოლო უფრო ნაკლები ზომისა, 70X 41 სანტ. ქვემო ნაწილი ამისაც მოძარცულია. მთელი ზემო და შუა ნაწილი უკავია ერთ დიდ ფირფიტას, რომელზედაც მაცხოვარია წარმოდგენილი სრულის ტანით, სახარებით და მაკურთხეველის მარჯვენით, წარწერით: იჴ ქე. ქვემოდ მაცხოვრისა წა გი, წელსზევითი (№16969). მარცხნივ და მარჯვნივ ფრთებზე წარმოდგენილნი არიან: ჯვარცმა: წა გიორგი, მთავარ ანგელოზნი და სხვა.

3. **დიდი ვერცხლის ფირფიტა**, ოქროთი დაფერილი, რომელზედაც წარმოდგენილია ჯვარცმა, 28X18 სანტ. (№16965). ზემოდ: ორი ჩამოფრენილი ანგელოზია, წარწერებით: წა მქლ, წა გზრლ. ჯვარცმულის ნიშნის ზემოდ, ჯვარის სახელი, წარწერა არის: ქ : ესე : არს : მეუფე : ურიათა .

ქვემოდ ორივე მხარს ჯვარცმულისა: ღვთის მშობელი და იოანე, წარწერებით: დ ღი, წა იე მზრ ბლი. ქვემო ნაწილი ფირფიტისა ადარ არის, დარჩენილია წარწერა: „ადამის თავი“; ეზო ვაზების ყლორტების მსგავსად არის შემკობილი. სამართლიანად შენიშნავს გრაფინია უვაროვისა, რომ ეს ფირფიტა წინეთ ყოფილა სახარების ყდის ფირფიტა. ხელობა ქართულია მე-15-16 საუკუნისა. ჩვენ ეს ფირფიტა, რომ არ გაფუჭებულიყო, ხატის ფიცარზე მივაკარით.

4. **ხატი ღვთის მშობლისა**, ყოფილა წამლით დახატული, მაგრამ ეხლა მოშლილია. ოქროს მორთულობა და აშიები ხატისა დაცულია (№16974). წარწერა სევადით არის შესრულებული: დედა ღ-თისა. აშიები, გაყოფილი წერტილის ხაზებით უჯრედებად, სევადითავეა შემკობილი, მაგრამ ეხლა ძლივს ემჩნევა. მეორე გვერდზე ვერცხლისა, ჯვარის ირგვლივ, ლექსად წარწერაა (№16975):

რმელმნ ეგე ევას მ  
იუზღე ვალი : ჰრქუი  
რაღ გბრიელს ვარ  
უფლის

ა მკველი : მშინ ისტ  
უმრე ქუეყნად მოუვ  
ალი : დაემკო ძალი პ  
რველვე სსხლ დამთრ  
ალი ქალწულო მიკსენ  
ბორენა ჭირ  
მრავალი.

უქარაგმოდ და ლექსად დაწყობილი ასე იქნება:

რომელმან ეგე ევას მიუზღე ვალი,  
ჰრქუი რად გაბრიელს : „ვარ უფლისა მკვეალი“.  
მაშინ ისტუმრე ქუეყნად მოუვალი,  
დაემკო ძალი, პირველვე სისხლ დამთრალი,  
ქალწულო, მიკსენ ბორენა ჭირმრავალი.

ეს წარწერა ფრიად დამახინჯებულად აქვს მოყვანილი ა. ხახანაშვილს (გვ. 37-38).

წარწერაში ასოები ო და უ ერთგვარად არის გამოხატული.

ბორენა იყო მეფე ბაგრატ მეოთხეს (1027-1072) მეორე ცოლი, ოსთა მთავრის ქალი.

ხელობა ხატისა, თუმცა ცუდათ დაცული, მართლა შიძლება მივაწეროთ კლასიკურ ხანას, მე-11-12 საუკუნეს. მაგრამ ხასიათი წარწერისა ყოვლად შეუძლებელია მე-11 საუკუნეს ვაკუთნოთ. ამიტომ ჩვენ გვგონია, რომ წარწერა მერმინდელია, შეიძლება ძველიდან გადაწერილი, არა უადროეს მე-16-17 საუკუნისა. ანდა აქ მოხსენებული ბორენა სხვა პირია და არა ბაგრატ მეოთხეს ცოლი.

5. პატარა ხატი მირქმისა, 6,5X5 სანტ. ტლანქი ხელობისა, (იხ. ფოტ. №16974). აქვე მეორე პატარა ხატი ღვთის მშობლისა, ჩჩვილელი, ფრიად ტლანქი და სპილენძის პატარა ხატი ჯვარცმისა (პანაგია).

6. ხატი მაცხოვრისა, ვერცხლისა, ნაჭედი, 39X26,5 სანტ. (№16967). მაცხოვარი ტახტოსანია, ჩვეულებრივი რიგით წარმოდგენილი. აშია ორია; შინაგანი ფოლაქების მსგავსად არის შემოვლებული; გარეგანი – ფართო, საცრის მსგავსია, მედალიონებით, მაგრამ უსურათოდ. ხელობა დაბალია, მე-16-17 საუკ.

7. ხატი მაცხოვრისა, ვერცხლით ნაჭედი, 42,5X34 სანტ. (№16968). მაცხოვარი აქაც ტახტოსანია, დიდი ჯვარისა სახის ნიშნით და წარწერით: ზე ექ (sic). ეს შებრუნებული ასოები შეესაბამებია სიტლანქეს ხატის ხელობისა. ეზო და აშიები ბალახის მსგავსად არის შემკობილი; ქვემო აშია აკლია. ხელობა ტლანქია, მე-18 საუკ. მარცხენა აშიაზე ღვთის მშობელია; მარჯვენაზე: იოანე ნათლის მცემელი, სრულის ტანით.

8. ხატი წინასწარმეტყველის ელიასი, ვერცხლისა, ნაჭედი, 20X22 სანტ. ნამდვილი სვანური ხელოვნებაა დაცემის ხანისა (№16966). წარწერა სახელისა ხუცურად: წ-ღ ელია. მხოლოდ ეს წარწერა გვავალებს ჩვენ დაუუჯეროთ ამის ხელოვანს, რომ მას უნდოდა აქ გამოეხატა ელია წინასწარმეტყველი. უამისოდ მის გამოხატულ სურათს ჩვენ მივიღებდით უბრალო სვანი კაცის გამოხატულებად. სახე

და მოკლე ტანისამოსი, ჩოხის მსგავსი, სვანურია. მარცხნივ, ვით უსახო ზვინი, რაღაც გროვია. ამ უთავბოლო გროვაში თითქო ისახება ჩონჩხი უზარმაზარი ფრინველისა, ნისკარტით და ფრთებით. აშიები ჩვეულებრივია ასეთი ტლანქი სვანური ხელობისათვის, რომელიც შესდგება ერთი ერთმანეთში გადაბმული ნახევარი სიმრვალებებისაგან, წერტილებით შიგნით; ქვემოდ ვულგარული ასომთავრული წარწერაა:

წო :: ელია :: მეოხ ექმენ :: ჯფარიძეს :: სუმანის (?) ::  
და თანა :: მცხდრესა :: მისსა : კოპაიძის :: ქალსა ::  
კაკონს დღეს მს გნკთხვისსა ამნ ო .

უქარაგმოდ:

წმიდაო ელია, მეოხ ექმენ ჯაფარაიძეს სუმანის (?) და თანამეცხედრესა მისსა კოპაიძის ქალსა კაკონას დღესა მას განკითხვისასა, ამინ, უფალო.

ნესგუნში ყოფილა კიდევ პატარა ქვის ეკლესია ილია წინასწარმეტყველის სახელზე და ზემო ნაჩვენები ხატი ალბათ ამ ეკლესიას ეკუთვნოდა. ჩვენს მოგზაურობის დროს ამ ეკლესიას ანახლებდენ; წინეთ მიტოვებული ყოფილა. ეკლესიასთან მე ვიპოვნე პატარა ზარი, უცნობი, მხედრულის წარწერით:

ქ. შემოგწირე :: მე :: ერისთვის :: ძემანი :: (sic) დავით ::  
ზარი :: ესე :: თქუენი :: საშინელისა :: ხატსა :: იმნეი-  
მისას (?) :: შენი :: მეოხი :: მექმენი :: ორსავე :: ცხო-  
რებასა :: შინა :: ამინ::

წაკითხვა „იმნეიმისასა“ საეჭვოა, ვინაიდან დედანში კარგად არ განირჩევა.

წარწერას ახასიათებს ხორცმეტნი ასოები ი-ნები. წარწერა მე-17 საუკ. უნდა იყოს.

### სოფელი ლემსი.

ამ სოფელში ეხლა ახალი ეკლესია არის, მაცხოვრისა; ეხლანდელი მისი ხატები წინეთ კომპში ინახებოდა და ლიტერატურაში ცნობილი ნაკლებად არის. ჩვენ აქ ვნახეთ:

1. **ჯვარი ხისა**, შუა ტანისა, 98X61 სანტ. შემერწილი ვერცხლის ფირფიტებით, ლამაზი ხელობისა, მაგრამ, სამწუხაროდ, ბევრი მათგანი აკლია. მარცხენა და მარჯვენა მკლავი ეხლა სულ შიშველია; ცოტა ზემოდაც აკლია და ქვემოდაც (№ 16986). ქვემოდ წარმოდგენილნი არიან: წყვილად, გრიგოლ დიდი და წა ნიკოლაოზ, წარწერებით: წ-ღ გრიგოლი, წ-ღ ნიკოლაოზ.

ქვემოდ, მათ შორის, მეორე წარწერა: ქე შეი/წყალე სუ/ -  
ლი ვხ/ტანგ/ისი.

ზემოდ და ქვემოდ ამ ფიგურებისა საუცხოო ხელობის შემკობილობაა ბროწეულის ყვავილების მსგავსი. ამას ზევით ორი სურათია მაცხოვრისა, ტახტოსნისა, ბერძნულის წარწერებით სახელისა. ამას ზემოდ მთავარ ანგელოზია, სრულის ტანით და შუბით.

2. **მეორე ასეთივე ჯვარი**, 86X58 სანტ. შუაში მიჭედილი აქვს ვერცხლის პერანგი სხვა ხატისა, ღვთის მშობლის საუკეთესო ხელობისა, მე-12-13 საუკ. ბერძნულის

წარწერით სახელისა; მარცხენა ფრთაზე ოქროთი დაფერილი ვერცხლის სამი ფირფიტა და მათზე წარმოდგენილი არიან: პეტრე და პავლე: წმ პავლე, წმ პეტრე. მარჯვენა ფრთაზე: წმ მიქელ, წმ გაბრიელ და ღვთის მშობელი, ბერძნულის წარწერით სახელისა. ქვემო ფირფიტები გაფუჭებულია, მაგრამ, ეტყობა, იქ მთვარ ანგელოზები ყოფილან წარმოდგენილნი ( ამის ფოტოგრაფია არა გვაქვს).

3. **ხატი მაცხოვრისა**, ოქროთ დაფერილი ვერცხლით ნაჭედი, 44X32 სანტ. (№ 16979). მაცხოვარი წელსზევითია, სახარებით და მაკურთხეველის მარჯვენით და დიდი ჯვარის სახის ნიმბით. წარწერა სახელისა ბერძნულია, მაგრამ შეცდომით; აშიები ბალახოვანი შემკობილობით არის მოცული ფიგურებით მედალიონებში; მარჯვნივ და მარცხნივ წა მხედარნი, სრულის ტანით, ზემოდ: წელსზევითი ფიგურები: ჩჩვილედი ღვთის მშობლისა შუაში და მთავარ ანგელოზთა კუთხეებში. ქვემო აშია სხვა ხელობის არის, რომბ-ლურსმული; მარჯვნივ დანაკერები ნაჭერია; ხელობა მოტლანქოა, მე-16-17 საუკუნისა.

4. **ხატი მაცხოვრისა**, ოქროთი დაფერილი ვერცხლით ნაჭედი, 33X23 სანტ. (№1681). მაცხოვარი ტახტოსანია; მარჯვენა ხელით აკურთხებს, მარცხენაში სახარება უჭირავს, რომლის ყდაზე ჯვარია გამოსახული. ნიმბი დიდი აქვს, ჯვარის სახისა. წარწერა სახელისა ბერძნულ-ქართულია. ზემო და ქვემო აშია მოძარცულია, დანარჩენის ფოთლოვანი შემკობილობა ულახათოა. ხელობა ტლანქია, არა უადროეს მე-17 საუკუნისა.

5. **ხატი მაცხოვრისა**, ვერცხლით ნაჭედი, 46 X35 სანტ. ტლანქი ხელობისა, მე-17-18 საუკუნის (№16978). მაცხოვარი ტახტოსანია, ჩვეულებრივი რიგით წარმოდგენილი, ხოლო ტახტი უბრალო ჩუქურთმიან სავარძელს მოგვაგონებს. წარწერა სახელისა ბერძნულია, ნიმბი დიდი ჯვარის სახედ. აშიები რომბ-ლურსმულია რვა მედალიონით, რომლებშიაც მოსჩანს ზემოდ: მაცხოვარი მთავარ ანგელოზებითურთ. ასეთივეა განმეორებული ქვემო აშიაზეც; მარჯვენა აშიაზე, ვგონებ, წა გიორგია, სრულის ტანით. წარწერა არა აქვს.

6. **ხატი ჯვარცმისა**, ოქროთი დაფერილი ვერცხლით ნაჭედი, 32X24 სანტ. (№16982). ჯვარცმის ზემოდ მზე და მთვარეა წარმოდგენილი; აქეთ-იქით მთავარ ანგელოზნი მედალიონებში. ქვემოდ წინამდგომნი: ღვთის მშობელი და იოანე. წარწერები გადასულია, ხოლო იოანეს წინ სჩანს: წმ. ჯვარცმულის ფეხებს ქვევით ადამის თავია; უფრო ქვემოდ ღვთის მშობელი წელსზევითი, მედალიონში, ბერძნულის წარწერით სახელისა. თვით ჯვარცმულის ტანი და ჯვარზე მიკვრა კარგად არის შესრულებული. საერთოდ, ხელობა ცუდი არ არის. აშიები რომბ-ლურსმული, უფიგურო მედალიონებით, არა უგვიანეს მე-16 საუკუნისა უნდა იყოს.

7. **შემოსილობა ღვთის მშობლის ხატისა**, ოქროთი დაფერილი ვერცხლისა, 36X37 სანტ. ადგილ-ადგილ მოშლილი, არა ცუდი ხელობისა (№16987). ღვთის მშობელი წელსზევითია, ჩჩვილედი. სახე მისი და ქრისტესი სულ მოშლილია; ნიმბები შემკობილია და დიდრონი წარწერა სახელისა ბერძნულია. აშიები არ შერჩენია.

7 ბ. ამავე ფოტოგრაფიაზე გადმოღებულია წელსზევითი ფიგურა მედალიონში წა პეტრესი, წარწერით : წ-დ პ-ტრე. და კიდევ მთავარ ანგელოზები: მიქელ და გაბრიელ, სრულის ტანით (ესენი ნიმბის არემი არიან ჩადებულნი). ამათზე დაცულია ნაშთები წარწერისა:

.... ანგელოზო ჯაიანი სულითა ....

8. ამავე ფოტოგრაფიაზე (№16987) ჩვენ გადმოვიღეთ ერთ სტრიქონიანი წარწერა ხატისა, რომელიც ცალკე ვიპოვნეთ; შეიძლება ეკუთვნოდეს მე-7 ნომრის ქვეშ აღწერილს ხატს. წარწერა იკითხება ასე:

ი : ღო ცათისო : შე : ნ-კზ : ჭილასძე : და შნ მშობელთა ... ესე იგი: ... ღმერთო ცათისაო (resp. ცათასაო). შეიწყალე ნიკოლოზ ჭილასძე და შეუნდვენ მშობელთა (მისათა).

9. ხატი წა გიორგისა, ოქროთი დაფერილი ვერცხლის შემკობილობით, 31 X23,5 სანტ. (№16984), ყოფილა წამლით ნახატი, რომელიც ეხლა გადასულია; წარწერა: წ-დ გ-ი. ეზო შემკობილია ხლართულებით; აშია დაყოფილია უჯრედებად წერტილებიანი ხაზებით.

10. შემოსილობა ვერცხლისა წს გიორგის ხატისა, გადმოღებულია ამავე ფოტოგრაფიაზე №16984. წმიდა გიორგი ცხენითაა წარმოდგენილი, ვეშაპს გმირავს შუბით; კარგი ნახელავია.

11. ხატი წა გიორგისა, ოქროთი დაფერილი ვერცხლისა, 38X34 სანტ. წმიდანი წარმოდგენილია რომაულ სამხედრო ტანისამოსით, სრულის ტანით; მარჯვენა ხელში შუბი უჭირავს, მარცხენა ფარზე აქვს დადობილი; თმა ხუჭუჭებად აქვს დაყოფილი. ირგვლივ თავის მრგვალი წრეა; ყველა ეს ნიშნები წმიდა გიორგის ეკუთვნის, მაგრამ წარწერა იწვევს სხვა კითხვებს, ვინაიდან აქ სწერია: წ-დ სგ-ი. ასო, რომელიც მოსჩანს გ-ის წინ, სხვათ არ შეიძლება მივიღოთ, თუ არა ს-ნად. ამიტომ შეიძლება წაკითხვა: წმიდაა სერგი. ან თუ აქ მართლა წ-ა გიორგი იგულისხმება, მაშინ შეიძლება წავიკითხოთ: წმიდაა საკვირველთ მოქმედი გიორგი, მაგრამ ეს ნაკლებად დასაშვებია. ჩვენს ფოტოგრაფიაზე №16980, როგორც სახე, ისე წარწერაც კარგად არის გამოსული და ამიტომ შემოწმება ადვილია. აშიები რომბ-ლურსმულია, რვა მედალიონით, მარჯვნივ და მარცხნივ წმიდა მხედარნი არიან სრულის ტანით წარმოდგენილნი, შუბით და ფართით; ზემოდ ვედრება, ქვემოდ მთავარ ანგელოზნი. ხატი მე-16 საუკ. უნდა იყოს.

12. ხატი მთავარ ანგელოზ მიქაელისა, ოქროთი დაფერილი ვერცხლისა, ნაჭედი. წარმოდგენილია სრულის ტანით, საზომით და ბურთით. წარწერა: მქლ მრ-ზი. ხელობა მოტლანქოა. აშიები ლამაზია, ფურცლოვანი მედალიონებით, მაგრამ ხუთის მეტი გაფუჭებულია. მარჯვნივ და მარცხნივ წმიდანნი მხედარნი არიან, სრულის ტანით (№16983). მე-16-17 საუკ. უნდა იყოს.



13. ხატი მაცხოვრისა, ვერცხლით ნაჭედი, 18X15 სანტ. ტლანქი ხელობისა (№16985). მაცხოვარი ტახტოსანია, სახარებით და მაკურთხეველის მარჯვენით. ნიშბი ჯვარის სახედ არის განყოფილი, ერთობ გამობერვით არის გამოყვანილი. წარწერა: ქ ე. აშიები რომბ-ლურსმული, მე-18-19 საუკ. უნდა იყოს.

14. ხატი ვერცხლისა, ნაჭედი, 21X15 სანტ. ლურსმულის აშიით. ამ ხატზე წარმოდგენილია ჯვარედინად ოთხი ფიგურა: ორი ჩვეილედის ღვთის მშობლისა, წელსზევითი, ორივე ერთგვარი, ბერძნულის წარწერით სახელისა; ორი მაცხოვრისა, სრულის ტანით, სახარებით და მაკურთხეველის მარჯვენით. ხელობა ტლანქია, მე-18 –19 საუკუნისა (№ 16985).

15. ხატი ვერცხლისა, რომელზედაც წარმოდგენილია ორი წმიდა გიორგი, ცხენით, ჯვარით ხელში. ერთობ ტლანქი ხელობისა არის, მე-18 –19 საუკუნისა. კერძო სახლში, ლემსიაში ჩვენ გვაჩვენეს შემდეგი ხატები:

16. ხატი წა გიორგისა, ვერცხლისა, 13X11 სანტ. (№16990); ხატს უვლის ორი აშია, ფოლაქების მსგავსად შემკობილი და მათ შორის ხლართულები. შუაში, წერტილებიდან შემდგარს მრგვალ წრეში, მოთავსებულია ფიგურა წა გიორგისა, ცხენით; გმირავს ახალგაზრდას, ჩაბალახის მსგავსი თავსახურავით. წარწერა: წა გ. ი. მე-17 –18 საუკ. უნდა იყოს.

17. ხატი წა გიორგისა, ვერცხლისა, 31X23 სანტ. (№16989). წმიდა გიორგი ოთხკუთხედშია წარმოდგენილი, ცხენით; გმირავს გვირგვინოსანს; ერთობ ტლანქი ხელობისაა, მე-18 –19 საუკ.

18. ხუთი ტლანქი ხატი ღვთის მშობლისა და ერთი ც მთავარ ანგელოზისა.

19. ხატი წა გიორგისა, ვერცხლისა, რომელზედაც ძლივს მოსჩანს ფიგურა წმიდანისა, ერთობ ტლანქი ხელობისა. ეს ხატი ჩადგმულია ოთხკუთხედ ხის ჩარჩოში, რომელსაც ქვემოდ ტარი აქვს, და ზემოდ მოღუნული თავი, გეომეტრიული ფიგურებით შემკობილი. ეს წინეთ, როგორც ეტყობა, ლაზარუმი ყოფილა ანუ ბოყერი, და თავისი ყოფილი შემკობილობა დაუკარგავს. ეს ჩარჩო შიგ ჩადგმული წის გიორგის ტლანქი ხატით დიდათ სწამთ ადგილობრივ სვანებს (№16988).

20. პატარა ხატი ხარებისა, 6X5 სანტ. ტლანქი ხელობისა, რომელიც მოთავსებულია იმავე №16988 ფოტოგრაფიაზე, მარცხენა კუთხეში, ზემოდ.

21. წინაპირი პატარა გულსაკიდი ხატისა წმიდის გიორგისა, ვერცხლისა, 6,5X4 სანტ. რომელიც ჩვენ ვიპოვნეთ ეკლესიის ეზოში, ხოლო დ. ბაქრაძეს ეს ეპოვნა ეკლესიის სკივრში (გვ. 89). წა გიორგი წარმოდგენილია კამარის ქვეშ, სრულის ტანით, ფარით და შუბით; კამარა ორმაგ სვეტებზეა დამყარებული, ლამაზის სვეტის თავებით; ორივე მხარეს ჩამოგრძელებულია ასომთავრული წარწერა:

წო / გ-ი ალ/ დს/აა

დ/დე მფ/ეთ/ა მ/ფე/გ-ი

წმიდაო გიორგი ალავერდისა, ა

დიდე მეფეთა მეფე გიორგი.

ძნელი სათქმელია, რომელ გიორგი მეფეზეა აქ საუბარი. ყოველ შემთხვევაში, ხატი არის არა უგვიანეს მე-15-16 საუკუნისა. ამის ფოტოგრაფიაც გვაქვს, მაგრამ ერმაკოვის კოლექციაში არ შედის.

22. ერთის ხატის ზურგის მოწყვეტილ ფირფიტაზე დ. ბაქრაძეს უნახავს (გვ. 89) და გადმოუღია ხელით (დამატება №25) შემდეგი წარწერა ასომთავრული:

ქ. მოწამე	მოწამე
თა : შრის : ბწ	თა შორის ბრწ-
ყინვლეო : წო : გი : ზლდრი	ყინვალეო წმიდაო გიორგი ზლდრი-
სო მო	საო, მეო-
ხ და მფრველ : ექმნ : დღე	ხ და მფარველ ექმენ დღე-
სა : გნკთხ სასა : არშსნ	სა განკითხვისასა არშესნა-
სა : და ძესა : ჩემსა	სა (?) და ძესა ჩემს(ა)
გის .	გიორგის.

ხსენებული ეკლესიიდან დ. ბაქრაძეს მარტო ორი უკანასკნელი წარწერა მოჰყავს და იხსენიებს კიდევ საღმრთო წერილის წიგნებს და ერთ კონდაკს გრაგნილს, ეტრატისას, სამი არშინის სიგრძით (გვ. 89) და იმ 20 ნივთზე, რომელიც ზემოდ ჩამოვთვალეთ, არაფერს ამბობს.

### სოფელი ქაშვეთი.

სოფელ ქაშვეთის ძველი ეკლესია წმიდა გიორგისა სულ პატარაა, ქვისაგან აშენებული, მაგრამ მისი ზემირკველი ერთობ მაღალია, ასე რომ ეკლესიაში შესავალად კიბეზე უნდა ახვიდეთ. კანკელი ქვის არის. საკურთხეველში ძლივს მობრუნდება ერთი კაცი. შესავალი ერთია, დასავლეთით; ფანჯარა ორი, თითო აღმოსავლეთით და სამხრეთით; კანკელის საფუძველზე აღმართულია ორი დიდი ჯვარი:

1. **ჯვარი ხისა**, 109X61,5 სანტ. შედერწილია ვერცხლის ფირფიტები. ზემო ფირფიტაზე მაცხოვარი ტახტოსანი, მოტლანქო ბერძნულის წარწერით სახელისა, და წმიდა თეოდორე : წა თ-დრ. ქვემოდ წარმოდგენილია ორი წმ. გიორგი, წარწერებით: წა გ-ი ქშთ. და ერთი გამოხატულობა წა თეოდორესი, სრულის ტანით. მარჯვნივ და მარცხნივ უმბოსა: ღვთის მშობელი, ორი წა გიორგი და ქერუბიმები და სერაფიმები (№ 16993).

2. **მეორე ჯვარი** ასეთივე ზომისა, მაგრამ მისი ფირფიტები უფრო ტლანქი ხელობისაა, ვიდრე პირველი ჯვარისა (№16992). შუაში ჯვარცმაა; ზემოდ, ვგონებ, მაცხოვარია, სრულის ტანით; მის ქვემოდ: მთავარ ანგელოზნი მედალიონებში; მარჯვნივ და მარცხნივ, ფრთებზე, ორი მაცხოვარია და ორი მოციქული, მკერდს ზევითნი; ქვემო ფრთაზე ორი მედალიონი წმიდათა; სახელები არ აწერია; დანარჩენი ნაჭრები აკლია. ფირფიტები სურათების ირგვლივ ბალახოვნად არის შემკობილი.

3. პატარა ხატი კარედი ღვთის მშობლისა, 12X9 სანტ. წინაპირი სულ გაფუჭებულია და მოშლილია, მაგრამ მეორე გვერდზე დაცულია უცნობი წარწერა (№ 16976):

ქ : დედაო : ღ-თისაო : მეოხ	დედაო ღმრთისაო, მეოხ
და : მფარველ : მ	და მფარველ მექ-
ქმენ : წ-ე : ძისა : შ-ნს	მენ წინაშე ძისა შენი-
დ ღ-თ	სა და ღმრთი-
სა : ჩ-ვა : დღესა : გ-ნკით	სა ჩვენისა დღესა განკით-
ხვის-ა : მამკობ	ხვთისასა მამკობ-
სა : ხ-ტსა : შნსას	სა ხატისა შენისასა
: ელშარს : ქრდინსა :	ელაშარს ქურდიანსა.

4. ხატი პატარა წმიდისა ონოფრესი, 13X9 სანტ. ოქროს შემოსილობით; თვით სახე წამლით ყოფილა დახატული, მაგრამ მოშლილია. ზემოდ წარწერა: წ-დ ონფრე. (№16976). აშიები ორი რიგი წერტილებიან ხაზების შორის შემკობილია ზარნიშით; ხელობა ხატისა სრულიად იგივეა, რაც ნესგუნის ღვთის მშობლის ხატისა, ჩვენ მიერ მეოთხე ნომრით აღწერილისა. ზურგი ამ ხატისა ვერცხლისაა, წარწერით, რომელსაც უჩვენებს დ. ბაქრაძე (გვ. 89) მე ეკლესიაში ვერ ვნახე, როგორც ვერ ნახა ეს გრ. უვაროვისამაც (გვ. 178), მაგრამ შემდეგ ვიპოვე ერთ კერძო სალხში და გამოვართვი. წარწერის შედარებამ ცხადჰყო, რომ ეს ის წარწერაა, რომელიც დ. ბაქრაძეს აქვს აღნიშნული. წარწერა გადმოღებული მაქვს ფოტოგრაფიულად და იკითხება ასე:

ქ წ-ო : ონ	წმიდაო ონოფ-
ფრე : მეოხ და	რე, მეოხ და
მფრველ მექმენ : წ-ე	მფარველ მექმენ წინაშე
ღ-თისა : მოსავსა : შენ	ღმრთისა მოსავსა შენ-
სა ; სასნსა : ვარდანა	სა სასანსა ვარდანას
ს : ძესა : და : მეუღლესა	ძესა და მეუღლესა
ჩემსა ხათუ	ჩემსა ხათუ-
თასა.	თასა.

ხატი ეკუთვნის მე-12-13 საუკუნეს. საკვირველია, რომ აქ ვარდანასძე, თუ ეს იგივეა, რაც ვარდანისძე, ერისთავად სვანეთისა არ არის მოხსენებული. ხათუთა, შემოკლებული ფორმით: „ხათთა“ მოხსენებულია ლეხოურის ეკლესიის წმიდა იაკობის ხატის წარწერაში, როგორც ქალი სამძივარისა და მეუღლე მარუშიან ვარდანისძისა (იხ. ჩემი „არხ. მოგზ. და შენიშვნანი“, ტ. I. გვ. 26-27).

5. ხატი წა გიორგისა, ვერცხლისა, 28X22 სანტ. ნაჭედი, კარგი ხელობისა; წმიდანი წარმოდგენილია სულ ახალგაზრდა, ლამაზი ხუჭუჭებით, საშუალო საუკუნის რაინდის ტანისამოსში, შუბით და ფარით, წარწერა: წ-დ გ-ი. აშიები მოძარცულია (№ 16977). მე-13-14 საუკუნის უნდა იყოს.

6. ხატი პატარა, წა გიორგისა, ოქროთი დაფერილი ვერცხლისა. წმიდა მხედარი წარმოდგენილია ცხენით, ვეშაპს გმირავს. წარწერა სახელისა: წ-ღ გ-ი ილორისა. ზურგზე აქვს წარწერა, რომელიც დ. ბაქრაძეს მოყვანილი აქვს (გვ. 90):

ქ : წო გ-ი : ილ	წმიდაო გიორგი ილო-
რისო : მეოხ : დ	რისაო, მეოხ და
ა : მფრველ :	მფარველ
მქმნ : მსვსა :	მექმენ მოსავსა
შნსა : თევდ	შენსა თევდო-
ორძესა : დე	რძესა დე-
მეტრეს :რთ	მეტრეს, რათა
ა : მცლ მქნა	მცველ მექმნა.

7. ხატი წამლით დახატული წა გიორგისა და წა დიმიტრისა, 55X42,5 სანტ. მხატვრობა ძლიერ წააგავს კონდაკებზე დახატულ წმიდანებს. (№16991). აშიები რომბ-ლურსმულია. მარცხენა აშიაზე წარმოდგენილია სრულის ტანით წა კვირიკე: წ-ღ კ-ე. მარჯვნივ: წმიდა დემეტრე: წ-ღ დ. ზემოდ: მაცხოვარი, წარწერით: ი-ჰ ქ-ე; ქვემოდ წმიდა გიორგია: წა გ-ი. მე-17-18 საუკ. უნდა იყოს.

8. ხატი დიდი, სხვა და სხვა ახალი აღთქმის სცენებისა, 46X34 სანტ. გაყოფილია ოთხ ნაწილად და თითოეულში წარმოდგენილია წამლით დახატული სცენები შემდეგის რიგით: ხარება, შობა, ჯვარცმა და აღდგომა. წამლები გადასულია; დარჩენილია ოქროს შემოსილობა თითოეულის სცენისა და ნაწილი საერთო მთელი ხატის შემოსილობისა და ისიც ზოგჯერ ფრიად დაზიანებული და გასვრილი (№16994), მაგრამ რაც დარჩენილია ისიც ცხადათ მოწმობს, რომ მთელი ხატი ყოფილა საუკეთესო ხელოვნებისა: ნაზი ჭედილობა, საუცხოო კაზმულობა აშიებისა, ძვირფასი ქვები (ესენი დაცულია ჯვარცმის სცენაზე) და ლამაზი წარწერები ეხლაც დიდ შთაბეჭდილებას ახდენენ. თუმცა აქ ეხლა ყველაფერი დაზიანებულია და სანახევროდ არის დაცული. აშია მთელად დაცულია მარტო ზემოდ. აქ ფაქიზად ნამუშევარ მორთულობაში დაცულია ხუთი მედალიონი; სახეები წამლით ყოფილა შესრულებული და სულ დაღუპულია. შუაში ყოფილა ვედრება; მარცხენა კუთხეში: იოანე მახარობელი; მარჯვენა კუთხეში მათე მოციქული; სჩანან ასოები: მათ. ქვემო აშიაზე, შუაში, ყოფილა წა ეკატერინე; დაცულია წარწერა: წ-ღ ეკტ-რნე; შემდეგ მარჯვნივ: წა ირინე; დაცულია: რინე; კუთხეში, მარჯვნივ ალბათ ყოფილა წა ბარბარე; დაცულია მხოლოდ ასოები: წ-ღ. ორ მედალიონში, ეკატერინეს მარცხნივ, არა სჩანს, რომელი წმიდანები იყვნენ. მარჯვნივ და მარცხნივ აშიებზე არის ოთხი მედალიონი და მათში წარმოდგენილნი არიან ოთხი წინასწარმეტყველი, სრულის ტანით, და მათ შორის მრგვალ მედალიონებში მოციქულნი: მარცხნივ – ლუკა; დარჩენილია ასოები: უკა; მარჯვნივ: მარკოზ; დარჩენილია: ... მა ... ჯვარცმას და აღდგომას ქრისტესა ბერძნულად უწერია სახელები; ქვემო აშიაზე ოთხსტრიქონიანი ლამაზი წარწერა ყოფილა. პირველი სტრიქონიდან დარჩენილია:

ქ წნო : წწყლნო : მოწამენო : და ქალწულნო : მეოხ :  
მქმნით : წ-ე ქა . . .

ესე იგი: წმიდანო წინასწარმეტყველნო, მოწამენო და ქალწულნო, მეოხ მექმენით წინაშე ქრისტესსა [სილიხანს] . . .

მეორე სტრიქონი დაცულია, მესამის მარტო პირველი ოთხი ასოა, მეოთხე ნაკლულოვანია, ხოლო დ. ბაქრაძის დროს მესამე და მეოთხე სტრიქონი ცოტა უფრო უკეთ ყოფილა დაცული (იხ. დამატება №27):

[ხა]რებით : შობად : ჯუარცმაი : აღდ  
გმაჲ სხუათს . . . . უმს : რ  
ყლბითი : იმ . . . . . ოქ . . . . [მხ]სნელო : მეცა :

ჯვარცის ქვემოდ წვრილის ასოებით სწერია;

ქ ზ ღრისა : სიტყუაო : შე ჩემ ცოდვილ

სა : დედოფლთა : დედოფლისა რუ

სდანს მწისა და გაზრდილისა ს[ლხ]

ნისგნ უნდოი ნამსახური და ღირს მყავ დ. . ს

უქარაგმოდ:

ჴი ქრისტე ღმრთისა სიტყვაო, შეიწირე ჩემ ცოდვილსა  
დედოფალთ დედოფლისა რუსუდანის მიწისა და გაზრ-  
დილისა სილიხანისაგან უნდოი ნამსახური და ღირს მყავ  
დ(ღესა მა)ს . . .

პირველი ორი სცენის, ხარებისა და შობის, ქვემოდ სწერია:

ქ ე ღ თო : რლმნ : ძელსა მ რ ჯ რისა დასაჯე : ცოდ-

[ვანი] ჴლისა კაცისა მეცა მიხსენ : სასჯელისაგან : მსა-  
სოებელი : სილიხან.

ესე იგი: ქრისტე ღმერთო, რომელმან ძელისა მიერ ჯუარისა დასაჯე ცოდვანი პირველისა კაცისა, მეცა მიხსენ სასჯელისაგან მსასოებელი სილიხან.

პირველი ორი სცენის შუაში, ზემოდ მოთავსებული ყოფილა ექვს-ფრთიანი ჯვარი ძელი ჴემმარტისა, რომელიც ეხლა მოშლილია, ხოლო მას ორივე მხარეს ქვემო მკლავისა სწერია:

ქ ძელისა მრ : ცხრ

ეზსა : მოჴმადლე

ჴსნაი : სოფელსა : ქ

ე : ღო მიჴსენ : მეცა

მვედრბლი სილიხან

ძელისა მიერ ცხორ-

ებისა მოჴმადლე

ჴსნაი სოფელსა ქრისტ-

ე ღმერთო, მიჴსენ მეცა

მვედრებელი სილიხან.

შეადარე ყველა ეს წარწერები დ. ბაქრაძის გადმოღებულს, გვ. 90, 91, დამატება 26, 27. ა. ხანახანშვილი ამ წარწერებს არ იხსენიებს (გვ. 37–38). უვაროვისა უჩვენებს დ. ბაქრაძის წაკითხვას მხოლოდ (გვ. 122–123).

ყველა წარწერები ამ ოდესღაც შესანიშნავი ხატისა თხოულობენ შეწყალებას ერთი და იგივე პირისა, რომელიც ყოფილა გაზრდილი დედოფალთ დედოფლის რუსუდანისა. სამწუხაროდ, მისი სახელი სრულად არ არის დაცული, მაგრამ კითხვა „სილიხან“ სწორი უნდა იყოს. ბაქრაძის წაკითხვა: „სალტაძე“, ყოველ შემთხვევაში მიუღებელია. მნელია აგრეთვე თქმა, რომელი რუსუდანი იგულისხმება წარწერაში: თამარ მეფის მამიდა, თუ ასული? უფრო საფიქრებელია, რომ აქ თამარ მეფის

ასულზეა საუბარი, ვინაიდან დედის დაზე არ იხმარებოდა ხარისხი (ტიტული): დედოფალთ დედოფალი.

### სოფელი კაერი

სოფელ კაერში ახალი ეკლესია არის ღვთის მშობლისა; მასში ჩვენ ვნახეთ მხოლოდ ერთი სქელი გულსაკიდი ვერცხლის ჯვარი. 8,5X5 სანტ. წინა პირზე ჯვარცმა გამოხატული წინამდგომებითურთ; მეორეზე – ღვთის მშობელი ჩჩვილედი და ორი მოციქული; ამას გარდა აქ არის კიდევ სამი უბრალო რკინის ჯვარი, უმნიშვნელო.

### სოფელი სოლი.

სოფელი სოლის ლამაზი სახე და მისი კომპეები იხილეთ ფოტ. №17438. ძველი ეკლესია **მაცხოვრისა** პატარაა, ქვისაგან ნაშენი, ერთის კარით დასავლეთიდან და სამის ფანჯარით, აღმოსავლეთით, დასავლეთით და სამხრეთით. კანკელი ქვისაა, ერთის კარით. ეკლესიაში ჩვენ ვნახეთ:

1. **ჯვარი გამოსასვენებელი**, ვერცხლისა, ოქროთი დაფერილი, ნაჭედი, 42X20 სანტ. წინა პირზე გამოსახულია ჯვარცმა, ხოლო კიდევში უვლის წერტილოვანი ხაზები (№16972). მეორე გვერდზე წარმოდგენილია ღვთის მშობელი ჩჩვილედი, სრულის ტანით (№16971); ხელობა მდარეა.

2. **ხატი მაცხოვრისა**, წელსზევითი, ვერცხლისა, ოქროთი დაფერილი აშიებით, 21X17 სანტ. მაცხოვარი მარჯვენა ხელით აკურთხებს, მარცხენაში გრაგნილი აქვს. აშიები შემკობილია უჯრედებად და გამყოფი ოთხკუთხედები შემკობილია ლამაზად. აშია უფრო ძველია, ვიდრე თვით ხატი, რომლის ხელობა დაბალია; მე-17-18 საუკუნის (№16970).

3. **ხატი ღვთის მშობლისა** ჩჩვილედი, 12X9 სანტ. ვერცხლისა, ნაჭედი. ღვთის მშობლის ფიგურა წელსზევითია; აშია ჯვარედინად დაყოფილი, მარტო ზემოდ არის დაცული; სხვა აკლია; ხელობა მდარეა (იქვე, №16970).

4. **ოთხი პატარა გულსაკიდი ჯვარი**. ესენი წარმოდგენილი არიან ფოტო №16970.

5. **პატარა გულსაკიდი ხატი წა გიორგისა**, ცხენით ვეშაპს გმირავს; ვერცხლისა, 8,5 X5 სანტ. ორივე მხარეს ერთი და იგივე ფიგურაა, მდარე ხელობისა; იხ. ფოტ. № 16970.

6. მამა ბაქრაძე თავის აღწერილობაში სვანეთის ეკლესიებისა სოფელ სოლის შესახებ სწერს:

ს(ოფელ) სოლს მაცხოვრის ეკლესიასა შინა არს წმიდა სახარება, ოთხის მახარებელითა ბიზანტიის ხელოვნებითა მოხატული, და მოთხრობა ისტორიისა

მასვე სახარებასა შინა წარწერილი. ხოლო სხვა არა რად იპოვების. მასვე სოფელში არს 2 ეკლესია, რომელიც არს გაუქმებული.

სახარება, რომელზედაც მოგვითხრობს ბერი ბაქრაძე, დღეს აღარ არსებობს. რაც შეეხება ეკლესიებს, დიმიტრი ბაქრაძეც სწერს, რომ სოლში სამი ეკლესია არის, წმ. გიორგისა, მაცხოვრისა და მთავარ ანგელოზთა. წმიდის გიორგის ეკლესიაში მას უნახავს სკივრში 10 პატარა ხატი, რომელნიც ისე გამურული ყოფილან, რომ სახეები აღარ სჩანდნენ, ხოლო ერთ პატარა ხატზე წმიდა დიმიტრისა და წმიდა გიორგისა, რომელიც დღეს აღარ სჩანს, წერებულა ჯერ სახელები: წა დმტ, წა გი/ჯნზ (sic) და შემდეგ:

მოწამეთა შრს : მხნო

გი : დ დმტრ : მეოხ მფ

არვლ : ექმენ : მამკობს :

ხატის : შენს : გზთას :

მიქაის : და შერ

გილს : რაითს : არ : დმს

თმს საოკონოს .

მოწამეთა შორის მხნენო

გიორგი და დიმიტრი, მეოხ, მფ-

არველ ექმენ მამკობს

ხატისა შენისა გზითას<sup>1</sup>,

მიქაის და შერ-

გილს, რაისათჳს არ დამს-

თმოს საუკუნოს.

უკანაკსნელ ოთხს სიტყვას, როგორც რუსული თარგმანიდან სჩანს, დ. ბაქრაძე

- 
1. დ. ბაქრაძეს ტექსტში უწერია „გზთას“, მაგრამ რუსულ თარგმანში „გულთას“ სწერს. ამიტომ შესაძლოა, აქ კორექტურული შეცდომა იყოს ქართულ ტექსტში და მართლა ყოფილიყოს „გულთას“.

წაუკითხავად სტოვებს (გვ. 88). მაცხოვრის ეკლესიასთან დ. ბაქრაძეს უნახავს კიდევ გაბზარული ზარი, ხეზე დაკიდული და მისი წარწერა არა ქართული ხელით გადმოუღია (იხ. დამატება №24).

### სოფელი ლაშტხვერი.

ამ სოფლის საზოგადო სახე შორიდან, იხილეთ ფოტოგრაფია №17437. ტიპი სვანისა ამ სოფლიდან, გურამ დავაცი. იხილეთ ფოტ. №17523. ამ სოფლის ეკლესია მთავარ ანგელოზისა პატარაა, თლილის ქვისაგან აშენებული, ოთხკუთხედი; მისი ზემირკველი სამი საფეხურისაგან შესდგება. იხ. ფოტ. №17441, რომელზედაც მოსჩანს ჩრდილოეთის მხარე ეკლესიისა და №17442, რომელზედაც ემჩნევა სამხრეთ-აღმოსავლეთის მხარე. გარეგანი კედლები ეკლესიისა ზემოდ მოგლესილი ყოფილა და შემკობილი ფრესკებით ხალხურ მოთხრობათა გმირებისა და მათი თავგადასავლისა, სახელდობრ, ამირანის ციკლისა და სხვათა, მაგრამ მხატვრობა დაზარალებულია და ზოგ ადგილას სრულიად გამქრალი. უკეთესად დაცულია ფიგურები ჩრდილოეთის კედელზე. აქ არიან წარმოდგენილნი ცხენებზე მჯდომარე

გმირები: ამირანი, ბადრი, სეფედავლა, უსიბი. თავზე ყველას ჩაფხუტი ახურავს, მარჯვენა ხელში ამოღებული მახვილი (ხმალი) უჭირავთ, მარცხენა მხრით მკლავზე ფარი აქვთ მოგდებული, რომელიც მთელს ზემო ნაწილს ტანისას ჰფარავს ყელამდის. ცხენები ლამაზია, შეკაზმულნი. პირველი სცენა ასეთია:

წარმოდგენილია ვეშაპი ვეებერთელა გველის სახით; მისი დაბჩენილი პირიდან გამოდის ამირანი; წელს ზევით უკვე გამოსულია ხმალით და ფარით. ზემოდ ასომთავრულით ამ სცენას აწერია:

ოდეს : ამირან : ვეშაპმან : ჩანთქა : /ვეშაპი : მ/ოკლა :

და გა/მოვიდა :

შემდეგ ომია ბაყბაყ დევისა და ამირანისა. ამირანი გაჭენებულის ცხენით არის მისული ბაყბაყ დევზე და ესეც არის მოქნეული ხმალი უნდა დასცეს; დევი რქებიანი, კუდგრძელი (კუდი ერთ რგოლად არის შეკვეცილი) და ბრჭყალებიანი, უკანა ფეხებზე სდგას და თითქოს ლახტს აგებებს მოქნეულ ხმალს ამირანისას. ამ სცენის თავზე აწერია:

ჰომი ამირანისა და : /ბაყბაყ : დევისი :

ამირანის უკან მომყოლოთ ცხენოსან გმირებს აწერია:

ბადრი : სეფედავლა : უსიბი :

ყველა ეს სცენები საზოგადო ხაზებით გამოხატა პირველად ბარტოლომეიმ, იხ. ტაბ. 2, №20. წარწერები დ. ბაქრაძესაც აქვს მოყვანილი (გვ. 91). ჩემს ბიბლიოთეკაში დაცულია მამა ბაქრაძის მიერ ფერადებით დახატული ასლი ამ ფრესკებისა. აღმოსავლეთის კედელზე მოსჩანს ნადირობა; მხედარი გაჭენებულის ცხენით მისდევს გაქცეულს ირმებს და ესვრის მათ ისარს მშვილდის საშუალებით. სამხრეთის კედელზე ფიგურები გადასულია, მოსჩანს მხოლოდ ცხენი უმხედროდ. დასავლეთის კედელზე საეკლესიო ქრისტიანული სცენაა. აქ წარმოდგენილია კომპოზიცია ვედრებისა, რომელშიაც ქრისტე ფანჯრის თავზეა წარმოდგენილი, ღვთის მშობელი და იოანე ნათლისმცემელი ფანჯრის გასწვრივ. შიგნითაც ეკლესია სულ მოხატულია, ფრესკები კარგია და საკმაოდაც დაცულია. საკურთხეველის კონქში მაცხოვარია თანამდგომებითურთ; მის ქვემოდ ღვთის მშობელია ნიშიანი („ზნამენია“) და მოციქულები; უფრო ქვემოდ, საკურთხეველის კედელზე: ეკლესიის მამები. ჩრდილოეთის კედელზე წა გიორგი წარწერით; წა გი. ზემოდ აღდგომაა: „აქა ქრისტე აღდა“. შემდეგ ჯვარცმა და გარდამოხსნა ქრისტესი. სამხრეთის კედელზე წა დიმიტრი, წა თეოდორე. დასავლეთის კედელზე ფერისცვალება და იერუსალიმში შესვლა. ამას ქვემოდ წმიდანი მესვეტენი და წა მკარი; წა მკარი და საბა (?); შემდეგ მთავარ ანგელოზნი; ერთს წარწერა აქვს: წა მიქელ თრგლზი. სამხრეთის კედელზე: ლაზარეს აღდგენა; თაღის სარტყელებზე: წა ბარბარე, წა მარინე და სხვა წმიდანნი.

კანკელი ქვისაა, ძველი, ერთის კარით და სამის კამარით; კანკელიც მოხატულია და კარგად არის დაცული. შესავალი ეკლესიას აქვს დასავლეთით; ფანჯარა სამი, აღმოსავლეთით, დასავლეთით და სამხრეთით. საკურთხეველის კედელში ორი უბეა; კანკელზე ბევრი ხის ფიცრებია ხატებისა მოძარცული; გადარჩენილთა შორის აღსანიშნავია:

1. ხატი იოანე მახარობელისა, ნაჭედი, ოქროთი დაფერილი ვერცხლისა, 21X17, 5 სანტ. ნაზი ბრწყინვალე ქართული ხელობისა, მე-12–13 საუკ. (№17008). იოანე წარმოდგენილია იმ პოზით, როგორც ეს მინიატურულ სახარების მხატვრობაში



გვხვდება, ესე იგი, ის მდგომარეა მვედრებელის სახით; მარჯვენა ხელით აკურთხებს და თანაც უკარნახებს სახარების ტექსტს მის წინ მსხდომარე პროხორეს, რომლის თავზე წარწერაა; წ-ღ პრხრ. იოანეს ნახევარ სფეროდან აკურთხებს მაცხოვრის მარჯვენა. ეზო ხატისა შემკობილია ვაზოვანი ორნამენტით, ხოლო აშიები ბროწეულის ყვავილების მსგავსად, რომლებშიაც რვა მრგვალი მედალიონია წმიდანებისა უწარწეროდ; შინაგანი აშიები ხატისა შემკობილია აკანთის ფოთლებით. წარწერა ლამაზის მსხვილი ასომთავრულით დ. ბაქრამესაც აქვს მოყვანილი (გვ. 92).

წო ინე მ	წმიდაო იოანე მა-
ხრბელო	ხარებელო,
ადე სბ	ადიდე სა-
ა დრ	ბა დრ-
ან	ან
დე	დე-
ლდ	ლი.

აქედან სჩანს, რომ ხატი შეუკვეთია დრანდის მონასტრის ეპისკოპოსს საბას; მაგრამ, ჩვენის აზრით, ეს დიდი ვერცხლის ფირფიტა, თავის უაღრესად ლამაზი ფიგურებით და ორნამენტებით, წინეთ შეადგენდა სახარების ყდის ზედა პირს. და თუ ეს ასე არ იყო, ყოველ შემთხვევაში, ამ მიზნით იყო დამზადებული. თავში ზემო მოყვანილის წარწერისა ფიგურების სახელების წარწერაა უცნობის ასოებით, რომელნიც სომხურსაც მოგვაგონებენ და კოპტურსაც. სომხურის სპეციალისტებმა ი. ზავრიემა და ნ. აღონცმა დანამდვილებით ვერ სთქვეს, რომ ეს სომხურია.

2. **ხატი წა გიორგისა**, ვერცხლით ნაჭედი, 34X21 სანტ. კარგი ხელობისა (№17010). წა გიორგი ფეხოსანია, რომაულ საომარ ტანისამოსით; მარჯვენა ხელში შუბი უჭირავს, მარცხენა დადებული აქვს ორნამენტით შემკობილს ფარზე. წელზე უკანიდან ჰკიდია ხმალი; თმა ხუჭუჭებად აქვს დაწყობილი და ირგვლივ თავისა წრეა. წარწერა: წ-ე (sic) გ-ი. საკვირველია, რომ პირველ სიტყვაში ხუცური ძ-ის მაგიერ მხედრული ე-ნია ნახმარი. სხვა ასოები ასომთავრულია. აშიები ფოლაქისებურია ორს წერტილოვან წრეებში. ხატი მე-14-15 საუკუნეს უნდა ეკუთვნოდეს.

მელი ამ ხატისა და მისი სარჩული ცვილისა თუ სხვა არ შენახულა.

3. **ხატი მთავარ ანგელოზ მიქელისა**, ვერცხლისა, ნაჭედი 17X14 სანტ. (№17012). მთავარ ანგელოზი მდგომარეა, შუბით და ბურთით. თავის მრგვალი წრის მარჯვნივ სწერია: მქ-ლ. ქვემო ნაწილი ხატისა და აშიისა დაშლილია. აშიები ორგვარი აქვს; ერთი აღმოსავლურ ხლართულებით და სადა მედალიონებით; მეორე ვიწრო ფოლაქოვანი. ხელობა მდარეა, მე-17-18 საუკ.

4. **ფირფიტა** ოქროთი დაფერილი ვერცხლისა მთავარ ანგელოზის **გაბრიელის სურათით**. მთავარ ანგელოზი წარმოდგენილია ლაბარუმით, ბურთით და წარწერით: წ-ღ გბრლ მთვლზი, 30X12 სანტ. ხელობა სუსტია, მე-17-18 საუკ. ეს ფირფიტა უსათუოდ დიდი ჯვარის მორთულობის ნაწილია (№17011).

5. ხატი პატარა, ღვთის მშობლისა, ჩჩვილედი, ოქროთი დაფერილი ვერცხლისა, ნაჭედი, 8X6 სანტ. ქვემო ნაწილი მოშლილია. ხელობა მდარეა (№17009).

6. ხატი წა გიორგისა, 8X6,5 სანტ. ყოფილა წამლით დახატული, მაგრამ წამალი გადასულია. შემოსილობა და აშიები ოქროთი დაფერილი ვერცხლისა, ლამაზი ხელობისა, დაცულია. ქვემოდ აქვს წარწერა:

წო : გ ი : შ ე : ასამდინ .

ესე იგი: წმიდაო გიორგი, შეიწყალე ასამდინ(?). ( №17009).

7. ხატი პატარა, ორთა მხედართა, წა გიორგისა და წა დიმიტრისა, ორივე მდგომარენი შუბით და ფარებით, ოქროთი დაფერილი ვერცხლისა, 11X9 სანტ. ადგილ-ადგილ მოშლილია. აშიები ფოლაქოვანია (№17009).

8. პატარა ხატი წა გიორგისა, ოქროთი დაფერილი ვერცხლისა, 11,5X 8,5 სანტ. ნაჭედი. მხედარი მდგომარეა ხმლითა და ფარით. აშიები დაყოფილია უჯდრედებად. ეზო შემკობილია მცენარეულობის ორნამენტით. ხელობა გვარიანია (№17009).

9. ხატი პატარა, ღვთის მშობლისა ჩჩვილედი, ვერცხლისა, ნაჭედი, 8X6 სანტ. ღვთის მშობელი წელსზევითია; ტლანქი ხელობისაა.

10. ხატი მთავარ ანგელოზის მიქაელისა, ოქროთი დაფერილის ვერცხლისა, 44X33 სანტ. ნაჭედი, გვარიანი ხელობისა, მაგრამ დიდათ გაფუჭებული.

11. ჯვარი ვერცხლის ხეტარზე სატარებელი, ვერცხლისა, ნაჭედი, 33X15 სანტ. გატეხილია; ტლანქი ხელობისა.

12. პატარა ჯვარი, ვერცხლისა 11X9 სანტ. უკეთესი ხელობისა, მაგრამ ერთობ დაზიანებული.

13. ზარი, 42 სანტ. სიმაღლით, შეწირული დავით კახთა მეფის მიერ, რომელიც იყო ძე კახთა მეფისა ალექსანდრე მეორის (1605 წ.), იმ ალექსანდრესი, რომელმაც სვანეთის სხვა და სხვა თემების ეკლესიებს შესწირა რვა ზარი: ორი მულაყისას, ორი მუჟალისას, ორი მესტიისას, ერთი ადიშისას, ერთი ლატალისას. დავით მეფის მიერ (1604 წ.) მარტო ეს ზარია შეწირული. ზარს აქვს ხუცური წარწერა, რომელიც სრულად გადმოღებულია ჩვენ მიერ და მოთავსებული სამს ფოტოგრაფიაზე, იხ. №17005, 17006, 17007. წარწერა იკითხება ასე:

ქ : შემოგწირე :: ზარი :: ესე ჩნ :: კახთა :: მეფემან ::

პტრონმნ :: დ თ :: თ ქნ :: ლშთახურს :: წმიდათ მთა-

ვარ :: ანგელოზთა :: დღეთა :: ჩნთა :: სადღეგრძელოდ ::

და :: მფბისა :: ჩნისა :: წრსმრზლად ::

ესე იგი: შემოგწირე ზარი ესე ჩუნ კახთა მეფემან პატრონმან დავით თქუენ ლაშთახურის წმიდათ მთავარ ანგელოზთა დღეთა ჩუნთა სადღეგრძელოდ და მეფობისა ჩუნისა წარსამართებლად. (ბარტოლომეი, გვ. 229, ტაბ. 2, № 21. დ. ბაქრაძე, გვ. 91-92).

14. **საცეცხლური ბრინჯაოსი.** სირიული რიგისა, რომლის ირგვლივ რელიეფებით წარმოდგენილია სცენები ახალი აღთქმიდან. ესენი სრულად გადმოღებულია და მოთავსებული სამ ფოტოგრაფიაზე, იხ. №№ 17921, 17922, 17924.

დ. ბაქრაძე (გვ. 92) ამ ეკლესიაში აღნიშნავს კიდევ პატარა წმ. ნიკოლოზის ხატს, რომელიც ეხლა აღარ არის და რომლის ზურგზე წერებულა (მოგვყავს შეუმოკლებლად):

ქ. წმიდაო ნიკოლოზ მღვდელთ-მოდვარო, მეოხ და  
მფარველ მექმენ : ბ : ამიჯრ . . . ა . . . მნ.

### სოფელი მუხელი.

ლაშტხვერის საზოგადოებას ეკუთვნის პატარა სოფელი **მუხელი** (წარწერაში მოხსენებული არის, როგორც მუხევი). სოფელ მუხევის პატარა ეკლესია მთავარ ანგელოზ მიქაელისა აშენებულია თლილის ქვით; შესავალი აქვს ერთი დასავლეთით, ფანჯრები თითო: აღმოსავლეთით, დასავლეთით და სამხრეთით. კანკელი ქვისა სამის კამართ; აღსავალის კარის აქეთ-იქით კანკელისა თითო სვეტია; კუთხეებში ნახევარ-ნახევარი სვეტები. კანკელის ზემოდ წარწერაა:

ესე არს ბჟე ჯვლისა : და მართალნი : შევლენ ამას შინა:

ეკლესიის კედლები შიგნით და კანკელიც მოხატულია.

ჩრდილოეთის კედელზე მთელის ტანით წარმოდგენილი არიან მთავარ ანგელოზნი: მ<sup>-</sup>ქლ, გ<sup>-</sup>ზლ, რომელთაც ხელთ უჭირავთ ქრისტეს სახე მედალიონში. წარწერა სახელისა ქრისტესი ბერძნულია. მთავარ ანგელოზთა უკან წარმოდგენილია მაშენებელი ეკლესიისა ქართულის ტანისამოსით და ეკლესიის გეგმით ხელში. ამას წარწერა აქვს, რომლის სრული დანამდვილებით გარჩევა მე ვერ მოვასწარი; ჩემს დღიურში აღნიშნული მაქვს მხოლოდ:

მიქა

მიქას

ს მე ე<sup>-</sup>ვ

მე ერისთავი

ზ<sup>-</sup>დუ

ზვიადი (ან: ზვიადად),

ა<sup>-</sup>ნ

ამინ.

წარწერა თხოულობს შემოწმებას. აღნიშნულ ფიგურის შემდეგ იმავე კედელზე არის წარმოდგენილი: მანდილოსანი, ქართულის ტანისამოსით და წარწერით:

ნათელ მეუღლე.

ამის შემდეგ სწერია:

აღვაშენე მე. . . აჩვა (?) და ჯვართა . . . სადიდებლად

ღმრთისა და მთავარ ანგელოზისა მუხევისა და სალხი-

ნებელად სულისა ჩემისათვისა შ<sup>-</sup>ნ ღ<sup>-</sup>თ.

ნივთებით ეკლესია ღარიბია. აქ მოიპოვება მარტო:

1. **გამოსასვენებელი ჯვარი**, ვერცხლისა, ნაჭედი, 38,5X27 სანტ. არც ცუდი ხელობისა. წინა პირზე წარმოდგენილია ჯვარცმა, ხოლო ბოლოებში ფრთებისა,

მედალიონებში, წელსზევითი ფიგურები: ღვთის მშობელი მარცხნივ, იოანე მახარობელი მარჯვნივ, მთავარ ანგელოზი ზემოდ, და ერთი წმიდანი ქვემოდ; სახელი არ უწერია (№17013).

მეორე გვერდი ჯვარისა შემკობილია ბროწეულის ყვავილების მსგავსი ორნამენტით ორმაგად და ლამაზი ნახელავია (№17014).

2. ამ ეკლესიაში ჯერ ბარტოლომეიმ ნახა და შემდეგ დ. ბაქრაძემ შესანიშნავი მხატვრული სახარება, რომელიც დღეს ჩვენთვის დაკარგულია. ბარტოლომეი სწერს: ყველაზე დიდ ღირებულებას ამ ეკლესიისას შეადგენს უექველად მშვენიერი ეტრატის ხუცური სახარება ოქროს ვარაყიანი სათაურებით, შემკობილებებით და მინიატურებით. მცოდნე და მოყვარული ადამიანისათვის, დასძენს ბარტოლომეი, მარტო ამ სახარებისათვის ღირს სვანეთში გამგზავრება (ბარტოლომეი, გვ. 192). დ. ბაქრაძეს მოჰყავს მინაწერები ამ სახარებისა (გვ. 93–94), შესრულებული ნუსხა ხუცურით. მათეს სახარების ბოლოს:

მე საწყალი მწირი მიქელ გვედრები ლოცვასა წმიდაო მღვდელო სტეფანე და ყოველთა მკითხველთა ერთობით გვედრები ამინ.

წიგნის სულ ბოლოს:

გვედრები კეთილო მღვდელო სტეფანე მოძღვარო სახელითა ღუთისათა მადლითა და სარწმუნოებითა წმიდისა კათოლიკე ეკლესიისა მცხეთისადათა მე გლახაკი სტეფანე ხუცესი პალავრელი მნათე ყოფილი ყოველთა მოწესეთა ნარჩევი მიწაჲ და მტვერი შვილი მცხეთისაჲ ღრის-მყო ღმერთმან მოუგონებელსა კეთილსა და წყალობასა მისსა და მოვიწიე წმიდასა ქალაქსა იერუსალიმსა ადგომასა უფლისა ჩუწნისა იესო ქრისტესა და წმიდასა გოლგოთასა და მოვილოცნე ყოველნი წმიდანი ადგილნი მისნი მოწყალებითა ქრისტესითა და დამაწესეს მწირველად ქართლსა კათალიკოზისა ოქროპირისა წმიდა ეკლესია<sup>1</sup> გარდამოხსნისასა მლოცველად.

და მოვიგე წმიდაჲ ესე ოთხთავი სრული ყოველთა სახმარითა სალოცველად ცოდვილისა სულისა ჩემისა და მშობელთა და მოძღვართა ჩუწნთასა და ყოველთა ქრისტიანეთა სალოცველად, ქორონიკონი იყოსა სდჳ.

შემდომად ჩემსა ვისაცა ღმერთმან მოგცეს და რომელნი აღმოიკითხვიდეთ წმიდასა ამას ოთხ-თავსა სულთა განმანათლებელს წმიდასა ლოცვასა თქვენსა ჩვენცა მოგვიხსენებდით.

დაიწერა წმიდასა ადგილსა გესმანიას<sup>2</sup> საფლავს წმიდასა ღუთის მშობლისსა<sup>3</sup> საბა წმიდისა განგებისა ზედა ბერძულსა დიად ხარკებითა ხელთა (ხელითა) საწყალობელისა მიქელ მეორესა<sup>4</sup> მცხეთისავე მიწისაგან.

წმიდანო ღუთისანო ჩემგან უძროლისა რომელი ეგებოდა მშრომთა და მომჭირვებია სულ<sup>5</sup> დედასა წერილ არს.

მსგეფსითა და საუფლოთა დღესასწაულთა ჟამსა წირვისა<sup>6</sup> . .

. . . შემოთლვა და შეცდომისა . . .<sup>7</sup>.

1 ბერი ბაქრაძის გადმოწერილში სწერია ამ ხუთი სიტყვის მაგიერ: ქართლისა კათალიკოზისა ოქროპირისა, ადიდენ ღმერთმან, წმიდასა ეკლესიასა.

2 ბერი ბაქრაძე: გეთსამანიას:

3 ბერი ბაქრაძე აქ უმატებს დედნისაგან.

4 ბერი ბაქრაძე: მიქელ მწირისა.

5 ბერი ბაქრაძე: მიშრომია და მომიჭირვებია, რომელი.

6 ბერი ბაქრაძე უმატებს: საკითხავითა და სხვითა ყოვლითა განგებითა, რიცხვითა და განთესულითა (სიც) ჯვართა, ვარსკვლავითა, ისრითა და ღელვა ვრცელითა. რომელი ვის ჩემდა უმეცრებით ცთომილი პოთ ანუ მოხვდეს, შემინდევით ღვთისათვის, ამინ.

7 ეს სამი სიტყვა შეცდომით უნდა იყოს მოყვანილი. ბერს ბაქრაძეს არა აქვს.

უკანასკნელი ასო ქორონიკონისა დ. ბაქრაძის წაკითხვით ჩ-ია, მაგრამ თვითონვე შენიშნავს, რომ შეუძლებელია, უნდა იყოს ან ვ და ზ. ჩვენის აზრით, რასაკვირველია, უნდა იყოს ზ; ასოები ჩ და ზ ასომთავრულში ერთმანეთს ჰგვანან; ცხადია, უნდა იყოს სძზ, რომელიც უდრის 1048 წელს, ესე იგი ბაგრატ მეოთხის მეფობას. წარწერაში მოხსენებული კათალიკოზი ოქროპირიც ცნობილია ბაგრატ მეოთხის დროს. როგორც გადამწერი სახარებისა, ისე მომგებელი ხუცესი სტეფანე პალავრელი (პალავრა, ესე იგი ძველი ლავრა, იყო წმ. ხარიტონის ლავრა, ერთი ცენტრი ქართველთა მოღვაწეობისა პალესტინაში) ყოფილან მცხეთიდან და ორთავენი წარწერებში მოწიწებით მიმართავენ უფროსს და გამოჩენილ მღვდელს სტეფანეს, ალბათ პალესტინაში მოღვაწეს. დ. ბაქრაძის აზრით, ეს უკანასკნელი სტეფანე უნდა იყოს ცნობილი მთარგმნელი წიგნებისა სტეფანე, მაგრამ საეჭვოა, ვინაიდან, რამდენადაც ჯერ ცნობილია, სტეფანე წიგნების მთარგმნელი სანანოის ძე უფრო მეათე საუკუნის დასასრულის მოღვაწეა (იხ. კეკელიძე, ქართული ლიტ. ისტორია, ტომი, პირველი, გვ. 176–179). სახარება გადაწერილია ღვთის მშობლის საფლავის ეკლესიაში გესმანიას ანუ გეთსამანიას მიქაელ მეორის მიერ მცხეთისავე მიწისაგან.

## ლატალის თემი

ლატალის თემს შეადგენენ სოფლები: იფახი, ლეშუკი, ლაშყვაში, შყალერი, მაცხოვარიში, კვანჩიანი, გიბამი, ენაში (დენაში), ლახუმტი, ლაჰილი.

ლატალის თემი ერთი საუკეთესო თემია თავისუფალი სვანეთისა, ყველაზე უფრო მაგარი და მდიდარი, ვინაიდან ენგურის ხეობა აქ ფართოა, ლატალელებს ბევრი აქვთ სახნავ-სათესი მიწა, საძოვრები და ტყე. ესენი ყველაზე უფრო მამაცად ითვლებიან, ყველა თემებზე უფრო გვიან მიიღეს ნებაყოფლობით რუსეთის ქვეშევრდომობა, პოლკოვნიკ ბარტოლომეის შუამდგომლობით. ბარტოლომეიმ მიიღო მათგან ფიცი რუსეთის ქვეშევრდომობაზე 1853 წელს.

## სოფელი ენაში.

სოფელი ენაში (დენაში) დიდათ ლამაზი სოფელია; საზოგადო სახე მისი იხ. ფოტ. №17439. ეკლესია ამ სოფლისა, იონა წინასწარმეტყველის სახელზე აშენებული, არის თლილის ქვისაგან ნაშენი, ბაზილიკური რიგისა; სამხრეთით,

დასავლეთით და ჩრდილოეთით ეკლესიას უვლის ეკვტერები და ეს ეკვტერები, სამხრეთის და ჩრდილოეთისა, მას აძლევენ სახეს სამ ნაოსანი ბაზილიკისა. შესავალი აქვს დასავლეთით და სამხრეთით; სამხრეთის ეკვტერში შესავალი 2 გაშლილი კამარით არის და ეს კამარები შემკობილია სვეტებით და პილიასტრებით. სარკმელები არის თითო აღმოსავლეთით და დასავლეთით (გეგმა მისი იხ. ბერნოვილი, გვ. 143, ფიგ. 19 და 20; აგრეთვე გეგმა და სახე იხ. უვაროვისა, გვ. 70, ფიგ. 11 და 12). სამხრეთ-დასავლეთის სახე ამ ეკლესიისა მშვენივრად არის გამოსული ჩვენს ფოტოგრაფიაზე, იხ. №17440. ჩვენ ამ ეკლესიის გეგმაც გვაქვს დამზადებული.

დასავლეთის ფანჯარა შემკობილია სკულპტურული ოთხკუთხედი ჩარჩოთი, რომლის ზემოდ ორი ქვაზე ამოჭრილი ჯვარია. სამი ასეთივე ფანჯარა არის აღმოსავლეთის ნაწილში, თითო თითო ნაოსში, თუ ეკვტერებს ნაოსებად ჩავსთვლით. ორმაგი ჩარჩო დასავლეთის კარისა ზემოდ დამყარებულია ორივეს მხრით ორმაგსავე სვეტებზე მრგვალის სვეტის თავებით. ასეთივე სვეტებით და სვეტის თავებით შემკობილია მაღალი გლუვი კამარები სამხრეთის ეკვტერის გარეგანი კედლებისა. ხოლო ამათ შორის არის მოქცეული ორი უფრო დაბალი კამარა შესავლისა. სამხრეთის და აღმოსავლეთის კედლებზე ჩვენ ვხედავთ კიდევ პასქებს, რომელთა სკულპტურული შემკობილობა წნულის სახისაა. კანკელი ქვისაა, ხუთ-კამარიანი, ოთხის სვეტით და ორის ნახევარი სვეტით.

ეკლესია სულ მოხატული ყოფილა; ფრესკები დაზიანებულია, მაგრამ აქა-იქ კიდევ საკმაოდ შენახული არის. საკურთხეველში მოსჩანან ეკლესიის მამები ქარტებით, რომლებზედაც ბერძნული წარწერებია, მაგრამ სახელები ფიგურებისა ასომთავრულით არის, მაგალითად: პეტრე, პავლე. კონქში მოსჩანს მაცხოვარი. დასავლეთის კედელზე ყოფილა ფიგურა მაშენებლისა, მაგრამ ცოტადაა დარჩენილი. ეკლესიაში ჩვენ ვნახეთ:

1. თავი ხატი იონა წინასწარმეტყველისა, ოქროთი დაფერილის ვერცხლისა, 16,5X12,5 სანტ. პირის სახე ჰქონია წამლით დახატული, რომელიც ეხლა სულ გადასულია, აგრეთვე მოძარცული აქვს დიდი ნიმბი, რომელიც ყოფილა ძვირფასი ქვებით შემკობილი; დარჩენილია კვანძები ლურსმებისა, რომელთა საშუალებით თვალები ყოფილა ნიმბზე მიმაგრებული (იხ. ფოტ. №17015). ფიგურა წინასწარმეტყველისა წელსზევითია; მარჯვენა ხელი გულზე აქვს მიდებული, მარცხენაში გრაგნილი უჭირავს; ტანისამოსი ხშირად არის დანაოჭებული; აშია შემკობილია ორნამენტით, რომელიც შესდგება ტეტრაკონქებში მოქცეულის ჯვრებისაგან და ეს ტეტრაკონქები შეერთებულია ორივეს მხრით სამკუთხედებით. მეორე გვერდზე ასომთავრული წარწერაა (იხ. ფოტ. №17016):

წ : მ-ვჰდეთ : და : შე  
ვ-მკვეთ : ხატი : ეს  
ე : ი-ნე : წ- წყლი : ჩ-ნ : კ  
ატრონმ-ნ : გური  
ლეღმ-ნ : მამია :  
ამ : სფ-ლს : გასამ

მოვჰედეთ და შე-  
ვამკეთ ხატი ესე  
იოანე წინასწარმეტყველი ჩუენ  
პატრონმან გური-  
ელმან მამია  
ამ სოფელს გასა-

არჯველ-დ : და : სა  
უკნს : სკნს : სკსრ-დ :  
სლის : ჩნისა : თვს : –

მარჯვებლად და სა-  
უკუნოს საუკუნის საკსრად  
სულის ჩუენისათვს.

შეადარე ბაქრაძე (გვ. 83-84).

გურიელი მამია ხუთი იყო: მამია პირველი, შვილი გიორგი გურიელისა, მოხსენებულია 1412 წელს ლეხორის წარწერაში; მამია მეორე, გიორგი მეორეს შვილი (1625 წ.); მამია მესამე, გიორგი მესამის შვილი (1717 წ.); მამია მეოთხე, გიორგი მეოთხის შვილი, (1726-1762); მამია მეხუთე, სვიმონის შვილი (1810-1826).

---

1 შეცდომით არის მოყვანილი გურიელის მაგიერ.

ხატი უნდა ეკუთვნოდეს მე-15 საუკუნეს; მაშასადამე, აქ უნდა იგულისხმებოდეს მამია პირველი.

2. **ჯვარი გამოსასვენებელი**, ოქროთი დაფერილის ვერცხლისა, 45X38 სანტ. ნაჭედი. წინა პირზე, შუაში, წარმოდგენილია ჯვარცმა, დაზიანებული. ბოლოებში მრგვალი მედალიონებია წმიდათა სახეებით, რომელთა შორის ორი წა გიორგია, მარჯვნივ და მარცხნივ, წარწერით: წა გი. ქვემოდ, ვგონებ, კოზმანია: კმნ; ზემოდ დამიანე: დმნ. დანარჩენი ნაწილი ჯვარისა შემკობილია ფოთლოვან-ყვავილოვანის ორნამენტით (იხ. ფოტ. №16998); მეორე გვერდზე, არავითარი შემკობილობა არ არის, გარდა ასომთავრული წარწერისა, რომელიც მოთავსებულია შუა მკლავებზე სამ სტრიქონად, ლამაზად (იხ. ფ. №16997). ამ წარწერას იხსენიებს ბაქრაძე და ამბობს მხოლოდ: ჯვარის მეორე გვერდზე წარწერაა, რომელიც არ განირჩევა (გვ. 84). საკვირველია, რომ ცნობილ არქეოლოგს ეს წარწერა არ გადმოუღია ხელით, როგორც სხვა ძნელი გასარჩევი წარწერები. არც ერთი სხვა მკვლევარი წარწერას არ იხსენიებს, თუმცა ამ ეკლესიაში ყველანი იყვნენ, როგორც სხვა მათი შენიშვნებიდან სჩანს. მართლა და ზოგიერთი ასოს მოხაზულობა ამ წარწერაში ფრიად უცხოა. ასეთია ჩვენის აზრით ა პირველი სტრიქონის ბოლოს და შუაში; ასეთი მოხაზულობის ა სხვა წარწერებიდან ჯერ ცნობილი არ არის. მეორე ასოა არა ჩვეულებრივი დ, თუმცა პირველ სტრიქონში ერთ ადგილას ეს თავისი ჩვეულებრივი მოხაზულობით გვხვდება, მაგრამ იმავე სტრიქონის უკანასკნელ სიტყვაში, აგრეთვე მეორე სტრიქონის უკანასკნელ სიტყვაში და მესამე სტრიქონის მესამე სიტყვაში მის მაგიერ სრულიად ასო პ მოყვანილი, თუ გნებავთ, ეს იგივე ასომთავრული დ-ნია, მაგრამ ყირამალად დასმული, ბოლო ზემოდ აქვს მოქცეული და თავი ბოლოდ. პირელი ასო პირველი და მეორე სტრიქონისა უნდა იყოს, ჩვენის აზრით, ბ და არა ვ და არც ყ, თუმცა ცოტა მათაც ჩამოჰგავს; ამას გარდა მესამე ასო მესამე სტრიქონისა თავიდან ე-ნია შებრუნებული. შემდეგ მარცხენა ფრთა ჯვარისა გატეხილია და ამ ადგილას ასოები აკლია ყველა სტრიქონში, მაგრამ მათი აღდგენა აზრით შეუძლებელია, გარდა პირველი სტრიქონის სიტყვისა. ვიღებთ რა ყველა ამას მხედველობაში, ჩვენ წარწერა ასე გვეჩვენება:

ბხთლს მარ[ი]ხიალ-ს შუდ[ო]ს ღმერთმა

ბსა :: თქვე[ნს]ასა :: ხებს : შუდს :: ღმერთმა

ქ ზ ძო ღმრთ[ი]საო : დ მეოხ დ ფრვლ : დ მამკ

შემოკლებულად დაწერილი არა ჩვეულებრივი საკუთარი სახელების ახმოვანება ძნელია და მათი წაკითხვა ყოველთვის საეჭვოდ დარჩება. საკვირველია, რომ ქ დასაწყისი ყველა წარწერისა ჩვენს შემთხვევაში პირველ სტრიქონს როდი უზის, არამედ მესამეს და ეს მესამე სტრიქონი დამთავრებული არ არის, აკლია შესმენილი; ძნელია თქმა, რას ნიშნავს მეორე სტრიქონის სიტყვა ბსა, შეიძლება ვიგულისხმოთ „ბიძასა“, ან „ბატონსა“, ან „ბაბუასა“, აგრეთვე მეტია კავშირის და-ს სამჯერ ხმარება მესამე სტრიქონში; ამ შენიშვნების შემდეგ, შეიძლება წარწერა ასე წავიკითხოთ:

ბახათელს (?) მარიხიალას (?) შეუნდოს ღმერთმა.

ბიძასა თქვენსასა ხებს შეუნდოს ღმერთმა.

ზ ძეო ღმრთიასაო, მეოხ და მფარველ [მექმენ] მამკ[ობსა შენსა].

3. **ჯვარი** დიდი, კანკელის წინ დასადგმელი, 80X41 სანტ. არა ჩვეულებრივი რიგისა, ფრიად თავისებური, რომელიც ჩვენ მარტო სვანეთში გვხვდება და სხვა საქართველოს ადგილებში ჯერ უცნობი არის (იხ. ფოტ. №17003). ყველა მხარეები ჯვარისა ბოლოში გაფართოებულია და თავდება დიდი მრგვალი მედალიონებით, რომელთაც ირგვლივ ახლავს სამი მომცრო მედალიონი; ქვემოდ კიდევ მედალიონს ტრაპეცია მისდევს. შუაში ოთხკუთხედი მედალიონია. ყველა კიდები ჯვარისა და მედალიონებისა შემკობილია მოოქრული ვერცხლის წნულით და გამშვენებული ძვირფასი ქვებით. ჯვარის ყველა ნაწილები საკმაოდ ღრმა უჯრედებს შეიცავენ, რომლებშიაც ეტრატზე ფერადის წამლებით დახატული სურათებია სახარების ციკლისა და ეს სურათები ზემოდან დაფარებულია შუშებით. სულ ეხლა 20 უჯრედი არის პირველ პირზე და ქვემოდ ერთი პატარა მედალიონი მოტეხილი აქვს, თორემ 21 უნდა ყოფილიყო. სრულიად ასეთივე სახე აქვს მეორე პირსაც ჯვარისა (იხ. ფოტ. №17004). სამწუხაროდ, ბევრ უჯრედში სურათები აღარ არის დაცული, ნამეტნავად მეორე გვერდზე და ისინიც, რომელნიც გადარჩენილა, ფოტოგრაფიაზე ნათლად არ გამოდის, ვინაიდან ეტრატის ნაჭრები დაღრეკილია სიცხის გამო. ერთი ნიმუში ასეთი მხატვრობისა მე გამოვართვი ბ. ნიჟარაძეს; ის წარმოადგენს ფერისცვალების მინიატურას, მაგრამ ის ამ ჯვარს არ ეკუთვნის, არამედ ამოღებულია სხვა ამგვარი ჯვარიდან ან ხატიდან. როგორც ქვემოდ დავინახავთ, ასეთი რიგის ხატებიც ყოფილა სვანეთში.

4. **ჯვარი**, შუა ზომისა 67X34, შეძერწილია ვერცხლის ფირფიტებით, ტლანქი ხელობისა. შუაში უმბო მოყვითლულია. სხვა ფიგურებთა შორის სამი სურათი მთავარ ანგელოზისა არის, ერთს აწერია: წ-ღ მიქელ.

5. **ხატი მაცხოვრისა**, დიდი, სიმაღლით 1 არშინი 4 1/2 ვერშოკი, განით 1 არშინი. პირის სახე წამლით ყოფილა დახატული, მაგრამ ეხლა მოშლილია; პერანგი და მორთულობა მოოქრული ვერცხლისაა. მაცხოვარი წელსზევითია, მაკურთხეველის მარჯვენით და სახარებით მარცხენაში; ნიშბი დიდი ჯვარის



სახედ და აშიები შემკობილია ბროწეულის ყვავილების მსგავსი ორნამენტებით. ეზო უფრო ბალახოვანი სახის არის. ზემოდ, ორივე მხრით ნიმბისა ჯვარის სახის „დროზნიცებში“ ბერძნული წარწერაა სახელისა. ქვემოდ და მარჯვნივ მაცხოვრის წარწერაა, მაგრამ ქვემო ნაწილი თავუკუდმაა მიჭედილი. ქვემოდ ყოფილა სულ სამი სტრიქონი, მაგრამ შენახულია მხოლოდ ორი და გაგრძელება ვერტიკალურად მარჯვნივ ხატისა, დ. ბაქრაძე ამბობს: წარწერა ვერ გადმოვიღეო (გვ. 84). ა. ხახანაშვილი შეცდომებით კითხულობს წარწერას (გვ. 38). იხ. ფოტ. 17002. ჩვენ ასე ვკითხულობთ:

1. [ვნახ]ეთ : ეკლესიაი : დარღლი<sup>1</sup> : ვპოეთ : სმკლი :  
ეკლესისა : შნისი : მოპრლი და დაფლული : . . . რათა  
შნივ შნდა : შევსწიროთ . . . შნდა : მინდობილთა :  
გკსნენ : ჩვ-ნ ჯჯხეთს
2. [აგან] [ბ]ნელისა : და : მიოხო<sup>2</sup> : დ-დსა : შნისა :  
თა<sup>3</sup> და : მითლე : კნინი : ესე : მს-ხრბი ჩნი : ვა  
მ[წვლილი] [ქ]ურვ-სგ-ნ<sup>4</sup> : ბრძიმი : ხუთ-სის :  
დრმისი : ტბკინი : ორნი : ს-ცეცხურნი : ერთნი :  
ხ-რნი ერთი

---

1 ამ სამი სიტყვის მაგიერ ა. ხახანაშვილი კითხულობს: თეკლე ალექსანდრე.

2 ა. ხახანაშვილი ამ ორი სიტყვის მაგიერ: მტერთა.

3 ეს სიტყვა არ მოჰყავს ა. ხახანაშვილს.

4 ეს ორი სიტყვა გამოტოვებული აქვს ა. ხახანაშვილს.

3. (ეს სტრიქონი მოტეხილია, ადგილ-ადგილ მოსჩანს ზემო ნაწილები ასოებისა, გაგრძელება მოთავსებულია მარჯვნივ ხატისა)

4. ორთვე /შნა : ცხ/რბთა : ხ/ტსა : ზე/და : არს / ოქ-  
როი : და / ვერცხლი : / დრამი : შ(ვ)იდასსი.

უქარაგმოდ:

. . . (ვნახ)ეთ ეკლესიაი დარღვეული, ვპოეთ სამკაული ეკლესიისა შნისაი მოპარული და დაფლული. . . რათა შნივ შნდა შევსწიროთ. . . შნდა მინდობილთა გვიკსენ ჩვენ ჯოჯოხეთის(აგან) (ბ)ნელისა და მიოხო დედისა შნისათანა და მიითვალე კნინი ესე მსახურებაი ჩვენი, ვითარცა მ(წვლილი) (ქ)ურვისაგან : ბარძიმი ხუთასის დრამისაი, ტაბაკნი ორნი, საცეცხურნი ერთნი, ხარანი ერთი. . . ორთვე შინა ცხორებათა . ხატსა ზედა არს ოქროი და ვერცხლი დრამი შ(ვ)იდასსი.

არც ალექსანდრე და არც თეკლე ამ წარწერაში სრულიად არ არის მოხსენებული, რაც შეცდომით ამოუკითხავს ა. ხახანაშვილს (გვ. 38). წარწერა სტილით, მართლწერით და პალეოგრაფიულის ნიშნებით წააგავს ოყურემის წმიდა გიორგის ხატის წარწერას იმერეთის მეფის ბაგრატ მესამის და მისი მეუღლის ელენესას (1510-1548) და ჩვენ გვგონია, ეს წარწერაც მათ ეკუთვნის (იხ. ზემოდ გვ. 65-68). ყოველ შემთხვევაში წარწერა მე-16 საუკუნის არის.

6. ხატი წა გიორგისა და წა თეოდორესი, ვერცხლისა, ნაჭედი, 50,5X39,5 სანტ. წარმოდგენილნი არიან სრულის ტანით, შუბებით და ფარებით; ახალგაზრდათ გამოიყურებიან; თმა ხუჭუჭად აქვთ დალაგებული. წარწერები: წ-დ გ-ი, წ-დ თ-ე, (იხ. ფოტ. №16999). ჩარჩო ფართო რომბ-ლურსმულიანი მოქცეულია შინაგან და გარეგან ფოლაქოვან წრეებში. ჩარჩოზე რვა მედალიონია; ზემო მედალიონებში ვედრებაა, შუაში მაცხოვარი, ბერძნულის წარწერით სახელისა; მარცხნივ: დ-დ ლ-დ; მარჯვნივ: წ-დ იოვანე. ქვემოდ: წ-დ დ-ე (შუაში), წ-დ ლუკა (მარცხნივ) და: წ-დ პ-ტრე (მარჯვნივ). აქეთ-იქით წარმოდგენილნი არიან, სრულის ტანით, იოანე: წ-დ ა-ე (მარცხნივ) და გაბრიელ მთავარ ანგელოზი: წ-დ გბრლ(მარჯვნივ); ქვემოდ, ფოლაქოვან ხაზს ქვეშ, წარწერაა:

წ-ო მაცხოვრო : შ-ე : ივ-ნე : ოქრომჭ-ი ამინ.

ხატი მე-17 საუკ. უნდ ეკუთვნოდეს.

7. ხატი წა გიორგისა, ვერცხლისა, ნაჭედი, 93X71 სანტ. წარწერით: წ-დ გ-ი სუფისა. წმიდანი მდგომარეა, შუბით და ვეებერთელა ფარით, რომელზედაც მარცხენა ხელი უდევს; აშიები რომბ-ლურსმული, ოთხი მედალიონით; ზემო მედალიონში, შუაში, ტახტის შემზადებაა წარმოდგენილი; წარწერები არა აქვს; ქვემო აშია აკლია (№16995). ეზო ვაზის შტოების მსგავსად არის მორთული, მე-15 საუკუნეს უნდა ეკუთვნოდეს.

8. ხატი წა თეოდორესი, 50,5X49,5 სანტ. წმიდანი გაჭენებულ ცხენით არის წარმოდგენილი, შუბით ვეშაპს გმირავს. წარწერა: წ-დ თ-ე. ჩარჩო ფართო რომბ-ლურსმული, მედალიონებით; ზემოდ ვედრებაა; მარცხნივ და მარჯვნივ სრულის ტანით წარმოდგენილ ფიგურებს წარწერა არა აქვთ. ხატი დაზიანებულია. ხელობა ტლანქია, მე-18 საუკ. (იხ. ფოტ. №1700).

9. ხატი წა ბასილისა, ოქროსი, 30X22 სანტ. ფიგურა წმიდანისა წამლით ყოფილა დახატული, მაგრამ სულ გადასულია. დარჩენილია ვრცელი ეზო და მორთულობა ფრიად ნასკვნი ხლართულებით და არაბესკებით შემკობილი. აშია ვიწროა, ორ-ორი დასერილი ხაზებით უჯრედებად დაყოფილი და შემკობილი ლამაზი ორნამენტებით. წარწერა „როზეტებში“, ზემოდ: წ-დ ბსლი.

ქვემოდ ნაკლული წარწერაა:

. . . მფრველ . მექმენ . ორსავე ცხოვრებსა . ივ-ნს .

კრჭმლსა . . . და მე ძიახარსა (?)

ესე იგი: [წმიდაო ბასილ] მფარველ მექმენ ორსავე ცხოვრებასა იოვანეს კერკემელსა . . . და მე ძიახარსა (?). ეს უკანასკნელი სიტყვა ცუდათ არის შენახული და მისი წაკითხვა საეჭვოდ მიგვაჩნია, შეიძლება მართალი იყოს ბერი ბაქრაძე, რომელიც თავის აღწერილობაში 1864 წ. ამ ხატის შესახებ ასე სწერს: „წმიდა ვასილის ხატი ოქროსი იოანე ამილახვრისაგან“. ალბათ უკანასკნელი სიტყვა მას ამილახვრად წაუკითხავს. ეს ხატი ჩვენის აზრით მე-13-14 საუკუნეზე უფრო გვიანი არ უნდა იყოს (იხ. ფოტ. №17001).

10. **ოთხი ხატი**, ღვთის მშობლისა, მაცხოვრისა და სხვათა, ფიცრებზე დახატული, წამლით, 131X80 სანტ. თითო, უფრო უკეთესად არის შენახული მაცხოვრის სურათი, ტახტოსანი. ხელობა მოიტლანქებს.

11. **ბრინჯაოს ჭურჭერი**, როდინი ანუ ავანდასტის მსგავსი, ორის ყურით, გამობერვილი გეომეტრიული სახეებით და აშიების შემკობილობით ზემოდ და ქვემოდ, მსგავსად არაბესკებისა ანუ არაბულის წარწერებისა, (იხ. ფოტ. №17017).

12. **ზარი**, ხუცურის წარწერით (იხ. ფოტ. № 17022):

ქ<sup>1</sup> : ჩ-ნ : მ-ფთ : მ ფმნ : ალექსანდრე : ძემნ : მ-ფისა :  
ლეონისმ-ნ .

წარმოვეც : კახეთით :: ზარი :: ესე :: სამსახურებლ-დ ::

წ-იდ ისა :: ტ-ძრისა :: შ-ნის-დ : წ-წტყ-ლ : იონა-დ : ლა-

ტალისაო :: აწ უკწ ::

მ-ხბითა : შ-ნითა :: ორისვე :: ცხორბისა :: ღელვ-თაგნ

ეგრ-თ :: უვნ-ბლდ :: და

მიცევ : ვ-ა : იგი :: ო-ნ გვცვა :: ზრვს- გნ :: და : ვემ-პი-

სა :: ა-ნ :: ქ-ნსა : სპწ ::

შეუმოკლებლად :

ჩუენ მეფეთ მეფემან ალექსანდრე, ძემან მეფისა ლეონისამან, წარმოვეც კახეთით ზარი ესე სამსახურებლად წმიდისა ტაძრისა შენისა და წინასწარმეტყველ იონა-დ ლატალისაო; აწ უკუწ მეოხებითა შენითა ორისავე ცხორებისა ღელვათაგან ეგრეთ უვნებლად დამიცევ, ვითარცა იგი უფალმან გვცვა (sic) ზღვსაგან და ვემპისა, ამინ, ქორონიკონსა : სპწ.

ამ წარწერის ქორონიკონს დ. ბაქრაძე შეცდომით მიაწერს 1598 წელს (გვ. 82). ქორონიკონი უდრის 1600 წელს.

---

1 დედანში წილქანი უზის.

მეფე ალექსანდრე კახეთის მეფეა, ლეონის შვილი, (1574-1605).

13. **სახარება ეტრატზე**, 27X21 სანტ. დაწერილია ნუსხა ხუცურით, ორ სვეტად; თითოეულ სვეტზე 23 სტრიქონია; შეიცავს 31 რვეულს; რვეულში 8 ფურცელია. სულ დაცულია 226 ფურცელი, მათ შორის 4 ფურცელი მოციქულების მინიატურებს უჭირავს; ესენი ფრიად დაზიანებული არის.

მახარობლების სურათებს წარწერები სახელებისა ბერძნული აქვთ, მაგრამ მათ წინ გაშლილ სახარების ფურცლებზე ქართული ხუცურით დაწერილი ტექსტია. პირელ 2 ფურცელზე მოყვანილია წერილი ევსებისა კარპიანესადმი; შემდეგ 12 ფურცელზე მშვენიერი ფერადებით და არაბესკებით შემკობილი კანონებია, რომელნიც მოქცეულნი არიან ლამაზ ნახელავ ფერადებიან სვეტებში თავის კვარცხლბეკებით და სვეტის თავებით (ერთი ნიმუში ამისა იხ. უვაროვისა, გვ. 153), ასეთივე ლამაზი ხელობის არის აგრეთვე მეთაური

სურათები თითოეულის სახარების თავში (მათეს სახარების თავის სურათი იხ. უვაროვისა, გვ. 153).

სახარებას ამშვენებს მრავალი საუცხოო ფერადებიანი მეთაური ასოები. ფერადები ერთობ ნაზია, მოწითანო, მოყვითალო, მომწვანო, შავი და ოქროს ფერი. თუ სხვა სახარებათა მორთულობა მე-11 და 12 საუკუნეთა ბიზანტიის გავლენას მოგვაგონებს საერთოდ, ამ სახარების მორთულობას და მის არაბესკებს აშკარად აღმოსავლეთის გავლენა ემჩნევა. დ. ბაქრაძე ტყვილად ადარებდა ამ სახარებას ცნობილს გელათის სახარებას გიორგი მთაწმინდელისა, მე-11 საუკუნისა (გვ. 84), ხოლო გრ. უვაროვისა სამართლიანად შენიშნავს, რომ სახარება არ შეიძლება იყოს მე-13 საუკ. უახლოესი დროისა. ჩვენ ქვემოთ დავინახავთ, რომ სახარება მართლა მე-13 საუკუნის პირველ ნახევარს ეკუთვნის. ალ. ხახანაშვილის აზრით, ტექსტი სახარებისა გიორგი მთაწმინდელის რედაქციას ეკუთვნის (გვ. 19), მაგრამ გიორგის ჩვეულებრივი ანდერძი ამ სახარებაში არ მოიპოვება და ერთი ადგილი სრულიად არ ეთანხმება გიორგის რედაქციას, მაგალითად: მე-24 მუხლი მათეს სახარების მე-19 თავისა იკითხება ასე.

უადვილეს არს მანქანისა საბელი გ-ნსლვად ჯურელსა ნემსისა ვ-ე მდიდრისა შესვლად სასუფეველსა.

სიტყვას მანქანისა შენიშვნა აქვს აშიაზე: აქლემი. და უწერია:

ესე არ მოცთომილია. დედასა ესრევე ეწერა.

მანქანა აქლემის მაგიერ წმ. ევთიმეს სახარებაში მოიპოვება და შესაძლოა ტექსტი ევთიმეს რედაქციას ეკუთვნოდეს. გადაჭრით ამას ვერ ვიტყვით, ვინაიდან ტექსტები არ შეგვიდარებია.

ბოლოს ხელნაწერს დართული აქვს: ზანდუკი სახარებისა საძიებელისაჲ საწელიწადოდ წმიდათა კ-რკსა აღვსებისასა.

ყდა სახარებისა ხის არის, ტყავ-გადაკრული და ეხლა ტყავის ზემოდ საბრალო და სამწუხარო ნაშთებია იმ მდიდრული და ძვირფასი შემკობილობისა, რომელიც წინეთ, დიმიტრი ბაქრაძის დროს და ნაწილობრივ გრაფ. უვაროვის დროსაც აქ ყოფილა. ეხლა აღარ არის არც ის ბიზანტიური ხელოვნების მედალიონები და არც ჯვარცმის ფიგურები, რომელზედაც იგინი მოგვითხრობენ. ეხლა მილანქრების კვალიც აღარ სჩანს; სულ ყველაფერი მოუძარცავთ და მოუპარავთ (დ. ბაქრაძე, გვ. 84-85; უვაროვისა, გვ. 153-154). წინა პირზე, სადაც ყოფილა წარმოდგენილი ჯვარცმა წინამდგომებითურთ, ეხლა მხოლოდ მოსჩანს მარჯვნივ: იოანე ნათლის მცემელი, ღვთის მშობლის ფიგურა და თვით ჯვარცმა აღარ არის; ზემოდ, მარცხენა კუთხეში მოსჩანს წელსზევითი ფიგურა მათე მახარობელისა, წარწერით: მათე მხრებლი. ქვემოთ, მარჯვენა კუთხეში დარჩენილია თავი წმიდანისა. სხვა შერჩენილი ნაჭრები ხლართულებით არის შემკობილი.

დ. ბაქრაძის დროს ამ ყდაზე ყოფილა მილანქრის მედალიონები და ამ მედალიონების ნაშთი უვაროვის დროსაც ყოფილა. ის სწერს: ყდა სახარებისა ერთ დროს საუცხოო ყოფილა თავის სიმშვენიერით, რომელთაგანაც დღეს დარჩენილია მხოლოდ საბრალო ნიშნები. ეს ყდა ტყავისაა, რომელზედაც გადაკრულია მოოქრული ბასმა ჯვარცმულის გამოსახულებით, წინამდგომებითურთ, რომელთ შემდეგ მოსჩანან მცირე ნაშთები ანგელოზთა,

ბიზანტიურის მილანქრიანი ხელობისა; ანგელოზებს შავი თმა აქვთ; თავის წრეები ცისფერი; ფონი, რამდენადაც შეიძლება შეინიშნოს, გაცარცვა ამ ყდისა დაწყებულა დ. ბაქრადის შემდეგ და დამთავრებულა გრ. უვაროვის შემდეგ, ეხლა მილანქრების ხსენებაც არ არის.

ასეთია დღევანდელი სახე ამ წინაპირისა (იხ. ფოტ. №17018).

მეორე მხარეს ყდისა, სამწუხაროდ, წინა მკვლევარები არ აგვიწერენ და ჩვენ არ ვიცით, ეს მათ დროს უკეთ იყო დაცული, ვიდრე ეხლა არის, თუ არა. გრ. უვაროვისა შენიშნავს მხოლოდ, რომ მეორე მხარე ყდისა კიდევ უფრო გაფუჭებულიაო, ვიდრე პირველი პირი და აგრეთვე ბასმისააო (გვ. 54). დ. ბაქრადეს გადმოუღია ხელით წარწერა ამ გვერდისა (იხ. დამატება №11), მოჰყავს მისი რუსული თარგმანი (გვ. 94), რომელშიაც კათოლიკოზის სახელს სტეფანე-დ კითხულობს (გვ. 84). ეტყობა ამ წაკითხვაში მას ეჭვი შესვლია, ვინაიდან ის სწერს: არ ვიცი მართლად გავიგე აზრი ამ წარწერისა, თუ არა, მაგრამ კათოლიკოსი სტეფანე ჩემთვის უცნობია. მე არც მგონია, რომ ქართულს მატრიანებში მოიპოვებოდეს კათოლიკოსი ამ სახელწოდებითაო (იქვე, გვ. 84). ა. ხახანაშვილი შენიშნავს, რომ წარწერა სრულ სწორად არა აქვს მოყვანილი დ. ბაქრადეს და მოჰყავს ტექსტი წარწერისა, მაგრამ არა თუ არაფერს არ ასწორებს ბაქრადის წაკითხვაში, არამედ კიდევ შეცდომას უმატებს. კათალიკოზის სახელს იგიც სტეფანედ კითხულობს, როგორც ბაქრადე და სიტყვის მაგიერ: „შეიმკო“, კითხულობს: „შემკობილი“. სრულიად წაკითხული არა აქვს ქარაგმანი ასო ქ- : როემლიც აქ ნიშნავს : „ქართლისა“, ისე როგორც ეს არ ამოუკითხავს ბაქრადესაც (გვ. 19). ეხლანდელი სახე ყდის მეორე გვერდისა (იხ. ფოტ. №17019), ხოლო წარწერა იკითხება ასე:

ქ : ამისა : ნტ  
არისა : ეპ  
იფანე : ქ : კ  
ზისგ-ნ : მგ  
ბული : ამი[ს]  
გ-ნვე : შე  
იმკო : კ-თლი  
კე : ეკლესი  
სთს : სხბ  
აი : ესე : მოი  
ქსენე : ქე :

ამის ნეტა-  
რისა ეპი-  
ფანე ქართლისა კა-  
თალიკოზისაგან მოგე-  
ბული ამის-  
განვე შეი-  
მკო კათოლი-  
კე ეკლესი-  
ისათვის სახარებ-  
ბაი ესე. მოიჯ-  
სენე ქრისტე!

ამ წარწერიდან ცხადათ სჩანს, რომ ქართლის კათალიკოზს ეპიფანეს მოუგია ეს სახარება; მასვე შეუმკვია და შეუწირავს კათოლიკე ეკლესიისათვის. კათოლიკე ეკლესიად აქ იგულისხმება მცხეთის ტაძარი, სვეტი ცხოველი, და რომ ეს ასეა, ამას ამ ყდაზე დარჩენილი ფიგურების ნაშთებიც ცხადათ მოწმობენ, რომელთათვის მკვლევართ ყურადღება არ მიუქცევიათ (იხ. ფოტ. №17019). აქ მე-13 საუკუნის ხლართულებში ყოფილა წარმოდგენილი თვით სვეტი ცხოველი. სვეტის სამსაფეხურიანი კვარცხლბეკი და თვით სვეტის დაზიანებული ღერიც ნათლად სჩანან, მარჯვნივ სვეტი ცხოველისა წარმოდგენილი ყოფილა სრულის

ტანით მაცხოვარი, ორივე ფეხი და ნაწილი სამოსლისა კარგად მოსჩანს. სვეტის მარცხნივ წარმოდგენილი ყოფილა აგრეთვე სრულის ტანით და საკათალიკოზო სამოსლით თვით ეპიფანე კათალიკოზი, რომელსაც ხელები ვედრების სახით მიპყრობილი აქვს სვეტი ცხოველის მიმართ. თავი და ფეხები ეპიფანესი მოშლილია; დანარჩენი ნაწილი შუა ტანისა კარგად არის დაცული; მოსჩანს ნიშნის წრის ნაწილიც და ნიშნს ქვემოდ, ორივე მხარეს დაზარალებული წარწერა სახელისა:

ეპ[ი] [ფ]ანე .

ეპიფანეს უკან, მარცხნივ ჩამოგრძელებულია ის წარწერა, რომელიც ზემოდ მოვიყვანეთ.

ეპიფანეს სახელი თვით სახარების ტექსტშიაც მოიპოვება. აქ მარკოზის სახარების დასასრულს ვკითხულობთ:

დაესრულა თ-თვი მ-რკოზისი ::

ჯლითა ფ-დ ცოდვილისა იოანადსითა :

მოდ-რისა ჩ-მისა ეპიფ-ნესთს ::

ყველა ზემო მოყვანილი ცნობებიდან ცხადია, რომ ამიერიდან ენაშის სახარებას უნდა დაერქვას: „ეპიფანე კათალიკოზის სახარება“.

ვინ არის ეს ეპიფანე კათალიკოზი? ეს ის ეპიფანეა, ეჭვს გარეშე, რომლის ვეებერთელა წარწერა აკადემიკოსმა ნ. მარმა აღმოაჩინა ქალაქ ანისის ერთს ქართულ ეკლესიის კედელზე და გამოსცა ფრიად ვრცელის და ჯეროვანის განმარტებებით (იხ. პეტერბურგის აკად. მოამბე (იზვესტია), 1910 წ. № 17), ხოლო ქვები გადაიტანა ანისის ყოფილ მუზეუმში და იქ აღადგინა კედელი სრულის დაცული წარწერით. წარწერა დათარიღებულია და ეკუთვნის 1218 წელს.

შესანიშნავი წარწერა ანისის ეკლესიისა მოწმობს, რომ კათალიკოზი ეპიფანე დიდი განათლებული კაცი ყოფილა, ნიჭიერი და სათნოიანი მწყემსი, მართლ მსაჯული და უნარის მქონე. მან მშვიდობიანად მოაწესრიგა შუილი თავის სამწყსოს წევრთა შორის ქრისტიანული მორალის და სიყვარულის მიხედვით. ხოლო ეს საუცხოო სახარება გვიმტკიცებს მეორე მხრით, რომ ეპიფანეს ჰქონია ამასთანავე უაღრესად განვითარებული გემო და მიდრეკილება ხელოვნებისადმი და არც დაუზოგავს შრომა გაემდიდრებინა თავისი საკათედრო ტაძარი ასეთი შესანიშნავი ხელოვნების განძით. რომელიც, სამწუხაროდ, ჩვენს დროში გაუცარცვავთ და მოუვლელიობით დაუზარალებიათ. სურათები ყდისა და გარჩევა წარწერებისა მოთავსებულია ჩვენს მიერ **Georgia**-ს მეოთხე და მეხუთე წიგნში, გვ. 96-100.

სოფელი მაცხოვარიში.

ეს განირჩევა სხვა სოფლებისაგან და ეთნოგრაფიისათვის გამოსადეგია ზოგიერთი ჩვენი ექსპედიციის მიერ გადმოღებული სურათები. ამ სოფელში გვხვდება ხის სახლები, რომელნიც იშვიათია სვანეთში; ერთი ასეთი ორსართულიანი სახლი, ორი დიდი ბალკონით, ბეკმურზა ფარჯიანისა, იხ. ფოტ. №17443; სხვა ხის შენობები სოფლის განაპირას, ეგრეთ წოდებული „ხუტორი“ გიკსუ ტამალიანისა, იხ. ფოტ. №17447; ტიპები ამ სოფლის ქალებისა (2 ქალი), იხ. ფოტ. №17525; ბავშვები ამ სოფლისა იხ. ფ. №17526. სვანის ქალები წყაროსთან, იხ. ფოტ. №17524 (ცხენოსანი კაცი აქ არის ლახამულის მცხოვრები იასონ ჩკადუა), მაცხოვარიშის მღვდელი მათე გულიდანი თავისი ჯორით, იხ. ფოტ. №17528; ჯორი პატრონის გარდა არავის იკარებდა, სასტიკად იტლინკებოდა. ჩვენმა თანამშრომლებმა სათითაოდ სცადეს, მაგრამ ვერავინ ვერ მოახერხა მასზე შეჯდომა.

ეკლესია ამ სოფლისა არის **მაცხოვრის სახელზე** აშენებული და აქედან წარმოსდგება სოფლის სახელიც მაცხოვარიში. გეგმა ამ თლილის ქვისაგან აშენებულის ეკლესიისა იგივე ყოფილა, რაც ენაშისა, მაგრამ დასავლეთის და ჩრდილოეთის მისი ეკვტერები ეხლა მონგრეულია; ამას გარდა ძველი კანკელი ქვისა შეცვლილია ახალი ქვის კანკელით. კედლები შიგნით სულ მოხატული ყოფილა, მაგრამ ეხლა დაზიანებულია და გაფუჭებული, ზოგან კომლისაგან გასვრილი, ანუ სულ გამქრალი. კარგად მოსჩანს კიდევ მაცხოვარი საკურთხევლის კონქში მთავარ ანგელოზებითურთ, შემდეგ დედა ღვთისა, ბერძნულის წარწერით სახელისა. მას ქვემოდ 12 ეკლესიის მამა. ზოგიერთის წარწერაც განირჩევა: თომა, სვმონ, იაკობ.

ჩვენთვის დიდათ მნიშვნელოვანი ფრესკები ყოფილა ჩრდილოეთის კედელზე. აქ, შუა ადგილას, მთავარ ანგელოზნი გვირგვინს ადგამენ თავზე წაეკატერინეს; ყოფილა წარწერაც, რომელიც ცუდათ არის დაცული, მაგრამ შესაძლოა გარჩევა:

ანგ-ლ . . .	ანგელოზ-
ა უფლ	თა უფალ-
ა ჩინსა	მა ჩინსა (?)
დასდ	დასდ-
გა მის თ	გა მის თა-
აჰსა ეკ	ვსა ეკა-
ატირ-ნს	ტირინას .

„ჩინსა“ აქ ალბათ ხარისხს, გვირგვინს ნიშნავს.

ამის პარალელურად, საკურთხევლის მახლობლად, მეფეა დახატული, ბიზანტიურის ტანისამოსით, რომელსაც აგრეთე მთავარ ანგელოზნი გვირგვინს ადგამენ თავზე. ერთს მთავარ ანგელოზს აწერია: გბრლ. მეფეს ხელი გაშვერილი აქვს მარჯვნივ, მაცხოვრის მარჯვენისაკენ, რომელიც მაკურთხეველის სახით გამოდის სფეროდან. მეფის ნიშნის ორივე მხარეს წარწერაა:

მფთ მფე დმტრი.

ესე იგი: მეფეთ მეფე დიმიტრი.

მეფის წინ ქვემოთ დაჩოქილნი არიან მისი ერისთავები; წარწერიდან მოსჩანს ასოები: ერთთავი (ერისთავთ ერისთავი).

მეფის მარჯვნივ წარწერაა, რომელშიაც ამოვიკითხე:

მოხატა სა  
ყდარი : ესე მ  
მეფობასა  
დემეტრეს  
ა : იზ : კელი  
თა : მქლ . . .  
მად . .  
აფლმი  
სათა

მოხატა საყ-  
დარი ესე მე  
ფობასა  
დემეტრე-  
სა : იზ : კე-  
ლითა მიქელ  
მად . .  
აფლამი-  
სათა .

წარწერებში, დაჩოქილ ერისთავებთა წინ, მე შევსძელი გარჩევა მხოლოდ შემდეგი სიტყვებისა:

ჯრმალსა აყმო / დათრგუნა .

სხვა წარწერებიდან ამ კედლისა მე ამოვიკითხე ცალკე სიტყვები:

მამასახლისი იყო..... ეკლესია .... კვამლისაგან შესვრილი

ალით გასვრილი .... რომელ ორი არ დააკლოს ....

ფოტოგრაფიულად გადმოღება ფრესკებისა შეუძლებელი იყო, ვინაიდან შესაფერი აპარატები არ ჰქონდა ერმაკოვს და მასთან კიდევ ფრესკები ერთობ გასვრილი იყო, მაგრამ მე შევხვდი ბეჩოში ჩემს ნაცნობ მხატვარს ეისნერს, რომელიც „ნამესტნიკის“ თანაშემწის ვატაცის თანმხლებელთა რიცხვში იყო, ავუხსენი მდებარეობა და მნიშვნელობა ფრესკებისა და ვთხოვე გადმოეღო; ხარჯის ანაზღაურება, რასაკვირველია, დავპირდი; მან გადმოიღო შემოკლებულად სურათები, რომელნიც ეხლა საისტორიო და საეთნოგრაფიო საზოგადოების მუზეუმშია, მაგრამ ეს დასაკმაყოფილებელი არ არის. ამისათვის საჭიროა ცალკე ექსპედიცია; კედლები უნდა გაირეცხოს, გაიწმინდოს და ნამდვილი კოპიო უნდა იქმნას გადმოღებული ფერადებით. მაშინ წარწერების უფრო მეტი და სწორი წაკითხვა შესაძლებელი იქნება.

მეფე დიმიტრი, ამ წარწერაში მოხსენებული, უნდა იყოს ან დიმიტრი პირველი (1125-1154), დავით მეორის აღმაშენებლის შვილი, ან დიმიტრი მეორე თავდადებული (1273-1289). უფრო მისაღებია დიმიტრი პირველი, ვინაიდან დიმიტრი მეორეს სრული 17 წელი არ უმეფია, მე-17 წელი დიმიტრი პირველის მეფობისა იქნება 1142 წელი. აქ მეტი არ იქნება დავსძინო, რომ არც ერთს მკვლევარს ეს ფრესკები და მათი წარწერები აღნუსხული არა აქვს.

სიძველენი მაცხოვრის ეკლესიაში ბევრი არ არის, მაგრამ სამაგიეროდ ზოგიერთი მათგანი, რაც არის, უნიკუმია და ერთობ ძვირფასი და უცხო.

1. პირელი ადგილი ამ ნივთთა შორის უჭირავს დიდ, მძიმე ვერცხლის ჯვარს, რომელიც ცნობილია სვანეთში ლატალის ჯვარად. ამ ჯვარის სიმაღლეა 56,5 სანტ. განი 33 სანტ. ჯვარს ქვემოდ აქვს ღერძი, რომლითაც ის დამაგრებული უნდა ყოფილიყო ხეტარზე. ამ სახით ჯვარს ალბათ ატარებდა ჯვარის მტვირთველი ჯარის წინ ომის დროს და აგრეთვე დიდი პროცესიების დროს დღესასწაულებში. მარჯვნივ და მარცხნივ ჯვარს აქვს ოთხ-ოთხი საკილოვე, რომლებზედაც, უნდა ვიფიქროთ, ჩამოკიდებული იყო სხვა და სხვა ძვირფასი



ჩანჩხურები და მეწკვები, როელნიც მეტს სიდიადეს და ზეიმობას აძლევდენ ჯვარს. ეს ჯვარი ბარტოლომეის და ბაქრამეს არ უნახავთ. სტოიანოვს უნახავს, მაგრამ ღირსება მისი მაინც და მაინც ვერ შეუფასებია (გვ. 389). ჯვარი პირველად დაწვრილებით აღწერა და გამოსცა გრ. უვაროვისამ (გვ. 91-93, ტაბ. XXIV, XXV), მაგრამ მისი ორი დიდი სურათი ვერ არის შესაფერისი და დეტალები სულ არა აქვს. ეს იყო მიზეზი, რომ ბერძნული წარწერა ჯვარისა პროფესორმა ა. ბ. ნიკიტსკიმ სრულად და ჯეროვანად ვერ გაარჩია (იხ. უვაროვისა, გვ. 95). ჩვენმა ექსპედიციამ კი ეს ჯვარი დეტალურად გადმოიღო და ჩვენი ცხრა ფოტოგრაფია სპეციალისტებს საშუალებას მისცემს ეს ძვირფასი ჯვარი დაწვრილებით და საკმაოდ შეისწავლონ. (იხ. ფოტო №№17028-17037).

ჯვარი ბიზანტიური ხელოვნებისაა, უვაროვისა მას მე-11 საუკუნეს მიაწერს, მაგრამ ამის დასამტკიცებელი საბუთები წარმოდგენილი არა აქვს და ეს საკითხი ჯერ კიდევ გამოსარკვევია.

ჩვენ მხოლოდ აქ მოკლედ ჩამოვთვლით იმ მინანქრიან სურათებს და შემკობილობას, რომელთაც ეს ჯვარი შეიცავს.

პირველ გვერდზე, ყოველ მხარეს ჯვარისას, ორნამენტალური გრეხილი აქვს მოვლებული (№17036), სხვა ყველა მედალიონები და შემკობილობანი შესრულებულია ლამაზი ბიზანტიურის მინანქრით. ამათ შორის, შუაში, ორმაგ წრიან სიმრგვალებში წარმოდგენილია მაცხოვარი ჯვარის სახის ნიშნით და სახარებით მარცხენა ხელში; სახარების ყდაზე ჯვარია გამოსახული (იხ. ფოტ. №17029). ამ მედალიონიდან ოთხივე მხრივ მიდის მინანქრიანი ზოლები ჭადრაკულის ორნამენტისა, რომელნიც თავის მხრივ თავდებიან მომცრო მედალიონებით. ამ მედალიონებში მინანქრითვე შესრულებულია მახარობელთა ფიგურები, ხოლო ქემოდ ერთი აკლია (იხ. ფოტ. №17073).

ჯვარის კუთხეებში წარმოდგენილნი არიან მედალიონებით მინანქრითვე შესრულებული ფიგურები; ზემოდ სულ ახალგაზრდა ანგელოზი (ფოტ. №17932), მარცხნივ ღვთის მშობელი (ფოტ. №17031), მარჯვნივ წა იოანე (ფოტ. №17037), ხოლო ქვემოდ, ოთხ კუთხედში, რომელიც კამარით თავდება, არის ღვთის მშობელი ჩჩვილადი (იხ. ფოტ. №17028).

მეორე მხარეც ჯვარისა მდიდრულად არის შემკობილი, ხოლო როგორც შემკობილობანი, ისე მედალიონებიც წმიდანთა შესრულებულნი არიან ოქროზე ზარნაშით, ნაზად და მხატვრულად; აქაც ყოველ მხარეს ჯვარს უვლის ბალახოვანი ლამაზი ორნამენტი; შუაში ჯვარცმის მედალიონია, წინამდგომებითურთ: ღვთის მშობლით და იოანეთი. ამ მედალიონსაც ეკვრის ყოველ მხრივ ზოლები, ბროწეულის ყვავილების ორნამენტით გამშვენიერებულნი, მაგრამ სხვა და სხვა სახისა. ზოლები თავდებიან პატარა მედალიონებით, რომლებშიაც წარმოდგენილნი არიან: ზემოდ წა ეკატერინე; ქვემოდ წა ნიკიტა; მარცხნივ წინასწარმეტყველი ილია; მარჯვნივ წა ნიკოლოზ.

ჯვარის გაფართოებულ ბოლოებში უფრო დიდ მედალიონებში მოქცეულნი არიან: ზემოდ ხარება; ქვემოდ ჯვართ ამაღლება კონსტანტინე და ელენეთი; მარცხნივ წა თეოდორე; მარჯვნივ წა დიმიტრი. ღერძზე, ჯვარის წინა პირზე, არის ბერძნული წარწერა (იხ. ფოტ. №17028), რომელიც მოვიხსენიეთ, პირველად გარჩეული იყო პროფ. ა. ნიკიტსკის მიერ. ჩვენ მოგვყავს ქართული თარგმანი პროფ. გრეგუარის შესწორებით:

„აღვუგე ჯვარი (ესე) ღვთის მშობელსა ძუძუს მაწოვნებელსა საფასითა ბერისა და წინამძღვარისა კოზმანისა (კოზმისა) და იოანე მღვდელ-მონაზონისა. ამინ“.

2. მეორე ძვირფასი ნივთი მაცხოვარიშის ეკლესიისა და ჩვენთვის საყურადღებო არის **ოქროს პანაგია**, კარედი, კათალიკოზის მიქაელისა, 7,5X6 სანტ. შუაში, თაღს ქვეშ წარმოდგენილია წა გიორგი, რომაულის სამხედრო ტანისამოსით; მარჯვენა ხელში შუბი უჭირავს; მარცხენა დადებული აქვს მოგრძო ფარზე, რომელიც შემკობილია ორნამენტით; ზურგს უკან ხმალი მოსჩანს; თმა ხუჭუჭად დაწყობილი ჩამოდის შუა ლოყამდის; თავის წრეს შემოვლებული აქვს მარგალიტის მძივი, რომელსაც მარჯვნივ აკლია, დარჩენილია შვიდი მარცვალი; წარწერა ზემოდ; ორივე მხარეს, ლამაზი ასომთავრულით: წა გ-ი. შუაზე, მარცხნივ, ერთი ძვირფასი ქვა უზის. ვგონებ, ლალი. კარები ოქროსი, ამოღრმავებული ქვემო ნაწილში, ჩვენ მოცილებული ვნახეთ შუა ნაწილიდან და რასაკვირველია, აზრი მოგვივიდა თავში, რომ ამოღრმავებულში რაიმე ფიგურები უნდა ყოფილიყო ჩადგმული, ისე მთელი კარები სწორი იქნებოდა, როგორც ზემო ნაწილნი. გამოკითხვიდან გავიგეთ, რომ პანაგიას ჰქონია წინეთ ნაკერი ქისა, სახატე, რომელშიაც ვიპოვნეთ მთავარ ანგელოზთა ფიგურები, შემდგარი მინის მასისაგან, მინანქრის სახეებით მთავარ ანგელოზთა, ჩავდევით თავიანთ ადგილებში, კარებში. და ამრიგად გადმოვიღეთ ფოტოგრაფიულად (იხ. ფოტოგ. №17025). მთავარ ანგელოზი მარჯვნივ საკმაოდ კარგად არის დაცული, ხოლო მარცხენა მთავარ ანგელოზი დაზარალებულია, ნამეტნავად მისი შემოსილობა. მცხნივარე მხიარული ფერები მინანქრისა. თეთრი, ცისფერი და ყვითელი, აგრეთვე პირის სახე ანგელოზთა და მთელი მორთულობა ცხადათ უჩვენებენ, რომ ეს მინანქრიანი პანაგია ქართული ნაწარმოებია, მე-12 საუკუნისა. ამასვე მოწმობს წარწერაც. მეორე გვერდი პანაგიისა კარებითურთ ოქროთი ნაწნავი საუცხოო ორნამენტით არის ერთიანად მოცული. შუა ნაწილში ჯვარია წარმოდგენილი; ჯვარის ორივე მხარეს ზემოდ, ორი სიტყვა ასომთავრულით კარგად არის დაცული; ქვემოდ დანარჩენი რამოდენიმე წაბლალულია, მაგრამ საერთოდ თავისუფლად იკითხება (იხ. მთელი გვერდი ფოტ. №17027). წარწერა იკითხება:

ქ-ე ა-დე	ქრისტე, ადიდე
ორთავე	ორთავე
შინა ცხრებ	შინა ცხოვრება-
ატა ქ : კზი	თა ქართლისა კათალიკოზი
მქ-ლ	მიქელ .

ეს მიქელ ქართლისა კათალიკოზი ის მიქელია, ჩვენის აზრით, რომელიც კათალიკოსობდა მე-12 საუკუნეში, გიორგი მესამის დროს და თამარის მეფობის დასაწყისში, მაშასადამე, მე-12 საუკუნის მეორე ნახევარში; ამ რიგად ეხლა ცნობილია ერთი კიდევ ზედმეტი ქართული მინანქრის ნაშთი, ჩვენთვის მეტად ძვირფასი. ბარტოლომეის და ბაქრამეს ეს ნივთი არ უნახავთ; გრ. უვაროვისას მინანქრები მთავარ ანგელოზთა არ უნახავს და წა გიორგის ფიგურა კარედის შუა ნაწილისა მას მიუღია მთავარ ანგელოზ მიქელად. მისი გამოცემული სურათიც მარტო ამ ფიგურისა რიგიანი არ არის (იხ. უვაროვისა, გვ. 106, ფიგ. 27). დაზიანებული წარწერა

მას შემდეგ დროის დაჩხაკნულად მიაჩნია. დაზიანება პანაგისა აიხსნება მით, რომ ადგილობრივი მღვდლები მას გულზე ატარებდნენ, მაგალითად გაიოზ ბიმისტარაშვილი და სხვებიც. არც ა. ხახანაშვილს უნახავს მინანქრის მთავარ ანგელოზები, კარედი მას წა გიორგის ხატის ბუდეტ („ლარეც“) მიუჩნევია; წარწერა გადმოუწერია ასე : ქ ად ე ორთავე შინა ცხორებათა შა კათალიკოზე იქლ (იხ. გვ. 39). ჩვენ მივიღეთ ზომა, რომ მინანქრები, რაც დაცულია, შემდეგ კიდევ უფრო არ დაზარალდეს; გატეხილი მარცხენა მთავარ ანგელოზი ცოტა შევაკოწიწეთ და ორივე ადგილში გავამაგრეთ; მღვდელს ვსთხოვეთ ყურადღება მიექცია და ცალკე ფრთხილად შეენახა პანაგია, მაგრამ დარწმუნებული არა ვართ, თუ სხვა ზომები არ იქნა მიღებული, ეს ძვირფასი ნივთი სრულ განადგურებას გადაურჩეს.

**3. ხატი მაცხოვრისა,** ოქროთი დაფერილი ვერცხლისა, ნაჭედი, 28X22 სანტ. შემკობილია 28 ძვირფასი ქვით (იხ. ფოტ. №17033). მაცხოვარი ტახტზე მჯდომარეა მაკურთხეველის მარჯვენით და გაშლილი სახარებით მარცხენა ხელში, რომელზედაც სწერია: მე ვარ ნათელი სოფლისა და სხვ. ნიშნი ჯვარის სახისა ყოფილა შემკობილი სამი ძვირფასი ქვით, ერთი აკლია. ეზო და აშიები ბალახოვანი ორნამენტით არის შემკობილი (იხ. ფოტ. №17033). წარწერა სახელისა: იესო ქიე. ტახტს ქვეშ, მარცხნივ, სწერია: ქამს . ქვემო აშიაზე სწერია:

ქ . მც ხრო : ლტაიო : ადიდნ : მფთ : მფე : გი გ :

დდფლო :

დფლი : რუსდნ : და : ძე : ბგრტ : ამინ .

უქარაგმოდ:

მაცხოვარო ლატალისაო, ადიდენ მეფეთ მეფე გიორგი, დედოფალთ დედოფალი რუსუდან და ძე მათი ბაგრატ, ამინ.

ამ წარწერაში მოხსენებული გიორგი მეფე არის უეჭველად გიორგი მეორე იმერეთისა (1548-1585); მისი პირველი ცოლი იყო რუსუდან, შარვაშიძის ასული, რომლიდანაც ჰყავდა შვილი ბაგრატ. ძნელი სათქმელია მხოლოდ რას ნიშნავს ტახტის ქვეშ დაწერილი: ქა მს. შეიძლება გვეფიქრა, რომ აქ ქორონიკონი იგულისხმება და მს შეცდომით დაწერილი სმის მაგიერ, მაშინ გამოვა ქორონიკონსა 240-სა, რომელიც უდრის 1552 წელს, მაგრამ ეს შეუძლებელია, ვინაიდან რუსუდანი შეირთო გიორგიმ 1563 წელს და ბაგრატ დაიბადა 1565 წელს (Brosset, H. G. II, I, p. 643). ბაგრატ და რუსუდანი ერთი და იმავე წელს გარდაიცვალენ, სახელდობრ 1578 წელს. ამიტომ წარწერა ეკუთვნის 1565-1578 წელს. ჩვენ უკვე ვნახეთ, რომ ერთი მაცხოვრის ხატი მულახის საზოგადოების ჟამუშის ეკლესიისა ეკუთვნის ამ გიორგი მეფეს და რუსუდან დედოფალს შვილით ბაგრატიურთ (იხ. ზემოდ, მე-2 ნომრით აღწერილი ჟამუშის ნივთი). ამ ხატს მიბმული აქვს შემდეგი წარწერა მხედრულად:

ქ : შემოგწირე . მცირე . შესაწირი . ძეწკვი . ესე . მაცხოვარს . ლატალისას . მე . ჩიქუანმან . ქაიხოსრომ . ჩემს . სადღეგრძელოდ . და . მერმე ჩემის . ცოდვილის . სულის . საოხად . და . საცოვნებლად .

ეს ქაიხოსრო ჩიქოვანი იგივე ქაიხოსრო ჩიქოვანი უნდა იყოს, რომელიც თავის ცოლით, ლასხიშვილის ქალით, წარმოდგენილია ფრესკებით ნაყურალეშის ეკლესიის კედელზე, მე-17 საუკუნისა (იხ. ზემოდ ნაყურალეშის ეკლესიის აღწერა).

4. **ხატი ღვთის მშობლისა**, ჩჩვილუდი, ვერცხლისა, ნაჭედი, 21X17,5 სანტ. შემკობილია 23 ძვირფასი ქვით, ქართული ხელობისა, მე-17 საუკუნისა (იხ. ფოტ. № 17034). ღვთის მშობელი წარმოდგენილია წელს ზევით, ძითურთ, რომელიც ერთობ ზორბაა; მარჯვენა ხელით აკურთხებს, მარცხენაში გრაგნილი უჭირავს; სახე ღვთის მშობლისა მოგრძოა; საბურავი თავისა გრეხილიანი გულამდის ჩამოდის; ყელი ღია აქვს; ნიშბი სამ მეოთხედს მთვარის სახეს წარმოადგენს; ეზო და აშიები, აგრეთვე ნიშბი, შემკობილია მხვეველი მცენარის სახეებით იმ რიგად, როგორც ეს ლევან მეორე დადიანის ოქრომჭედლებს ჩვეულებრივ მუდამ ჰქონდათ მე-17 საუკუნეში. ზემოდ წარწერა სახელისა მხედრულით: ქ დედა მღრთისა და ძე მისი. ქვემოდ, აშიაზე მეორე მხედრული წარწერაა:

ქ.: მე : მამუკა : ვაჩნაძემ : გავაჭედინე : ხატი : ესე : ყოვლად : წმიდისა .:

5. **ზარი შუა ტანისა მხედრულის წარწერით**:

ქ. შემოგწირე .: ზარი : ესე .: მაცხოვრისა .: ლატალი-  
სასა .: მე : აბაშიძემან .: ცაგარელ .: მ-ნ .: მამათ .: მთა-  
ვარმ-ნ .: სვიმონ .: სულისა ჩმისა .: საოჯად .:  
სვიმონ ცაგარელი ცნობილი არ არის.

6. **ფარი**, შეღრმავებული, ხისა, ტყავ-გადაკრული შიგნით, ხოლო გარეგან შემკობილი წვრილი სპილენძის ნაჭრებით, 53,5X42 სანტ. (იხ. ფოტ. №17039).

7. რამოდენიმე **ისარი** ურთხლის ხისა, რკინის წვერებით.

8. დ. ბაქრაძეს უნახავს აქ სახარება, რომელსაც ასე აღვიწერს: სახარება ეტრატის, ხუცურად ნაწერი. თავები დალაგებულია საეკლესიო საკითხავების რიგით; სინესტისაგან ის შემპალა (გვ. 82). ეხლა სახარება აღარ მოიპოვება ეკლესიაში.

9. **ხატი მაცხოვრისა**, ოქროთი დაფერილის ვერცხლისა, 14 X11 სანტ. მაცხოვარი წელსზევითია, წარწერით სახელისა ბერძნულად. აშიები შემკობილია მრგვალი წრეებით და ფოლაქოვანი ორნამენტით. ხელობა ტლანქია.

10. **ხატი წა გიორგისა**, ვერცხლისა, ნაჭედი, 18X8 სანტ. წმიდანი წარმოდგენილია სრულის ტანით, შუბით და ფარით ჩვეულებრივად და წარწერით: წ ე გ-ი. ხელობა ტლანქია.

11. სამი წელსზევითი **ხატი ღვთის მშობლისა**, ჩჩვილუდი, 14X11, 11X9,5 11,5X9,5 სანტ. ყველა ვერცხლისაა, ნაჭედი, მაგრამ დაბალი და გვიანი ხელობისა.

12. **ხატი მთავარ ანგელოზთა**, ვერცხლისა, მოყვითლული, 15X12 სანტ. ლამაზი ხელობისა; აშიები მოძარცული აქვს, გარდა მარჯვენა ნაწილისა; მთავარ ანგელოზი წარმოდგენილია სრულის ტანით, ლაბარუმით და ბურთით.

13. **კონდაკი**, დაწერილი ეტრატის გრაგნილზე, რომლის სიგრძე არის 2 მეტრი და 21 სანტ. ნუსხა ხუცურის ხელით, არა უგვიანეს მე-15-16 საუკუნისა.

**ვერცხლეულობა მაცხოვარიშის ეკლესიისა.** მაცხოვარიშის ეკლესიას დიდ ძალი ვერცხლეულობა მოეპოვება, რომელიც ინახება კომპში. მოგვყავს აქ მათი აღნუსხვა და წარწერანი:

14. **სურა**, ვერცხლისა, ანუ უკეთ ვსთქვათ, ნახევარი სურისა, რომელსაც იხსენიებს ს. სტოიანოვი (გვ. 390), ყველაზე უფრო საყურადღებოა თავის სილამაზით (იხ. ფოტ. №17041), მისი სიმაღლე 35,5 სანტ. დიამეტრი ფართო ნაწილში – 29 სანტ. ყელი საკმაოდ ვიწროა; ძირი არა აქვს მაინც ფართო და შესდგება ხუთი ზოლისაგან: მუცელი ფართოა, ზემოდ თანთადან ვიწროვდება და მთელი ტანით დაყოფილია მსხალის მსგავს ფიგურებით და შემკობილია ლამაზად ფურცლოვანის ორნამენტით. ეს ყოფილა საკუთრება ორი კაცისა და რაკი გაყოფაზე სხვაფრივ ვერ შეთანხმებულან, გაუჭრიათ შუაში და ეხლა დაცულია მხოლოდ ნახევარი; ქვემოდ ფსკერზე სურას ჰქონია მხედრული წარწერა, რომლის ნახევარი იკითხება ასე:

ქ : ში ღთაებ . . . და ჩემმან .: ძმის წულმან კაციამ .: და .:  
მისმან .: ძმებმა . შემოგწირეთ სურა . . .

წარწერა მე-17 საუკუნის უნდა იყოს ხელის მიხედვით, ხოლო თვით სურა, ჩვენის აზრით, უფრო ძველია, ქართული ხელობისა. კაცია, წარწერაში მოხსენებული, შეიძლება იყოს კაცია ჩიქოვანი, გიორგი ლიპარტიანის შვილი, რომელიც დადიანად გახდა.

15. დიდი ბარქაში ვერცხლისა, რომლის დიამეტრი უდრის 34 სანტიმეტრს. ძირი მისი გარედან შემკობილია მხედრულის წარწერით:

ქ : ში : საშინელო : მაცხოვარო : წალენჯიხისაო : შე-  
მოგწირეთ : ბარქაში .: ესე .: ჩვენ .: დადიანმან .: პატ-  
რონმან : ლევან : ამ .: სოფლისა : ჩვენდა : სადღეგრძე-  
ლოდ : და : გასამარჯვებლად : მაგ : საუკუნოს : სულის :  
სახსრად : და : საოხად : ლევან .

საუბარია, რასაკვირველია, ლევან მეორე დადიანზე (1657 წ. ).

შუაში უწერია: ლევან. ეს წარწერა სრულიად იმ რიგად არის ამოჭრილი, როგორც ლევანი ხელს აწერდა ხელჩართულად მის მიერ გაცემულს სიგელებზე (იხ. ფოტ. წარწერისა, №17042). როგორ მოხდა იგი, წალენჯიხის ბარქაში, ლატალის საზოგადოების მაცხოვარიშის ეკლესიაში, არავინ უწყის.

16. **თასი** ვერცხლისა, რომლის დიამეტრი არის 27 სანტ. და რომელზედაც გამეორებულია წინა ბარქაშის წარწერა სრულად, ლევანის ხელის მოწერითურთ (იხ. ფოტ. №17043).

17. **თასი** ვერცხლისა, რომლის დიამეტრი არის 25 სანტ. მხედრულის წარწერით:

ქ: ეს : თასი : ბაკა : ჩიქუ(ა)ნის : არის .

ბაკა ჩიქოვანი უნდა იყოს გიორგი ლიპარტიანის შვილი, რომელიც ცნობილია მე-18 საუკ. დასაწყისში (Bros. H. G. II, 1, p. 648).

18. თასი ვერცხლისა, დიამეტრით 23 სანტ. მხედრულის წარწერით:

ქ : ჩიქუანის : ქალი : თეთრუასი : -

19. ოთხი, ვერცხლის თასი, რომელთა დიამეტრი უდრი 17,5; 18; 19 და 20 სანტ. უწარწერონი.

20. ვერცხლის ჯამი, 17,5 სანტ. დიამეტრით, მხედრულის წარწერით:

ქ : ციცისა .

21. ასეთივე ჯამი, 14 სანტ. დიამეტრით, უწარწეროდ.

22. ასეთივე ჯამი ვერცხლისა, 15 სანტ. დიამეტრით და წარწერით (იხ. ფოტ. № 17043):

ქ : შენ : სამებით : ქებულო : და : ერთ არსებით :  
თაყუანის : ცემულო : მაცხოვარო : ლატანიასო sic :  
ჩვენ : ცვა : მფარავთა : თქვენთა : მონდობილმან :  
მეფეთ : მეფემ : ალექსანდრემ : შემოგწირეს : ჯა-  
მი : ესე : ჩვენათ . სადღეგრძელოთ და გასამრჯუებ-  
ლათ : და ცოდვათ : ჩვენთა : შესანდობლათ : ამინ .

აქ მოხსენებული მეფე ალექსანდრე უნდა იყოს იმერეთის მეფე ან ალექსანდრე მესამე (1661 წ. ), ან ალექსანდრე მეოთხე (1695 წ.). თუმცა შესაძლოა აქ ის კახეთის მეფე ალექსანდრე იგულისხმებოდეს, რომელმაც ასე მრავალი ზარები შესწირა სვანეთის ეკლესიებს.

23. ასეთივე ვერცხლის ჯამი, უწარწერო.

24. ასეთივე ჯამი ვერცხლისა, ხელჩართული მხედრულის წარწერით: ლევან. ეჭვს გარეშე, ეს ლევან მეორე დადიანია, ვინაიდან მისი ხელის მოწერა იმ რიგად არის, როგორც წინა ჭურჭლებზე.

25. ასეთივე ჯამი ვერცხლისა, 15 სანტ. დიამეტრით, უწარწერო.

26. ჯამი ვერცხლისა, 14,5 სანტ. დიამეტრით და მხედრული წარწერით:

ქ . მნადორა (sic) ჯწლიძის ქლისა.

27. ჯამი ვერცხლისა, 16 სანტ. დიამეტრით და მხედრული წარწერით:

ქ : გულუანის : ქალის : ხვარამზესი : .

აქ იგულისხმება გელოვანის ქალი.

28. **ჯამი** ვერცხლისა, 16 სანტ. დიამეტრით; შიგნით, ფსკერზე უზის ძვირფასი ქვა ლალი და ფურცლოვანი ორნამენტი (იხ. ფოტ. №17044). აქვს მხედრული წარწერა:

ქ. ეკა : ყოვლად :: დიდებულო :: მაცხოვარო : ლატა-

ლისაო : შემოგწირე :: მც(ი)რე : და . კნინი : თასი ::

ესე :: ჩვენ ჩიქუანმან : ლიპარტიანმან :: ბატონმან :: გიორგიმ :: ჩვენას ::

სადღეგრძელოდ :: და : ჩემის ::

ცოდვილის :: სულის : საოხად :: და :: საცხოვრებლად ::

ამ წარწერაში იგულისხმება გიორგი პირველი, ლიპარტიანი, კაცია ჩიქოვანის შვილი, რომელიც სამეგრელოს მმართველი გახდა 1681 წელს, (H.G. II, 1, P. 648). ფსკერზე კიდევ აწერია: „ქ. ესე“.

29. ორი ვერცხლის **ჯამი**, 14,5 სანტ. დიამეტრით თითო, უწარწერო.

30. ვერცხლის **ჯამი**, 12 სანტ. დიამეტრით; ამას ფსკერზე აქვს შემკობილებანი მსგავსად შუბების წვერებისა (იხ. ფოტ. № 17043).

31. ვერცხლის ღრმა **ჯამ-ძაბრი**, 9 სანტიმ. დიამეტრით, ძირი დახვრეტილი ძაბრს წარმოადგენს, მხედრული წარწერით:

ეს ძაბრი სეხნია მუსელიანის არის.

32. **კათხა** ვერცხლისა 7,5 სანტ. დიამეტრით.

33. არაყის **კათხა** პატარა, ვერცხლისა, სვანურად კუანჩხუ, სახელურით, 13,5X16,5 სანტ. (იხ. ფოტ. № 17043, მარჯვნივ).

34. ვერცხლის **დოქი**, (№17044), წარწერით ფსკერზე (იხ. №17040):

ქ. ლიპარტიანი :: გიორგი .

აქ საუბარია გიორგი ლიპარტიანზე, მე-17 საუკუნისა, რომელიც თავის მამა კაცია ჩიქოვანის შემდეგ გახდა პატრონი სამეგრელოსი 1681 წელს და რომელიც მოხსენებული იყო ზემოდ №28 წარწერაში.

35. ზემო ნაწილი ვერცხლის **დოქისა**, მოოქრული სპარსულის რიგისა.

36. **ბარძიმი**, დიდი ვერცხლისა, შემკობილია ორნამენტებით (იხ. ფოტ. №17043).

37. **აზარფეშა**, დიდი ვერცხლისა, შემკობილი ორნამენტებით (იხ. ფოტ. №17043) და მხედრულის წარწერით:

ქ ეკა :: შენ . პატიოსანო :: ჩვენო :: მცველო :: და მფარ-

ველო :: მაცხოვარო : ლატალისა :: შემოგწირეთ :: ჩვენ

ლექხუმის :: ბატონმა :: ლიპარტიანის :: შვილმა :: ბე-

ჟან ესე :: აზარფეშა :: ჩვენდა :: გასამარჯვებლათ.

ბეჟან ჩვენი წარწერისა არის ბეჟან პირველი, გიორგი ლიპარტიანის შვილი; ის მართლა იყო მფლობელი ლეჩხუმისა, 1715 წელს გახდა დადიანად და გარდაიცვალა 1728 წელს. (H.G. II, 1, P. 648).

38. წყვილი ვერცხლის საყურე, სადა, დიდრონი, ერთი ერთმანეთში გაყრილი, რომლის მსგავსი ხშირად მოიპოვება ხოლმე ოსეთის ძველ სასაფლაოებში (იხ. ფოტ. № 17045).

39. ორი თათრული ვერცხლის ფული (იხ. იქვე №17045).

40. სადაფი, ფეხსაცმელის მსგავსი (იხ. იქვე №17045).

41. თოფის წამლის ქილები, ანუ მასრები, ორნამენტით შემკობილნი, ვერცხლისა, ძეწკვებით (იხ.ფოტ. №17038).

42. 1864 წელს აქ დაცული ყოფილა კიდევ ვერცხლის ლახტი, შემოწირული ბეჟან რობაქიძის მიერ; ამის შესახებ მღვდელ-მონაზონი ბაქრაძე ასე მოგვითხრობს თავის აღწერილობაში; ამასვე ეკლესიაშიდ (მაცხოვარიშის) არის ლახტი ვერცხლისა ბეჟან რობაქიძისა, რომელასაც აწერია ესრეთ:

თვალად და ტანად ლამაზო, გულად აღმასო რკინაო,  
რაზმის შემტევებელო, ფიცხლავ მიმსვლელო წინაო,  
შეკაზმულ კაცს იჭირავ, ცხენის ფეხს გედვეს წინაო,  
და ნეტარ თქუწნ ლაშკარს წაბრძანდეო, ვინც დაგიხვდებათ  
წინაო!

მეორე ეკლესია მაცხოვარიშის სოფლისა არის მთავარ ანგელოზთა ეკლესია, აშენებული განცალკევებულ მალლობზე, მაცხოვარიშის ქვემოდ, თითქმის პირდაპირ წა იონას ეკლესიისა. ეს ისეთივე გეგმისაა და იმავე მასალიდან აშენებული, როგორც იონას ეკლესია და მაცხოვრისა, მაგრამ თვალსაჩინო განსხვავებაც არის; ამის საკურთხეველი გამოდის გარეთ მრავალ-წახნაგოვანად, და მასთან ეკვტერი ნაწილობრივ ჩანგრეულია; შესავალი აქვს სამხრეთით და დასავლეთით; ფანჯრები: ორი სამხრეთით და თითო აღმოსავლეთით და დასავლეთით; მას შერჩენილი აქვს ძველი კანკელი, სამი კამარით და საკმაოდ კარგად შენახულის ფრესკებით; ფრესკებით მოცულია აგრეთვე ყველა კედლები შიგნით ეკლესიისა, მაგრამ ძალზე გამურულნი კვამლისაგან. საკურთხეველის კონქში წარმოდგენილია მაცხოვარი მთავარ ანგელოზებითურთ; ქვემოდ, საკურთხეველის კედელზე ეკლესიის მამებია, გრაგნილებით ხელთა: წა სტეფანე, წა კირილე, წა ნიკოლოზ, ინ ოქროპირი, წა ბასილი, წა ეპიფანე, წა სფირიდონ, წა ფილიპე.

ჩრდილოეთის კედელზე: წა დიმიტრი და წა თე.

დასავლეთის კედელზე: წა ეკატერინე, წა ბარბარე, იერუსალიმში შესვლა, სული წმიდის მოფენა, ჯვარცმა და სხვა.

საკურთხეველის წინ ორი დიდი ხის ჯვარია, მაგრამ სულ გაშიშვლებული; ფირფიტები მოუძარცვავთ. კანკელზე მოძარცული ხატის ფიცრები მრავალია. ერთ კუთხეში ჩვენ ვიპოვნეთ რკინის ლახტი ექვს-ფრთიანი.



## სოფელი ლაჰილი.

ამ სოფლის სახეები იხ. ფოტგრაფიებზე №17444-17446, ხოლო გუნდი აქ მცხოვრებ სვანებისა №17527.

ამ სოფელში სულ პატარა ეკლესია არის, ქვისა, წმიდის გიორგის სახელობისა. შესავალი ერთი აქვს, დასავლეთიდან. ამ დასავლეთის მხრით მიშენებული აქვს პატარა ხის ოთახი, ეკვტერის მსგავსად. კანკელი ძველია, ქვისა, სამის კამარით და ერთის შესავალით. ფანჯარა თითო: აღმოსავლეთით, დასავლეთით და სამხრეთით. ეკლესიაში დაგროვილია ხატები და ჯვრები სამი დანგრეული და გაუქმებული ეკლესიიდან; ამათ შორის ერთი ეკლესია ყოფილა მაცხოვრისა და მეორე ღვთის მშობლისა; ესენი თვით სოფელშია და ერთი მთავარ ანგელოზთა ნასოფლარ მუჰერში (მუჰერი), მაღალ მთაზე, ლაჰილის ზემოდ. ეკლესიაში ინახება:

1. ჯვარი დიდი, კანკელის წინ დამყარებული, შეძერწილი ოქროთი დაფერილის ფირფიტებით, რომელზედაც ბევრი მედალიონებია წმიდათა სახეებისა, ღვთის მშობლისა, მთავრ ანგელოზთა და სხვათა და შემკობილია წერტილოვანი ორნამენტით (იხ. ფოტ. №17050). მე-17-18 საუკ. უნდა იყოს.

2. ორი სრულიად ერთგვარი ჯვარი, კანკელის წინ დასადგმელი, ერთი 89X 51 სანტ. მეორე 81X54 სანტ. ორივე შეძერწილია მოოქრული ვერცხლის ფირფიტებით და შემკობილია მრგვალი მედალიონებით წმიდათა, ღვთის მშობლისა ძითურთ და სხვათა; ხელობა ისეთია, როგორც წინა ჯვარის (იხ. ფოტ. №№17055-17056).

3. ჯვარი გამოსასვენებელი, ოქროთი დაფერილი ვერცხლისა, მაგრამ ეხლა გატეხილია და შეკრული იმ ადგილას, სადაც ჯვარცმა შუაში გამოხატული; მარცხენა ფრთაზე ღვთის მშობელი წარწერით: დ-და ღ-თისა, და მარჯვენა ფრთაზე: წ-მ ი-ნე მ-ბლი (მახარობელი); ზემოდ მიქელ მთავარ ანგელოზი: მ-ქლ მ-თ. ქვემოდ წ-მ გ-ი, ბურთი ანუ ვაშლი, რომელზედაც ჯვარია დამყარებული, შემკობილია რომბებით და ფოლაქოვანი ორნამენტით (იხ. ფოტ. №17053). მეორე გვერდზე ლამაზი ხლართულების ორნამენტია, სადა მედალიონებით (იხ. ფოტ. №17054). ხეტარზე, რომელიც ვერცხლითაა შემოსილი, სწერია ასომთავრულით:

ქ : მცხვარო ლა-ლ-სო აშენე : ჳევი : მაშნებლნი და  
შმმწარველნი : რომელთა შამკეს : ტარი : წადაი : შეი  
(?) : და : გიჳსენ : განსცდელოთგნ :. მოიჳ-და : ტაიბლის :  
ხკანისასა .

უქარაგმოდ:

მაცხოვარო ლაჰილისაო, აშენე ჳევი, მაშნებლნი და შემომწირველნი, რომელთა შეამკეს ტარი წმიდა შენი და გვიჳსენ განსაცდელოთაგან. მოიჳედა ტაიბლის (ანუ ტაიბულის) ხკანისასა.

ჯვარი მე-15 საუკ. უნდა იყოს.

4. ჯვარი ხისა, 54X34 სანტ. შეპერწილი ვერცხლის ფირფიტებით; ტლანქი ხელობისა, სანახევროდ მოძარცულია.

5. ხატი წა დიმიტრისა, ოქროთი დაფერილი ვერცხლისა, ნაჭედი, 27X19 სანტ. წარწერით „დროზნიცებში“: წ-დ დ-ტრი. წმიდანი წარმოდგენილია სრულის ტანით, რომაულ ტანისამოსით, გრძელის მოსასხამით; მარჯვენა ხელში შუბი აქვს, მარცხენა დაუდვია მოგრძო, ლამაზად მოჩუქურთმებულ ფარზე. ეზო და აშიები ბალახოვანი ორნამენტით არის შემკობილი და სადა მრგვალი მედალიონებით. ქვემოდ ცოტა დაზიანებულია.

ორიგინალური მხარე ამ ხატისა არის თავი წმიდა დიმიტრისა, რომელიც ჩვენ პირველად გვხვდება საქართველოში. ეს თავი ბროლისა არის, ბერძნულ-რომაულის რიგისა, და ერთ-ერთი მათი ღვთაების თავის გამოსახულებას უნდა წარმოადგენდეს. აქ კი ეს თავი ხელოვნურად და ოსტატურად ჩასმულია ნიმბში და ისე გაერთიანებულია ყელთან, რომ ადვილად ვერ შეამჩნევთ, რომ ეს ხატთან ერთად მთელს ერთ ქმნილებას არ წარმოადგენს. პირის სახე ამისი მრგვალია, თვალები დიდი, თმა ტალღოვანი, გაყოფილი შუაში. ეს განცალკევებული თავი არაფრით შეერთებული ან დამაგრებული არ არის ხატის ნაწილთან, ასე რომ ადვილად შეგიძლიათ გამოიღოთ და შემდეგ ჩასვით თავის ადგილზე (იხ. ფოტ. №17049). ხატი უნდა ეკუთვნოდეს მე-14 საუკ.

6. ხატი მთავარ ანგელოზის გაბრიელისა, ოქროსი, ნაჭედი, 30X23 სანტ. მთავარ ანგელოზი წარმოდგენილია სრულის ტანით, რომაული საომარი ტანისამოსით, მაგრამ ფრთებით; მარჯვენა ხელში უკავია ამოწვდილი ხმალი; მარცხენა ხელი დაზიანებულია, მაგრამ ეტყობა, ის ხმლის ქარქაშზე ედვა; წრე თავის შემკობილია ექვსი ძვირფასი ქვით; სხვა შვიდ ძვირფას ქვათა შორის, რომელნიც ამ ხატზე მოიპოვება, ორი ბეჭდის თვალია (კამეი), ერთი ჯვრებით არის შემკობილი და ერთიც ქვემოდ მუსულმანურის წარწერით. ზემო და ქვემო აშიები შემკობილი ყოფილა ბროწეულის ყვავილების ორნამენტებით, მაგრამ ქვემო აშია მოშლილია, და ფირფიტების ქვემოდ ცვილის სარჩული მოსჩანს. ეზო ხატისა და მარჯვენა აშიები ბალახოვანის ორნამენტებით არის შემკობილი. ფრთების ზემოდ, ორივე მხარეს, არის წარწერა სახელისა: წ-დ მთ-ვრნგლზი (იხ. ფოტ. №17047); ზურგი ხატისა ოქროთი დაფერილი ვერცხლისაა, შემკობილი ლამაზი ხლართულებით კუთხეებში, ხოლო შუაში, ჯვარის გამოსახულების ირგვლივ, წარწერა დიდრონის ასომთავრულით (იხ. ფოტ. №17048).

ქ წო :: მთვრნ

გელოზო ::

მზხერ-სო :: ჯელთვ

ქმარო :: ადიდენ :: მე

ფენი :: ბაგრტონიანნი ; დადიანი :: და

დიდებზლნი :: და ერ

თობლი :: საქრთელო :: და :: ერთობლნი :: სან

ნი და ჯევი :: ლატალისა :: და ალაშენე :: მა

შენებელი (sic) :: შენი :: სოფელი :: ლაილისა ::

და : ყვლნი :: მადიდებელნი ::

შენნი :. ამნ.:  
მე :. მამსახლისსა :. ც  
ოდვლსა :. და დეკნ  
ოზა :. აბრამს :. შეკნ  
დეკნ :. ღნ :. :

წმიდაო მთავარ ან-  
გელოზო  
მუხერისაო, ჳელთ-  
უქმარო, ადიდენ მე-  
ფენი ბაგრატონიანნი, დადიანი და  
დიდებულნი და ერ-  
თობილი საქართველო და ერთობილნი სან-  
ნი და ჳევი ლატალისა და აღაშენე მა-  
შენებელი შენი სოფელი ლაილისა  
და ყოველნი მადიდებელნი  
შენნი, ამინ.  
მე მამსახლისსა ცოდ-  
ვილსა და დეკანო-  
ზ(ს)ა აბრამს შემინ-  
დეკინ ღმერთმან.

ხატი უნდა ეკუთვნოდეს მე-13-14 საუკუნეს. დ. ბაქრაძე მას აკუთვნებს მე-10-11 საუკუნეს (გვ. 86087). საკვირველია, რომ სხვა წარწერებს და ნივთებს ამ ეკლესიისა ის სრულიად არ ეხება; უვაროვისას და ა. ხახანაშვილს ეს ეკლესია არ უნახავთ სრულიად.

7. **ხატი წა ანასი**, ოქროთი დაფერილი ვერცხლისა. ნაჭედი, 53X40 სანტ. წმიდანი წარმოდგენილია სრულის ტანით, მარჯვენა ხელში ჳვარი უჭირავს; მარცხენა, ვედრების სახით, გულზე აქვს გაშლილი; თავის წრე დიდია; მის აქეთ-იქით წარწერა სახელისა: წ-დ ა-ნა. არე ხატისა ვენახის ყლორტების მსგავსად არის შემკობილი; აშიები რომბ-ლურსმულია, ლამაზი, მრგვალი მედალიონებით წმიდათა; წარწერა სახელებისა ყველას აქვს; ჳემოდ მაცხოვარია და მთავარ ანგელოზნი; აქეთ-იქით: პეტრე და პავლე. ქვემოდ: ქა ბასილი, წა კირილე და წა კვირიკე (იხ. №17046). ხელობა საკმაოდ კარგია, მე-15-16 საუკუნისა.

8. **ხატი მაცხოვრისა**, ოქროთი დაფერილი ვერცხლისა, 21X17 სანტ. მაცხოვარი ტახტოსანია, ჩვეულებრივის სახით; წარწერა სახელისა ქართულ-ბერძნული, შერეული ასოებით. აშია ჳადრაკული. რომბებით, ორ-ფოლაქოვან წრეს შუა, ლამაზი, მე-16-17 საუკუნის უნდა იყოს (იხ. ფოტ. 17051).

9. **ხატი მიქელ მთავარ ანგელოზისა**, ვერცხლისა, ნაჭედი, 19X16 სანტ. მთავარ ანგელოზი წარმოდგენილია სრულის ტანით, ბიზანტიურ სამეფო ტანისამოსში, ლაბარუმით მარჯვენა ხელში. მარცხენა მხარე მოშლილია (იხ. №17951). აშიები რომბ-ლურსმულია. მე-17 საუკუნის უნდა იყოს. ქვემოდ, ძლივს შესამჩნევი წარწერა აქვს:

წო მქ  
შმწლ  
ქუჩმ  
ოი ოქრო  
მქდ

წმიდაო მიქელ,  
შემიწყალე  
ქუჩ-  
მოი ოქრო-  
მქედ(ელი).

10. **ხატი ჯვარცმისა**, ვერცხლისა, ნაჭედი, 16,5X13 სანტ. დაზიანებულია ნამეტნავად ჯვარცმის ფიგურა; წინამდგომნი უკეთ არიან დაცულნი; აშია ფოლაქოვანია; ხელობა ერთობ ტლანქია, მე-18-19 საუკუნისა (იხ. №17052).

11. **პატარა ხატი ღვთის მშობლისა**, ჩჩვილედი, 12X10 სანტ. ყოფილა წამლით დახატული; მხატვრობა სულ მოშლილია. ღვთის მშობელი წელსზევითი ყოფილა ძითურთ. აშიეზი ლამაზი ხელობის არის; მარჯვენა ნაწილი მოძარცულია; მაცხოვრის სახე კიდევ მოსჩანს (№17052).

12. **ხატი ღვთის მშობლისა**, ვერცხლისა, ნაჭედი, 33X17 სანტ. ქვემოდ აშიაზე წა გიორგია და წა თეოდორე; ტლანქი ხელობისა არის.

13. რამდენიმე **ბეჭედი** სხვა და სხვა სახისა, ერთ მათგანზე მხედრულად აწერია: „მათე“.

14. **სამაჯური**, მწვანე მინისა, რომელ გვარიც იპოება ხშირად ძველ სასაფლაოებში; ალბათ იქიდან არის ამოღებული.

15. **სამაჯური სპილენძისა**, აგრეთვე ძველი სასაფლაოდან უნდა იყოს ამოღებული.

16. **დოქი**, ჭურის ანუ ქვევრის მსგავსი, სპილენძისა, ლამაზად შემკობილი გრავიურით, აღმოსავლური ხლართულებით. ვიპოვნეთ ნაგავში, კუთხეში მიგდებული. დიდათ გაჭუჭყიანებული და გასვრილი; რაც შეგვეძლო, გავსწმინდეთ და ეს სურათები გადმოვიღეთ (იხ. ფოტ. №№17057 -117058).

17. **სახარება**, უცნობი ლიტერატურაში, ეტრატზე დაწერილი ნუსხა ხუცურით, 25X17 სანტ. ხის ტყავ-გადაკრულ ყდაში, რომლის ზემოდ ოქროთი დაფერილი ვერცხლის ფურცელია ზედ ნაჭედი ფიგურებით. პირველ გვერდზე წარმოდგენილია ჯვარცმა, წინამდგომებითურთ, ღვთის მშობლით და იოანეთი. ფირფიტა საზოგადოთ დაბალი ხელობის არის და მასთან დაზიანებული; პირის სახე ჯვარცმულისა და ღვთის მშობლისა მოშლილია; ზემოდ და ქვემოდ ჯვარცმის კომპოზიციისა ეხლა დარჩენილია ორ-ორი მედალიონი კუთხეში; შუა მედალიონები აღარ არის. ზემოდ ყოფილა ვედრება, მაგრამ მაცხოვარი შუაში აღარ დარჩენილა; შენახულია ღვთის მშობელი და იოანე; ქვემოდ მახარობლებია; შუა აკლია. ყდა შემკობილია ძვირფასი ქვებით, მაგრამ ბევრი აკლია (იხ. ფოტ. №17020). მეორე გვერდზე ყდისა, შუაში, ღვთის მშობელია ჩჩვილედი, წელსზევითი, ბერძნულის

წარწერით სახელისა. ზემოდ აქაც ვედრება ყოფილა, მაგრამ მაცხოვარი არ შენახულა. ქვემოთ იქაც იგივე მახარობლები, მაგრამ შუანა აკლია (იხ. ფოტ. №17021). ეს ყდა მე-15-16 საუკუნის უნდა იყოს.

თვით ტექსტი სახარებისა ნუსხა ხუცურით ნაწერი უფრო ძველია მე-13-14 საუკუნისა. ტექსტი იწყება ევსების წერილით კარპიანესთან: „ევსები კარპიანეს საყვარელსა ძმასა ღისა მრ გითხავ“ (sic). თითოეული სახარების წინ სათვალავია თავებისა; ბოლოში დღიური საკითხავების მაჩვენებელია. სულ ხელნაწერში 23 რვეულია; რვეულში 8 ფურცელი. მარკოზის სახარების ბოლოს, ტექსტის ხელით სწერია:

წ : სხელითა ღისადთა / აღდგომისა ეკლესიასა შა წე  
საფლვს ქსა : მე ცდვლმნ : და უმეცარ / მნ და  
უცბად მჩხრეკლ/მნ : ინე ქსცხიანისა შვი/მნ : ჯლ  
ნაკლულმნ გგლ : ჯლვყვ აღწერად წთა ამთ ოთ/-  
თვთა : და შევსწირე/ სუანეთს : წა მთ ვრა/ნგლზსა :  
მუხერისა : ვინცა და რამნცა კცმ/მნ : და / რდთცა  
სქმითა გამოაჯუას : ჰრისხავსმცა/მამა მე და სლი წმ :  
და /კნსცა ქუჭშე არს/ვრ იკმარებდეთ : მე /და მმა  
ჩი ინე : და დედად / ირინე (?) მოგვკსენენ : რა /  
თ-ქნცა მოგიკსენს ღნ სსფლსა მისსა ან : კუამლისგნ  
შეინახეთ ღამე . .... ნუ ვინ მიუშვებთ .  
ფხტითერისა დეკანოზისა / ჯლითა გამომიგზავნია მსცა  
შნ ღნ . ტილოს შა შემიკრავს : ჩმო ძმაო მიქლ  
შნდა სასუდ რედ დაიმჭირე .:

უქარაგმოდ:

წ. სახელითა ღმრთისადთა აღდგომისა ეკლესიასა შინა, წინაშე საფლავისა ქრისტესსა, მე ცოდვილმან და უცბად მჩხრეკელმან იოანე ქსცხიანისა-შვილმან, ჯელ ნაკლულმან, გრიგოლ ჯელ ვყავ აღწერად წმიდათა ამათ ოთხთავთა და შევსწირე სუანეთს წმიდასა მთავარანგელოზსა მუხერისა. ვინცა და რამანცა კაცმან და რადთამცა საქმითა გამოაჯუას, ჰრისხავსმცა მამა, მე და სული წმიდად, და კანონსაცა ქუჭშე არს. ვითარ იკმარებდეთ, მე და მამა ჩემი იოანე და დედად ირინე მოგვკსენენ, რათა თქუწნცა მოგიკსენოს ღმერთმან სასუფველსა მისსა, ამინ. კუამლისაგან შეინახეთ, ღამე სანთელსა<sup>1</sup> ნუ ვინ მიუშვებთ.

ფხტითერისა<sup>2</sup> დეკანოზისა ჯელითა გამომიგზავნია, მასცა შეუნდვენ ღმერთმან. ტილოსა შინა შემიკრავს, ჩემო ძმაო მიქელ, შენდა სასუდრედ დაიმჭირე.

მამა ბაქრაძე თავის 1864 წ. აღწერილობაში ამ სახარების შესახებ სწერს: სახარება ოქროთი მოჭედილი, რომელიცა შეუწირავს მუხერის მთავარ ანგელოზის ეკლესიისათვის იონე ქარცხიანის (sic) ძესა გრიგოლს.

ექვს გარეშეა, გადამწერი სახარებისა გრიგოლ სვანი ყოფილა, მუხერის სოფლიდან და სახარება მას გადაუწერია იერუსალიმში, ქრისტეს აღდგომის ეკლესიაში და გამოუგზავნია ფხტითერის დეკანოზის ხელით, ცხადია აგრეთვე სვანის. ყველა ეს იმის მაჩვენებელია, რომ სვანებსაც, როგორც სხვა ქართველებს, ხშირი მიმოსვლა და კავშირი ჰქონიათ იერუსალიმთან და სხვა წმიდა ადგილებთან. ყურადღების ღირსია, რომ ჩვეულება ეკვტერებში ცეცხლის დანთებისა, საიდანაც

კვამლი შედიოდა ეკლესიაში და ფრესკებს და ნივთებს აფუჭებდა, ძველ დროშიც ადათად ჰქონია სვანებს.

არა ტექსტის ხელით მინაწერთა შორის ერთი დაწერილია ხუცურად; ნიშნებს ჩვენ ვუმატებთ, სხვა უცვლელად მოგვყავს:

სახელითა ღმრთა მამისა ძისა და სლისა წი-სადთა მცხრი-სა ლაჰილისათს შემიწირავს ქუჭმო პუშარს ერთი ყანად მე ლაზარე შაურეგიანმან და ჩემმან მეუღლემან მარინა ჩნისა ს-ლისათს შეგწირავს. აწ ჩემითა პირითა ესრე დამისკუნია : ვისცა მაცხოვრისა კლიტე ჰქონდეს, იგი-ცა ყანად მს ჰქონდეს . ლაზარეს აღადგინებასა დღესა ჩემი აღაპი ჰქენით . რააზომცა ლაიჰილს ხუცესი იყოს, ყუჭლამან ჟამი მიწირეთ და სული ჩუენი ღმერთსა და მაცხოვარსა ლაჰილისა შეჰვედრეთ. და მასპინძელი, ვის-ცა კლიტე ჰქონდეს, იგი იყოს. ჩემისა სახელისა ერთი კაცი, ვინცა უხუცესი იყოს, იგიცა დაიხუჭდრეთ . . რო-მერლმანცა კაცმან ჩუენთვს შენდობაჲ ბრძანოთ, ღ-ნ თქუენცა შეგინდოს ან. რომელმანცა კაცმან ესე ესრე გამითაოს, კურთხეულმცა არს იგი კაცი ქეს პირითა, რომელმან ესე შეშალოს, კრულმცა იგი კაცი ქს პირითა.

სხვა წარწერები მხედრულის ხელით არის შესრულებულ და ყველა ეხება საზოგადოებათა ხელშეკრულობას საერთო მოქმედების შესახებ მტერთა წინააღმდეგ. მომყავს ორი წარწერა უცვლელად:

ქ : მაცხოვრისა ლაილისა მთავარანგელოზისა მოხერისა თავსმდებობითა და შოვამდგომლობითა დავსწერეთ და დავდევით დაწერილი ესე ჩენ ერთობილთა ლაილელთა დიდმან და მცირემან ყელამან ერთმანეთისა ნდომითა და დამოწმებითა მტკიცე და უქცეველი ყოვლისა მიზე-ზისაგან უმიზეზი მას ჯამსა უდეს ჩენ შიგან დაშლით ვიყვენით იგი ჰავად მოგ(ვ)იჭდა. მერმე გავიგონეთ და დავამტკიცეთ ეს ერთი ლაჰილისი საქმე ამა პირსა ზედა თავად თუ ერთობილს სვსიმათოდ წამგკიდოს და მერმე

---

1 ეს სიტყვა აზრით მოგვყავს, დედანში წაშლილია.

2 ამაში უნდა იგულისხმებოდეს ეხლანდელი სოფელი ფხოტრერი ეწერის თემისა, სადადემუკელიანო სვანეთში.

ერთს და ანუ ურს ვინგინდა იყოს ანუ ერთი კაცი იყოს და ანუ ქეყანაი იყოს ვინ გინდა ლაჰილელი კაცი იყოს საჰაოდ და სამაჯნდ არ გაუსცეთ იგი კაცი ერთობილმან გურეთად უშელოთ: მისთა პირობითა არ გავეყაროთ არას კაცის გლისი არას ქრთამისათუის არას მიტირვე-ბისათუის არ გავეყაროთ სხუებრ საერთოი ლაჰილისა

საქმესა ზედა რითაც საქმითა იყოს ფათარაკსა შიგან ჩიტრეს გინდა ერთი იყოს გინდა ური იყოს მაშინც მაცხოვარი და მთავარ ანგელოზი არის პირი და პასოხის გამცემი. ვისცა გარეგანისა კაცისა მოკმარებაი გამოვა-ჩინ(ე)თ ანუ იდამალ ანუ ცხადად ანუ მთისა და ანუ ბრისა ანუ რაიცა უკესი ყანაი ედგას ამა კაცსა პატივად დამიც მთავარანგელოზისთვის შემოგიწიროს.

სახელითა ღსაითა მამისა ძისა და სილისა წმიდისაითა თავსდებობითა და შუამდგომელობითა მოხურისა მთავარანგელოზისაითა დავწერეთ დაწერილი ესე მტკიცე და უქცეველი ჩუენ ერთობილთა ლაჰილელთა მას ჟამსა უდეს მოგინდა ერთმანეთისა ნდომითა და დამოწმებითა ვამტკიცეთ ჩუენი საქმე ამა პირსა ზედა ჰვითა კაცთა ჰვად ქნაი მოგეწყინა რაი შინით ხასტაგი წავასხათ და ლაყელ ზე შეიაროს და ცხენისა პარვითა გინდა ხასტაგისა პარვითა მალვით რაიცა კაცისაგან დაეკლების რაი გინდა გამოჩნდეს ჩუენ დავაურვებინოთ. ნახევარი პატრონსა იმას, ნახევარი ერთობილთა ლაჰილელთა იყოს ამა ქვეყნის მპარავი ვინც არ გაცხადოს ერდ ჯარი წაოლოთ . . . ერთობილთა დიდთა და მცირესთა და უმცროსთა დამტკიცებული მოშალოს. . . (შემდეგ წყევლაა, ვინც მოშლის პირობას, იმის წინააღმდეგ).

18. მამა ბაქრაძე თავის აღწერაში შენიშნავს შემდეგს: ეკლესია მაცხოვარისა მუნვე ლაილს გაუქმებულ არს. აქ არს წიგნი მცირე ფურცლით, გეონ მდინარის მოთხრობა, რომელიც მიდის ის მდინარე ინდოეთში.

### სოფელი ლახუმტი.

სოფელი ლახუმტის მდებარეობა, სახე და მწვერვალი უშბას მქრალი გამოსახულება იხ. ფოტ. №№17448-17449. ჯგუფი ამ სოფლის სვანთა: ქალთა, მამაკაცთა და ბავშვთა იხ. ფოტ. №17526. ამ სოფლის ეკლესია მაცხოვრისა ახალია, მაგრამ მასში ინახება საკმაოდ ბევრი ხატი, თუმცა, სამწუხაროდ, გაფუჭებული და გაძარცვული.

1. **ჯვარი** გამოსასვენებელი, მოოქრული ვერცხლისა, ნაჭედი, დამყარებულია ხეტარზე; ხეტარი ვერცხლითაა შეძერწილი, ახლავს ბურთები და ორნამენტი; 39X29 სანტ. ბოლოები ჯვარისა მრგვალია და მათში წმიდათა მედალიონებია მოქცეული, შუაში ჯვარცმაა; ჯვარცმულის ქვეშ ადამის თავი ისეა წარმოდგენილი, როგორც ცოცხალი; წარწერა ჯვარს აქვს ზემოდ შერეული ქართულ-ბერძნული ასოებით. მთელი არე ჯვარისა საცერის მსგავსი ორნამენტითაა შემკობილი. მარჯვნივ და

მარცხნივ მედალიონებში ღვთის მშობელი და იოანე ღვთის მეტყველია; ზემოდ მაცხოვარი: ქვემოდ: წი გ გი. ჯვარს უზის ოთხი ძვირფასი ქვა (იხ. №17064).

ზურგზე ჯვარისა მედალიონებში წარმოდგენილნი არიან: შუაში ღვთის მშობელი, ზემოდ და ქვემოდ მთავარ ანგელოზნი; აქეთ-იქით მახარობელნი; ზევიდან ქვემოდ, მთელს ჯვარზე წარწერა არის დიდრონის ასომთავრულით (იხ. №17065):

ქ ძელ :: ც	ძელო
ხორ	ცხორე-
ბ-სავ ::	ბისავ,
შეუ	შეუნ-
დვნ :	დვენ
ცდვ	ცოდვა
ნ მსნ ::	ნი მისნი
ადს :: კ	ადს კა-
:: ხანს და მს	ხიანს (?) და მის
მუღ	მეუღ-
ლსა	ლესა
ნთლს .	ნათელს.

ძნელი სათქმელია, როგორ უნდა წავიკითხოთ ჯგუფი: „ადს“ : კხანს“, – „ადს კახანს“, თუ „ადამს კახიანს“, თუ სხვა. ჯვარი მე-15-16 საუკუნის უნდა იყოს. ნიშნებად წარწერაში სამი ვერტიკალური წერტილია.

2. **ჯვარი** დიდი, ხისა, კანკელის წინ დასადგმელი, 92X47 სანტ. შექმნილია ვერცხლის ფირფიტებით, რომლებზედაც წარმოდგენილნი არიან წმიდათა ფიგურები: ზემოდ მაცხოვარი ტახტოსანი; ქვემოდ ღვთის მშობელი ჩრვილედ, ბერძნულის წარწერით სახელისა. მას ზემოდ წა გიორგი, სრულის ტანით; ამას ზემოდ: მოციქული; მარცხენა ფრთაზე ღვთის მშობელი ჩრვილედ; მარჯვენაზე მთავარ-ანგელოზი; შუაში: შემკობილი უმბო (იხილეთ №17068 და 12069).

3. **ჯვარი** ხისა, 39X18 სანტ. შექმნილია ვერცხლის ფირფიტებით და მათზე წარმოდგენილ წმიდათა სახეებით (იხ. 17066). ზემოდ არის ჯვარცმა; ქვემო მკლავზე სამ-სამი ფიგურა, მარჯვნივ და მარცხნივ თითო; სახელები არ აწერია; შემკობილობა არეთა რომბ-ლურსმულია და ფოლაქოვანი. მე-16-17 საუკუნის უნდა იყოს.

4. **ხატი ღვთის მშობლისა**, ჩრვილედი, ვერცხლისა, ნაჭედი, 48X37 სანტ. ღვთის მშობელი წარმოდგენილია გამობერვით, ძითურთ, მთელის ტანით; ტანისამოსი ერთობ ხშირად და ღრმად დანაოჭებულია; წარწერა სახელისა „დრობნიცებში“ ბერძნულია და ისიც შეცდომით. არე ხატისა ფურცლოვანის ორნამენტით არის შემკობილი; აშიები რომბ-ლურსმული, წმიდათა მედალიონებით, რომელნიც ასე არიან განაწილებულნი: მარჯვნივ, ზემოდ და ქვემოდ კუთხეებში ვედრებისა ღვთის მშობელი; შუაში, აგრეთვე ზემოდ და ქვემოდ: მთავარ ანგელოზნი; მარცხნივ კუთხეებში, ზემოდ და ქვემოდ წა გიორგი, სრულის ტანით, ხოლო შუაში, მარჯვენა და მარცხენა აშიებზე წ-ა დიმიტრი, სრულის ტანით (იხ. №71062 და 17069); აშიები



უკეთესი ხელობისაა, ვიდრე თვით ხატი, რომელიც მე-16-17 საუკუნეს უნდა ეკუთვნოდეს.

5. **ხატი დიდი, ღვთის მშობლისა**, ჩჩვილედი, 90X62 სანტ. ოქროთი დაფერილი მორთულობით; თვით სახეები წამლით დახატული დაზარალებულია (იხ. №17059). აშიები და ნიშბი თხელი ბასმისაა, შემკობილი მქრთალი გამოსახულობით წმიდათა, მდარეა. წარწერა სახელების ხუცურია, მაგრამ გადმობრუნებული ასოებით. წა პეტრეს სახე: პე, სამჯერ არის გამეორებული. ქვემოდ ეტყობა ნაშთი წარწერისა; მე-18 საუკუნის უნდა იყოს.

6. **ხატი ღვთის მშობლისა**, ჩჩვილედი, 81X51 სანტ. ყოფილა წამლით დახატული, რომელიც სრულიად გამქრალია; მორთულობა ოქროთი დაფერილი ვერცხლისაა, მაგრამ დარჩენილია მხოლოდ ზემო ნაწილი აშიებითურთ (იხ. №17061). ნიშბი ბალახოვანი ორნამენტით არის შემკობილი; აშიები რომბ-ლურსმულია სამი მედალიონით ზემოდ, მაცხოვრისა და მთავარ ანგელოზთა, მდარე ხელობისა, მე-16-17 საუკ. უნდა ეკუთვნოდეს. წარწერა სახელისა ბერძნულია.

7. **ხატი ღვთის მშობლისა**, ყოფილა წამლით დახატული, რომელიც გამქრალია, 26X119 სანტ. მოცულობა ოქროსი ლამაზი ხელობისა, მე-12-13 საუკუნისა (იხ. № 17066). წარწერა სახელისა ბერძნულია; აშიებზე ყოფილა წარმოდგენილი ბევრი წმიდათა ფიგურები, აგრეთვე წამლებიანი; მოსჩანს ნაშთები 11 წმიდანისა, წარწერებით: წა მაკარი, წა ონოფრე, იე დამასკელი, წა თევდორე, წა ჯე (ჯერასიმე); ქვემოდ ყოფილა წარწერა; დაცულია ნახევარი, მარცხენა ნაწილი:

: ქ : წო გე (sic)  
მფალ ექმენ დ

წმიდაო გევედრები (?)  
მფარველ ექმენ დ. . .

8. **ხატი მაცხოვრისა**, 84X59 სანტ. ყოფილა წამლით დახატული, რომელიც ეხლა გამქრალია; მორთულობა ოქროთი დაფერილი ვერცხლისა, ესე იგი დიდი ნიშბი და აშიები, ყველა რომბ-ლურსმული ორნამენტით შემკობილი, დაცულია (იხ. №17060). მე-16-17 საუკ. უნდა იყოს.

9. **ხატი, პატარა, ღვთის მშობლისა**, ჩჩვილედი, ოქროთი დაფერილი ვერცხლისა; წინა პირი ერთობ დაზიანებულია; ზურგზე დაცულია წარწერა (იხ. №17066):

ქ : დედაო : ღთსაო : მე  
ოხ : მექმენ : დღს :  
განკთხვისას  
წე : მი  
სა : შენსა : მამ  
კობსა : ხ-ტსა : შე  
ნსა : სასა : მ-ნსა : შ  
ენსა :

დედაო ღმრთისაო, მე-  
ოხ მექმენ დღეს  
განკითხვისას  
წინაშე მი-  
სა შენისა მამ-  
კობსა ხატისა შე-  
ნისა სასა(ს), მონასა  
შენსა.

საკუთარი სახელი რჩება „სასა“; რომ ამას ქარაგმა ჰქონდეს, შეიძლება და წაგვეკითხა „სასანსა“.

10. ხატი კარედი ღვთის მშობლისა, 38X28 სანტ. ყოფილა წამლით დახატული, რომელიც ეხლა გამქრალია; მოცულობა ოქროსი, კარგი ქართული ხელობისა, მე-12-13 საუკ. ნაწილობრივ დაცულია (იხ. №17070). კარებზე გარედან ყოფილა სურათები მთავარ ანგელოზთა; შიგნით, შუაში, ღვთის მშობელი ჩვილედით; მათი ნიშნები შემკობილია მარგალიტებით და სხვა ძვირფასი ქვებით. კარებზე, შიგნით, ზემოდ ორივეზე მთავარ ანგელოზებია; ქვემოდ: წა ქალწულნი, ჯვრებით ხელთა და გვირგვინებით თავზე.

11. ხატი ღვთის მშობლისა ჩვილედით, 48X36 სანტ. ყოფილა წამლით დახატული, მაგრამ ეხლა გაფუჭებულია; მოცულობა ოქროთი დაწერილი ვერცხლისა, ესე იგი, ნიშნები და მარცხენა აშია საუცხოო ნახელავია, მე-12-13 საუკ. (იხ. №17071). წარწერა ასომთავრულით: დ დი ღ თი. ნიშნები შემკობილია ძვირფასი ქვებით.

12. ხატი ღვთის მშობლისა, ვერცხლისა, ნაჭედი, 20X15 სანტ. ღვთის მშობელი წელსზევითია, ვედრების სახით. წარწერა: დ დ ღ ს. აშიები რომბ-ლურსმულია, ფოლაკოვან წრებში; ხელობა მე-17 საუკ. უნდა ეკუთვნოდეს (იხ. №17063).

13. ხატი წა გიორგისა, ოქროთი დაფერილი ვერცხლისა, 25X19 სანტ. წმიდანი წარმოდგენილია სრულის ტანით, მძიმე, ვაჟკაცის სახით, რომაულ საომარ ტანისამოსით; მარჯვენა ხელში შუბი უჭირავს; მარცხენა ფარზე აქვს დადობილი; წარწერა სახელისა: წ-გ გ-ი. აშიები მოძარცული აქვს (იხ. №17063). მე-16-17 საუკუნის უნდა იყოს.

14. ხატი მიქელ მთავარ ანგელოზისა, ოქროთი დაფერილი ვერცხლისა, 25X17 სანტ. ნაჭედი, თითქმის სულ მოშლილია; დარჩენილია მხოლოდ თავი წარწერით: წი მიქელ, და ნაწილი აშიისა, ლამაზი ხელობისაა.

15. ხატი ღვთის მშობლისა, ყოფილა წამლით დახატული, რომელიც მოშლილია; დაცულია ნიშნი და აშიები მოოქრული ვერცხლისა, ლამაზად შემკობილი; აშიებზე მარჯვნივ და მარცხნივ ორი წმიდა მხედარი არის, სრულის ტანით, ფარით და შუბებით (იხ. №17068).

16. ხატი ღვთის მშობლისა, წა ეკატერინესი და წა ბარბარესი, 26X21 სანტ. ყოფილა წამლით დახატული, რომელიც ეხლა სრულიად მოშლილია; დარჩენილია მოცულობა ზემო ნაწილისა ნიშნებით, ოქროთი დაფერილის ვერცხლისა. აშიები რომბ-ლურსმულია. მარჯვენა აშიაზე თავია რომელიღაც წმიდანისა; წარწერები სახელებისა ასომთავრულია (იხ. №17066).

17. ხატი, პატარა, ღვთის მშობლისა, ჩვილედით, 10,5X9 სანტ. ოქროთი დაფერილი ვერცხლისა; ღვთის მშობელი წარმოდგენილია სრულის ტანით და

წარწერით: დ.დ. ლ.დ. აშიები სამის კედრით აღარა აქვს; დარჩენილია მხოლოდ მარჯვნივ, ტალღისებური ზოლით (იხ. №17066).

18. ხატი მაცხოვრისა, ტახტოსანი, ვერცხლისა, 22X18 სანტ. ნაჭედი, ბერძნულის წარწერით სახელისა; ტლანქი ხელობისაა (იხ. №17068).

19. ხატი მაცხოვრისა, 27X21 სანტ. ყოფილა წამლით დახატული, რომელიც ეხლა სულ გამქრალია; დარჩენილია ზემო ნაწილი მირთულობისა, ნიმბი და აშიები, ყველა შემკობილი ლამაზად რომბ-ლურსმული ორნამენტით; ქვემო აშია აკლია; აშიებზე დარჩენილია სამი მედალიონი წმიდათა, უწარწეროდ (იხ. №17071).

20. ნაწილი ჩარჩოსი რომელიც ხატისა ზედ გამოსახული მთავარ ანგელოზთა ფიგურებით, ვერცხლისა, 31X25 სანტ.

21. ჯვარი სატარებელი, თავის ხეტარით, რომელიც შემერწილია ვერცხლით და თავდება ვაშლით ანუ ბურთით, რომელზედაც დამყარებულია ჯვარი. შუაში ჯვარისა არის უმბო; სამ მხარეს ჯვარისა მედალიონებია წმიდათა სახეებით (იხ. № 17070).

22. ორი ჩარდახი ხატისა, ოთხი ფეხით თითო; ჩარდახები დაშლილია; ფეხები ხისაა, შემერწილი მოჩუქურთმებული ვერცხლით სხვა და სხვა სახისა, 77X46 სანტ. თითო. შუაში: თითოეული ფეხისა, ოთხკუთხედში წარმოდგენილია თითო ფიგურა წმიდანისა: მაცხოვარი, ღვთის მშობელი, წ-ა გიორგი, წ-დ იოვანე და სხვა (იხ. № 17067). ხოლო ბოლოებში ორი მთავარ ანგელოზია: მიქელ, გაბრიელ (იხ. №17069 და 17067).

23. სახარება ეტრატზე, უცნობი, 30X21 სანტ. დაწერილია ნუსხა ხუცურით და წითლურის სათაურებით; თითოეულ გვერდზე 34 სტრიქონია, ერთ სვეტად ნაწერი. ყდა ხისა აქვს, ტყავ გადაკრული. ტექსტი დალაგებულია დღიური საკითხავების რიგზე; იწყება აღდგომიდან. დასაწყისი:

წ-ა და მწის კრკესა აღვსებისა .: სამხრად . სახარებად :  
იოვანეს თავი . პირველითგან იყო სიტყუა და სიტყუა  
იგი იყო ღ-ისა ...

სხვა ადგილას:

აქა დასრულდეს სახარებანი ყ-თა დღეთანი . აწ კ-დ

შ-ბთ : კ-კთა იწყების.

უკეთუ კულა ვინმე გამოიძიებდეს მიზეზსა არცაღა დარჩომილ არს ოთხთ ვსა შ-ა აუწერელი სხრბ-დ რი ანუ ჩომილ არს ოთხთ ვსა შ-ა აუწერელი სხრბ-დ რი ანუ ამ-თ სმრდისოთ სახარებათა შინა არა გამოუკრებელ არს. ანუ შაბათ კვირიაკეთა ანუ თუჭთა.

შემდეგ:

მეთორმეტესა შაბათსა ჯუარ აპყრობითგან სახარებად ლუკასი რიზ. თ-ქა ო-ნ იგავი ესე. მსგავს არს სოფელი ცათაჲ მარცვალსა მდოგვსასა.

შემდეგ:

სახარებანი საცისკრონი.

ბოლოში მინაწერი, ტექსტის ხელით:

ზეშთა უსაზღვრომნ ყდ წნ დდფლმნ ღის მშობელმნ . მეცა / ცდვლი ტიმოთე ღირსმყო აღწერვებად წისა ამის / სხრბისა . მცხვრისა ლახუმტისა სამსახურებლად / შემოსითცა თვთ ჩმითა ჯლითა : აწ ვინცა ჩნსა შდ მწირველნი იყვნეთ. ღისა მცნებისათს ლცვა / ყვთ ჩმთს. და ონ თქნცა მოგანიქენ მადლი ა : / ოდეს ესე დაესრულა ახლად დაწყებლი / ქრონიკონი იყო : ი : ცხრაჲ წელი / წადი გარდასრლ იყო : ქვემოდ : ვაჲ შნ ეტრატო .:

9 ქორონიკონი უდრის 1321 წელს.

სხვათა შორის, ეს არის ერთად ერთი თვალსაჩინო მაგალითი, რომ ხელნაწერი თვით სვანეთშია გადაწერილი; ამ შემთხვევაში სოფელ ლახუმტში, სადაც გადამწერი ტიმოთე ყოფილა მღვდლად.

შემდეგ მოყვანილია ერთი მხედრული მინაწერი მე-14-15 საუკუნისა:

ქ . სახელითა ღთისაითა მამისა ძისა და სულისა წმიდისაითა დავსწერეთ და დავდევით დაწერილი ესე ერთობისა და გაუყრელობისა ჭუნენ(sic) ლახუმდელთა ლაჭიმრაშისა მუსკრთა ერთმანეთისა ნდომითა და დამოწმებითა და უქცეველი რაისა გინდა საქმისა და ჟამისა შემოსრულობისათუის შეუცვალებელი მას ჟამსა ოდეს მოგვინდა ჩენ შიგან გაუყრელობაი და სიმტკიცე ამა პირსა ზედა ვისცა დამჭიროს მისთა პირობისა ჭირთა შეძლებითა გულმართლად უშველოს და საურავი უჯობდეს გულმართლად საურავი მოვიჭირვოთ გინდა ბარსა, გინდა სვანეთს ვისაც დაეჭიროს ვინცა დახუდეს მისითა შეძლებითა გულმართლად ვუშველოთ, არაი უცრუოთ და არაი უღალატოთ არცა მთასა, არცა შინა. ვინც ჭვენ შიგან დამდურდეს გულმართლად საურავი მოვიჭირვოთ. ამისა გათავებისა თავსდებად მომიცემია ნებითა ერთმანერთისა მაცხოვარი ლახუმტისა და მთავარანგელოზთა ნაწილისა. ვინცა ესე დაწერილი შემალოს, შემცაიცვალეების რჯულისაგან ქრისტიანეთასა.

ამა დაწერილსა საქმითა გავათავებთ: + +

(უზის ათი ჯვარი)

24. ლახუმტის ეკლესიის პაპმა, გიორგი ფირცხალაძემ, რომელიც ეხლა ეკლესიის მნათესა წოდებას ატარებს, მაგრამ ძველი პაპის მოვალეობას ასრულებს, მაჩვენა მისი საკუთარი სამი წიგნი. ერთია კონდაკი, ქალაღზე ნაწერი, მოსხო ხუცურით. ხელნაწერის ბოლოს სწერია ტექსტის ხელით:

ღო და უშვოდ მისო მშობელო დამიცევ ორსავე შინა ცხორებასა ფდ ცოდვილი ამ კურთხევანის დამწერი ინასარიძე მღვდელ-მონაზონი ევდემონ და ვინცა შენდობა ბრძანოთ თქვენცა შეგინდოს ღნ .:

შემდეგ მოყვანილია კინკლოსი პასექისა და სულ ბოლოს კალანდა, თქმული ეზრა წინასწარმეტყველისა.

25. მეორე ხელნაწერი პაპისა არის ჟამნი in 16, ეტრატზე ნაწერი, მაგრამ სულ გასვრილი და გაჭვარტლული; თავი და ბოლო აკლია; დაწერილია ნუსხა ხუცურით.

26. მესამე წიგნი ამ პაპისა არის **ქართული გრამატიკა დოდაევისა**, 1833 (?) წელს გამოცემული; ეს ბიბლიოგრაფიულ იშვიათობას შეიცავს და ჩვენი მნათე დიდათ აფასებს და კრძალვით ეპყრობა, იშვიათად თუ ვინმეს აჩვენებს. ეს იმის მაჩვენებელია, რომ სვანეთის პაპები ყოველთვის დიდი მოწადინე იყვნენ ქართული ენის ჯეროვნად შესწავლისა. ჩვენი პაპი მაინცდამაინც კარგად არ უცქერის ახალ მღვდლებს; გვიამბო ჩვენ ანეკდოტი მათზე და წარმოსთქვა სახუმარო ლექსი მათ შესახებ ქართულად.

**თანღები.** ორი კილომეტრის მანძილზე სოფელ ლახუშტიდან, ფრიალო ტყიან მთაზე, **თანღებად** წოდებულზე, ხშირ ტყეში მოიპოება ერთი პატარა ძველი ეკლესია, ქვისაგან აშენებული. ეს ეკლესია გამონაკლისს შეადგენს სვანეთისათვის და დიდათ საყურადღებოა. სვანეთმა სხვა გეგმა ეკლესიისა, გარდა ბაზილიკურისა, უბრალო თუ რთული, არ იცის. აქ კი დასახულია მრგვალი ფორმა ეკლესიისა, მაგრამ არც სულ მრგვალი გამოდის, არც სრული წახნაგოვანი, საზოგადოთ კედლები მრუდეა. ყოველ შემთხვევაში, ამგვარ ეკლესიას უნდა ჰქონდეს გუმბათი, მაგრამ გუმბათის მაგიერად, ის გადახურულია თაღით, ხოლო ეს თაღიც უსწორ-მასწოროა, არც მრგვალია, არც ჯვარის სახისა, როგორც მოსალოდნელი იყო. ფანჯრების მაგიერ აქ მრგვალი სარკმელებია. შესავალი ერთი აქვს დასავლეთით. კანკელი ქვისაა, ერთის კართით.

კედლები შიგნით მოგლესილია და მოცული ფრესკებით. ფრესკები კარგი რიგისაა და ლამაზი. სხვათა შორის კარგად არის დაცული წა გიორგის ფრესკა, ცხენით, რომელიც გმირავს არა ვეშაპს, არამედ გვირგვინოსანს. ეს ჩვეულებრივი იკონოგრაფიული სიუჟეტი, ფრიად ხშირი სვანეთში, აქ გადატანილია კედელზე. ასეთი მოვლენა სხვაგან იშვიათად შეგვხვედრია. კარგად მოსჩანს აგრეთვე ჯვარცმა, სული წმიდის მოფენა და ამაღლება. ეკლესია გაუქმებულია. ხატები აქედან გადატანილია ლახუშტის ეკლესიაში; დარჩენილია აქ მხოლოდ ერთი **პატარა, წა ბასილის ხატი**, ვერცხლისა, მოოქრული, 13,5X9,5 სანტ. დაბალი ხელობისა.

ეკლესია ითვლება მონადირეთა მფარველად; მასში აუარებელი რქებია ჯიხვისა და შველისა და მთელი გროვა ისრებისა, სხვა და სხვა ფორმის და ჯურისა. ასეთი კოლექცია ისრებისა მე სვანეთის ეკლესიაში არ მინახავს. ეკლესია საგანგებოდ გავაზომინეთ ხუროთმოძღვარს ს. კლდიაშვილს, მაგრამ, როგორც მოხსენებული გვექონდა, მან თავის რვეული ამ გეგმათა დაჰკარგა. საჭიროა გაზომვა და სწორი გეგმის გადმოღება ამ ეკლესიისა, ვინაიდან ის ერთი უძველესთაგანი უნდა იყოს სვანეთში. აგრეთვე საჭიროა ფრესკების პირების გადმოღება ფერადებით.

### სოფელი ლამი.

სოფელ ლამში, საწუხაროდ, ჩვენ არ ვყოფილვართ. ბერი ბაქრაძე სწერს: ს. ლამის წმიდის იოანე ნათლის მცემელის ეკლესია(ში), რომელიც 1862 წელს, ოქროსა და

ვერცხლის ხატები განუცარცვიათ, და დღეს აღარა იპოვების რა, მხოლოდ ერთი მცირე ვერცხლის ხატია წმიდის გიორგისა.

დ. ბაქრაძე ყოფილა ამ ეკლესიაში და ის აღნიშნავს სამს ნივთს: 1. მიქელ მთავარ ანგელოზის ხატს, ვერცხლისა, წარწერით (გვ. 87), 2. ვერცხლის აშიას, ხატისაგან მოგლეჯილს, წარწერით (იქვე, გვ. 67), 3. ღვთის მშობლის ხატს, რომელსაც პერანგის (ვერცხლის) ფურცლები მოცილებული ჰქონია და ერთზე წარწერა ყოფილა, რომელიც მას ხელით გადმოუღია (იხ. დამატება, №23). მოგვყავს აქ ორი პირველი წარწერა შეუმოკლებლად, ვინაიდან ჩვენ ზოგიერთ სიტყვას სხვანაირად ვკითხულობთ და გვესმის, ვიდრე ეს ბაქრაძის რუსული თარგმანიდან სჩანს.

მიქელ მთავარ ანგელოზის ხატის წარწერა:

წმიდაო მიქელ, შეიწყალე ივანე  
ჯაყიანი და მეუღლე მისი თაბაი დ მე მისი გიორგი  
შეიწყალე სულით და ჯორცით. ამინ.

დ. ბაქრაძე „გიორგი“-ს მაგიერ „გეშე“-ს კითხულობს.

მეორე წარწერას ჩვენ ვკითხულობთ ასე:

ქრისტე ღვთისა დედაო, მოწყალე ექმენ  
სულსა ჩემ უნდოსა ბერისა დ  
ვლისა მას დიდსა დღესა განკითხვისა.

დ. ბაქრაძეს თარგმანში სიტყვა „ელისა“ გამოშვებული აქვს და სიტყვების მაგიერ: „მას დიდსა“, ის კითხულობს: „დედასა მისსა“.

მესამე წარწერას დ. ბაქრაძე წაუკითხავად სტოვებს. იმ სახით, როგორც ეს გადმოღებულია, სრული მისი წაკითხვა ძნელია, მეტადრე ბოლო მესამე სტრიქონისა და მთელად მეოთხე სტრიქონი; სხვა, ჩვენის აზრით, იკითხება ასე:

წი ვედრებისა ღთის მშობელო, შემწ-  
ე : მეყავ და მიხსენ სა-  
ტანჯველისაგან მე. . .  
.....

## ნაწილი IV

### სადადიშკელიანო ანუ სათავადო სვანეთი

სადადიშკელიანო სვანეთი შეადგენს გაგრძელებას თავისუფალი სვანეთისა, მოქცეულია იმავე ენგურის ხეობაში, ქვემოდ თავისუფალ სვანეთისა, ენგურის შუა წელზე. აქ მთავრობდნ თავადი დადიშკელიანები და ამიტომ დაერქვა სახელი სადადიშკელიანო სვანეთი. ამ ნაწილში სვანეთისა შედიან თემები: ჩუბი-ხევი, ფარი, ეწერი, ცხომარი და ბეჩო. სოფელ ბეჩოს საზოგადო სახე იხ. ფოტ. № 182.

ბეჩოს თემი

ბეჩოს თემში ცხრა სხვა და სხვა სოფელი შედის, მაგრამ მათში ძველი შენახული ეკლესიები თითქმის არაა. თვით ბეჩოში სულ ახალი ეკლესია არის, სწორს ადგილზე, დიდი ეზოთი, როგორც სამეგრელოს ეკლესიები. წინეთ, რასაკვირველია, აქ ყოფილა ძველი ეკლესია, მაგრამ 1830 წელს, როდესაც ოთარ დადიშკელიანს და მის ძმის წულს ქელეშბეგს მაჰმადიანობა მიუღიათ, ხატების ცარცვა დაუწყიათ; ადგილობრივ მაცხოვრებლებს გადარჩენილი ხატები გაუტანიათ და მახლობელ სოფლის დოლის კოშკში დაუმალავთ. დ. ბაქრაძემ და ა. სტოიანოვმა ეს ხატები აქ ნახეს (იხ. ბაქრაძე, გვ. 78, სტოიანოვი, გვ. 368). დოლის კოშკი, სტოიანოვის სიტყვით, ფრიად მაღალი ყოფილა, მაგრამ შემდეგ დანგრეულა და შიგ მოქცეული ხატებიც, რასაკვირველია, ერთობ დაზარალებულა. ბოლო დროს, როგორც ეტყობა, რაც დარჩენილა, ახალ ეკლესიაში გადაუტანიათ და ეხლა იქ ინახება. ამათ შორის ყველაზე უფრო შესანიშნავია და ძვირფასი:

1. **ხატი ღვთის მშობლისა**, ჩჩვილედი, სიმაღლით 1 1/4 არშინი. ღვთის მშობელი მითურთ წარმოდგენილი ყოფილა წელს ზევით, წამლით დახატული, რომელიც ეხლა სულ გამქრალია; დარჩენილია ნაწილი ოქროთი დაფერილი ვერცხლის პერანგისა მდიდრულის მოცულობისა, მაგრამ ისიც ეხლა მოცილებულია თავის ძელს და სამი მეოთხედი, სულ ცოტა რომ ვსთქვათ, მაინც დაუკარგავს თავის ერთხელ ფრიად მდიდრული და ძვირფასი შემკობილებისა, რომელიც შესდგებოდა პატარა მინანქრიანი ხატებისაგან, ასეთივე მედალიონებისაგან, „დროზნიცებისაგან“, ძვირფასი ქვებისაგან და წმიდათა ნაწილებისაგან.

ეს ყოფილა ხატი კარედი, სამ-ნაწილედი; დარჩენილი ნაწილი შეადგენს შუა ნაწილის ნაშთს, ხოლო კარებიდან დარჩენილია მხოლოდ ძელები, რომელნიც თავის მხრით შემკობილნი ყოფილ არიან მინანქრიანი მედალიონებით და ასომთავრულის წარწერებით. ნაშთები აქა-იქ შერჩენილა. კარების ძელებზე მოსჩანს ნაფლეთები მოყვითლული ვერცხლისა, ასომთავრული წარწერებით. წარწერები უჩვენებენ სახელებს წინასწარმეტყველთა და წმიდათა, რომელნიც ამ კარებზე ყოფილ არიან წარმოდგენილნი მინანქრებით. და რომ აქ ასეთი მედალიონები ყოფილა, ამას გვიმოწმებს დ. ბაქრაძე (გვ. 79), რომელიც, სამწუხაროდ, გაკვრით იხსენიებს მათ. წარწერები რომელნიც ჩვენ ამოვიკითხეთ კარებზე დარჩენილ ნაფლეთებზე, შემდეგია: ოქროპირი, კარავი, საწამებელი, წ-წყალი ესაია, წწყლი ელია, ბჭენი, წწყლი გედეონ, წწყლი დანიელ, წწყლი იერემია, აჰარონ. ყველა ამ წარწერებს კავშირი აქვს ქვემოდ მოყვანილ დიდ წარწერასთან, ვინაიდან აქაც ჩამოთვლილია წინასწარმეტყველნი, რომლებმაც იწინასწარმეტყველეს ღვთის მშობლის შესახებ.

დარჩენილი ნაწილი ხატის, შუა ტანისა, ეხლა შეიცავს მარჯვნივ და მარცხნივ აშიებს. არა პრტყელს, შემკობილს ბროწეულის ყვავილებით, ნაზი ხელობისა. აშიების წინ, ირგვლივ, სამის მხრით დიდძალი ოთხკუთხედი უჯრედებია წმიდათა ნაწილთათვის და უჯრედების გამყოფ ზოლებზე ეხლაც აქა-იქ მოსჩანან წარწერები, რომელნიც გვამცნევენ, თუ რომელ წმიდანის ნაწილი იყო უჯრაში წარმოდგენილი (იხ. ფოტ. №17073 და № 17078). ნაწილები, რასაკვირველია, არც ერთი არ შენახულა, მაგრამ მათ შორის, როგორც წარწერებიდან სჩანს, ყოფილა ნაწილები: წა გიორგისა, წა რიფსიმესი, ელევთერისა. რიცხვი წმიდათა ნაწილების ყოფილა 50-ზე მეტი.



ნიმბები ღვთის მშობლისა და ყრმა ქრისტესი შემკობილი ყოფილა დიდძალი მინანქრიანი მედალიონებით და „დრობნიცებით“. წარწერები სახელებისა, ღვთის მშობლის და მისი ძისა, დიდრონი ნაჭედი ბერძნულის ასოებით არის შესრულებული. ღვთის მშობლის ნიმბის ზემოთი არე, როგორც ეტყობა, სჭერია ვედრების კომპოზიციას, ვინაიდან კუთხეებში, როგორც სახელების ბერძნული წარწერებიდან სჩანს, ყოფილა მარცხნივ ღვთის მშობელი, მარჯვნივ იოანე წინამორბედი ანუ ნათლის მცემელი, ამიტომ შუაში უნდა ყოფილ იყოს მაცხოვარი და ვინაიდან კიდევ ადგილი რჩება, ალბათ იქნებოდა „როზეტები“, ან მთავარ ანგელოზები.

ღვთის მშობლის ნიმბის ბოლოები მარცხნივ კუთხეში „როზეტებით“ თავდება. (იხ. №№ 17073, 17077).

მინანქრიან მედალიონთაგან გადარჩენილია მხოლოდ ორი, რომლებზედაც წარმოდგენილი არიან საუცხოოდ მინანქრით შესრულებული მესვეტენი (იხ. ფოტ. №17078); სიგრძე თითოსი არის სამი სანტ. განი 1,3 სანტ. ფერადები მათი: წითელი, თეთრი და ცისფერი. „როზეტებიდან“ დარჩენილია 17; მათ შორის 7 მრგვალი, 2 ოთხკუთხედი, 4 სამკუთხედი და ერთი მოგრძო. ამას გარდა, სამი მოგრძო და ერთი პატარა მედალიონი შემკობილია თეთრ ფონზე მინანქრითვე შესრულებულის ასომთავრული ასოებით; პატარაზე: **ოო**; მეორეზე: **სათდიმადს**; მესამეზე : **მნჭყდსა**, ხოლო მეოთხეზე, მესვეტეთა ქვემოდ: **ნ-დრთა**. ხატი შემკობილი ყოფილა ძვირფასი ქვებით. დარჩენილია მათი ბუდეები, რიცხვით 14. ამას გარდა, აუარებელი ნალურსმანი ადგილები ცხად ჰყოფენ, თუ რაოდენ მრავალი ყოფილა სხვა მედალიონები, „როზეტები“ და ორნამენტები. (იხ. ფოტ. №№ 17078 და 17077). ზემოთ აშია არ შენახულა, მაგრამ მოსჩანს ნაშთი ასომთავრული წარწერისა:

ჟ წ-დაო : მრამ : მშობლო : ღთ-სო : მოხ : მექმენ :

მე : [მსა]სოებესა : შნსა<sup>1</sup> მ . . . და ქართ . . .

უქარაგმოდ:

ჟი წმიდაო მარიამ, მშობელო ღმრთისა, მეოხ მექმენ მე

მსასოებელსა შენსა მე(ფეთ მეფესა აზხაზთა) და ქართ-

ველთა . . .

ქვემოდ ხატს ჰქონია ორ-სტრიქონიანი გრძელი წარწერა, მოოქრულ ვერცხლის გრძელ ნაჭერზე, წნულის ასომთავრულით, რომელიც არც ისე ადვილი გასარჩევია. ეს წარწერა ჩვენ ცალკე ვიპოვნეთ ხატის ბუდეში და თავის ადგილს მივაკარით (იხ. ფოტ. №№17072-17073). დ. ბაქრაძეს წარწერა არ უნახავს; უვაროვისა და ა. ხახანაშვილი არ ყოფილ არიან ამ ეკლესიაში. ყოველ შემთხვევაში არც ერთი მათგანი არც ხატს და არც წარწერას არ იხსენიებენ, თუმცა სოფელ ბეჩოში ყოფილან. წარწერას ჩვენ ვკითხულობთ ასე:

1. წ : რი ეგე : დან ლ : მთად გიხ ლა : ესაია : დედად : ევმ-  
ნოელსად : კ დ : გედონ : ს წმის დ : დ თ : კიდ ბნდ :

ეზ კლ : ბჭედ : მოსე : მ ღთდ შ ნვე : ზიასა : ერისთვეთერ

2. ქაო : გ ხნ : მ მიპვე : მ დლი : წ ე : ჩ მ : და : ყ თა . ღ თსა :

დ დფლო : ზს კნლთა : და : ქ ყნისო : ოღ რსი : ბ რი : მი-

ოხე : დ თ მ კპოსი : ხ მ ბ შ ს ძე : ძ მ თ : ქ ვთრით თ რთ : ჟ :

სოათა სსოო .

უქარაგმოდ ჩვენ წარწერას ასე ვკითხულობთ:

რომელი ეგე დანიელ მთად გიხილა, ესაია დედად ევმანოელისად, კუალად გედეონ საწმისად, დავით კიდობნად, ეზეკიელ ბჭედ, მოსე მღრთად, შემინდვე ზიასა (ანუ ზვიადსა), ერისთავთა ერ(ისტავს)!

ქალწულო, გიხაროდენ (ანუ გვიოხენ)! მომიპოვე მაღლი წინაშე ჩემ და ყოველთა ღმრთისა, დედოფალო ზესკნელთა და ქუეყანისაო, უღირსი ბერი მიოხე, დავით მთავარ ეპისკოპოსი ხამბაშიძე (ანუ ხემბაშიძე), ძმით ქავთარითურ, ში სუანთა სასოო!

ამ წარწერაში ო და უ ერთი გამოსახულების არის, არ განირჩევა. „ზიასა“ შემოკლებული გადმოცემაა „ზვიასა“ ანუ „ზვიადსა“. ერისთავი თუ ერისთავთ ერისთავი (ეს კარგად არ განირჩევა დედანში) ზვიადი ხშირად იხსენიება ქართულს წარწერებში სხვა და სხვა დროს. მთავარეპისკოპოსი დავით ხამბაშისძე ანუ ხემბაშისძე ცნობილი არ არის. აქედან უნდა მომდინარეობდეს ეხლანდელი გვარი ღამბაშიძე, რომელთა შორის მღვდლობა, ეტყობა, ძველთაგან ყოფილა.

თუ ჩვენი წაკითხვა „სუანთა სასოო“ სწორია, მაშინ ცხადია, ხატი სპეციალურად სვანეთის ეკლესიისათვის ყოფილა განჭედილი.

ეს ძვირფასი ხატი დიდათ მოგვაგონებს აწ მოსპობილს მინანქრიან ხატს ლეონ მეფისა, ხობში, თავისი მდიდრული მინანქრიანის შემკობილობით, რომელიც, ჩვენის აზრით, მე-13 საუკუნეს უნდა ეკუთვნოდეს.

2. **ჯვარი** კანკელის საწინავე, 100X46 სანტ. შემერწილია ვერცხლის ფირფიტებით, საკმაო კარგი ხელობისა. ზემოდ წარმოდგენილია წ-დ დმრი და კიდევ ერთი მედალიონი უწარწეროდ. ქვემოდ კიდევ წარწერაა:

ივანე : ფათანს : და

შვლ მისი შეიწყ

ლე : მთვრ ანგ

ლო სამესრისაო (?)

ამას ქვემოდ რაღაც დაჯღაბნილია ფრიად უშნოდ და კარგად არ ირჩევა:

ო-ი მიქაელო დიანს და შვილი

... კ შეწყ ე მთავარანგლზი

ივანე ფათანს და

შვილი მისი შეიწყა-

ლე მთავარანგე-

ლოზო სამესრისაო (?)

3. **ჯვარი, კანკელის საწინავე, 84X49 სანტ.** ისეთივე ხელობისა, როგორც წინა ჯვარი, ზემო ფირფიტაზე წარმოდგენილია მაცხოვარი მთელის ტანით; ქვემოდ წა გიორგი, მთელის ტანით, შუბით და ფარით; უფრო ქვემოდ უშნო ფირფიტებია მთავარ ანგელოზთა, წარწერით: წ-ო მცხრო (?); მარჯვნივ და მარცხნივ: მთავარ ანგელოზნი, ღვთის მშობელი და წა იოანე. შუაში ამ ჯვარს ფირფიტა აკლდა და ჩვენ იქ დავდევით პატარა ხატი წა გიორგისა, 8X7 სანტ. და ისე გადმოვიღეთ მთელი ჯვარი (იხ. ფოტ. №17076).

4. ასეთივე **ჯვარი**, მაგრამ ცოტა უფრო მცირე, 69X52 სანტ. ამ ჯვარის ფირფიტები ბევრად უკეთესია, ვიდრე წინა ჯვარისა. ზემოდ წარმოდგენილია მიქელ მთავარ ანგელოზი ლაბარუმით, ბურთით და წარწერით: წ-დ მიქლ. ქვემოდ: წ-დ გ-ი. სრულის ტანით, შუბით და ფარით; მის ქვემოდ წელსზევითი მაცხოვარი, ბერძნულის წარწერით სახელისა; იმის ქვემოდ ღვთის მშობელი: დ-დ დ-დ. მარჯვნივ და

მარცხნივ უმბოსაგან, რომელიც თითქო მზის სურათს წარმოადგენს, მთავარ ანგელოზნი, წა გიორგი ცხენით, ვეშაპს გმირავს, და წა იოანე (იხ. №17075).

5. ხატი მთავარ ანგელოზთა, ვერცხლისა, მოოქრული, ნაჭედი, 83X49,5 სანტ. კარგი ქართული ხელობისა, მე-12-13 საუკუნ. წარწერით: გბრლ ანგელოზი, მქლ ანგელოზი. შუაში მაცხოვარი ტახტოსანი, ბერძნულის წარწერით სახელისა; აშიეზი დაცული არ არის.

6. ხატი, რომელიც შესდგება სხვა და სხვა ნაჭრებისაგან, ზოგი მათში მოოქრული ვერცხლისაა, ზოგი უბრალო ვერცხლის, ხელობაც სხვა და სხვაა, უმეტესად ტლანქი, სახელდობრ ორი ვერცხლის მედალიონი პეტრესი და თეოდორესი: წი პე, წი თე, 43X28 სანტ. ტლანქი ხელობისაა.

7. ხატი წის გიორგისა, ვერცხლისა, ნაჭედი, 31X23 სანტ, წარწერით: წი გი. წმიდანი სრულის ტანით არის წარმოდგენილი შუბით და ფარით; აშია მატერიისაგან არის შემოვლებული; საკმაო კარგი ხელობის არის.

8. ხატი მირქმისა, ვერცხლისა, ნაჭედი, 17X17 სანტ. ტლანქი ხელობისა.

9. ხატი მაცხოვრისა, ვერცხლისა, ნაჭედი, 30,5X 23 სანტ. მაცხოვარი ტახტოსანია, ჩვეულებრივი რიგით. წარწერა: ივ ქე. ტლანქია.

10. კარედი ხატი, შედგენილია სხვა და სხვა ნაჭრებისაგან, 58X38 სანტ. მარჯვნივ წარმოდგენილია: წე ეკტრნა და წე ტრონი (?) (=თეოდორე ტრონი); ზემოდ ღვთის მშობლის ნიშნია და წარწერა ხუცურით: „წ : აქა მანდილი დედისა, ღვთისაი :“; მარცხნივ მაცხოვარი და ღვთის მშობელი; ტლანქი ხელობისაა: შუაში ყოფილა ჯვარი, 26X17 სანტ. სამი მედალიონით, ტლანქი ხელობისა; კარებიც შემკობილია ნაჭრებით; ზოგი მოოქრულია და წარწერებიც აქვთ:

ფზმ . . . / რდსა / წე ბარბარე. და შემდეგ:	
ღმერთო :	ღმერთო
მოწყლ	მოწყალე-
ეო : შეუნ	ო, შეუნ-
დვენ : ოქრ	დვენ ოქრო-
ომქედე	მქედე-
ლსა : ცოდვ	ლსა ცოდვა-
ნი : მისნი :	ნი მისნი,
იოვანეს თუ	იოვანეს თუ -
მანის ძესა	მანის ძესა.
ამნ .	ამინ.

ამ წარწერასთან ერთად დ. ბაქრაძე იხსენიებს კიდევ მომცრო ზარს, თათრულის წარწერით, რომელშიაც მოხსენებული ყოფილა ვიღაც ისმაილი (გვ. 78, დამატება 17). არ ვიცით, სად არის ეხლა ეს ზარი.

11. ხატი ღვთის მშობლისა, ჩჩვილელი, ვერცხლისა, ნაჭედი, 5,5X5,5 სანტ. ტლანქია.

12. სასანთლე, თითბერისა, სამი საფეხურით, ერთობ მიმიმა.

13. ბარძიმი, სპილენძისა, სახელურით, რომელიც ოქროთია შემკობილი; ქვემოთ ლათინურად აწერია: **MARIA** ; ზემოდ: **IESUS**.

## ცხომარის თემი

ცხომარის თემს შეადგენენ შემდეგი სოფლები: – გაბალთი, სვიფი, ტვიბერი, ლეზგარი, მაგანდერი და ლაფსხალდი. დ. ბაქრადის დროს ეს თემი ეკუთვნოდა თენგიზ დადიშკელიანს, შემდეგ იქ ცხოვრობდა ბექირ-ბეი დადიშკელიანი, რომელიც განთქმული იყო მთელს სვანეთში სტუმართ-მოყვარეობით; ჩვენ დაგვხვდენ მათი შვილები, ლევან და მურზაყან დადიშკელიანები, რომლებმაც დიდი თავაზიანი მასპინძლობა გაგვიწიეს და დაგვხმარენ ჩვენი მუშაობის დროს.

## სოფელი სვიფი.

სოფელ სვიფში პატარა მთავარ ანგელოზის ეკლესიაა და მთელი ცხომარის თემი ამ ეკლესიის შემავალად ითვლება. ეკლესიაში ჩვენ ვნახეთ:

1. **ჯვარი**, დიდი, კანკელის საწინავე, რომელიც თავის ადგილზეა ამართული, საკურთხეველში კარის წინ; სიმაღლე მისი არის სამი არშინი და განი ერთი არშინი და 11 ვერშოკი. შედერწილია მხოლოდ პირველ გვერდზე ვერცხლის ფირფიტებით, მდარე ხელობისა, მაგრამ თავზე ქუდი ანუ გვირგვინი შერჩენილი აქვს, ორის წმიდანის სურათით (იხ. ფოტ. №17074). საუკეთესო ფირფიტები მოოქრული მოიპოება მარჯნივ უმბოსა; პირველ მათგანზე წარმოდგენილნი არიან მთელის ტანით: მაცხოვარი, პეტრე და პავლე, წარწერით:

ქე შე მქლ და . . . . .

სხვა ადგილებზე წარმოდგენილნი არიან: მაცხოვარი, ლუკა მახარობელი (ორჯერ) და 11 პატარა ფიგურა წ<sup>ა</sup> გიორგისა ცხენით, რომელიც ადამიანს გმირავს; სხვა ფიგურები ტლანქია.

2. **ხატი ღვთის მშობლისა** ჩჩვილელი, წელსზევითი, 16,5X13,5 სანტ. ყოფილა წამლით დახატული, მაგრამ მხატვრობა მოშლილია; მოცულობა ვერცხლისაა; ნიშნები და აშიები შენახულია; სურათები მოვლებული ყოფილა ირგვლივ მარგალიტის მძივებით; ნაწილი მარცხნივ დაცულია; ნიშნი ქრისტესი ჯვარის სახედ არის; ნიშნის აქეთ-იქით ორი სიმრგვალე არის; აშიები დაყოფილი ოთხკუთხედ უჯრედებად და შემკობილი ლამაზი სევადიანი ორნამენტებით; სევადით არის შემკობილი აგრეთვე ნიშნები (იხ. ფოტ. №17079). სამწუხაროდ, სევადის ორნამენტები

ფოტოგრაფიაზე არ არის გამოსული. ზურგზე, ჯვარის სახის ირგვლივ, ასომთავრული წარწერაა (იხ. ფოტ. №17080):

ქ ყოლად : წო . ღთს : მ ყოვლად წმიდაო ღმრთის მშო	
ბელო შეიწყალე	ბელო, შეიწყალე
ფ რ	ფრი-
იად : ცოდვილი : ევფ	ად ცოდვილი ევფე-
ემიას : მწირვლი	მიას მწირველი
დემეტრე და დაივწნ :	დემეტრე და დაივიწყენ
შცოდებნი : მსნი :	შეცოდებანი მისნი!

ხატი ჩადებულია კარედში, რომელიც გაფუჭებულია და ქვემოთ მოსჩანს ნაშთი ხუცური წარწერისა: . . . . იქმენ წინაშე ძისა შენისა. . . ხატი უნდა ეკუთვნოდეს მე-13-14 საუკუნეს. (წარწერა მოყვანილი აქვს დ. ბაქრაძესაც, გვ. 70, მაგრამ რუსულ თარგმანში ერთ სახელად მიუღია ევფიმია-დემეტრე).

3. ხატი მაცხოვრისა, ოქროთი დაფერილი ვერცხლისა, ნაჭედი, 51X36,5 სანტ. სანახევროდ მოშლილია (იხ. ფოტ. №17087); მაცხოვარი ტახტზე მჯდომარეა; ეზო და აშიები შემკობილია ფოთლოვან-ბალახოვანის ორნამენტით, საუცხოო ხელობისა, მე-11-12 საუკუნისა. ზემო აშია არ შენახულა; აკლია ქვემოსაც. ზემოდ, სიმრგვალეში წარწერაა სახელისა, მაგრამ ასოები შებრუნებულია: ქ ზ ჯ მ. მარცხნივ ტახტისა მუხლ-მოდრეკილი ფიგურაა მავედრებელის პოზით, რომლის ზემოდ ასომთავრული წარწერაა:

ქ . წმიდო : მცხ	წმიდაო მაცხო-
ვრ : მეოხ : ეყ	ვარ(ო), მეოხ ეყავ
ვ : მს : დღესა :	მას დღესა
გნკდთხვსას :	განკითხვისას
წნშ : ღს : შნისა	წინაშე ღმრთისა შენისა
სღრს	საღირს
სღი	საღი-
რძე	რიძე-
სა .	სა.

წარწერა უცნობია; დ. ბაქრაძე არ უჩვენებს; უვაროვისა და ა. ხახანაშვილი აქ არ ყოფილ არიან. საღირისძეები თამარ მეფის გვირგვინის კურთხევის დროს არიან მოხსენებულნი (იხ. ქართ. ცხ. მარიამ დედოფლის ვარიანტი, გვ. 400) და ხატიც ხელოვნების მიხედვით მე-12 საუკუნეს ეკუთვნის.

4. ხატი ჯვარცმისა, 28X21 სანტ. წამლით არის დახატული; თვით ჯვარცმული საკმაოდ კარგად არის შენახული, ხოლო წინამდგომთა სახეები, მარიამისა და ივანესი, დაზარალებულია (იხ. ფ. №17085). წარწერა სახელისა ზემოდ ბერძნულია. ანგელოზთა ფიგურები ზემოდ გამქრალა; ჩარჩო შემკობილია ხლართული ბალახოვანის ორნამენტით და სადა მედალიონებით. ზემო აშია მოძარცვულია. ხატი არის არა უგვიანეს მე-16 საუკუნისა.

5. **ხატი მაცხოვრისა**, ვერცხლისა, ნაჭედი, 34X25 სანტ. მაცხოვარი ტახტოსანია, ჩვეულებრივი რიგით; ნიშბი ჯვარის სახისა აქვს, ზემოდ (№17086) დრობნიცებში უწერია სახელი ბერძნულად. აშია რომბ-ლურსმულია ორ ფოლაქოვან წრის შუა, სადა მედალიონებით; ქვემოდ ერთ სტრიქონიანი წარწერა ნაკლულევანად არის შენახული:

ქ : მცხორო . . . ა : ოთოდვანსა : მე მოვჰედე : მოვჰედე გი . . .

დ. ბაქრაძეს გადმოუღია ეს წარწერა (იხ. დამატება №11) და შენიშნავს, წარწერა არ იკითხებაო, ხოლო მე მგონია, უკანასკნელი ორი სიტყვა ნიშნავს: გიორგი ლიპარის ძე-სო (გვ. 70). ეხლა უკანასკნელი სიტყვა წარწერას აღარ აქვს. წარწერა უნდა ნიშნავდეს:

მაცხოვარო, [შეუნდვენ ცოდვანი]ა ოთოდვანსა, მე მოუჰედე. მოვჰედე გიორგი [ლიპარიტის ძემ].

წაკითხვა „ლიპარიტის ძემ“ ბაქრაძის გადმოღებულზედაც საეჭვოა ყოველ შემთხვევაში, გიორგი ლიპარტიანზე, დადიანი ლევან მეორის ბიძაზე, აქ ლაპარაკი არ შეიძლება. ლიპარიტის ძე აქ აღნიშნავს ოქრომჭედლის გვარს; ისე ხატი კი მე-16-17 საუკ. უნდა იყოს.

6. **სამი ჯვარი**, სრულიად ერთგვარი, 32X21 სანტ. თითო; შემერწილია მოოქრული ვერცხლით; ოთხივე ფრთის ბოლო თავდება დიდი მრგვალი მედალიონებით, რომლებზედაც ერთი და იგივე წყვილი წმიდანია წარმოდგენილი, სრულის ტანით და სახარებით ხელში. წარწერა არ აქვთ. (იხ. №17081). ხელობა დაბალია.

7. **ჯვარი გამოსასვენებელი**, ვერცხლისა, 19X17 სანტ. შუაში დიდი ქვა არის, ლალი; ბოლოში მედალიონებია; ქვემოდ ღვთის მშობელი ნიშოვანი ტახტით; მარცხნივ და მარჯვნივ მთავარ ანგელოზნი; ზემო მედალიონი დაკარგულია; სხვა ნაწილი ჯვარისა სადაა (იხ. №17083)..

8. **ხატი მაცხოვრისა**, სხვა და სხვა წმიდანებითურთ, 34X20 სანტ. სამ ნაწილად არის გაყოფილი; შუაში დიდ მრგვალ მედალიონში მაცხოვარია და ოთხივე კუთხეში ამ ნაწილისა თითო წმიდანი, ვგონებ, მთავარ ანგელოზები. ზემო ნაწილზე, შუაში, მაცხოვარი ორი წმიდანით, ერთი მთავარ ანგელოზია. ქვემოდაც, შუაში ქრისტე და აქეთ-იქით ღვთის მშობელი და იოანე, სრულის ტანით სამივე (იხ. №17082). შემკობილობა რომბ-ლურსმულია, აშია დაზარალებული, სხვა უკეთესი ხელობის ხატიდან უნდა იყოს.

9. **ვერცხლის ფირფიტა**, პეტრეს სურათით, რომელიც წარმოდგენილია კამარას ქვეშ, სახარებით ხელში და წარწერით: წ-ა პრე. ტლანქი ხელოლობისაა (იხ. ფოტ. №17084).

10. **სპილენძის ფირფიტა**, რომელზედაც წარმოდგენილია ორი წმიდანი, სახარებით ხელთა, სრულის ტანით; წარწერა არა აქვთ (იქვე, №17084). ხელობა უკეთესია, ვიდრე წინა ფირფიტასი.

11. **საცეცხლური**, ვერცხლისა, ლამაზი ხელობისა, რომლის კორპუსი დაყოფილია გრებილიან თალებად და თალებში წარმოდგენილი არიან ფიგურები, ასომთავრული წარწერებით:

წ-დ მრკზ, წ-დ ლ-კა, წ-დ თ-ე, წ-დ პ-ე, წ-დ პვლე.

თეოდორეს თაღის ზემოდ ბერძნული ასოებია: ბგდ (იხ. №17088).

12. **ხატის** ვერცხლის აშიის ნატეხი, რომელზედაც ასომთავრულით სწერია:

ქე შე კე ჭშტ-რნი.

ეს ნატეხი წინა ნომრის საცეცხლურზეა დადებული და ისე გადმოღებული (იხ. №17088).

13. **პატარა**, ვერცხლის **ხატი პეტრესი**, ტლანქი.

14. **პატარა**, წა გიორგის **ხატი**, ტლანქი.

სვიფის ზემოდ არის ეკლესიის ნანგრევები იმ ადგილზე, რომელსაც ჰქვია ფალა. მოსჩანს მხოლოდ ეკლესიის საფუძვლები და ქვები. ერთ ქვაზე არის ასომთავრული წარწერა (იხ. №17116) ცოტა წაბღალული:

ქ. წო გო

შე ადა

მაშჯა

რ

მეორე ქვაზეც მოსჩანს რაღაც წარწერები (იხ. №17116).

### სოფელი ლაფსხალდი.

საზოგადო სახე ლაფსხალდის სოფლისა და აქედან ენგურის ხეობისა იხილეთ ფოტ. №17450 და №17451. ლაფსხალდში მიმავალი გზიდან კარგად მოსჩანს მწვერვალი უჟბა. იხილეთ ფოტ. №17452. ამ სოფლის ჩვეულებრივი, ქვის, სვანური ეკლესია მთავარ ანგელოზთა სახელზეა აშენებული. ეკლესიაში ჩვენ ვნახეთ:

1. **ჯვარი**, დიდი, კანკელის საწინავე, სიმაღლით 4 არშინი, განით 24 ვერშოკი. ეს ჯვარი განირჩევა ყველა ასეთი რიგის ჯვარისაგან; აქ ხე ჯვარისა მრგვალია ყველა ნაწილში და არა ბრტყელი; ამასთან ერთობ მძიმეა, ამიტომ დიდი ცდა მოგვინდა, რომ გარედ გამოგვეტანა და ფოტოგრაფია გადმოგვეღო (იხ. №17115). შეპერწილია ირგვლივ ვერცხლის ნაჭრებით, წ-თა სახეებით და სხვა შემკობილობანით. ჯვარს შერჩენია ქუდიც ანუ გვირგვინი, რომელიც მოგვაგონებს კონუსის მსგავს გუმბათს ქართული ეკლესიისა. ამას გარდა ადგილ-ადგილ ზოგი ნაჭრები შემკობილია

ძვირფასი ქვებით, ჯვარზე ჩამოკიდებულია ბევრი პატარა ბეჭდები, მძივები და მედალიონები, „დრობნიცები“. ყველა ეს მლოცველთა შემოწირულებაა. სხვათა შორის ჯვარზე ჩამოკიდებული იყო ხელის გამოსახულობა ვერცხლისა და პაპმა ამიხსნა, რომ ეს არის ნამდვილი ასლი (კოპიო) თამარ მეფის ხელისაო; ჯვარის შუა ნაწილი უჭირავს უმბოს, რომელიც შემკობილია ხუთი ქვით, ლალით; მის ზემოდ ჯვარია შედგენილი ძვირფასი ქვებით; ამ ჯვარის ზემოდ ხარებაა წარმოდგენილი; ქვემოდ მთავარ ანგელოზნი; კიდევ ქვემოდ ჯვარცმა ვერ არის ლამაზი ხელობისა, მაგრამ მის ქვემოდ მოქცეული მთავარ ანგელოზები და ვედრება უკეთესი ხელობის არის. მარცხენა და მარჯვენა ფრთებზე ჯვარისა უფრო შემკობილებანია, ვიდრე წმიდათა ფიგურები. ერთ ნაჭერზე ხუცური წარწერებია, არა დიდათ ძველი, და ძნელი გასარჩევი:

ქე შე ლანერა ონგასძე .

ქე შე გამკო ნუასძე (?)

2. მეორე კანკელის საწინავე **ჯვარს** ჰქონია ჩვეულებრივი სახე სვანური ჯვარებისა, მაგრამ მისი ვერტიკალური ნაწილი სულ მოძარცვულია და დარჩენილია შიშველი ხე, ხოლო ჰორიზონტალური ნაწილი დარჩენილია ხელუხლებლად (იხ. №17102).

აქ შუაში უმბოა მზის სახით, რომელსაც ოთხივეს მხრით პატარა სიმრგვალებები ახლავს. მარჯვნივ და მარცხნივ ორ-ორი მთავარ ანგელოზია, დაბალი ხელობისა; არე მოოქრული ვერცხლისა შემკობილია რომბ-ლურსმული ორნამენტით.

3. მესამე **ჯვარი** ამვე რიგისა უფრო პატარაა, 67X32 სანტ. შემერწილია ვერცხლის ფირფიტებით, რომლებზედაც არიან უმბოს მარჯვნივ და მარცხნივ: ღვთის მშობელი, წ-ა იოანე და მთავარ ანგელოზნი; ზემოდ: ერთი ფიგურა შიშველი ტანით თითქოს ჯვარცმულს წარმოადგენს, მაგრამ ჯვარი არ სჩანს. უმბოს ქვემოდ წ-ა გიორგი, სრულის ტანით, ანუ წ-ა თეოდორე (წარწერა არა აქვს); მის ქვემოდ ღვთის მშობელი; ხელობა დაბალია (იხ. №17090).

4. ფრიად დიდი და მძიმე **ჯვარი**, კანკელის საწინავე, რომელიც მიჯაჭვულია ეკლესიის კედელზე და ამიტომ ჩვენ ვერ გამოვიტანეთ გარეთ, რომ ფოტოგრაფია გადმოგვეღო, მაგრამ დიდათ საინტერესო არაა, ვინაიდან ქვემოდ სულ მოძარცვულია; ზემო ნაწილი დაცულია და მათზე წარმოდგენილნი ორი წ-ა გიორგი და სხვა წმიდათა ფიგურები დაბალი ხელობის არის.

5. **ჯვარი** შუა ზომისა, 70,5X33 სანტ. ჯვარცმულის ფიგურით და სხვათა წმიდათა მედალიონებით, დაბალი ხელობისა არის.

6. **ჯვარი** ხისა, 38X28 სანტ. შემერწილი ვერცხლის ფირფიტებით; შუაში უზის ოთხი ძვირფასი ქვა; ზემოდ და ქვემოდ ორი წმიდანია; მარჯვნივ და მარცხნივ მთავარ ანგელოზები; დაბალი ხელობისა არის.

7. ამგვარივე **ჯვარი**, 49X24 სანტ. კიდევ უფრო ტლანქია, ვიდრე წინა ორი ჯვარი.



8. **ჯვარი**, ზორბა, გამოსასვენებელი, ვერცხლიდან ჩამოსხმული, მოოქრული, 49X30 სანტ. ფრიად თავისებური სახისა არის, რომლის მსგავსი საქართველოს სხვა კუთხეებში არა გვხვდება (იხ. ფოტ. №№17108 და 17107, აგრეთვე უვაროვისა, გვ. 89-90, ტაბ. XXIII, №№ 39, 40). მარჯვენა და მარცხენა მკლავები ჯვარისა ჩამოღუნულია და ქვემო მკლავი მოღუნულია მარცხნივ, ასე რომ გამოდის არა სწორი ფორმა ჯვარისა, მაგრამ ეს კი არ აფუჭებს სილამაზის შთაბეჭდილებას და ამგვარად გამოდის სრული და მხატვრული ნაწარმოები.

შუაში ჯვარი ვიწროა, მკლავები გაფართოებულია თანდათანობით და თავებიან პალმეტებით, რომელნიც ცალკე არიან გაჭედილი და შემდეგ მიმაგრებული ბოლოებზე; შინაგანი წვერები ჯვარისა, პალმეტების წინ, შემკობილია სუმბულის გვარი ორნამენტით. წინა პირზე, შუაში, წარმოდგენილია ჯვარცმა, რვა-მკლავიან ჯვარზე წარწერით: ესე არს მ-ფც 3-რთ. ტანი ქრისტეს ერთობ გამხდარია, განწლეული, მაგრამ პირის სახე დაწყნარებული, უმტკივნო, თავი – გრძელის თმით, სახე – წვერით, თვალები მინაბული; ხელების გასწვრივ ქრისტესა მზე და მთვარეა; ჯვარის მკლავების მარჯვენა და მარცხენა ბოლოებში ღვთის მშობელი, რომელსაც ხელით კაბის წვერი აუწევია, რომ თვალები დაიფაროს, ან ცრემლები ამოიხოცოს, და მარჯვნივ იოანე ღვთის მეტყველი, ახალგაზრდა, მაგრამ წვერიანი, სახარებით მარცხენა ხელში, მარჯვენა კი პირზე მიუდვია მწუხარების ნიშნად. წარწერები ფიგურებისა ასომთავრულით: წ-დ მ-მ (მარიამ), წ-დ ივ-ნე. ზემოდ მთავარ ანგელოზია, სრულის ტანით, ხელებ აპყრობილი და წარწერით: წ-დ მ-ქლ. ქვემოდ ადამის თავია, წარწერით: ადამ. ჯვარს ქვემოდ წაწვეტიანებული სახელური აქვს ხეტარზე ჩამოსაცმელად.

მეორე პირზე ჯვარისა (იხ. №17107), შუაში წარმოდგენილია ღვთის მშობელი ჩჩვილედ, მთელის ტანით; მისი კორპუსი მარცხნით არის მოქცეული, წარწერა: წ-დ მ-მ (მარიამ), დ-ჯ ქ-ე, მარჯვნივ: მთავარ ანგელოზი გაბრიელ: წ-დ გ-ბ. ზემოდ წარმოდგენილია მთელის ტანით მაცხოვარი, უწვერო, მაკურთხეველის მარჯვნივ და სახარებით მარცხენა ხელში, წარწერა: მ-ცხრი ყ-ლთა. ქვემოდ წარმოდგენილია წელსზევითი ფიგურა წა ნიკოლოზისა, წარწერით: წ-დ ნ-კ-ლზ. გრ. უვაროვისას მიაჩნია ჯვარი რომაულის რიგის ჯვარად და მიაკუთვნებს მე-13 საუკუნეს (გვ. 89-90), მაგრამ წარწერების ხასიათი და მომდარე ხელობა ფიგურებისა უფრო მე-14 საუკუნეს უდნა უჩვენებდენ.

9. **ხატი მთავარ ანგელოზის მიქაელისა**, ვერცხლისა, ნაჭედი, 84X46 სანტ. მთავარ ანგელოზი წარმოდგენილია სრულის ტანით, საომარ ტანისამოსით და დიდის ფრთებით; მარჯვენა ხელში ამოწვდილი ხმალი აქვს, მხარზე შედებული; მარცხენა ხელში ხმლის ქარქაში უჭირავს; ხშირი თმა უვლის მთელს სახეს და ჩამოსდის ყელამდის კიკინებად; თავის წრე სანახევროდ მოსჩანს, ვინაიდან ნახევარი ფრთებით არის დაფარული. ფეხს ქვემ ნოხი უგია; აშია ორია; ერთი შინაგანი ქვემო ნაწილში ფრთებამდის; მეორე გარეგანი; ორივე ბალახოვანი შემკობილობისაა და მოყვითლულია. მედალიონები აშიებისა პატარანია და მათში წარმოდგენილნი არიან წელსზევითნი ფიგურები: ზემოდ ქრისტესი, მთავარ ანგელოზებითურთ, ღვთის მშობლისა და იოანე ნათლის მცემელისა (მარცხნივ), პეტრე და პავლესი (მარჯვნივ). ზემოდ, დიდ „დრობნიცებში“ ასომთავრული წარწერა: ქ წა თვრენგელოზი (sic):

მიქელ : ცვემნრისა (იხ. №17106). ცვემნი იგივეა რაც ცვემნარი ანუ ცხემლნარი. დ. ბაქრაძე მართალია, რომ სახელწოდება თემისა ცხომარი აქედან უნდა წარმოსდგებოდესო (დ. ბაქრაძე, გვ. 72). ქვემოდ სამ-სტრიქონიანი წარწერაა. მესამე სტრიქონს აკლია, მაგრამ ერთი ორი ნატეხი ნაკლული წარწერისა მე ვიპოვე ზანდუკში სხვა ხურდამურდასთან არეული და თავის ადგილზე მივაჭედე, მაგრამ ეს იყო მაშინ, როდესაც ხატი უკვე გადმოღებული გვექონდა და ამიტომ ჩვენს ფოტოგრაფიაზე არა სჩანს. დ. ბაქრაძეს ეს წარწერა ხელით გადმოუღია (იხ. დამატება №16 ად გვ. 72):

ნიშნად ზოგჯერ იხმარება სამი და ოთხი ვერტიკალურად გაწყობილი წერტილი. ჩვენ ვტოვებთ მარტო ორ-ორ წერტილს.

ქ . წა : თვრენგელოზო (sic): მეჯ და : ფრველ : ექმე :  
დადიანი : გურიელს : სვთ : ერ  
ისტეს (sic) : მანდატურთ : უჯუცესა : შამ-დვლს : შ-ნ :  
ღ-ნ : ა-ნ : თნა : მემცვდრეს  
მისა : დედო (ეს ორი სიტყვა მარცხენა აშიაზე სწერია)  
ფლს : ა-ნს : შ-ნ : ღ-ნ : ძე [მათი : ლიპარი : ] გაზრ-  
დენი : ღმერთო : ოქრომჭედლსა : ყ  
იზიასა შ-ნ ღ-ნ (ეს სამი სიტყვა მარჯვენა აშიაზე სწერია).

უქარაგმოდ და შესწორებით:

წმიდაო (მ)თავარ ანგელოზო, მეოჯ და (მ)ფარველ ექმე(ნ) დადიან-გურიელს, სვანთა ერისთავთა ერისთავს, მანდატურთუჯუცესსა შამანდავლეს, შეუნდვენ ღმერთმან, თანამეცხედრეს მისა, დედოფალს ანას. შეუნდვენ ღმერთმან, ძე [მათი ლიპარი] გაზარდენი ღმერთო. ოქრომჭედელსა ყიზისა შეუნდვენ ღმერთმან.

ამ წარწერაში მოხსენებული შამან-დავლე არის დადიანი შამან-დავლე პირველი, რომელიც დადიანობდა 1470-1474 წლებში. მისი შვილი და მემკვიდრე იყო ლიპარი. ტიტული დადიან-გურიელი, მანდატურთ-უხუცესი და სვანთა ერისთავთ ერისთავი მას ტრადიციით მიუთვსება ამ წარწერაში, თავის წინაპრების მიხედვით, როგორც სამართლიანად განმარტავს დ. ბაქრაძე, თორემ ის არც გურიელი ყოფილა, არც სვანთა ერისთავი და არც მანდატურთ-უხუცესი; ის იყო მხოლოდ დადიანი; შამანდავლე თანამეცხედრით ანნათი მოხსენებულია კიდევ ილორის წარწერაში. ის დამარხულია ხოპში. (Brosset, Voyage, Rapp, VII, p. 95-86. Rapp. XII, p. 69-61, H. G. II, 1 livr.p. 259).

10. ხატი მთავარ ანგელოზის მიქაელისა, ოქროთი დაფერილი ვერცხლისა, ნაჭედი, 63X46 სანტ. მთავარ ანგელოზი წარმოდგენილია საომარი ტანისამოსით და ამოწვდილი ხმალით მარჯვენა ხელში; მარცხენა ხელში უკავია ქარქაში; გრძელს თმას მოცული აქვს შუბლი, ლოყები და ჩამოსულია ყელამდის. საზოგადოთ, კომპოზიცია წინა ხატისა აქვს; თავზე ნახევარი წრე აქვს მოვლებული; ფონი ბალახოვანი ორნამენტით არის შემკობილი. ჩარჩო ხატისა უფრო ძველია, შემკობილი ფიჭვის კინკრეიჭების მსგავსი ორნამენტით (იხ. №17103). ზემოდ ფრთების წარწერაა:

„ქ მთვრნგლოზო“.

ქვემოდ აშიაზე ორ-სტრიქონიანი წარწერაა:

ქ : მთავარანგლოზო : მმგიბო (sic) : აღშნ : მშნბლ : შნ : ხე  
ვ ცხმრს : ა : მნ : ამსაი : მმჭდლს : მ ხლ-ს : ხ-ბლს (?) :  
შ-ნდ : ღმეთ . . .

უქარაგმოდ:

მთავარ ანგელოზო მომგიბო (მომგიბისაო?), აღაშენ(ე) მაშენებელ(ი) შენ(ი) ხევ(ი) ცხომარის(ა), ამინ. ამისაი მომჭედელს(ა) მიხაილს (ანუ მიხეილს) ხაბაღს (ანუ ყაბაღს?) შეუნდვენ ღმერთმ(მან).

ამ წარწერაში ხმოვანი ასოები სიტყვების ბოლოში ხშირად გამოშვებულია. ჯგუფი: „მმგიბო“ უნდა ნიშნავდეს ადგილის სახელს მომგებისაო (?) ან სხვას, რომელიც ჩვენ არ ვიცით.

ასო „ხ“ სამ სხვა და სხვა შემთხვევაში სხვა და სხვა ნაირად არის გამოხატული, ხან უკუღმა, ხან გადმობრუნებულად. ძნელი სათქმელია „ყაბაღს“ უნდა წავიკითხოთ, თუ „ხაბახს“. პირველი ასო თავშეკრულია და ამიტომ ყ-ს მოგვაგონებს, მაგრამ ქვემოდ მოკაუჭებული წრე აქვს, როგორც სხვა ასო „ხ“-ნს ამავე წარწერაში. და ამიტომ საფიქრბელია, აქ შებრუნებული „ხ“-ნია და იგიც დამახინჯებული. ფოტოგრაფიაზე წარწერა კარგად არის გამოსული და მკითხველი ადვილად შეადარებს. თქმა არ უნდა, წარწერა სვანის მიერ არის შესრულებული.

დ. ბაქრაძე ამბობს, ამ წარწერაში მარტო სამი სიტყვა გავარჩიეო (იხ. გვ. 72, დამატება №14, 15). მთავარ ანგელოზის ფეხებს ქვეშ არის კიდევ შემდეგი წარწერა:

ქ რმლმნ . მჭდ : ხ-ტ . ეს : ოქრომჭდლ  
მნ : შუნდვ : ღმთო : დ : ო  
რთ : შვლთ : მ-სთ : შუნდვენ : ღმრთ : ამნ .  
რომელმან მოჭედა ხატი ესე ოქრომჭედელ.  
მან შეუნდევ, ღმერთო, და ო-  
რთა შვილთა მისთა შეუნდვენ ღმერთმან, ამინ.

ხატი, ჩვენი აზრით, იმავე მე-15 საუკუნეს ეკუთვნის, როგორც წინა ხატი.

11. **ხატი მიქაელ მთავარ ანგელოზისა**, ვერცხლისა, ნაჭედი, 53X46 სანტ. მთავარ ანგელოზი წარმოდგენილია სამეფო ტანისამოსით, გრძელის ფრთებით, ლაზარუმით მარჯვენა ხელში და ბურთით მარცხენაში; ხშირი თმა ჰფარავს შუბლს და ჩამოდის ყელამდე კიკინებით; ზემოდ ორ წრეში წარწერაა: წ-ა მ-ქალ. ფონი სადაა (იხ. №17105). ჩარჩო ფართოა, რომბ-ლურსმული ორნამენტით შემკობილი, რვა მედალიონით, რომლებშიაც წარმოდგენილნი არიან ზემოდ: მაცხოვარი, მიქელ მთავარ ანგელოზი და წ-ა იოანე; ქვემოდ, შუაში წ-ა გიორგი ცხენით, ადამიანს გმირავს; მარცხნივ წ-ა მარინე; მარჯვნივ: „წ-ა დოვნე“; მარცხენა აშიაზე: დ დდ ღ-ა, ხელებ აპყრობილი სავედრებლად; მარჯვენა აშიაზე გაბრიელ მთავარ ანგელოზი წელმოხრილი და ხელებ გაშვერილი სავედრებლად; ქვემოდ წარწერაა, რომელშიაც ო და უ ერთნაირად ონით არის გამოხატული:

წო მთავარანგელოზო(sic) შე მქლ თუმანი ამ-ნ.

ხატი მე-16 საუკუნის უნდა იყოს, როგორც №10 სვიფის ხატის ერთის ნაწილისა.

12. ხატი მიქაელ მთავარ ანგელოზისა, ვერცხლისა, ნაჭედი, 27,5X22 სანტ. მთავარ ანგელოზი კვარცხლბეკზეა დამდგარი, მდიდრულ სამეფო ტანისამოსით და გრძელის ფრთებით, ლაბარუმით და ბურთით; ხშირი თმა აქვს, რომელიც შუბლს ფარავს და ყელამდის ჩამოდის; თმიდან, ორივე მხარეს, თმაში გაყრილი ქინძის თავები გამოდის; თავის წრე დიდია; აქეთ-იქით წარწერაა: წ-დ მქლ. ჩარჩო რომბ-ლურსმულია სადა მედალიონებით; ქვემოდ, მარცხნივ ძლივს შესამჩნევი ნაჯღაბნია: „წმდის აგლზის ხატი“. საზოგადოთ ხატი ლამაზი ხელობის არის, მე-15-16 საუკუნისა (№17091).

13. ხატი წა გიორგისა, ვერცხლისა, ნაჭედი, 46X34 სანტ. წა გიორგი აქ ფეხოსანია, რომაულ საომარ ტანისამოსით; მარჯვენა ხელში შუბი უჭირავს; მარცხენა მოგრძო ფარზე აქვს დადებული; თმა ხუჭუჭა აქვს; წრე, თავის ირგვლივ, დიდი; ფონი ქსელოვანი, ჯვრებით; აშიები შემკობილი ხლართული რგოლებით ბალახითურთ; ქვემო აშია მომარცულია, დარჩენილია ხუთი მედალიონი; ზემოდ ვედრება; მარჯვნივ და მარცხნივ თითო წმიდანი, უწარწეროდ. ხატს ზემოდ, ნიშბის ორივე მხარეს, რგოლებში აწერია: წ-ი გ-ი სუჯსდ (სუჯუნისა). ხატი მე-16 საუკ. უნდა იყოს (№17092).

14. ხატი წა გიორგისა, ოქროთი დაფერილი ვერცხლისა, 41X34 სანტ. აქ წა გიორგი ცხენოსანია, მაგრამ ძლივს შესამჩნევი რელიეფით, გვირგვინოსანს გმირავს, რომელსაც უკვე დაუყრია თავის ფარ-ხმალი (№17104). ხატი ძალზე დაჭეკილია და ცვილის სარჩული აღარა აქვს. ზემოდ, „დროზნიცებში“ თითქო წარწერაა, მაგრამ ყოველ შემთხვევაში, არა ქართული. აშიები ბალახოვანის ორნამენტისა აქა-იქ გაფუჭებულია, ქვემოდ სხვა ნაჭრები აქვს დაკერებული; ზემოდ სამი მედალიონია: მაცხოვრისა, წა მხედრისა და მთავარ ანგელოზისა. ხელობა მდარეა, მე-17 – 18 საუკ.

15. ხატი იოანე ნათლისმცემლისა, კარედი, 42X31 სანტ. ფიგურები წამლით ყოფილა დახატული, მაგრამ ეხლა მოშლილია; თვით იოანეს ხატი შუაში ჩასმული, ბერძნულის წარწერით სახელისა; მის ქარტაზედაც ბერძნული წარწერაა. აშია ამ შუა ხატისა გრძელ უჯრებად დაყოფილი სევადით არის შემკობილი. სახე იოანესი სულ გაფუჭებულია (იხ. №17109), იოანეს მარცხნივ წარმოდგენილია ღვთის მშობელი, ბერძნულის წარწერით სახელისა. მარჯვნივ იოანე მახარობელი, ასომთავრულის წარწერით, რომლისაგან დარჩენილია მხოლოდ: „მ-ხრბელი“. ზემოდ იოანეს ხატისა კამარას ქვეშ მაცხოვარი ყოფილა, წელსზევითი, ბერძნულის წარწერით სახელისა, მაგრამ შებრუნებული ასოებით. ნიშბი ჯვარის სახისა არის; ქვემოდ მედალიონებში წარმოდგენილნი ყოფილან ასომთავრული წარწერებით: წ-დ ი-რნ (ირინა) წ-დ ბ-რა (ბარბარა), წ-დ ეკტრინა (ეკატერინა); ეზო ხატებისა და არა კამარის ირგვლივ შემკობილია ლამაზი ბალახოვანი ხლართულებით. ზურგზე კარედისა წარწერაა (იხ. №17089):

: ქ : წო : ი-ნე : ნათლ  
ის მცემ-ლო : შეიწრე : მ  
ცირედი : ესე : მკობაი : ჩემ

წმიდაო იოანე ნათლის  
მცემლო, შეიწირე მცი-  
რედი ესე მკობაი ჩემ

ფოლარიანისა : ცოლისა :  
მარიამისაგან : და ჩემ  
ისა : შვილსა : ჩარგალის  
გან : ად მეუხ  
გუექმენ :.

ფოლარიანისა ცოლისა  
მარიამისაგან და ჩემი-  
სა შვილისა ჩარგალის-  
გან და მეუხ  
გუექმენ.

წარწერა დ. ბაქრამესაც მოყვანილი აქვს (იხ. გვ. 71). ხატი მე-14-15 საუკუნის უნდა იყოს.

16. ხატი მიქელ მთავარ ანგელოზისა, 26X18 სანტ. ფიგურა ყოფილა წამლით დახატული, მაგრამ ეხლა დაზიანებულია; ნიმბი, აშიები და მოცულობა ოქროსი დაცულია (იხ. №17111). ნიმბი საუცხოოდ შემკობილია ბალახოვანი ორნამენტით; მის ორივე მხარეს ლამაზი ასომთავრულით აწერია:

წ-ღ : მექ მთვრნგლზი ლესკილდშისა.

ასო ს ორივეჯერ უკუღმა სწერია. ქვემოდ ერთ-სტრიქონიანი წარწერა ყოფილა, მაგრამ ბოლო აკლია:

[ქ. წო მი]ქელ მეოხ დ მფრვლ მევ მსვს შნს . . . .

ასო ს აქაც ყოველთვის უკუღმა სწერია.

აშიები უჯრებად დაყოფილი, შეცვლით, სევადით და ბალახოვანის ორნამენტით არის შემკობილი. ხატი მე-12-13 საუკუნის უნდა იყოს.

17. ხატი წა გიორგისა, ოქროთი დაფერილი ვერცხლისა, 26X18 სანტ. სულ მოშლილია; დარჩენილია თავი ნიმბით და ხუჭუჭა თმით, და წარწერით: წ-ღ გ-ი. მარჯვნივ დარჩენილი ფონის ნაწილი შემკობილია ვენახოვანი ორნამენტით. აშიები, აგრეთვე შემკობილი ორ-ფლოქოვან ზოლებს შუა, დაცულია, გარდა ქემო ნაწილისა და მარცხენა მხარის ქვემო კუთხისა (იხ. №17111). ალბათ ამ ხატს ეკუთვნის ხუცური წარწერის ნაწყვეტი, რომელიც მე სკივრში ვიპოვე:

. . . ველ ექმენ : ა . . . არ : კვრ . . .

18. ხატი წა ნიკოლოზისა, 24X17 სანტ. ოქროსი; ფიგურა წამლით დახატული მოშლილია; ნიმბი ყოფილა შემკობილი სევადიანი ტალღისებური ორნამენტით. ფონი და აშიები საუცხოო ნაჭედი ორნამენტებით ბროწეულის ყვავილებისა სრულიად დაცულია. ნიმბის აქეთ-იქით, გრეხილოვან წრეებში, წარწერაა ერთობ ლამაზი ასომთავრულით: წ-ი ნკ-ზ (იხ. №17110). ხატი მე-12 საუკ. უნდა ეკუთვნოდეს.

19. ხატი წა გიორგისა, ოქროსი, 27X20 სანტ. წმიდანი ფეხოსანია, შუბით და ფარით; თავის წრე, წერტილოვანი, დიდია. წარწერა: წ-ღ გ-ი. აშიები რელიეფური კრინკიჟებით შემკობილი დაცულია სამ მხარეს; ქვემოდ და მარჯვენა მხარეს აკლია. ფიგურა გიორგისა დაბალი ხელობისაა, მე-17-18 საუკუნისა (იხ. №17110).

20. ხატი ორთა ეკლესიის მამათა, ვერცხლის ფირფიტაზე, 17X15 სანტ. დაბალი ხელობისა (№17090).

21. ხატი წა გიორგისა და წა დიმიტრისა, სრულის ტანით, წარწერებით: წა გი, წა დი. ვერცხლისა, 11X9 სანტ. უფრო ახალი დროისაა (№17090).

22. ხატი მთავარ ანგელოზ გაბრიელისა, ვერცხლისა, ნაჭედი, 43X34 სანტ. მთავარ ანგელოზი წარმოდგენილია სრულის ტანით, ლაბარუმით და შუბით. წარწერა: გზლ მგეი. გვარიანი ნახელავია, მაგრამ შვიდი მედალიონის ფიგურები აშიებზე წმიდათა ტლანქი ხელობისაა. ქვემოდ ხუცური წარწერაა: ჯხს შევნდვ ნ ღნ. ესე იგი „ჯავახს შეუნდვენ ღმერთმან“.

23. ორი გულის ხატი მთავარ ანგელოზ გაბრიელისა, 7,5X6 სანტ. თითო; ტლანქი ხელობის არის.

24. პატარა, მაგრამ ფრიად ლამაზი სპილენძის ზარი, 26 სანტ. სიმადლით; უკვე გაბზარულია (იხ. №17093).

25. დიდი, თუჯის ზარი, ლათინურის წარწერით, რომელიც დ. ბაქრამესაც აქვს მოყვანილი (გვ. 71):

#### **AVE MARIA GRACIA PLENA DOMINUS (TECUM)**

26. სადაფი (№17090).

27. სახარება ეტრატზე, 29,5X22 სანტ. ხის ყდით, რომელზედაც გადაკრული ყოფილა ფარჩა (ეხლა უკვე გამქრალი), ხოლო მის ზემოდ მოოქრული ვერცხლის ფურცელი, ნაჭედი სახეებით და შემკობილობით სოსანის ყვავილებისა.

წინა პირზე წარმოდგენილია მაცხოვარი, სკამის მსგავს ტახტზე მჯდომარე, სახარებით მარცხენა ხელში და მაკურთხევლის მარჯვენით. ნიშნი ჯვარის სახისა აქვს, ბერძნულის წარწერით სახელისა. ტახტი დაბალია, მუხლოვანად შემკობილი, მუთაქით ზემოდ. აშიები ისეთივე შემკობილობის არის, როგორც ოთხკუთხედი ქრისტეს ფიგურით და ოთხი მედალიონით მახარობელთა კუთხეებში. წარწერა ბერძნულია. მარცხენა აშია დაკარგულია და შემდეგ ამოუვსიათ ვერცხლის ზოლებით.

წინა პირზე მოიპოება კიდევ ვერცხლის პატარა „როზეტები“, სულ 13 როზეტია და სხვები აკლია. კუთხეებში, ამას გარდა, შუა ოთხკუთხედთან ყოფილა შემაერთებელი, ჩანგის მსგავსი ფიგურები, მაგრამ დარჩენილია ერთი მარცხენა მხარეს, დაბლა; და ორი ამ გვარივე, მაცხოვრის ოთხკუთხედში, დაბლა (იხ. ფოტ. №17112).

მეორე გვერდი ყდისა თავის შემკობილობით სრულიად იგივეა, რაც წინა პირი, მხოლოდ აქ შემკობილს ოთხკუთხედში ჯვარცმაა წარმოდგენილი, მაგრამ ქვემო ნაწილი ჯვარცმულისა სრულიად მოშლილია. ჯვარცმულის ხელების გასწვრივ

მედალიონებში ღვთის მშობელი და იოანე მახარობელია; ჯვარცმულის ზემო მედალიონში მთავარ ანგელოზია, ეხლა დაზიანებული. პატარა როზეტების რიცხვი აქ რვა არის, ხოლო ჩანგის მაგვარი ორნამენტი სამია დარჩენილი, თითო მარცხენა კუთხეებში აშისა, და ერთი ზემოდ, მარცხენა კუთხეში ოთხკუთხედისა. კვადრატის აშია აქ სამს ადგილას ისეთი ვერცხლის ზოლებით არის ამოვსებული, როგორც წინა პირის მარცხენა აშია. მარჯვენა კუთხეც ზემო დიდი აშისა ცოტა მანძილზე ამგვარათვე არის შეკეთებული. ოთხი კუთხის მედალიონებიდან მახარობელთა დარჩენილია ერთი მთელი, დაბლა, მარჯვენა კუთხეში, და ნახევარი ზემოდ, მარცხენა კუთხეში (იხ. ფოტ. №17113).

ტექსტი სახარებისა ნაწერია ნუსხა ხუცურით, ორ სვეტად; სვეტზე 21 სტრიქონია; თავში მოყვანილია ევსების წერილი კარპიანესთან: ევსები : კარპიანეს : სერ-ლსა : ძმასა : ო-ისა მიერ გიკითხავ. (ეს სინგურით სწერია).

ყველა სახარების წინ ნუსხაა თავებისა. შემდეგ ფერადოვანი სურათი მახარობელისა, მაგრამ ამათგან მხოლოდ ორია დაცული (ერთი მათესი, იხ. №17096); სხვა მოუპარავთ (უვაროვის დროს ყველა იყო დაცული). მოუპარავთ აგრეთვე ფერადებით შემკობილნი კანონებიც. გარდა ხუთისა (ამათგან სამი იხ. №№17094, 17097, 17098).

ყველა სახარებას აქვს თავის მეთაური ფერადოვანი მხატვრობა, „ზასტავკა“ (ამათგან ორი, ერთი მათეს თავისა, იხ №17099, მეორე მარკოზის თავისა იხ. №17095). მხატვრობა საზოგადოთ ხელოვნურად და ფრიად ლამაზად არის შესრულებული სხვა და სხვა ფერადებით.

სახარების ტექსტის ბოლო იხ. ფოტოგრაფია №17100. აქ არის მოქცეული იოანეს სახარების მე-21 თავის მე-21-25 სტრიხები.

სახარების ტექსტის დასასრულს ტექსტის ხელით შემდეგი ბოლოსიტყვაობაა მოყვანილი (იხ. ფოტ. №17101 და 17114):

სახელითა ღ-თისაჲთა მ-მისა ძისა და ს-ლისა წ-სთა :  
მეოხებითა ყ-დ წ-ისა ღ-თსმშობელისაჲთა ძალითა პატი-  
ოსნისა და ცხოველის მყოფელისა ჯ-რისაჲთა, წმიდათა  
მთავარანგელოზთა მიქაელისითა და გაბრიელისითა წ-ისა  
წინასწარმეტყველისა წინამორბედისა და ნათლის მცე-  
მელისა იოანესითა წ-თა მცქლთა წინასწარ მეტყუელთა  
მღდელ მოძღუართა მოწამეთა მამათა მამათ მთავართა  
და ყოველთა წ-თა ზეცისა და ქუეყნისაჲთა. რომელნი  
საუკუნითგან სათნო ეყვნეს უფალსა ჩუენსა ი-ჲ ქე-სა.  
ამათ ყოველთა წ-თა მადლითა და შეწევნითა დავწერე  
ანდერძი ესე ამა წმიდასა სახარებისა შინა მეფისა მოძ-  
ღუარმან ბერმან ილნრიონ(sic) სოფრომის ძემან მას  
ჟამსა ოდეს პატრონმან ღ-თ მეფემან ძემან რუსუდა-  
ნისამან ოპიზით წამომიყანეს და გელათს ქედს წ-თა  
მთავარანგელოზთა წ-ე მამყოფეს ესე წ-ჲ სახარებაჲ  
მიბოძეს და ვითა მმართვედა მათად სადიდებლად და  
სალოცავად ქედს წ-თა (აქამდის ამ ანდერძის ფოტო-  
გრაფია იხ. № 17101). მთავარანგელოზთა შევსწირე და  
მათსა ეკლესიასა დავდევე და რომელი ჩემგან ეგებოდა

მათითა ნაბოდვართა რადცა აკლდა ესე სახარებად შეჰკაზმე და ბარძიმ ფეშხუმი ხვრი და კოვზი ვერცხლისად სიწმიდის სამსახური სრული ლავრისად ხატი წათა მთავარანგელოზთად მომცროდ დავახატვინე და მოვაჭედინე სამღდელოდ ესე ყუფლად პატრონისა ნაბოდვართა მათად სადიდებოდ და სალოცავად ვქმენ და ესეცა გავაჩინე წათა მთავარანგელოზთა წე ოთხნი სანთელნი და ოთხნი კანდელნი სანთებად პატრონისათვისვე ; აწ ვინცა და რამანცა გუარმან კაცმან ამა წმიდისა სახარებისა და ესე რადცა ზემოდთ დაგვწერია ამათ წათა მთავარანგელოზთა ეკლესიისგან გამოღებად ანუ გამოკუფებად ანუ შეცვლად რადსაცა მიზეზისა მიღებითა კელყოს და დააკლოს ჰრისხავსმცა მამად და ძე და სული წად და ყოვლად წმიდა ხახულისა ღთისმშობელი წანი მთავარანგელოზნი მიქელ და გაბრიელ და ესე ზემო წერილნი ყოველნი წანი ღთისანი და კანონსამცა ქუფშე არს წათა მოციქულთა და მღდელთ მოძღვრთასა .:

დაკრულამცა არს დაუსაზამოდსა ღთის პირითა და ოდეს ყნი კრლნი გაქსნენ დღესა მას საშინელსა განკითხვისასა იგიმცა ნუ განიქსნების ყათა ღთისა უვარის მყოფელთა და შემცოდეთა თანამცა დაისაჯების სული მისი<sup>1</sup> საუკუნოდ უკე და ვინცა მტკიცედ და უცვალეზლად იპყრას ესე ყოველივე მადლი და კურთხევად ღად და ამა წათა მთავარანგელოზთად იყავნ მს ზად და საუკუნომცა არს სქსენებელი მისი. და ვინცა კაცი რადსაცა მიზეზისთვს ამის ანდერძისა შეშლასა და ანუ ამოკუფთათასა ეცადოს კრულმცა არს ღთისა მადლითა და ამათ ზემო დაწერილთა კანონთამცა ქუფშე არს. <sup>2</sup>

შემდეგ მოყვანილია ცნობილი ანდერძი გიორგი მთაწმინდელისა. ჩვენ ეს ანდერძი, როგორც ჩვეულებრივი, არ მოგვეყავს; დ. ბაქრაძეს (იხ. გვ. 74) და ა. ხახანაშვილს (გვ. 15) მოყვანილი აქვსთ.

ამით მტკიცდება, რომ ტექსტი ჩვენი სახარებისა გიორგის რედაქციის არის. გიორგის ანდერძის ბოლოს ტექსტის ხელით და კინოვართ, წვრილის ხელით სწერია:

წნო ღთისანო ვინცა მიემთხვნეთ წად ამას სახარებასა ლოცვა ყავ მდაბალთა მონაზონთა ინე და სვმეონისთვს .:

მათეს სახარების ბოლოს სწერია:

ქქე შე სლი ჩემ ცდვლისა სტფნესი .:

იქ, სადაც თავდება მათეს სახარების თავების ჩამოთვლა, მხედრულის ხელით მეცამეტე საუკუნისა სწერია:

ქ. სახელითა ღთისაითა ცაიშის ღთის მშობლისაითა



თვესა სეკდბრსა ათხუთმეტსა მე ცაიშელი მთავარების-  
კოპოსი დანიელი ლაბსაყელდასა მივ(ე)დი ვაკ(უ)რთხე  
მთავარანგელოზი ლაბსაყელდაშისა დემეტრე მეფისა  
მეფობასა შიგა ერისთავთ ერისთავისა დად(ი)ანისა ოზ-  
ბ(ე)გისა ბრძანებითა და მოწმებითა და ცხ(ო)მ(ა)რისა

---

1 აქედან ანდერძის ბოლოს ფოტოგრაფია იხ. 1614.

2 შეადარე დ. ბაქრაძე, გვ. 74-65 და ა. ხახანაშვილი, გვ.15.

ვევმან დაუწერეთ მთავარანგელოზსა ლაბსაყელდაშისა  
საპ(ა)ტიჟუი ზ(ღ)უდესა შიგნით სამოც და ათასისა თეთ-  
(რისა) საპ(ა)ტიჟუი მას გარე საპ(ა)ტიჟუი სადა სარ(ე)კ-  
ლისა ჳმაი ისმის რვაი ათ(ა)სისა თეთრ(ი)სა მისი საპ(ა)-  
ტიჟუი დაგვსა ჳიხუაშისა და ხანსისა. შვა ოთხი ათა-  
სისა თეთრსა საპ(ა)ტ(ი)ჟუი დაგვ(ი)ცსა. მე ცაიშელ  
მთავარებ(ი)სკ(ო)პ(ო)სმან დანიელ ვ(ა)მტკიცე და ჳნ  
(sic) ერთობილთა ჳევთა ცხრომისათა მეფეთ დადიანსა  
ბრძანებ(ი)თა . ვინც გა(ა)მ(ა)გრესა კურთხეულიმც არსა  
ვინც შესცვ(ა)ლოსა კურლმცა არს ღთისა მ(ა)დლითა.  
მე კაკასატასა დავითს დამიწერია და მოწამეცა ვარ ამა  
სიგელისა .

პირველ გვერდზე ამას ემატება:

ქ . ვინც დამნ(ა)ხველი ჳნ შოვა გამოჳნდესა (sic) ან  
ღვშდა (= ხვაშიადი (?)) გაგვმჟღონოსა ათ(ა)სისა თეთ-  
რისა საპ(ა)ტიჟუი გარდავ(ა)ვდევ(ი)ნოთ მთავარანგე-  
ლოზსა გ(ა)ნმომსროლი იყოს<sup>1</sup>.

როგორც სჩანს მონაწერებიდან, ლაფსხალდის სახარების ისტორია მოკლედ ასეთია: სახარება, უნდა ვიფიქროთ, გადაუწერიათ ორს ბერს, იოანეს და სვმეონს, რომელნიც თავიანთ თავს იხსენიებენ ტექსტის ხელითვე მინაწერში იოანეს სახარების ბოლოს. მაგრამ სად და როდის არის დაწერილი სახარება, მოხსენებული არ არის სამწუხაროდ. ეს საძიებელია; სახარება ჳკუთვნებია მეფე დავით ნარინს, რუსუდანის ძეს, (1243-1293), რომელსაც ის უბოძებია თავის მოძღვრის, ბერის ილარიონ სოფრომისძისათვის. ეს ბერი მას გადმოუყვანია განთქმული კლარჯეთის მონასტრის ოპიზიდან და დაუდგენია ქედის მთავარ ანგელოზთა ეკლესიაში, რომელიც დღესაც არსებობს კლდოვან ქედზე, გელათის ზემოდ, აღმოსავლეთით, სულ ახლოს გელათის მონასტრისა. ეს უნდა მომხდარ იყოს მას შემდეგ, რაც დავით ნარინი გამეფდა იმერეთში, ესე იგი, 1258 წლის შემდეგ.

ილარიონ სოფრომის-ძეს, დავითის მიერვე ნაბოძვართ, ქედის ეკლესია გაუმდიდრებია წირვის იარაღით, სამღვდელო შესამოსლით, მთავარ ანგელოზთა ხატით და საწინასწარმეტყველო წიგნით და ეს სახარებაც, „რაღცა აკლდა“,

შეუკაზმავს და ქედის ეკლესიაში დაუდვია. მის ანდერძში მოხსენებული არ არის, რაში გამოიხატებოდა ეს შეკაზმვა, რა აკლდა სახარებას? შეკაზმვა ხელნაწერისა საზოგადოთ გულისხმობს ყდის გაკეთებას და მხატვრობით გამშვენიერებას და გამდიდრებას. ცალკე ფურცლებზე მოქცეულნი მხატვრობანი, მაგალითად, მოციქულთა სურათები, ფერადოვანი კანონები და ცალკე სცენები სახარებისა ხშირად ცალკე მუშავდებოდა და შემდეგ უმატებდენ ხელნაწერს. ზოგჯერ ასეთი სურათები მზამზარეული ბიზანტიიდან მოდიოდა, მაგრამ როდესაც მხატვრობა ტექსტთან არის შეკავშირებული, როგორც არის მეთაური მხატვრობანი

---

1 მთელი ეს მხედრული ხელით მინაწერები დ. ბაქრაძეს არ მოჰყავს. ა. ხახანაშვილს მოჰყავს, გარდა პირველ გვერდზე მინაწერისა (იხ. გვ. 16), მაგრამ ჩვენს და მის კოთხვაში იმდენი განსხვავებაა, რომ ჩამოთვლა შორს წაგვიყვანს; მკითხველმა თვით უნდა შეადაროს.

(„ზასტავკები“), შიგ ტექსტში მოქცეულნი ანუ აშიებზე მოთავსებულნი მხატვრობანი, ამათი ცალკე შემენა და ხელნაწერში ჩამატება შეუძლებელი იყო.

ჩვენს ხელნაწერში ყველა ფერადიანი მხატვრობა ერთი რიგის არის სახარებათა მეთაურ მხატვრობასთან, „ზასტავკებთან“, შედარებით. ამიტომ, უნდა ვიფიქროთ, რომ ფერადოვანი მხატვრობა უკვე იყო სახარებაში, როდესაც ილარიონმა სახარება მიიღო მეფისაგან. მაშასადამე, მას ეკუთვნის ნაჭედი ვერცხლის ყდის გაკეთება. ამრიგად, ყდა მე-13 საუკუნის მეორე ნახევრის უნდა იყოს.

ხელნაწერის თარიღის გამოსარკვევად მარტო წერის ხასიათის და მხატვრობათა რიგის, სტილის მიხედვით უნდა ვიხელმძღვანელოთ. ერთიც და მეორეც, ჩვენის აზრით, მე-12-13 საუკუნეს უნდა ეკუთვნოდეს, და არა მე-11-ს, როგორც დ. ბაქრაძეს (გვ. 77) და ა. ხახანაშვილს (გვ. 16) ჰგონიათ. უვაროვისა მე-13 საუკ. აკუთვნებს, მაგრამ მას ილარიონის მინაწერი ისე გაუგია, თითქოს ხელნაწერის გადაწერის დროს უჩვენებდეს (გვ. 152).

მეორე, მხედრული მინაწერიც ფრიად საყურადღებოა. თავდაპირველად ის უჩვენებს, რომ ლაფსხალდის ეკლესია მე-13 საუკუნეში აუშენებიათ და ის უკუერთხებია 15 სექტემბერს ცაიშის მთავარ ეპისკოპოსს დანიელს, დავით ნარინისავე მეფობაში, რაც უნდა მომხდარ იყო 1258-1293 წლებს შუა; და რაკი მის ფურცელზე ლაფსხალდის ეკლესიისათვის განჩინება დაუწერიათ, ალბათ სახარებაც მის საკუთრებად დაუტოვებიათ. მაშასადამე, ის დიდ ხანს ქედის ეკლესიაში აღარ დარჩენილა. ამ დროს სადადიშკელიანო სვანეთის ეკლესიები, როგორც ირკვევა, ცაგერის ეპისკოპოსის სამწყოს არ შეადგენდენ, არამედ სამეგრელოზე ყოფილ არიან მიწერილნი. აგრეთვე ხელისუფლება აქ დადიანებს ჰკუთვნებიათ. თავის თავად ეს განაჩენი შეადგენს უძველეს კანონს სვანეთის ეკლესიისა, სადაც განმარტებულია, თუ რა ჯარიმა უნდა გაიღოს ეკლესიის სასარგებლოდ, ვინც მას უპატიობას მიაყენებს ეკლესიის ზღუდეს შიგნით, თუ გარედ, სანამდის სარეკლისა ხმაი ისმის. სარეკელი აქ ზარს კი არ ნიშნავს, როგორც ა. ხახანაშვილს ჰგონია, არამედ ფიცრის სარეკელს, რომელიც ზარის მაგიერ იხმარებოდა ძველს დროში.

ეს განაჩენი დანიელ ცაიშელს თავის ინიციატივით კი არ დაუდვია, არამედ მეფისა და დადიანის ბრძანებით. ესეც ფრიად საყურადღებო ფაქტია, რომელიც მოწმობს, რომ მეფეს უფლება არა ჰქონია დადიანის უდასტუროდ ასეთი განჩინება

დაედვა. ერთი ამ აქტის მსგავსი განჩინება ლარგვისის მონასტრისათვის ჩვენ უკვე გამოვეცით (იხ. საქართველოს სიძველენი, ტ. III, გვ. 555-561). შესაძლოა, ილარიონ სოფრომის ძე სვანი იყო და ეს სახარება უანდერმა ლაფსხალდის ეკლესიას.

### განჩინება ცხომარის ხევისა.

ცხომარის თემს ეკუთვნის ერთი ხელშეკრულების წერილი, რომელიც ჩვენ ვნახეთ დეკანოზის იოანე მარგიანის სახლში, ხელშეკრულება დაწერილია ეტრატზე, შეიცავს ორ ფურცელს; ეტყობა, ამოღებულია ტყავის წიგნიდან. მეორე ფურცელი დაუწერელია; პირველ გვერდზე მხედრულის ხელით მე-15 საუკუნისა, შემდეგი განჩინებაა მოთავსებული, რომელიც ჩვენ უცვლელად მოგვყავს:

ქ : სახელითა ღთისაითა დაშეწონითა და ბრძანებითა მთავარანგელოზისა ლაგსაყელდაშისა შეწონითა და-  
ვოწერეთ და დაოდევით დაწერილი ესე მტკიცე და ოქ-  
ცველი დროი დაოდებელი მიზეზი შემო(უ)დებელი რა-  
სა გინდა ჟამსა შემოსროლობასათვისა შეოცვლებელი  
ჩენ ცხმრისა ჳეომან ჳვანსა და ხანსარასა შოვა მსხდო-  
მარეთა ცხმრასა მიწასა ზედა მსხდომარეთა ერთობ ყო-  
ველთა დიდთა და მცირეთა ერთობლათა ერ(თ)მან  
ერთისა ნდომითა და მოწმებითა მას ჟამსა ოდეს ღო-  
ღელოჟგი მოსაგებლასა შემოგვ(ე)ცილნესა მერმე მო-  
ვიგონეთა დავ(ი)მ(ა)გრეთ რაც ცხრმასა ამას იქითა მო-  
საგებელი იქნასა და გ(ა)მოსჩნდესა ან გამოჩინებული  
ჩანსა ყველი მთავ(ა)რანგელოზსადა დაგვ(ი)ცსა მთავარ-  
ანგელოზისა იყოს . შვალად მთავარანგელოზი იყოს,  
შვლადა მთავარ ანგელოზი დაგვისამსა ვინცა ამას შე-  
მოგვეცილოს ან მთავარ ანგელოზსა ან ცხმრისა ჳე-  
ოსა და რაი მთავარანგელოზი არასა და ცხმრისა ჳევი გინდა  
ვ-ნ შემოგვკედესა გინდა ვინ გამოდ(ა)რცოთ გინდა ვისა  
ალ(ა)ფი წ(ა)ოღოთა რაი გინდა ობ-ლოი საშ(ი)ნელი  
საქმე მოჰყვესა რაგინდა გგრძლდესა და გაძნელდესა  
ვინც მთავარ ანგელოზსა მოსაგებელსა არა ერთოსა  
მთავარანგელოზსაგან გამოსროლი იყოს : ესე დაგვიმ-  
ტკიცებია და გაგვიმაგრებია ვინცა ესე შესცვალოსა  
მწერალი წყეულ შეჩვენებული არს სული მისი აქა და  
მას საუკნოსა ურსავე ცხოვრებასა. (უზის 14 ბეჰედი).

### ეწერის თემი

## სოფელი ბარში.

სოფელ ბარშიში არის ციხე-დარბაზი დადიშკელიანებისა, ანუ უკეთ ვსთქვათ, მათი კოშკი, ირგვლივ გაწყობილი სახლებით და შენობებითურთ. ეს კოშკი მთელს სვანეთში უდიდესი და უმაღლესია. სტოიანოვის დროს აქ ცხოვრობდა მთელი ოჯახობა თენგიზ დადიშკელიანისა და მას აწერილი აქვს, როგორც ეს კოშკი და სხვა შენობები, ისე ცხოვრება და ზნე-ჩვეულება მათში მცხოვრებ მთავრის თენგიზ დადიშკელიანის ოჯახისა (გვ. 302-309). გრ. უვაროვის დროს აქ ცხოვრობდა თათარხან დადიშკელიანი (იხ. უვაროვისა, გვ. 43-44), მაგრამ ჩვენს დროს თათარხანი უკვე აღარ იყო ცოცხალი, მისი ძმა ოთარი მუდამ აქ არ ცხოვრობდა, მხოლოდ საზაფხულოდ მოდიოდა; მეორე ძმა, ჯამსუყი სამსახურში იყო (ყარსის ღუბერნატორის თანაშემწე) და იშვიათად ესტუმრებოდა ხოლმე თავის სოფელს. კარგი ხანია ძველი შენობები მათ საცხოვრებელ ბინას აღარ შეადგენდნენ, არამედ ზღუდეს გარედ, გაშლილ ეზოში, ორი ჩვენებური, იმერული, ანუ მეგრული, კოპწია ოდა იყო გაშენებული; ერთი მათ საცხოვრებლად, მეორე სტუმართათვის.

საზოგადო სახე ბარშის სოფლისა, რომელიც ამ ძველ დადიშკელიანების კოშკის შენობებზეა მიკრული, საუცხოოდ მოსჩანს ფხოტერის ეკლესიის ეზოდან; იხილეთ ჩვენი ფოტოგრაფია №17456. კოშკის და ძველი შენობების სახე, იხ. №177, (ამ ფოტოგრაფიაზე მოსჩანს, მოშორებით კიდევ ძველი დადიშკელიანების სოფელი ყურაში). №178, №17453. ერთი ახალი, ხის სახლი და დადიშკელიანისა, იხ. №17454. ბალკონის ქვეშ მოსჩანს სპილენძის ქვაბები, რომლებიც მიწიდან ამოულიათ გათხრის დროს და რომელნიც კუბოს მაგიერ ყოფილან ნახმარნი. საზოგადო სახე ეწერის მინდვრებისა და მთებისა, იხ. №17455.

ძველ შენობებში დადიშკელიანების განსაკუთრებულ ყურადღებას იქცევს ხის ბეღელი, სულ მოხარატებული და შემკობილი საუცხოო ჩუქრუთმებით. ოთარი დაგვირდა მის მოცემას მუზეუმისათვის, თუ კი მის გადმოტანას მოვახერხებდით. ჩვენ დროს ეს არ მოხერხდა.

დადიშკელიანების ეზოს ამშვენებს შტოებ-გაშლილი დიდი ჭადარი, რომლის ქვეშ იკრებიან როგორც ოჯახობა დადიშკელიანთა, ისე სოფლელები; აქ არის სჯა-ბაასი საოზგადო საქმეებზე, სასამართლო, ფიცი, პირობების დადება, თუ სხვა თათბირი. სურათი იხილეთ, უვაროვისა, გვ. 44. ტაბ. XVII, სურ. 30.

დადიშკელიანების სახლში ჩვენ დროს იყო ორი ძველი საარქეოლოგიო ნივთი:

1. ერთი დიდი ვერცხლის ჩარა, მასსიური, 45 სანტიმეტრი დიამეტრით. ფსკერზე ამობურცული, დასრეტილი ვერცხლის შემკობილება აქვს (იხ. ფოტ. №17153). ამას ჰქონია ირგვლივ ხუთი მწვანე ძვირფასი ქვა, ჩასმული ამობურცულ ბუდეებში. დ. ბაქრაძის დროს ყველა იყო. ეხლა ორია დარჩენილი. მთელი შემკობილება, როგორც ეტყობა, წინეთ მოძრავი ყოფილა, ამოღება შეიძლებოდა და მერმე შიგ ჩადგმა, მაგრამ ეხლა მიმაგრებულია ფსკერზე თავლის სანთელით და ვერცხლის ლურსმებით; ირგვლივ ჩარას აქვს სპირალური ჭდები. გარედან ფსკერზე მხედრული წარწერა მოიპოვება. ყოველი სიტყვა შეუმოკლებლად არის მოყვანილი. თითოეული სიტყვის შემდეგ სამ-სამი წერტილი არის. ნიშნებს დედნისა ჩვენ არ ვიცავთ, მით უმეტეს, რომ დ. ბაქრაძეს ეს დაცული აქვს (გვ. 67-68). ჩვენი წაკითხვა მცირედ განსხვავდება დ. ბაქრაძის წაკითხვისაგან:

ქ.: ეჭა ცისა და ქუეყანისა დამზადებელი, მამისა ჩუენისა ადამისა მამავო, ლატალისა მაცხოვარო, ჩუენ მიწამან შენმან და ბრძანებითა შენითა გამაღლებულმან, მეფემ დადიანმა პატრონმა ვამეყ, და დედოფალთა დედოფალმა პატრონმა ელენემ, ოდეს იმერეთს მეფენი გარდაშენდენ და ძალითა და შეწევნითა შენითა ლისა<sup>1</sup>-და შავს ჯიქეთს შუა მეფობა და დაიანობა ჩუენ დავიჭირეთ, და მონდობილმან თქუენმან შემოგწირეთ ჩარა თვალეზიანსი (sic) ესე ჩუენსდა სადღეგრძელოდ და საქმისა ჩუენისა წარსამართებლად და გასამარჯვებლად, სულისა ჩუენისა სახსრად, საოხად, შვილებისა ჩუენისა გიორგის და ბაგრატისა და ასულისა ჩუენისა დარეჯანის სადღეგრძელოდ. შენ მოწყალეო მაცხოვარო ლატალისაო, შეიწირე მცირე შესაწირავი ესე. ხელმოწერილია ხელჩართულად: მეფე ვამეყ მონა შენი. ეს ჩართული გადმოღებული აქვს დ. ბაქრაძეს (დამატება, №10)

1 დ. ბაქრაძე კითხულობს: „ღისა“. ჩვენის აზრით, აქ შეცდომაა. უნდა წერებულ იყო: „ლიხსა“. რაკი წარწერაში ნათქვამია რომ ვამეყი იმერეთის მეფედაც გახდა, ამით ნაჩვენებია იმერეთის საზღვარი.

წარწერა ეკუთვნის ვამეყ მესამეს, დადიანს, გიორგი ლიპარტიანის ძეს, რომელიც მოკლულ იქმნა სვანეთში მე-17 საუკუნის მეორე ნახევარში, დაახლოვებით 1660 ანუ 1661 წელს. (იხილეთ Brosset, H. G. II, 1 liv. pp 274-280).

2. მეორე საყურადღებო ნივთი არის **ვერცხლის კოლოფი**, მცირედ მოყვითლული, 31X18,6 სანტ. სიმაღლით 16 სანტიმეტრი, წონით 20 გირვანქა. არეები კოლიფისა დაყოფილია ექვს წახნაგოვან ფიგურად და შემკობილია ზარნიშით და კუბიკური წარწერებით, ფრიად ლამაზი და ნაზი ხელობისა. ზემო ნაწილს კიდევ სამყური ყვავილების აშია უვლის. წარწერები კოლოფის წაკითხული არ არის. ჩვენ მივიღეთ ზომები, რომ ყველა ნაწილი კოლოფისა გადმოგვეღო უკლებად ფოტოგრაფიულად და ჩვენი ხუთი ფოტოგრაფია სრულ წარმოდგენას გვაძლევს ამ კოლოფის შესახებ. წინა პირი სიგრძისა იხ. ფოტ. №17155, უკანა პირი სიგრძისა იხ. №17156; ზემო ნაწილი სახურავისა იხ. №17154; მარჯვენა მხარე განისა იხ. №17157; მარცხენა მხარე განისა იხ. №17158 გრ. უვაროვისას მარტო ერთი სურათი აქვს მოყვანილი ამ კოლოფისა (იხ. გვ. 142, 143, სურ. 70).

ეს კოლოფი უნახავთ ერთ-ერთ კოშკში ეწერის საზოგადოებისა და შიგ ყოფილა ჩადებული სარტყელი, რომელიც თამარ მეფის სახელით მოუნათლავთ. სარტყელი ბოლოს და ბოლოს გამხდარა საკუთრება სამეგრელოს თავადის ნიკო დადიანისა. ის გამოცემული აქვს გრ. უვაროვისას (იხ. გვ. 144, სურ. 71). უვაროვის გამოკვლევით, ეს არის გერმანული ხელობის ნივთი, მე-16 საუკუნისა.

აქ მეტი არ იქნება შევნიშნოთ, რომ ეს ორი საყურადღებო ნივთი, ვერცხლის ჩარა და კოლოფი, ჩვენ უკვე ვიყიდეთ პატრონისაგან ჩვენი თავისუფლების დროს და გადავეცით ნაციონალურ მუზეუმს.

3. წინეთ კიდევ, დადიშკელიანის ოჯახში ყოფილა ვერცხლის შანდალის მსგავსი ნივთი, ლამაზი ევროპული ხელობისა, რომელიც ეხლა დაკარგულად ითვლება, მაგრამ მისი ფოტოგრაფია ერმაკოვის გადმოღებული დარჩენილა, იხ. №7815. როგორც ამბობენ, ეს საყრჩოლებელი უნდა ყოფილიყო, გერმანული ხელობისა.

4. დადიშკელიანის ოჯახში იყო კიდევ ხის სკივრი ანუ კოლოფი, სადაფებით შემკობილი, დამასკური რიგისა. ამ კოლოფის ფოტოგრაფიული სურათი ხელთ გვაქვს, მაგრამ ის სხვის მიერ არის გადაღებული და ნომერი არა აქვს; კოლოფზე ძვეს, ორი, ზემოდ აღწერილი ნივთიც, ჩარა და ვერცხლის კოლოფი.

### სოფელი ყურაში.

მახლობლად სოფელ ბარშისა არის სოფელი ყურაში, რომლის პატარა ეკლესია ყოფილა წინანდელი სასაფლაო დადიშკელიანებისა. ეს ეკლესია აღწერილი აქვს ალ. სტოიანოვს თავის მოგზაურობაში (გვ. 320-321), ხოლო მისი ტყავის სახარება ნაკლული, უნახავს ნიკო მარს 1912 წელს. ამ სახარებას ჰქონია ორი მინაწერი ტექსტის ხელით; ერთი მარჯოზის სახარების ბოლოს:

ამის წისა სახარებისა / დაწერა ჰლდ ინაჲ / ხემტინის

ძემნ იურ(ვ)ა და დაიწერა მისი/თა საურავითა :

ოო ღთო მოივს-ნე / ინაჲ ხემტინის ძე / მეულლე და

ძენი / მისნი და შეუნდვენ / ყნი ცდვანი მთნი ან .:

ლუკას სახარების ბოლოს:

ქე ღე შე სლითა / ამის წიგნისა მწე/რალი ცდვლი გი :

მოჰყას რა ეს მინაწერები, ნ. მარრი სამართლიანად დასძენს, რომ ქართული ხელნაწერების არსებობა სვანეთში მარტო გარედან შეტანით კი არ აიხსნება, არამედ თვით განათლებულ სვანთა დაკვეთით (იხ. „ხრისტიანსკი ვოსტოკ“, ტ. II, გვ. 5-6).

ყურაშის სასაფლაოზე ა. სტოიანოვი აღნიშნავს უძველეს სასაფლაოს დიდ ქვას, რომლის ქვეშ რკინის ნაჭერი ემჩნევაო. ამ რკინის კუბოში, განაგრძობს სტოიანოვი, განისვენებს უძველესი დიდი ოთარი, მესამე მამამთავარი დადიშკელიანებისა, მაგრამ ხალხს უკე დაავიწყდა მისი სახელი და ჰგონია, აქ ვიღაც ძველი გოლიათი არის დამარხულიო.

როგორც გავიგეთ, ეს საფლავი შემდეგ გაუხსნიათ. მიცვალებული, კუბოს მაგიერ, ორ დიდ ქვაბში ყოფილა მოთავსებული. ქვაბის თავები ერთი ერთმანეთზე ყოფილა მიდებული: ეს ის ქვაბებია, რომელნიც ეხლა დადიშკელიანების ხის სახლის ბალკონის ქვეშ არის დაცული. მიცვალებული მდიდრულ ტანისამოსით და იარაღებით ყოფილა დასაფლავებული.

### სოფელი ფხოტრერი.

ფხოტრერი თავი სოფელია ეწერის თემისა. მისი მთავარანგ. ეკლესია ითვლება შტატის ეკლესიად ეწერის თემისა. ეკლესია შედარებით დიდია; აშენებულია თლილის ქვისაგან და იმგვარი ბაზილიკური რიგის შენობაა, როგორც ლატალის საზოგადოების ეკლესიები ენაშისა, მაცხოვარიშისა და სხვა. ცენტრალურ ბაზილიკას სამი მხრიდან, სამხრეთიდან, დასავლეთიდან და ჩრდილოეთიდან ახლავს ეკვტერები, გაერთიანებული შიგნით. შესავალი აქვს სამხრეთიდან, ორკამაროვანი, სვეტით შუაზე, და შემდეგ ეკვტერიდან შუა ბაზილიკაში. აღმოსავლეთის მხარე შემკობილია ორის უბით და შუაში ზემოდ მორგვალეზულის ფანჯრით და მისი ორმაგი ჩარჩოთი, ხოლო ეკვტერების ფანჯრების ჩარჩოები ოთხკუთხედაა (იხ. ფოტ. №17620). შესავალი კარი, ურთხელის ხიდან გაკეთებული, მოხარატებულია და შემკობილი ექვსი წმიდათა ფიგურებით და სხვა საუცხოო ჩუქურთმებით, იხ. ჩვენი კარგად გამოსული ფოტ. №17144, და აგრეთვე უვაროვისა, ტაბ. XXXVIII, №66.

კედლები ეკლესიისა სულ მოხატული ყოფილა, მაგრამ ეხლა გაფუჭებულია. კანკელი გადაკეთებულია; აღსავალის კარის გარდა მარცხენა კამარაში მეორე კარი გაუკეთებიათ. ცუდ მდგომარეობაშია შენობა, ინგრევა. ეკლესიაში ჩვენ ვნახეთ:

1. **ჯვარი ხისა**, კანკელის საწინაო, სიმაღლით 3 არშინი და 10 ვერშოკი, განით 1 არშინი და 11,5 ვერშოკი (№17141); შეძერწილია ვერცხლის ფირფიტებით წმიდათა სახეებისა; ზემოდ მაცხოვარია ტახტოსანი; მის ქვემოდ ორი წელსზევითი წმიდანია და მთავარ ანგელოზი გაბრიელ, წარწერით: წა გლ. უმბოს ქვემოდ: მთავარ ანგელოზი მიქელ: წა მქლ. მის ქვემოდ: წა გიორგი; კიდევ ქვემოდ: ორი მთავარ ანგელოზი; მარჯვენა და მარცხენა მკლავებზე აგრეთვე მთავარ ანგელოზები და წა გიორგი ცხენით და ორი სხვა წმიდანი. საზოგადოთ ხელობა დაბალია; საუკეთესო ფირფიტები პირველ ორ მთავარ ანგელოზის არის და არა წა გიორგისა, როგორც შენიშნავს გრ. უვაროვისა (გვ. 180).

2. **თავი ხატი ეკლესიისა მთავარ ანგელოზთა**, ფრიად დიდი, სიმაღლით 2 არშინი და 4 ვერშოკი, განით 1 არშინი და 6 ვერშოკი (იხ. ფოტ. №17143). ძლიერ ცუდათ არის დაცული: მთავარ ანგელოზ გაბრიელის ტანი თითქმის მთლად მოშლილია; მიქაელ, მარცხნივ, უკეთ არის შენახული; წარწერები ლამაზი ასომთავრულით: წა მქლ, წა გბრლ. მთავარ ანგელოზთ მედალიონი მიაქვთ ქრისტე ემმანუელისა. მთავარ ანგელოზები წარმოდგენილნი ყოფილან მდიდრულ სამეფო ტანისამოსებით და საზომებით ხელთა. ეზო და ნიშნები ლამაზის ორნამენტით არის შემკობილი; აშიები, რომბ-ლურსმული, ეხლა შეიცავს რვა მედალიონს წმიდათა, ასომთავრულის წარწერებით: ქრისტე, იოანე ნათლის მცემელი, წა ანდრია, (ღვთის მეტყველი), წა პავლე, მათე, ლუკა. ხატი მე-14 საუკუნ. უნდა იყოს.

3. **ჩარდახი ხატებისა**. წინა ხატი მოქცეული ყოფილა ჩარდახში, კანკელის წინ, მაგრამ ეხლა ჩარდახი სულ დაშლილია; ის ისეთი ფორმის ყოფილა, როგორც ლახუშტის ეკლესიის ჩარდახი: თავი გუმბათის მსგავსი აქვს, სვეტები ლურსმული ორნამენტებით და წმიდათა მედალიონებით არის შემკობილი, რომელთა შორის დარჩენილნი არიან: მაცხოვარი მთავარ ანგელოზებითურთ, წა გიორგი და კიდევ

მთავარ ანგელოზნი, სრულის ტანით და წარწერით: წ-ე გ-ი, მთავარ ანგელოზი. ამის ქვეშ წარწერაა:

წ-ო მთავარანგელოზო

შე მქალ თუმანი ა-მნ.

ჩარდახი მსხვილი მძივის მარცვლებით არის შემკობილი; ერთი მარცვალი დიდი მინისა შიგნით შემკობილია მხატვრობით.

აქ ყოფილა კიდევ მეორე ჩარდახი ამგვარივე სახისა. მაგრამ კიდევ უფრო დაშლილია და მისი სვეტები სასანთლეებად გადაუკეთებიათ.

4. ხატი მთავარ ანგელოზთა მიქელ და გაბრიელისა, ვერცხლისა, მოოქრული, ნაჭედი, 44X35,5 სანტ. მთავარ ანგელოზთა მოაქვთ მედალიონი ქრისტესი (იხ. №17135); ზემოდ მხედრულად სწერია; ქ : მიქაელ : და გაბრიელ : ეს ხატი გაკეთებულია წინა ხატის კომპოზიციის მიხედვით, მაგრამ ერთობ ტლანქი, როგორც ყველა ხატი ლევან II დადიანის დროისა და მისი ბრძანებით დამზადებული და შეწირული. ფიგურები, ჩაცმულობა, ფრთები, ყველაფერი ულახათოა; ფონი, ბალახის მაგიერ, რაღაც ჯოხების მაგვარი ხაზებით არის უშნოდ შემკობილი. თანამედროვე აშია დაცულია მარჯვნივ და მარცხნივ მხვეველი მცენარის სახისა, ხოლო ზემო აშია შესდგება სხვა ხატების აშიის ფრაგმენტებისაგან და შუაში წარმოდგენილია საკმაოდ ლამაზი თავის ფიგურა წ-ა ვლასესი, ასომთავრული წარწერით: წ-ე ვლასე. ქვემო აშიაც ფრაგმენტებისაგანაა შემდგარი და ორი ნაჭერი რომბ-ლურსმული ორნამენტის არის, მათ შორის წარწერის ფრაგმენტი სხვა ხატისა:

... ეფთმესი და წინ ...

... ამანის ძე ...

... ჯოხის [ძე] (=ჯოჯხისძე).

მეორე გვერდზე ხატისა მხედრული ვრცელი წარწერა ლევან II დადიანისა, რომელიც მოყვანილი აქვს დ. ბაქრაძეს (გვ. 61-54). და რომელიც ჩვენ ფოტოგრაფიულად გადმოვიღეთ (იხ. №17136). წარწერა შეიცავს 36 სტრიქონს; ყოველი სიტყვის შემდეგ სამ-სამი წერტილია, რომელსაც ჩვენ არ ვიცავთ (დ. ბაქრაძეს დაცული აქვს). როგორც ფოტოგრაფიაზე სჩანს, სამ ადგილას ვერცხლის ფურცელი ამოტეხილია ცოტ-ცოტად და ამათი წარწერა დაკარგული. სხვა იკითხება ასე:

ეტლნო ღთისანო, საყდარო საშინელო, ცეცხლნო, სულად სიტყუითა კაცთა მეოხად შექმნილნო, ბრძანებითა საღთო ამის ყოფითა მორტყმულნო, მიხაილ ძალით, მთავარნო, გაბრიელ ქალწულისა ხარებითა კაცთა ღთისა, თქუნენ, რომელნი წამისწოფითა ღთისა ბრძანებასა უხილავად ძლიერებითა უმჯობესსა განაგებთ, რომელნი სცავთ ცასა და ქუეყანასა ფრთითა თქუნითა, მხოლო აწ მეცა მაჩრდილეთ მეოხება თქუნენი, მე დადიანსა ლევანს, მთავარანგელოზო მიქაილ და გაბრიელ! სახელითა ღთისათა და ძალითა და შეწევნითა შენითა ჩუენ, კელმწიფემან დადიანმა პატრონმა ლევან, მოველაშაქრენით მეფესა ალექსანდრესა და მის ძმას მამუკაზედა და მოვედით ქუთაის ციხის საბრძოლად, თავად მეფე, სრულ იმერელნი და სვანი ლეტეხელნი



და საფარ-ფაშის მეთოფეები ბევრ ახლდა, და ციხესა და ჯებირშიდან იდგენ. ჩუენ მივედით და სოფია წმიდის საყდარი მეთოფეებით აევსო და გაემაგრებინა. უყავით ღამით იერიში და საყდარი წავართვით. რაცა მეომარი მეთოფეები იდგა, ყველა გამოვასხით. ჯებირს გარეთ ორი დიდი ქვის პალატი იყო ძველითგან ნაშენები და ის მეთოფეთა და მეომრის კაცით აევსო და გაემაგრებინა. სოფია წმიდის საყდართანა დიდი ზარბაზანი მივიტანეთ და იქიდალმა დაუწყეთ სროლა და ცემა იმ ქვის სახლებსა, და დავამტრიეთ ზარბაზნებითა, და მრავალი კაცი შიგ მდგომნი დავხოცენით. მერე იერიში უყავით და იქით მეფემ გამოაშველა ლაშქარი, დაუშინეს ერთმანეთსა თოფითა სროლა და საკვირველი ომი შეიქნა, მრავალი კაცი დაიხოცა იქითაც და აქეთაც. იქით მოკვდა თავადი და აზნაურიშვილი : გიორგი ლორთქიფანიძე, ელიზბარ ლოლაძე, ორი ძმა ახულედიანი . . . და კვირიკე, სხუა ზოგი დაიხოცა და ზოგი დაიკოდა, და წავართვით ის ქვის პალატები . . . (ც)იხეზედანს . . . (ზარ)ბაზნები ვერ მიუტანეთ, მისატანი ალაფი არა გვქონდა. წამოვედით დაბლა რიონის . . . (პირ)სა დავდეგ(ით) . . . სასახლის ქვის სახლებს დაუწყეთ ზარბაზნებითა სროლა და ცემა. დავამტრიეთ ის ახალ(ი) . . . ქვის პალატი, თუით ალექსანდრე მეფისაგან აშენებული, გაუსივით ლაშქარი გაღმა ქუთაისის ქალაქსა, დავხწვით და მოვაოხრეთ, მრავალი იშოვეს, და წამოვედით გამარჯვებული, მოვედით ოდიშს ძიგურს და ერთი კვირე ა. . . ოსულა . . . ე ვქენით ილდარი, ცხენის წყალს შემოვიღამეთ. ის ღამე ვიარეთ და გათენების დროს . . . სასახლესა და ქალაქს, უწინდელისაგან ოთხი და ხუთი ზომა საშოვარი ალაფი და ტყვეები ვიშოეთ, რომ ლაშქარი ძლივ დაერივა, და წამოვედით გამარჯვებული, შევასვენეთ ლაშქარი და ცხენი და კიდევ გავილაშქრენით იმერეთზედ თვესა თებერვალსა და მივედ . . . ურიას აჯამეთს, დავსწვით და ავაოხრეთ, მივედ(ით) . . . ჩხარის ქალაქსა და . . . და იქ დავდეგით და სოფლები და ნაშ . . . რულ დასწვეს და ააოხრეს სქანდა მ. . . სასა . . . დავსწვით ვარდის-გორა და ჩიხორი ქალაქი და ესკა . . . დეთ არგვეთს რუთ . . . ს . . . მისა . . . აახლეს დავდეგით და იქიდალმა ჩუენმა ლაშქარმა სრულ არგვეთი და ქალა-ტყეს (რაც) სასახლე და სოფლები იყო დაუწვავი და აუოხრებელი არა დააგდეს რა. აქიდალმან ავიყარენით და თერჟოლს პათთაც და გოფანთოს მხეიდის სასახლეს დავდეგით, და იქიდალმა, სადაც ლაშქარი მიუწვევდა, დაუწვავი და აუოხრებელი არ დააგდეს

რა. წამოვედით გამარჯვებული და ნაშოვრით სავსე, რომ ლაშქარი ვერ დაერივნეს, ბალახოვანზე რიონს გამოვედით და ქუთაის ციხიდაღმა მეფე და სრულ იმერელი ლაშქარი შეყრილი თვალთ გვიმზერდენ, მისის თემისა და ქვეყნის ამოწყვეტას ხედევდა, იმდენი სანაშოვარის ტყვეების ჟღივილი ყურით ესმოდა, მაგრამ ციხიდაღმა თავი არ გამოყვეს და ვერცარა დაგვაკლეს, ასე შევარცხვინეთ და წამოვედით ოდიშს გამარჯვებული მას ჟამსა, ოდეს მოვაჭედინეთ ხატი ესე, ოდეს იმერეთიდაღმა მოვედით გამარჯვებული, გამოვგზავნეთ და დავასვენეთ ტაძარსა შენსა ვხსტრელსა და ალაგსა და თემსა ეცერსა ხატი ესე მთავარანგელოზისა, ქორონიკონსა სამას ოცდაათოთხმეტსა (= 1646).

5. ხატი იესო ქრისტეს ნათლის ღებისა, ვერცხლისა, მოოქრული, ნაჭედი, 63X41 სანტ. ისეთივე ტლანქი ხელობისაა, როგორც წინა ხატი; შეწირულია იმავე ლევან II დადიანის მიერ (იხ. №17133), მაგრამ კომპოზიცია ხატისა რთულია და ძველი. ზემოდ, ლენტის ქვეშ, რომელიც კამარის მსგავსად ხელთ უჭერიათ მთავარ ანგელოზებს, წარმოდგენილია მაცხოვარი წელსზევითი. მას მარცხენა ხელში სახარება უჭირავს, მარჯვენა ხელით აკურთხებს; მაცხოვარს აწერია ასომთავრულით: იესო ქრისტე, ხოლო მთავარ ანგელოზებს: მიქელ და გაბრიელ მთავარ (sic) - ანგელოზნი. ქვემოდ წარმოდგენილია იორდანეს მდინარე, რომელშიაც მოსჩანან თევზები. იორდანეში სდგას ქრისტე და მცირედ მოხრილია იოანეს მიმართ, მარცხნივ, რომელიც ხელს სდებს მას თავზე. მარჯვნივ მას მსახურებს ორი ანგელოზი. ზემოდან, ქრისტეს თავზე ჩამოდის სული წმიდა ტრედის სახით. მთელს სცენას წარწერა აქვს:

ქ . აქა ნთალს (sic) ილო ქრისტე.

მარცხნივ იოანე ნათლისმცემელისა ასომთავრული წარწერაა:

მცხოვა	მაცხოვა-
რო .: შეწიე	რო <sup>1</sup> , შეეწიე
ორსვე ყო	ორსავე ყო-

1 აქ აღარ ვიცავთ უმართებულო მართლწერას დედნისას.

ფას : ფარი	ფას ფრი-
ად (sic) ცოდვ	ად ცოდ-
ილს : ოქო	ვილს ოქ-
რო მაჭ	რო მჭე-
ედელს .:	დელს
ბეჟნ	ბეჟანს
ს : წიქრ	წიქ-

ის ძეს

რის ძეს.

ზემოდ, მაცხოვრის და ნათლის ღვთის სურათების შუა, მხედრული წარწერაა:

ეჰა დაუსაბამო დაუსრულებლო ღთო ცისა და ქუეყ-  
ნის დამწყებელ დამარსებლო მაცხოვარო წალენჯიხისა  
ჩვენ ცვაფარვათა შენთა მონდობილმან და მოსავმან  
სიწმინდისა შენისამან დადიანმან ლეონ დაგასვენეთ ეც-  
ერს ჩვენდა სადღეგრძელოდ და გასამარჯვებლად და  
საოხად სულისა ჩუენისათჳს. ამინ.

აშიები ხატისა სხვა და სხვა გვარია და მრავალი მათი მედალიონი სხვა და სხვა  
დროის და ხელობის არის. საუკეთესო არის ორი მთავარ ანგელოზის ფიგურა, ზემოდ  
მარჯვენა და მარცხენა აშიებზე, წარწერებით: მიქელ ანგელოზი, გაბრიელ ანგელოზი,  
შემდეგ კიდევ ერთი ფიგურა მარცხენა აშიაზე, ქვემოდ, რომელსაც აწერია: „გე  
საკურელთ მოქმედი“. სხვა მედალიონებზე წარმოდგენილნი არიან მაცხოვარი  
(სამჯერ), ღვთის მშობელი, წა გიორგი წარწერით: წა გი ხლდრისა; და სხვა.

ხატი შემკობილია ძვირფასი ქვებით. ზემოდ ორი ქვა მინით არის დაფარული და  
ერთზე წარწერა მოსჩანს.

6. ხატი მაცხოვრისა, 72X54 სანტ. ყოფილა წამლით დახატული, მაგრამ  
მხატვრობა ეხლა მოშლილია; დარჩენილია ზემო ნაწილი პერანგისა, საუცხოოდ  
შემკობილი ნიშნი ჯვარის სახედ და ასეთივე ნაზად შემკობილი აშიები. ბალახ-  
ყვავილოვანი; ნიშნი კიდევ გამშვენირებულია ცხრა ძვირფასი ქვით (იხვ. ფოტ.  
№17131). წარწერა სახელისა ბერძნული ასოებითაა. ხელობა მე-12-13 საუკუნის არის.  
ქვემო აშიაზე სამ-სტრიქონიანი წარწერა მოიპოვება:

1. ქ : არსო : თვითებით(sic) მყოფობისათჳს(sic) ღო :  
სჯულთა : შენთა : მტკიცედ : მპყრობლისა : მეფეთა : მე-  
ფისა : დიმიტრის ა<sup>1</sup> : სჯლისა მ ფისა : და მეფეთა : მიზ-  
სა : გი : დისა :
2. სულტანთა : სძლისა : რუსდნ დედოფლისა : სამსახვრებ-  
ლად : შენა : შემზადებულნი : ნივთნი : ვინათგნ : ქმნ :  
არ დარ-სცნა : სრულებად : ჩემ : გაზრდილისა :
3. მათის : და : ღმობ-თ : მგნ-ბელის : გ-ის : ასჯლის : დე-  
დოფლისა : რჯსდანისგნ : სარჯლ (sic) : ქმნილნი : მით-  
ჯალენ : მეოხ მ-ნ : მათმ-ნ : მკვდრ (sic) ყვფად (sic) :  
სჯევისა :.

---

1 აქ ორი წერტილი თავის ადგილზე არ არის; უნდა იყოს დიმიტრის: ასჯლისა :

მართლწერა სიტყვებისა წარწერაში ზოგჯერ სრულიად შეუსაბამოა: ასო ი-ნის  
ხმარება უს შემდეგ პირველი სტრიქონის ორს სიტყვაში და მესამის ერთ სიტყვაში;  
„სარჯლ“ „სრულ“-ის მაგიერ მესამე სტრიქონში; „ყვფად“ „ყოფად“ -ის მაგიერ იქვე.

რაც შეეხება ჯ-ს ხმარებას უის მაგიერ, ეს ჩვეულებრივია, ვინაიდან აქ იგულისხმება გამოშვებულად ო-ნი. წარწერის დამწერი სვანი უნდა იყოს.

ეს წარწერა დ. ბაქრაძეს გადმოუღია ხელით (იხ. დამატება, №9) და მოჰყავს მისი სრული რუსული თარგმანი, არა ჯეროვანი. დ. ბაქრაძე თვით ამბობს, აზრის აღდგენა უკანასკნელი სამი სტრიქონისა მნელიაო (იხ. გვ. 66). ბაქრაძის წინეთ წარწერა დეკანოზ ქუთათელაძის მიერ მიწვდილი ბროსემ დაბეჭდა შეცდომებით (Rapp. X, გვ. 61). ა. ხახანაშვილს აგრეთვე დაბეჭდილი აქვს ტექსტი წარწერისა, მაგრამ შეცდომებით და რუსული თარგმანი არ მოჰყავს (იხ. გვ. 39). სხოლასტიური სტილი წარწერისა მართლა აძნელებს აზრის გაგებას, მაგრამ ჩემთვის ერთი ამკარაა, რომ წარწერა თამარ მეფეს ეკუთვნის, თუმცა ის თავის სახელს არ იხსენიებს. აზრი ყოველ შემთხვევაში ასეთია: მეფეთ მეფის დიმიტრის (დიმიტრი I, დავით აღმაშენებლის ძე) ასულს და დას მეფისა და „მეფეთ მზისა“ გიორგისა (იგულისხმება გიორგი მესამე, თამარის მამა) სულტანთა სძალს, რუსუდან დედოფალს (ის იყო მეუღლე ხორასნის სულტანისა), შეუმზადებია ამ ხატის ნივთნი (მასალა), მაგრამ სიკვდილის გამო აღარ დასცალეზია ხატის დამთავრება. ამის შემდეგ რუსუდანის მიერ აღზრდილს (ესე იგი თამარ მეფეს; თამარი მართლა მისი აღზრდილი იყო), და მის ღმობით მომგონებელს, გიორგის ასულს (თამარი ხომ გიორგი მესამის ასული იყო), სრულ უქმნია, თავის მამის დის, რუსუდან დედოფლის, დაწყებული საქმე: ხატი დაუმთავრებია, შეუწირავს ეკლესიისათვის და მაცხოვარს სთხოვს: „დედოფლის რუსუდანისაგან მიითვალე ეს შენ, მისმა მეოხმან, მკვიდრ ყოფად მისა სუფევისა“-ო. ეს საერთო აზრი ჩემთვის ცხადია და თუ ტექსტში ეს ნათელი არ არის, ეს მისი ბრალია, რომ სიტყვები გადასმულია: ორი სიტყვა მესამე სტრიქონისა: „დედოფლისა რუსუდანისაგან“ უნდა გადატანილ იქმნას სიტყვის შემდეგ „სრულ ქმნილნი“ და მაშინ აზრი ცხადი იქნება. და წარწერა უქარაგმოდ და ზოგიერთი შეუსაბამოდ ორთოგრაფიის გასწორებით ასე უნდა წავიკითხოთ:

არსო თვთებით მყოფობისათვს, ღმერთო, სჯულთა შენთა მტკიცედ მპყრობელისა, მეფეთ მეფისა დიმიტრის ასულისა, მეფისა და მეფეთ მზის გიორგის დისა, სულტანთა სძლისა, რუსუდან დედოფლისა, სამსახურებლად შენდა შემზადებულნი ნივთნი, ვინათგან ჟამმან არ დასრსცნა (ესე იგი: არ დააცალა) სრულებად, ჩემ გაზრდილისა მათის და ღმობით მგონებელის (მომგონებელის), გიორგის ასულის, სრულ ქმნილნი, დედოფლის რუსუდანისაგან მიითუალენ მეოხმან მათმან მკვდრ ყოფად სუფევისა.

**7. ხატი ღვთის მშობლისა, 69X48 სანტ.** ყოფილა წამლით დახატული. მხატვრობა ეხლა სულ მოშლილია, დარჩენილია ზემო ნაწილი პერანგისა, ნიშბი და აშიები სრულიად ისეთივე საუცხოო ხელობისა, როგორც წინა ხატი, ამიტომ იმავე მე-12-13 საუკ. უნდა ეკუთვნოდეს. (იხ. №17132). წარწერა სახელისა: დ-დ ღ-სა.

**8. ხატი მაცხოვრისა, ოქროთი დაფერილი ვერცხლისა, ნაჭედი, 67X49 სანტ.** ძლიერ დაზარალებულია; მაცხოვარი წელსზევითია. მაკურთხეველის მარჯვენით; მარცხენაში სახარება უნდა სჭეროდა, ეხლა მოშლილია. მოშლილია აგრეთვე სრულად პირის სახე და აქ ცარიელ ადგილს ჩაუდგამთ პატარა ვერცხლის ხატი მაცხოვრისა ტახტოსანი (იხ. №17134). ნიშბი ჯვარის სახისა შემკობილია ორი ძვირფასი ქვით. ფონი ჭადრაკის მსგავსია ჯვრებითურთ, ხოლო ზემო ნაწილი ბალახოვანი

ხლართულებით არის შემკობილი, ფრიად კარგი ხელობისა, მე-12-13 საუკუნისა. ზემოდ, შუაში ტახტის შემზადებაა, კუთხეებში ლამაზი „დროზნიცები“. მარცხნივ და მარჯვნივ ნიშბისა, კუთხეებში, მედალიონები ყოფილა წმიდანებისა, ალბათ დედა ღვთისა და იოანე, მაგრამ ეხლა ცარიელია, წარწერა სახელისა ბერძნულია „დროზნიცებში“.

9. **დასაკეცი ხატი-სანაწილე**, 32X26 სანტ. მრავალის ნაწილებით და მინიატურული, ეტრატზე დახატული სურათებით, რომელნიც შუშებით არიან ზემოდან გადახლართულნი, ისე როგორც ენაშის ჯვარი, ჩვენ მიერ ზემოდ აღწერილი. შიგნით ხატი დაყოფილია მარმარილოს ნაჭრებით; უჯრედებში მინიატურებია, ეტრატის ნაჭრებზე დახატული ფერადებით; ხოლო ზოგიერთ უჯრედების კუთხეებში მოსჩანს ოქროს ბასმებზე ფიგურები თითო-თავიანი არწივებისა. მინიატურებიდან ეხლა დაცულია მხოლოდ: ხარება, იერუსალიმში შესვლა და იუდას ამბორი. სხვა დაკარგულია. ა. სტოიანოვის დროს აქ ყოფილა კიდევ ამალღება და ჯვარცმა (გვ. 326); სხვა ფიგურები მას არ შეუნიშნავს. გარედან ეს ნაწილი შეძერწილი ყოფილა თხელი ოქროს ბასმით, ზედ გამოსახული ტახტოსანი მაცხოვრის სურათებით, არწივებით და გრიფონებით, მაგრამ ეხლა ყველა ეს გაფუჭებულია და აქა-იქ ნაფლეთებია დარჩენილი. სამწუხაროდ ფოტოგრაფიაზე არ გამოვიდა ისიც, რაც დარჩენილია ამ ერთს დროს შესანიშნავი ლამაზი ნივთებისაგან, უსათუოდ მე-11-12 საუკ. (იხ. №17140). სვანები ამ ხატს ეძახიან **მოჩქილ** (ესე იგი მოციქული). ჯვრები და ფიგურები უჯრედებისა ზოგჯერ მოცულია წვრილი მარგალიტებით და სხვა ქვებით. გრაფინია უვაროვისა ამ ხატს მოკლედ იხსენიებს და ბიზანტიურ ხელოვნების მე-11 საუკუნის ნაშთად ხადის (გვ. 181), მაგრამ ეს უფრო კათალიკური ხელოვნების რიგისა უნდა იყოს, რასაც მოწმობს სტოიანოვიც, რომელსაც ამ უჯრედებიდან ორი ეტრატის ფრაგმენტი გამოუძვრია, ლათინურის წარწერით, მაგრამ გადმოღება, სამწუხაროდ, ვეღარ მოუხსრია (გვ. 326).

10. **დასაკეცი ხატი-კარედი, ნაწილებითურთ**, რომელიც სულ მოშლილი და გაფუჭებულია. როგორც ეტყობა, შუა ნაწილში წარმოდგენილი ყოფილა ვედრება, და კარებზე მთავარ ანგელოზნი, ვინაიდან დარჩენილია ასომთავრული წარწერები: დ-დდ დ-თი, წ-დ მ-ქლ, გ-ბრლ მთავარანგელოზი. ხატი მოცული ყოფილა ოქროს თხელი და ლამაზი ბასმით მე-12 საუკუნისა, მაგრამ დარჩენილია მხოლოდ ნაკლული წარწერა ზურგზე და გარეგანი შეძერწილობა კარებისა, ოქროთი დაფერილის ვერცხლის ფურცლისა, ჯვრებით და სხვა ორნამენტებით შემკობილი (იხ. №17138).

ეს საყურადღებო წარწერა ხელით გადმოუღია დ. ბაქრაძეს (იხ. დამატება №8), მაგრამ არ გაურჩევია; შენიშნავს მხოლოდ, ვიღაც „გაბრდუხანი“ იხსენიებოა შიგ (გვ. 65). ა. ხახანაშვილი სრულიად არჩევს წარწერას, მაგრამ ბევრ სიტყვებს და ასოებს უმატებს, რომელნიც არ მოიპოვებინ არც ჩვენამდის მოღწეულს ტექსტში, არც დ. ბაქრაძის მიერ გადმოღებულში და არც საკმაო ადგილი სჩანს მათთვის ფირფიტაზე და ტექსტის არეში. ამას გარდა, მიმატებულ სიტყვებს და ასოებს ფრჩხილებით არ აღნიშნავს. ამიტომ ჩვენ ჯერ მოვიყვანთ ჩვენამდის მოღწეულ ტექსტს, დამატებით იმ მცირე ასოებისა, რომელნიც დ. ბაქრაძის დროს ჯერ კიდევ დაცული ყოფილა და შემდეგ შევეცდებით ტექსტის აღდგენას აზრის მიხედვით:

1. .... ებრ ცოდვი  
 .... ელო ცთომილთა მოძიებად  
 .... ნად მოსრულო ნეფსთ ჯუარც  
 .... ლო<sup>1</sup> ქანანელისაებრ ...
5. .... ებ მეძავისაებრ ვცრე ....<sup>2</sup>  
 .... რა მასმინე მე ჳმაი შ-ნა ....  
 .... დით კურთხეულნო მამი ....  
 ჩმისანო<sup>3</sup> დღესა დიდებით მოს  
 ლვისა შნისასა ფრად ცოდვითა
10. ტაებდა .... ბურდუხანს და  
 მე ს გ ....  
 თა
13. მ

როგორც სჩანს, ჩვენი შენიშვნებიდან, დ. ბაქრაძის გადმოღებულ წარწერაში, ნამდვილთან შედარებით, შეცდომებია: ერთ ადგილას ლ-სის მაგიერ თ-ნია მოყვანილი; ორს შემთხვევაში თითო ასო გამოშვებულია. მე-11 სტრიქონში ასოები ს და გ ბაქრაძეს არ მოჰყავს. ამ ასოების სანახევრო ნაშთებია დარჩენილი, მოშორებით ერთმანეთისაგან, რადგან აქ ჯვარის ფეხი, რომლის ირგვლივ წარწერაა ამოჭრილი, გაფართოებულია. მე-13 სტრიქონში დ. ბაქრაძეს მოჰყავს ე და ლ, მაგრამ ე-ნის ადგილას დარჩენილია ნაწილი ასო მ-ნის და ლ-ის ადგილზე ეხლა აღარაფერი მოსჩანს და არა ვგონებ, ეს ასოც სწორად იყოს ნაჩვენები.

აღსანიშნავია კიდევ, წარწერაში არც ერთხელ ასო ი არ იხმარება; მის ადგილას ყოველთვის ა არის. ჩვენი ცდა წარწერის აღდგენისა ასეთია:

[# ჩემ]ებრ ცოდვი [ლთა მხ]-  
 [სნე]ლო, ცთომილთა მოძიებად  
 [ქუეყ]ნად მოსრულო, ნეფსით ჯუარც-  
 [მუ]ლო, ქანანელისაებრ[გიღარა]-  
 [დ]ებ, მეძავისაებრ ვცრე[მლი],  
 რადთა ა(ნუ რადთა ) მასმინე მე ჳმაი შენი : „მო-  
 ვედით კურთხეულნო მამი[სა]  
 ჩემისანო“, დღესა დიდებით მოს-  
 ლვისა შენისასა, ფრად ცოდვილთა :  
 ტაებდა .... ბურდუხანს და  
 მე ს[ა] ... გ[იორგის]?  
 თა  
 მ[არს?]

ა. ხახანაშვილი განმარტავს, და ჩვენც ვფიქრობთ, ამ წარწერაში იხსენიება ბურდუხან დედოფალი, გიორგი III მეუღლე, თამარ მეფის დედა, და ტექსტის ბოლოშიც შეიძლება თამარი იგულისხმებოდეს. ყოველ შემთხვევაში ხატი მე-12 საუკუნის არის.

1 დ. ბაქრაძის გადმოღებულში „თო“ სწერ

- 2 დ. ბაქრაძე: ცრე  
3 დ. ბაქრაძე: მისანო

11. **ხატი იონა წინასწარმეტყველისა.** ასე მესმის მე ამ ხატის წარწერა: წ-ი ი-ოა; ოქროთი დაფერილი ვერცხლისა, ნაჭედი, 67X52 სანტ. ხელობა არა ურიგოა, მაგრამ ცუდათ არის დაცული (იხ. №17137). სახე მისი მხცოვანი კაცის არის; სამოსელი ძველი ებრაული; იონა წარმოდგენილია სრულის ტანით, ნოხით ფეხ ქვეშ; ფონი ბალახოვანია, მცირე რელიეფით; აშიები რომბ-ლურსმული, ზემოდ სულ მოცილებული აქვს, ნაწილობრივ მარცხნივ და ქვემოდანაც, ორ სანახევროდ შერჩენილ მედალიონში მარცხნივ წ-ა გიორგია: წ-ა გ-ი; მარჯვნივ: წ-ა დ-ე; ქვემოდ მოსჩანს ასოები კე (ალბათ: კვირიკე). ამის ქვემოდ, მარცხნივ წინასწარმეტყველისა, წარმოდგენილია ფრიად დაზარალებული მავედრებელი ფიგურა; ძნელი გამოსაცნობია, მეფეა თუ დიდებული. ხატი მე-14-15 საუკუნის უნდა იყოს.

12. **ნარჩენი კარედი ხატისა,** რომელიც ყოფილა წამლით დახატული და რომელიც ეხლა სულ მოშლილია. წარწერებიდან სჩანს, რომ ზემოდ წარმოდგენილნი ყოფილა: წ-ა ნკლზ, წ-ა ბ-სლი; მთავარ ანგელოზები: მიქლ, გ-ბრლ. ეხლა ამ კარედზე მოთავსებულია ცხრა პატარა სხვა და სხვა ხატი. ეს ყველაფერი ერთად გადმოღებულია ფოტოგრაფიაზე. იხ. №17139. ზემოდ მაცხოვრის მრგვალი მედალიონია; ქვემოდ მთავარ ანგელოზ გაბრიელისა, მარცხნივ ღვთის მშობელი, ბერძნულის წარწერით სახელისა; კიდევ ქვემოდ: სამი პატარა ხატი წ-ა გიორგისა, სრულის ტანით, ხმლით და ფართით, და ერთიც ამავე სახით წ-ა დემეტრესი. შემდეგ კიდევ ხატი ღვთის მშობლისა ჩვილადი და მაცხოვრისა, წელსზევითი. ყველა ჩვეულებრივი რიგის არის, არა ულამაზო.

13. **ვერცხლის ფირფიტა,** მოოქრული, რომელზედაც წარმოდგენილია წ-ა გიორგი, წელს ზევით, ჯვარით ხელში; თმა მსხვილ ხუჭუჭებად დაწყობილი აქვს; წარწერა სახელის ასომთავრულით: წ-ა გ-ი. ტლანქი ხელობის არის (იქვე, №17141).

14. **ფირფიტა ვერცხლისა,** რომელზედაც წარმოდგენილნი არიან: **მაცხოვარი** სრულის ტანით და წ-ა დიმიტრი, წარწერით წ-ა დ-ი. ტლანქი ხელობის არის (იქვე, №17142).

15. **ჯვარი გამოსასვენებელი,** ვერცხლისა, ხეზედ დასარქობ ტარითურთ. წინა პირზე წარმოდგენილია ჯვარცმა, ბოლოებში, მარჯვნივ და მარცხნივ, მედალიონებია: ღვთის მშობლისა და იოანესი. ზემოდ და ქვემოდ მთავარ ანგელოზთა. ჯვარი მე-17 საუკ. უნდა იყოს. (იქვე, №17142).

16. **ზარი,** პატარა, 15 სანტიმეტრი სიმაღლით, რომელსაც ლათინურად აწერია:

## NICOLAUS

მეორე, უფროსი, ზარი, უწარწერო. გატეხილია.

17. ნალბაქი ვერცხლისა, 33 სანტიმეტრი დიამეტრით, რომეზედაც ხელჩართულად აწერია: „ლევან“. ეს ხელჩართული ლევან II დადიანის არის, მე-17 საუკუნისა. შემდეგ სხვა მხედრულით აწერია:

ქ : ესე : ნალბაქი :. წულუკიძის :. ქალის :. თეთრუასი :.  
არის .

წინა პირზე კიდევ დაფხაჭნილი, ვულგარული მხედრულით აწერია:

ღმერთო : გურჯვეს (sic) : დადიან : ლევანის : ძის :

წყალობა : მე : მიზობეს : სუვიმონის : ქანცხელიანის :

თავი ანგელოზი .

18. დ. ბაქრაძე აღნიშნავს კიდევ საყდარში, დიდ ორ-არშინიან სპილენძის საყვირს, რომელიც ჩვენ არ გვინახავს. ალ. სტოიანოვს აქ უნახავს კიდევ ორი ფურცელი, ლათინურად დაწერილი (გვ. 326); ეხლა აღარ ჩანს, ისე, როგორც მრავალი ეტრატის დაწერილი ფურცლები, რომელთაც დ. ბაქრაძე იხსენიებს (გვ. 64).

## ფარის თემი

საზოგადო სახე ფარის თემისა იხ. ფოტ. №17457.

## სოფელი სუფი.

ფარის თემის სოფელ სუფში ძველი ეკლესია არის, ქვისა, წმიდის გიორგის სახელზე, მაგრამ ისე დამძველებულია, რომ ყოველი მხრიდან ბოძები აქვს შეყენებული; წირვა-ლოცვა შიგ ადარ არის. ხატები და ჯვრები ჩვენს იქ ყოფნის დროს ერთ კუთხეში იყო მიყრილი მიწაზე და ირგვლივ ხეები ჰქონდა მიჯრილი, ვინცობაა, თუ ეკლესია ჩამოინგრა, ხატები არ დაილეწოსო. ჩვენ თითოეულად კარში გამოვიტანეთ ნივთები, იქ გავშინჯეთ და გადმოვიღეთ ფოტოგრაფიით. ეკლესიის კედლები გარედ და შიგნით მოხატული ყოფილა, მხატვრობაც გაფუჭებულია. თაღზე, შიგნით, მოსჩანს მაცხოვარი. ჩრდილოეთის კედელზე ყოფილა წარმოდგენილი მაშენებელი ეკლესიისა, ქართულის ტანისამოსით. კანკელი ქვისაა, სამის კამარით და სვეტებით. გარე კედლების მხატვრობა სულ მოშლილია და ნაშთებიდან სჩანს, რომ აქაც ამირანის და სხვა ზღაპრული სიუჟეტები ყოფილა წარმოდგენილი; შესავალი კარი, დასავლეთით, ხარატოვანია, შემკობილი მრავალის საუცხოო ჩუქურთმებით (იხ. ჩვენი ფოტ. №17149 და უვაროვისა. ტაბ. XXXVIII, 65). სხვათა შორის, აქ ათ ჩუქურთმიანი რგოლია და ერთში ასომთავრული წარწერაა:

წ ო გ ი მ ო ხ

წმიდაო გიორგი, მეოხ



იყ ვ წ ე ლ თ ი  
ს ა ს ო ჯ ლ ს  
ა გა ბ ის ს ო  
დ ს ა ა ნ .

ეყავ წინაშე ღვთი-  
ს ა ს უ ლ ს -  
ა გა ბ ის ს ო -  
დ ს ა , ა მ ი ნ .

ეკლესიაში ჩვენ ვნახეთ:

1. **ჯვარი**, დიდი, კანკელის საწინავე; სიმაღლით 3 არშინი და 10 ვერშოკი, განით 1 არშინი და 8 ვერშოკი (იხ. №17151); შეძერწილია ვერცხლის მოოქრული ფირფიტებით წმიდათა სახეებითურთ, მაგრამ ქვემო ნაწილზე ჯვარისა ფირფიტები სულ მოძარცულია. საუკეთესო ფირფიტა არის ზემოდ, რომელზედაც წარმოდგენილია მაცხოვარი ტახტოსანი, წარწერით: ი ვ ქ ე. დანარჩენი ფირფიტები პატარაა და მათზე წარმოდგენილნი არიან: მთავარ ანგელოზნი, ღვთის მშობელი, წა გიორგი, წა დიმიტრი. უმბოს შუაში დაცულია ერთი დიდი ძვირფასი ქვა. თავისებურ თვისებას ამ ჯვარისა წარმოადგენს მისი გვირგვინი ზემოდ, რომელიც სავსებით სვანურ ქეჩის ქუდს გამოსახავს, შეკეცილი კალთებით და ამ კალთებზე წარმოდგენილნი არიან წმიდათა სახეები, წელსზევითნი.

2. მეორე ასეთი **ჯვარი**, სიმაღლით 2 არშინი და 12 ვერშოკი, განით 1 არშინი და 3 ვერშოკი. ეს ჯვარი ეხლა თითქმის სულ მოძარცულია და შერჩენია მხოლოდ უმბოს ზემოდ ერთი ოქროთ დაფერილი ვერცხლის ფირფიტა, ღვთის მშობლის სურათით ვედრებისა და წარწერით: დ დ ლ ს დ. მის ქვემოდ, იმავე ფირფიტაზე მთავარ ანგელოზია, წარწერით: წ დ მ ქ ლ. მარცხნივ უმბოსა არის „წ დ ა ე“, მარჯვნივ ფიგურაზე მოსჩანს მხოლოდ სიტყვა „წ დ“. უმბოს მარჯვენა კუთხეში სწერია: „ელენე“. სურათი აღარ არის. დარჩენილი ნაწილებიდან სჩანს, რომ ჯვარის ფირფიტები ლამაზი ხელობის ყოფილა (იხ. №17128).

3. **ჯვარი, კანკელის საწინავე**. მაღალი მაგრამ არა ისე ფართო მკლავებით, როგორც ჩვეულებრივი. სიმაღლე აქვს 3 არშინი და 5 1/2 ვერშოკი, განი ერთი არშინი და 2 1/2 ვერშოკი. ეს ჯვარი განირჩევა სხვა ასეთი ჯვარებისაგან კიდევ მით, რომ მისი მოოქრული ვერცხლის ფირფიტები ყველა ერთი დროის და ერთი და იმავე ოქრომჭედლის ნახელავი არის. მათზე წარმოდგენილნი არიან ნაჭედი ხატები წმიდათა ნახევარ-ნახევარ კამარების ქვეშ.

ვერტიკალურ ნაწილზე, ზემოდან ბოლომდის, ფიგურები სრულის ტანით არიან წარმოდგენილნი, შემდეგის რიგით და წარწერებით: ა ე ქ ე, წ ა პ ვ ლ ე, წ ა გ ი, წ ა თ ე, წ ა მერკილე (sic მერკური უნდა იყოს), წ ა პანტელეიმონ, წ ა პროკოპი, უმბოს მარჯვნივ და მარცხნივ: თითო მთავარ ანგელოზი, სრულის ტანით და მავედრებელის სახით, და სამი მოციქული. ამ უკანასკნელთა ფიგურები წელსზევითნია (იხ. №17150 და უვაროვისა, ტაბ. XXXII, №54, და გვ. 81, 185). ბოლოს, ქვემოდ ასომთავრული წარწერა აქვს (იხ. №17127)

: ქ : მ : მოწამეთ  
ა : შორის : ღვწ  
ლისა : მძილევ  
დიდო : მთავა

მ მოწამე-  
თა შორის ღვაწ-  
ლისა მძლევ(ო),  
დიდო მთავარ-

რ მოწამევო	მოწამეო,
წმიდაეო (sic) : გი ც	წმიდაო გიორგი
სუფისავ (sic) : მეოხ	ცსუფისავ (sic), მეოხ
და მფრიველ :	და მფარველ
ექმენ : ორითავე (sic)	ექმენ ორთავე
შინა : ცხოვე	შინა ცხოვე-
ბათ : მამკობ	ბათა მამკობ-
თა : შენთა : და მდ	თა შენთა და მადი-
იდებლთა : შე	დებელთა შენთა
ნთ : ხვეთ : მა : ილ	ხვეთ მაილე
ელით (sic) : ამნ .	ლთა, ამინ.

უკანონო წერა სიტყვებისა ამ ტექსტში ხშირია, მაგალითად, „მძილევ“, „მძლევ“-ს მაგიერ, „წმიდაეო“, „წმიდაო“-ს მაგიერ, „მოწამევო“, „მოწამეო“-ს მაგიერ, „ორითავე“, „ორთავეს“ მაგიერ, „ცხოვრებათ“, „ცხოვრებათა“-ს მაგიერ; აგრეთვე „შენთ“, „ხვეთ“, „შენთა“ და „ხვეთა“ მაგიერ. „მა : ილელითა“ ერთი სიტყვა უნდა იყოს, თუმცა გაყოფილია ორი წერტილით; შეიძლება მაილელთა იყოს, ალბათ წინეთ იყო მაილელთ ხევი. საკვირველია კიდევ, რომ „სუფი“ „ცხუფი“-ს ფორმით არის წარმოდგენილი. უქარაგმოდ წაკითხვაში ჩვენ დედნის მართლწერას არ ვიცავთ. დ. ბაქრაძეს ხელით გადმოუღია ეს წარწერა (იხ. დამატება №3. ჯვარი მე-16-17 საუკუნეს უნდა ეკუთვნოდეს.

4. თავი ხატი ეკლესიისა, წ ა გიორგისა, ოქროთი დაფერილი ვერცხლისა დიდია, 146X84 სანტ. საკმაოდ დაზარალებულია, ნამეტნავად ქვემო ნაწილში. წმიდანი წარმოდგენილია სრულის ტანით, მაგრამ მცირე რელიეფით, რომაულ სამარ ტანისამოში; მარჯვენა ხელში შუბი სჭერია, რომელიც ეხლა მოშლილია; მარცხენა დადებული აქვს მოგრძო, წაწვეტიანებულ ფარზე; ზურგის უკან ხმალი მოსჩანს; თმა ხუჭუჭად დაწყობილი და ზემოდ ლენტით გადასკვნილი ნიკაპამდის ჩამოდის; პირის სახე მრგვალი აქვს; თავის წრე დიდი; ფონი ჭადრაკის მსგავსი ჯვრებითურთ. წარწერა სახელისა: წ ა გ ი სჰასა. ჩარჩო ხატისა შესანიშნავი ლამაზი ხელობისაა, მე-12-13 საუკუნისა და უფრო ძველი უნდა იყოს, ვიდრე თვით ხატი. ორნამენტი ბალახოვანია, საუცხოო ნახელავი, მრგვალის „დრობნიცებით“, ისეთის, როგორც გელათის ხახულის ხატზეა – როგორც სამართლიანად შენიშნავს გრ. უვაროვისა (გვ. 110, ტაბ. XXXII, №54). მედალიონებში, ზემოდ, ვედრებაა, ბერძნულის წარწერებით მაცხოვრისა და ღვთის მშობლისათვის და ქართულით იოანესათვის: წ ი იო ე. მარჯვენა და მარცხენა აშიებზე წარმოდგენილნი არიან სრულის ტანით, მარცხნივ: წ ი : დ ე : , მარჯვნივ : წ ი : თ ე : ქვემო ნაწილი აშიისა და ხატისა მოშლილია ძალზე. მარჯვნივ, ქვემო ნაწილზე, გრ. უვაროვის რწმუნების წინააღმდეგ, დაცულია ის წარწერა, რომელიც დ. ბაქრაძესაც მოჰყავს (გვ. 58):

წ ო გ ი მეოხ ეყავ ორთავე ცხოვრებათ : ი ნ ე : ათრიანსა : ა ნ .

ესე იგი: წმიდაო გიორგი, მეოხ ეყავს ორთავე ცხოვრებათ(ა) იოენა ათრიანსა, ამინ.

თვით ხატი მე-14-15 საუკუნეს უნდა ეკუთვნოდეს, როგორც გრ. უვაროვისასაც აქვს განმარტებული; უფრო მე-15 საუკ. ვიდრე მე-14 ს. ხოლო, როგორც შევნიშნეთ, ჩარჩო უფრო ადრინდელი უნდა იყოს (იხ. №17148).

5. **ხატი, დიდი, წ ა გიორგისა**, ოქროთი დაფერილი ვერცხლისა, 70,5X57სანტ. მთავარ მოწამე ცხენით არის წარმოდგენილი, გვირგვინოსანს გმირავს, რომელსაც დაუყრია თავის ფარხმალი (იხ. №17147). პირი წმიდანისა ახალგაზრდა კაცისაა; ჯავშანი აცვია და მას ზემოთ მოსასხამი გრძლად იმლება ჰაერში. ცხენი კარგი ჯიშის არის, მაგრამ მთელი სურათი მცირე რელიეფით არის წარმოდგენილი. მრგვალი თავის წრის ორივე მხარეს „დრობნიცებში“ ასომთავრულით სწერია: წ ა გ ი. აშიები ბალახოვანი ორნამენტით არის შემკობილი, მაგრამ სანახევროდ მოშლილია. მედალიონებიდან გადარჩენილია სამი წელსზევითი ფიგურებით, ერთს მარცხნივ უწერია: წ ა თ ე. ხატი მე-15-16 საუკუნის უნდა იყოს.

6. **ხატი წ ა გიორგისა**, ოქროთი დაწერილი ვერცხლისა, ნაჭედი, 85X56 სანტ. ერთობ პრტყელი რომბ-ლურსმული აშიებით (№17145). მხედარი ფეხოსანია, რომაულ საომარ ტანისამოსით, შუბით და ფარით, ხუჭუჭი თმით, რომელსაც შუბლი დაუფარავს, თავის წრე, წერტილოვანი, დიდია. წარწერა: წ ა გ ი სუ ფსაი. ზემოდ აშიაზე, შუაში ტახტის შემზადებაა, ღვთის მშობლით და იოანეთი; მარჯვენა და მარცხენა აშიებზე მთავარ ანგელოზებია, სრულის ტანით; ერთ ხელში ჯვარიანი ჯოხი აქვთ, მეორეში – ბურთი; წარწერები: წ ა მ ქლ, წ ა გ ბლ. წმიდა გიორგის ქვემოდ სამი მედალიონია, წელსზევითი ფიგურებით; შუაში დ დ დ ლ ა , მარჯვნივ: წ ა პ ტრ(ე); მარცხნივ : წ ა ლუკა უნდა იყოს, თუმცა აწერია: ლ უპ. ამ ფიგურების ზემოდ დაზიანებული წარწერაა:

წ ო გ ი შ ე რ ა ტ რ ა ტ ი ნ ი ა ნ ი .

ქვემოდ სხვა წარწერაა:

წ ო გ ი მ ე ო ხ და მ ფ ა რ ვ ე ლ ე ქ მ ე ნ მი ქ ა ე ლ ს რ უ ბ ა გ ი ა ნ ს ა .

ქვემო აშიაზე წელსზევითი ფიგურებია წ ა ნიკოლოზისა: წ ა ნკზ, წ ა ანდრიასი: წ ა ადრია, და წ ა ბასილისა: წ ა ბა. . . ხატი მე-16 საუკუნის უნდა იყოს.

7. **ხატი მაცხოვრისა და მთავარ ანგელოზთა**, ოქროთი დაფერილი ვერცხლისა, ნაჭედი, 78X56 სანტ. ხატი შესდგება სხვა და სხვა განცალკევებული, მოოქრული ვერცხლის ფირფიტებისაგან, რომელნიც ერთს ფიცარზე არიან დაკრულნი და მოქცეულნი ერთ ჩარჩოში. (იხ. №17146). ზემო ფირფიტაზე წარმოდგენილია მაცხოვარი, წელსზევითი, მაკურთხეველის მარჯვენით, სახარებით მარცხენა ხელში, მთავარ ანგელოზებითურთ აქეთ-იქით. წარწერა სახელისა გადმობრუნებული ბერძნულის ასოებით არის ქვემოდ, მეორე ფირფიტაზე წარმოდგენილია ვედრება; მაცხოვარი აქ ტახტოსანია, ჩვეულებრივის სახით და ასომთავრული წარწერით: ა ჯ ქ ე. აქეთ-იქით წარმოდგენილნი არიან: ღვთის მშობელი და იოანე; და მათ გვერდით მთავარ ანგელოზნი. მთავარ ანგელოზთა ქვემოდ წ ა მარკზ. და წ ა ხლპრი (ხალამპრი). სულ ქვემო ფირფიტაზე მოსჩანან სრულის ტანით სამი მხედარი, შუბებით და ფარებით: წ ა დ ე წ ა თ ე წ ა გ ი. აშიებზე მარჯვნივ და მარცხნივ მთავარ ანგელოზნი: მ ქლ და გ ბრლ. აშიები, სადაც დაცულია ჭადრაკის მსგავსია; ფონი ფირფიტისა ბალახოვანია. ხატი მე-17 საუკუნის უნდა იყოს.

8. ხატი მაცხოვრისა, ვერცხლისა, ნაჭედი, 29X19 სანტ. აშიები წერტილოვანი ორნამენტის არის; მაცხოვარი წარმოდგენილია მღვდელ მთავრის ტანისამოსით, სრულის ტანით; მარჯვენა ხელით აკურთხებს, მარცხენაში სახარება უჭირავს. სახე მცხოვანი კაცისა აქვს; ნიშბი ჯვარისებური, დიდი; ფონი სადაა; წარწერა: ი ო ქ ე (იხ. №17118). ხატი მე-16 საუკუნის უნდა იყოს.

9. ხატი მთავარ ანგელოზ გაბრიელისა, (№17124), ყოფილა წამლით დახატული, მაგრამ მხატვრობა სულ მოშლილია; დარჩენილია აშიები, ლამაზი ბალახოვანი ორნამენტით; ზემო აშია აღარ არის; დარჩენილია აგრეთვე ნიშბის ნაწილები და წარწერა: გ ბ რ ლ მ თ ა ვ ა რ ა ნ გ ე ლ ო ზ ი . მ ა რ ჯ ვ ე ნ ა და მ ა რ ც ხ ე ნ ა ა შ ი ე ბ ზ ე წ ყ ვ ი ლ ი , ე რ თ გ ვ ა რ ი ფ ი გ უ რ ა , ლ ა ბ ა რ უ მ ე ბ ი თ , უ წ ა რ წ ე რ ო დ . ქ ვ ე მ ო ა შ ი ა ზ ე ა ს ო მ თ ა ვ რ უ ლ ი წ ა რ წ ე რ ა ა :

ქ . წ ო :: გ ო :: მ ო ხ დ :: ფ რ ვ ე ლ ე ქ მ ნ :: მ კ ბ ნ :: შ

ენ :: ხ ე ვ ნ :: ს უ ფ ს ა :: შ უ დ ს :: ღ თ მ ნ :: ა ქ ა დ ა ს

ამ, შეცდომებით სავსე წარწერაში, სიტყვა გ ო ზ გაბრიელის მაგიერ აიხსნება ასომთავრულის ლ-ს და ზ-ს მსგავსებით. აგრეთვე სიტყვების მაგიერ: „მამკობს“, „შენს“, „ხევს“, სწერია „მამკონ“, „შენ“, „ხვენ“. წარწერა უნდა გულისხმობდეს:

წმიდაო გაბრიელ მთავარ ანგელოზო, მეოხ და მფარველ ექმენ მამკობსა შენს ხევს სუფსა. შეუნდვეს ღმერთმან აქადას.

ხატი მე-13-14 საუკ. უნდა იყოს.

10. ხატი წ ა გიორგისა, 106X63 სანტ. (№ 17117); ყოფილა წამლით დახატული, მაგრამ მხატვრობა სულ მოშლილია; დარჩენილია ნიშბი, ზემო ნაწილი პერანგისა ვერცხლისა, მოოქრული და რომბ-ლურსმული აშიები მთელად; მედალიონები არ ახლავს, წმიდანის სრულის ტანით ყოფილა წარმოდგენილი, შუბით და ფართით. ხელობა ლამაზი სჩანს. ქვემოდ ასომთავრულით აწერია:

ქ . წ ო : გ ო : შ ე მ წ ე : ე ყ ა ვ ნ : გ ო ს : სა ღ ი რ ი ს : ძ ე ს ა

ორთავე : შ ი ნ ა : ც ხ ო რ ე ბ ა თ ა : ა მ ო ნ .

უქარაგმოდ:

წმიდაო გიორგი, შემწე ეყავნ გიორგის საღირის ძესა ორთავე შინა ცხორებათა, ამინ.

11. ხატი მაცხოვრისა, 50X33 სანტ. ყოფილა წამლით დახატული, მხატვრობა უკვე გამქრალია. პერანგის ნაწილი და მარცხნივ ღვთის მშობლის ლამაზი ფიგურა წელსზევითი და ქვემოდ წარწერა დაცულია. წარწერა მაცხოვრისა სახელისა ბერძნულია; ღვთის მშობლისა – ასომთავრული: დ ო დ ლ ე . ღვთის მშობლის ქვემოდ ორი ფიგურა ყოფილა, ალბათ მთავარ ანგელოზთა, მაგრამ ეხლა მარტო ნიშბები მოსჩანს. სულ ქვემოდ ასომთავრული წარწერაა:

ქ ე : შ ე მ ქ ა ლ

ქ რ ი ს ტ ე , შ ე ი წ ყ ა ლ ე მ ი ქ ა ე ლ

რ ა ტ ი ა ნ : და : მ

რ ა ტ ი ა ნ ( ი ) და მე-

ე უ ლ ლ ე : მ ი ს ი

უ ლ ლ ე მ ი ს ი .

აშიები რომბ-ლურსმული დაცულია; ხელობა მე-14-15 საუკუნის უნდა იყოს (იხ. №17122).

12. ხატი წ ა ნიკოლოზისა, 17X12 სანტ. ყოფილა ვერცხლით ნაჭედი, მაგრამ ხატი ეხლა მოძარცულია და დარჩენილია ზურგის ვერცხლის ფირფიტა, ასომთავრულის წარწერით (იხ. №17120):

ქ წ ო : მღ  
დელო მოღჯა  
რო : ნკზ მეოხ გუექმენ :  
წ ე ქესა : მოსავთა : შენთა :  
ახალასა : და მისთა : შვილთა :  
ჩხეტსა და დარჩის : და  
შვილთა . . .  
წმიდაო მღუ-  
დელო მოძღუა-  
რო ნიკოლოზ, მეოხ გუექმენ  
წინაშე ქრისტესა მოსავთა შენთა  
ახალასა და მისთა შვილთა  
ჩხეტსა და დარჩის და  
შვილთა . . .

წარწერაში ო და უ ერთგვარად არის გამოსახული და ერთს შემთხვევაში 3-ს მაგიერ ნახმარია ჯ.

13. ხატი წ ა ბასილისა, 22X17 სანტ. წინა პირი ოქროთი დაფერილი ვერცხლით ნაჭედი სულ მოშლილია; შუაში ჯვარი ყოფილა ხისა, მრავალის ნაწილებით; ბუდეები ნაწილების დაცულია, აგრეთვე ხის ჯვარი. დაცულია კიდევ ნაწილი რომბ-ლურსმული აშიებისა. ზურგის ვერცხლზე ჯვარია გამოსახული, ვაზოვანის ორნამენტით, ზემოდ და ქვემოდ, ჯვარის ორივე მხარეს, წარწერა ასომთავრული (იხ. №17119):

წ ო ბასილი მეოხ მცველ და  
მფარველ ეყავ მონათა  
შენთა ღოდელიანთა ფურ  
თუხს ვეშაგს გვარანდუ  
ხს და ძეთა მათთა ამენ  
წმიდაო ბასილი, მეოხ, მცველ და  
მფარველ ეყავ მონათა  
შენთა ღოდელიანთა ფურ-  
თუხს, ვეშაგს, გვარან-  
დუხს და ძეთა მათთა, ამენ.

ვინაიდან წარწერაში ო დ უ არ განირჩევა, ამიტომ ძნელია თქმა, ფურთუხს უნდა წავიკითხოთ თუ ფორთოხს. სიტყვა „ამინ“ ძველი ფორმით არის „ამენ“. წარწერა მე-17 საუკ. უნდა ეკუთვნოდეს.

14. ხატი მთავარ ანგელოზ მიქაელისა, ოქროთი დაფერილი ვერცხლისა, ნაჭედი, 16X22 სანტ. ლამაზი ხელობისა (იხ. №17121). მთავარ ანგელოზი რომაულ საომარ ტანისამოსით არის წარმოდგენილი, მარჯვენა ხელში ქარქაშიდან ამოწვდილი ხმალი

უჭირავს, მარცხენაში ქარქაში; თმა შუბლს ჰფარავს და კიკინებად ჩამოდის ყელთამდის; ფრთები ზომიერი აქვს. აშიები მოგრძო უჯრედებად დაყოფილი, ბალახოვანი, ლამაზი ორნამენტით არის შემკობილი. ზემოდ სახელი ბერძნულად აწერია.

ზემო აშიაზე წარწერა ასომთავრულით: ჯ-მთისაჲ : მთ-ვრ აგლზი. ქვემოდ მეორე წარწერა ისეთივე ასოებით:

ჯ-მთისაჲ : მთვრაგ-ღოზო :

მეოხ ექმენ ბერსა : კტრდს ძესა :

ჯუმათისაჲ მთავარ ანგელოზო,

მეოხ ექმენ ბერსა კოტრისძესა.

შემოკლებით დაწერილ გვარს „კტრდს ძესა“ ჩვენ ვკითხულობთ „კოტრის ძესა“, ვინაიდან გურიაში ასეთი გვარი ეხლაც არსებობს: კონტრიძენი ლეხოურის საზოგადოებაში სახლობენ; მათ შორის ყოველთვის სამღვდელო პირნი იყვნენ.

ცნობილი საეპისკოპოსო საყდარი ჯუმათისა გურიაშია, სუფსის პირზე<sup>1</sup>. ეს ხატი ცნობილი არ არის ლიტერატურაში. ის ჩვენ ვიპოვნეთ სხვა ნამტვრევებთან ნაგავში. სულ გაშავებული; გავრეცხეთ და კარგი ხატი აღმოჩნდა.

15. პატარა ხატი ღვთის მშობლისა, ვერცხლისა, 10X8 სანტ. წარწერით: დ-დ დ-დ (იქვე 17121).

16. ვერცხლის ფირფიტა, რომელზედაც ზემოდ წარმოდგენილია ღვთის მშობელი, ვედრების სახით, წარწერით: დ-დ ღ-თსჲ, და ქვემოდ, სულ პატარა, მეორე

---

<sup>1</sup> მისი სიძველენი, ოდესღაც მდიდარი, დ. ბაქრაძის მიერ იყო პირველად აღწერილი (იხ. მისი მოგზ. გურია-აჭარაში, გვ. 259-269, და მისიდა კონდაკოვის „ოპისი“, გვ. 102-110).

ღვთის მშობლის ხატი, ჩჩვილეთი და წა გიორგი ცხენით. ალბათ ეს ფირფიტა კანკელის საწინავე ჯვარის იყო (იხ. იქვე, №17121).

17. ზურგი გამარცვლი ხატისა, რომელზედაც გადაკრულია ლამაზი ძველი მატერია. სინამდვილეში ერთობ ლამაზია, მაგრამ სამწუხაროდ ფოტოგრაფიაზე ეს არა სჩანს (იხ. №17125).

18. ჯვარი გამოსასვენებელი, ოქროთი დაფერილი ვერცხლისა, 51X13 სანტ. სულ გაფუჭებულია.

19. ხატი წა გიორგისა და წა დიმიტრისა; მათ შუა, ზემოდ მაცხოვარია წარმოდგენილი; ქვემოდ, ვგონებ, ღვთის მშობელი, ჩჩვილეთი; გვერდის აშიებზე მთავარ ანგელოზნი, 21X17 სანტ. ხელობა ტლანქია, მე-18-19 საუკუნის. (იხ. №17123).

20. დოქი სპილენძისა, დასადგემლი საცრის მსგავსი აქვს, ყელი ვიწრო, მუცელი შემკობილია გეომეტრიული ფიგურებით, მოგრძო რომბებით და გრეხილებით; შუაში

პატარა ძაბრი აქვს და დასრეტილი შემკობილობა; როცა გააქანებთ, შიგნიდან კენჭის ხმა ისმის (იხ. №17126).

21. **ვერცხლის ფირფიტა**, 24X18,5 სანტ. რომელიც წინეთ კანკელის საწინავე ჯვარის შემკობილება ყოფილა და რომელზედაც წარმოდგენილია ფიგურები მაცხოვრისა, ბერძნულის წარწერით სახელისა, წ-ა გიორგისა, წ-ა დიმიტრესი და მთავარ ანგელოზთა; ტლანქი ხელობისაა.

22. მრავალი რკინის **ლახტი** და სხვა და სხვა სახის **ისრები**.

23. სახარებიდან ეტრატზე, რომელსაც იხსენიებს დ. ბაქრაძე (გვ. 58). აღარაფერი დარჩენილა.

24. ბერი დიმიტრი ბაქრაძე 1864 წ. აღწერილობაში სწერს ასე: აქ არს კამარა ჯვარისა და მოქედელი ვერცხლით. აწერია ესრეთ: ღმერთო და წმიდაო გიორგი (შეუწდვენ) რატიანს ჩიბურდანს.

### სოფელი უგვალი

სოფელ უგვალში ჩვენ არ ვყოფილვართ. დიმიტრი ბაქრაძე (გვ. 58) აღნიშნავს აქ ეკლესიას წმიდა გიორგისა, ტლანქად ნაშენს. ეკლესიის მახლობლად მას უნახავს გატეხილი ზარი, მსგავსი სვანური ქუდისა, შემოკვეცილი კალთებით. გარეთი ნაწილი ეკლესიის კარისა შექედელი ყოფილა რკინით, რომელზედაც მოქცეული ყოფილა გამობერვით განჭედილნი ფიგურები ადამიანთა, თევზთა და ჯვართა. შიგნით ნაწილი კარისა აგრეთვე რკინით ყოფილა შექედელი, მაგრამ უსახეობოდ. ეკლესია კვამლით ყოფილა შემურული, როგორც ყველა სვანური ეკლესია. ხატები ყოფილა პატარანი, ჩაკერილნი ტყავის ბუდეებში, ჩანჩხურებით და ეჭვნებით. წიგნებითგან აქ ყოფილა: ა) მარხვანი, ჩინებული ხელით დაწერილი, ბ) ლოცვანი და გ) სახარება, ქალაღზე ნაწერი, დღიური საკითხავების რიგით. ა. ხახანაშვილი აკუთვნებს სახარებას მე-15 საუკუნის დასაწყისს და მოჰყავს მინაწერები: „ლოცვა ყავთ გლახაკისა გ-ისთს რ-ნ წ-დ ესე სახარებად ვთარგმნე“. მეორე მინაწერში იგივე გიორგი მთაწმინდელი სხვათა შორის სწერს:

... „წ-სა მამისა ეფთჳმის სანატრელისა სახარებისაგან ესე წ-ნი სახარებანი დავნუსხევით ვ-ა ღ-თნ ძალი მომეცა. ხოლო ესე საცნაურ იყავ რამეთუ ბერძნულისაგან დაგვიწერია“ (გვ. 21). გარდა ამისა დ. ბაქრაძეს უგვალის ეკლესიაში უნახავს:

1. **ხატი წმიდა გიორგისა**, წარწერით: წ-ი გ-ი ილორისა. მხედარი ცხენოსანი ყოფილა, ადამიანის მგმირავი, ვეშაპის მაგიერ.

2. **ხატი წმიდა გიორგისა**, ასომთავრული წარწერით:

ქ : წო : გი ხლმისაო (ხვამლისაო) :

მეოხ და მფარველ : მე

ქმენ : წე : ღოსა მამკობ

სა : ხატისა : შენისასა : ქედი

ლაძესა : ნეს და შვილ

თა : ჩემთა :

რუსულ თარგმანში სახელს „ნეს“ დ. ბაქრაძე „ნენედ“ კითხულობს (გვ. 69).

### სოფელი ლახამულა.

სადადიშკელიანო სვანეთში, სოფელ ლახამულაში, ა. ხახანაშვილს უნახავს ტყავზე დაწერილი უთავბოლო სახარება, წვრილი ხუცურის ხელით ნაწერი. ამას ჰქონებია ხუცური მინაწერი: ... „ქეშე გრიგოლ შქერებიძე და სტეფანე დიაკონ ან“. მეორე მინაწერი მხედრულად: „ლო და წნო შეიწყალეთ ორთავე შინა ცხორებასა მონა და მადიდებელი ამ ოთხთავისა მომგებელი აფაქიძე მოსათი დ თანამეცხედრე მათი ქაშაგთა მეფის ძე მათი ჭუბიმი და მარშუები და რომე ადღეგრძელენ და მშვიდობით ახმარე სიმრავლეთ შინა ჟამთა, ა-ნ. აქა და მას საუკუნოსა სულსა აფაქიძესა თუალისა შეუნდნეს ღნ და ვინც (შენდობა) ბრძანოთ, თქვენც შეგინდონ ღნ“. (იხ. ა. ხახანაშვილი, გვ. 17). ქაშაგნი (რუსული კასოგი) ჩერქეზთა ტომია.

### სოფელი ფარი.

ფარი პატარა სოფელია. აქ ეხლა ახალი ხის ეკლესია არის. ძველი ნივთები შიგნაკლებია და რაც არის, ის შესდგება ფრაგმენტებისაგან სხვა და სხვა ხატებისა. აქ ჩვენ ვნახეთ:

1. **ხატი მაცხოვრისა**, ოქროთი დაფერილი ვერცხლისა, 44X26 სანტ. სახე მაცხოვრისა წამლით არის დახატული; ნიშბი დიდი აქვს, ჯვარის სახედ, ორნამენტებით შემკობილი. ხატის ვერცხლის სამოსელი და შემკობილობა სხვა და სხვა ფრაგმენტებისაგან შესდგება (იხ. №17129). ამ ფრაგმენტებზე არიან წარმოდგენილნი: ღვთის მშობელი, ვედრების სახით, მთავარ ანგელოზნი და წ-ა გიორგი; შემკობილობა უმეტესად რომბ-ლურსმულია.

2. **კარი რომელიდაც კარედი ხატისა**, რომბ-ლურსმული შემკობილობით და მედალიონებით წმიდათა, მაცხოვრისა, წ-ა გიორგისა და წ-ა იოანესი. ყველა ესენი სხვა და სხვა ფრაგმენტებს შეიცავენ (იხ. №17130).

3. **ვერცხლის ფირფიტა**, რომელზედაც წარმოდგენილია ღვთის მშობელი, ვედრების პოზით და წარწერით: დ-ი ღ-ი; გვარიანი ნახელავია (იხ. იქვე. №17130).

4. ორი პატარა **ხატი წ-ა გიორგისა**, ერთი 13X10,5 სანტ. მეორე 6,5X5 სანტ. გვარიანი ხელობისა.



შენიშვნა: დ. ბაქრაძის დროს აქ ყოფილა პატარა ქვის, ეკლესია. ერთად ერთ საგანს ამ ეკლესიისა და დ. ბაქრაძე ასე აღნიშნავს: – პატარა ვერცხლის ხატი, რომელზედაც მიკრულია ორი სხვა ხატის მინანქრიანი ნაჭრები, ბერძნულის წარწერებით (სახელებისა). (იხ. დ. ბაქრაძე, გვ. 58, დამატება №1). ეხლა ეს ხატი აქ აღარ მოიპოება.

**სოფელ ღემტერის ხატი კეიშის მთავარ ანგელოზთა.** სოფელ ფარის მღვდელმა გადმოგვცა, რომ სოფელ ღემტერში, ფარის საზოგადოებისა, არის აგებული ნიში ძველი, ქვის ნაეკლესიარზე და ამ ნიშში ინახება ხატი, რომელიც გადმოუტანიათ ნასოფლარ კეიშიდამ. ეს ნასოფლარი მაღალ მთაზე არის. ხატი ჩვენ მოგვიტანეს ეწერში და იქ გავმინჯეთ და ფოტოგრაფია გადმოვიღეთ (იხ. №17152),

**ხატი მთავარ ანგელოზთა,** ოქროთი დაფერილი ვერცხლისაა, ნაჭედი, 27X21 სანტ. მთავარ ანგელოზნი წარმოდგენილნი არიან სრულის ტანით და ლაბარუმებით; მათ მოაქვთ მედალიონი ქრისტეს ემძანუელისა. ფონი სადაა; აშიები არა აქვს; ზემოდ ასომთავრულით აწერია: წ .: წა .: კეიშის .: მთავარ ანგელოზი.

ხატი მე-16-17 საუკუნის უნდა იყოს.

### სვანეთის სულთა მატთანე.

ამ წიგნის ბოლოს ჩვენ უნდა დაგვესტამბა „სვანეთის სულთა მატთანე“, მაგრამ მისი ტექსტი ეხლა ხელთ არა გვაქვს. ამ სათაურით ჩვენ ვგულისხმობთ დიდ ტყავის გრაგნილს, რომელზედაც ნუსხა ხუცურით დაწერილია განჩინებანი სვანეთის ხევთა წარმომადგენლებისა, სასულიეროსი და საეროსი, ამა თუ იმ პირთა აღაპების შესახებ, რომელთაც გაუღიათ შესაწირავი ეკლესიებისათვის. მატთანეში აღნიშნულია სოფლების სახელები, სადაც კრებები გაუმართავთ, და შემდეგ სახელი და გვარი მათი, ვისაც ცოდვა შეუნანებია და სული შეუვედრებია ღვთისათვის. აღნიშნულია, ვინ რა და რამდენი შესწირა. ეს ძველი გამზადებული დასაბეჭდად, განმარტებით და წინასიტყვაობით, ჩვენ გადავეცით პროფესორ ა. შანიძეს „უნივერსიტეტის მოამბე“-ში მოსათავსებლად ან ცალკე გამოსაცემად, მაგრამ არ გამოსულა, არც უკან მიგვიღია ჩვენი წამოსვლის გამო. თარიღი გრაგნილს არ ჰქონებია, მაგრამ დადიანების მოხსენების მიხედვით დრო დაახლოვებით განმარტებული იყო, როგორც მახსოვს არა უგვიანეს მე-16 საუკუნისა. ეს „სულთა მატთანე“ ერთგვარი სტატისტიკური ცნობების კრებულია. რამდენიც უფრო მრავალრიცხოვანია სოფელი, იმდენად მეტი პირებია მოხსენებული ამ სოფლის კრებაში. ეს ერთად ერთი ძველია ჩვენამდის მოღწეული შედარებით ძველი დროიდან, რომელშიაც ასე მრავალ-რიცხოვანად დაცულია სვანთა გვარები და სახელები. აქედან ცხადდება, თუ რა და რა გვარებია გამოსული სვანეთიდან და დასახლებული საქართველოს სხვა და სხვა კუთხეებში, ნამეტნავად იმერეთში და სამეგრელოში. რასაკვირველია, ქართული გავლენაც ამკარაა ზოგიერთ სახელებში. სხვათა შორის, როგორც მახსოვს, ვეფხის ტყაოსნის გმირის ტარიელის სახელიც გვხვდება.

ეს ძველი შეეძინა განსვენებულს რაჟდენ დათეშიძეს და გადაეცა ქუთაისის მუზეუმისათვის. მუზეუმის გამგეს, ბ-ნ ტრიფონ ჯაფარიძეს ჩვენ დროებით გამოვართვით და დავტოვეთ საქართველოს საისტორიო და საეთნოგრაფიო საზოგადოების მუზეუმში.

### სხვა ნივთები.

ნივთების სია, რომელიც ჩვენ შევიძინეთ მუზეუმისათვის, ეხლა ხელთ არა გვაქვს. ამათ შორის იყო ბრინჯაოს ცულები კელტის რიგისა, საცეცხლურები ბრინჯაოსი, სირიული რიგისა, თმის ქინძისთავები ბრინჯაოსი, ცხოველების სურათებით, ყურსაკიდები, პატარა ქვაბები, ჯვრები და სხვა. ამ სხვებთა შორის აღვნიშნავთ ორ ნივთს, რომელთა ფოტოგრაფია ხელთა გვაქვს:

1. **სპილენძის სამფეხი**, ფრიად უცხო და ძვირფასი, შემკობილი მინანქრით სპილენძზე, სასანიდების დროისა, რაც ასე იშვიათია. ეს არის მომრგვალო სამ ფეხზე მდგარი ძირი ანუ კვარცხლბეკი საღრჩობელისა ან ლამპარისა.

მთელი არე მოცულია მინანქრიანი ჩუქურთმებით და ამას გარდა სამს დიდ მედალიონში მინანქრითვე წარმოდგენილია სამი ფიგურა ფრთოსანი ლომისა. სამის მხრით, ზემოდ, მარჯვნივ და მარცხნივ, კიდევ ემჩნევა შეჭრილი სამი მეოთხედი სიმრგვალები, რომლებშიაც, როგორც ეტყობა, საზოგადო კონტურებით წარმოდგენილი უნდა იყოს ალუ-რამაზა. შუაში ამ სამფეხისა ოთხკუთხედი ნახვრეტია, საიდანაც ამართული უნდა ყოფილ იყოს სპილენძისავე ღერი, რომელზედაც ალბათ ჩამოკიდებული იქნებოდა ფიალები ანუ საჭრაქო ანუ საღრჩოლებელი სულნელებისა. როდესაც ეს ნივთი ერთ გერმანელ მეცნიერს ვაჩვენეთ მუზეუმში, ის აღტაცებაში მოვიდა და განაცხადა, თუმცა თქვენს მუზეუმში ბევრი იშვიათი და ძვირფასი ნივთია, მაგრამ ამაზე უძვირფასესი არაფერი არისო, ეს მთელ მუზეუმად ღირსო.

2. **მრგვალი ფლიაგა**, წყლის ჭურჭელი ჯარისკაცისა, რომელიც გურულ მათარას უდრის; წითელი თიხისა არის, კარგად გამომწვარი; ყელი ვიწრო აქვს; წინა პირზე გამოყვანილია ორთავიანი არწივი გვირგვინით, ერთობ ლამაზად და მშვენივრად შესრულებული. რუსული ხელობისა უნდა იყოს მე-17 საუკუნისა.

3. **ქისა ტილოსი**, რომელიც ბესარიონ ნიჟარაძემ შემოსწირა მუზეუმს. ამაზე ამოქარგულია ლომის ფიგურა მხედრულის წარწერით, მაგრამ წარწერა კარგად არ იკითხება, ნამეტნავად უკანასკნელი სტრიქონი საეჭვოდ მიგვაჩნია:

ქ ვეფხებ ლომგულმა / ზომითა  
ბარს ჩანს / რილი(sic) ვარდი ბადა.  
ვარდი ჯელობის ლომს ეძებს,  
გაჭრილა ვინ ვარდი ბადა (?)

**ბერი ბაქრაძის ორი რვეული ზოგიერთი სვანეთის  
ეკლესიების ჯვარ-ხატების და ნივთების მოკლე  
აღწერილობით.**

ბერი ალექსი ბაქრაძე შესანიშნავი სათნოიანი პიროვნება იყო, უზომო თავმდაბალი, კეთილი, ღვთისნიერი, წყნარი, უადრესად მორწმუნე და მუშაკი, მასთან მწიგნობარი, კალიგრაფი და მხატვარი. მას დიდის ქებით იხსენიებენ გაბრიელ იმერეთის ეპისკოპოზი და განსაკუთრებით ალ. სტოიანოვი (იხ. მისი „მოგზაურობა სვანეთში“, გვ. 373-374). ღრმად მოხუცებული ის დადიოდა ჩემთან ტფილისში და მოქონდა წიგნები, მის მიერ გადმოღებული წარწერები (მაგალითად, მომიტანა დადიშკელიანის კოლოფის არაბული წარწერები) და სურათები. შემდეგ ათონის მთაზე წავიდა და იქიდან მიგზავნიდა მის მიერ გადმოწერილ სტატიებს ივერიის მონასტრის ძველი ხელნაწერებიდან; ესენი ეხლა საქართველოს საისტორიო და საეთნოგრაფიო საზოგადოებაშია. ეს ღირსეული ადამიანი იქ, ათონის მთაზე გარდაიცვალა. ერთი მის მიერ გადმოცემული პატარა რვეული in 16, შეიცავს ცხრა ფურცელს, ერთი ფურცელი აკლია. ამას აწერია: **მოგზაურობა სვანეთში**. იწყება ვახუშტი ბატონიშვილის მიერ გადმოცემული ლეგენდით, რომ სეტის ეკლესიაში გახიზნული იყო მცხეთის ტაძრის განძეულობა და კანკელი ძვირფასი თვლებისა, ვახტანგ გორგასლანის მიერ ინდოეთიდან მოტანილი (იხ. ზემოდ, გვ. 269, შენიშვნა 1) და შემდეგ მოჰყვება მოკლე ცნობები მცირე რიცხოვან ნივთებზე ლატალის, ლენჯერის, მესტიის, მულაყის, მუჟალის და ფარის (სუფის ეკლესია) თემებისა. ეს აღწერილობა შედგენილია 1864 წელს. მეორე რვეული შეიცავს სულ 7 დაწერილ ფურცელს ასეთის სათაურით: „1874 წელსა, მაისის 29 დღესა კომისია დანიშნული სვანეთის ეკლესიებთა ქონების ცნობაში მოყვანისათვის შეუდგა უშკულის სამრევლოსა შინა გამოკვლევასა მოძრავთა კუთვნილებათა მისთა და აღმოჩნდა შემდგომი“. სულ ორი ხატია აღწერილი უშკულის თემისა. პირველის შესახებ სწერია: „უშკულის ძეგლის მაცხოვრის ეკლესიაში არის ხატი წმიდის გიორგისა, სიმაღლით 4 ვერშოკი, განით 3 ვერშოკი, ვერცხლით მოჭედილი უკანით და მოოქვრილი, რომელსაც აწერია შემდეგი: „წმიდაო გიორგი ზღუდისაო, მეოხ და მფარველ ექმენ აბესალომს ყიფიანს, და ძეთა მისთა, ამინ“.

ეს ხატი ამ წარწერით არც ჩვენ გვინახავს, არც დ. ბაქრაძეს და არც გრაფინია უვაროვისას.

მეორედ აღწერილია ჩაჟაშის მაცხოვრის ეკლესიის ღვთის მშობლის ხატი ვახტანგ წახენელიძის წარწერით (იხ. ზემოდ). შემდეგ აღნიშნულია: კალას თემის წმიდა კვირიკეს და ივლიტას ეკლესიაში ბიზანტიური მინანქრიანი სანაწილე და გარდამოხსნის ხატი (იხ. ზემოდ). უკანასკნელის წარწერა არ არის ნახსენები, მაგრამ ნათქვამია, ზურგზე ხატისა თოთხმეტი ნაწილების ადგილია და აწ ერთის მეტი აღარ სჩანსო; ადიშის ეკლესიაში აღნიშნულია მხოლოდ ალექსანდრე მეფის ზარი; იფარის (ნაკიფარის) ეკლესიაში ნაჩვენებია მარტო ვერცხლის ჭურჭელი, რომლის სია ჩვენ ზემოდ მოვიყვანეთ. წვირმის და ელის ეკლესიებში თითო ხატია აღნიშნული; მუჟალისაში – ერთი; მულაყისაში მარტო ვერცხლის სურა ბაგრატ მეფისა, სამი გირვანქა; მესტიის ეკლესიაში აღნიშნულია ვერცხლეულობა გირვანქობით (იხ. ზ.). და სახარება საკმაოდ ვრცლად; ლენჯერის ეკლესიაში აღნიშნულია ღვთის მშობლის ხატი (იხ. ზემოდ). ლაშთხვერის ეკლესიაში ნაჩვენებია ზარი ალექსანდრე მეფის და

იოანე მახარობლის ხატი (იხ. ზემოდ). ქაშვეთის ეკლესიაში ჯვარცმის ხატი (იხ. ზემოდ). წარწერები ჯეროვანად არ არის წაკითხული, ლატალის ეკლესიაში აღნიშნულია ღვთის მშობლის ხატი მამუკა ვაჩნაძის წარწერით (იხ. ზემოდ) და მინანქრიანი ბიზანტიური ჯვარი (იხ. ზემოდ). იონაშის ეკლესიაში იოანე წინასწარმეტველის ხატი მამია გურიელისაგან შეწირული (იხ. ზემოდ). ზარი ალექსანდრე მეფისა და სახარება სტეფანე (sic) კათალიკოზისა (იხ. ზემოდ). ბოლოს აღნიშნულია ცხუმურის ეკლესიაში მარტო სახარება, არა სრულის წარწერებით. ამით თავდება რვეული. აღსანიშნავია საოცარი სიმცირე დასახელებული ნივთებისა. ვინ იყვნენ კომისიაში, ნაჩვენები არ არის, მაგრამ რომ ამ კომისიაში ბერი ბაქრაძეც უნდა ყოფილ იყოს, ეს იქიდან სჩანს, რომ ხელით გადმოღებულია ბერძნული წარწერა კალას სანაწილესი და ლატალის ჯვარისა; გარდა ბაქრაძე ბერისა სვანეთის მღვდლებმა ბერძნული არ იცოდენ. წარწერებში ზოგჯერ შეცდომებია. მნიშვნელობა ამ რვეულებისა იმაშია, რომ მათში ნაჩვენებია ზოგი ნივთი, რომელიც ჩვენს დრომდე არ შენახულა. ყველა ესენი თავის ადგილზე მოყვანილია ამ გამოცემაში. აგრეთვე ნაჩვენებია სხვა არქეოლოგიური ლიტერატურა სვანეთისა, რომელიც ჩვენს ექსპედიციამდის იყო გამოცემული.

## შენიშვნა

ჩვენს მიერ ამ წიგნში განხილული ნივთები უმეტეს შემთხვევაში ეკუთვნის ქრისტიანული კულტურის ნაშთებს. ქრისტიანობა სვანეთში ეჭვს გარეშე შემოსულია ბიზანტიიდან, ალბათ იმ დროს, როდესაც ლაზებმა და აფხაზებმა მიიღეს ქრისტიანობა. ბიზანტიის დიდი გავლენა აღნიშნულია როგორც სვანურ ენაში, ისე წირვის წესში და სვანთა ერისთავთა მიერ ბიზანტიურ საკარისკაცო პატივის ტარებაში (იხ. ზემოდ, გვ. 26). სვანეთი ჯერ შეადგენდა კოლხეთის ავტონომიურს ნაწილს, შემდეგ ლაზთა სამეფოს ნაწილს და ბოლოს შედიოდა აფხაზეთის სახელმწიფოში. როდესაც აფხაზეთი და საქართველო გაერთიანდა ბაგრატ მესამის უფლების ქვეშ 980 წელს, სვანეთიც საქართველოს ნაწილი გახდა. აქედან იწყება მჭიდრო კაშირი სვანეთისა მთლიან საქართველოსთან. ეტყობა, საქართველოს მეფენი დიდ ყურადღებას აქცევდნენ სვანეთს. იფრარის ეკლესია დავით აღმაშენებლის მხატვრის მიერ არის ფრესკებით მოხატული, ალბათ მეფისავე ბრძანებით (იხ. ზემოდ, გვ. 208), ამავე ეკლესიის ღვთის მშობლის ხატზე წარმოდგენილია მეფე დავით მეხუთე, გიორგი ლაშას ძე, და მოხსენებულია მისი მეუღლე გუანცა. ლატალის მაცხოვარიშის ეკლესია დიმიტრი პირველის დროს არის დახატული 1142 წელს და აქ ფრესკით წარმოდგენილია დიმიტრის გვირგვინის კურთხევა და მისი ერისთავები (გვ. 350-351). თამარ მეფე, რუსუდან დედოფალი და სხვები ძვირფასი ხატებით ამკობენ სვანეთის ეკლესიებს. თვით სვანთა ხელების მიერ შემკობილ ხატებზე გამოსჭვივის მჭიდრო ერთობა მთელ საქართველოსთან; მუხერის მთავარ ანგელოზის ხატის წარწერაში ვკითხულობთ: „ადიდენ მეფენი ბაგრატონიანნი, დადიანნი და დიდებულნი და ერთობილი საქართველო და ერთობილნი სანნი“ (იხ. ზემოდ).

წინათ ფიქრობდენ, სიმრავლე ჯვარ-ხატებისა და ხელნაწერებისა, რომელნიც სვანეთში იყო და დღესაც არის (უმეტეს შემთხვევაში ძალზე დაზიანებული მოუვლელობით და მტაცებლობით), აიხსნებოდა იმით, რომ სვანეთში ეზიდებოდნენ საქართველოს სხვა და სხვა კუთხიდან ამ ნივთებს შესანახად და გადასარჩენად განადგურებისაგან მტერთა შემოსევის დროს. ეჭვი არ არის, ამასაც ადგილი ჰქონდა, მაგრამ ჩვენის დაკვირვებით, ცხრა მეთაფი ჯვარ-ხატებისა თვით სვანეთშია დამზადებული. ამას მოწმობს სვანიზმები წარწერებისა, გვარები შემკვეთელებისა და ოქრომჭედელთა. საზოგადოთ ოქრომჭედლობა სვანეთში დიდათ განვითარებული ყოფილა. არაფერი ისე არ ახასიათებს საზოგადო, კულტურის აყვავებას თუ დაცემას, როგორც ოქრომჭედლობის ევოლუცია. კლასიკური დროის შემდეგ ეს ხელობა თანდათან ეცემა სვანეთში, ისე როგორც საქართველოში, მაგრამ უაღრესად მისი დაცემა ეკუთვნის მეთვრამეტე საუკუნეს და მეცხრამეტის დასაწყისს. ეს ერთგვარად ახასიათებს როგორც სვანეთს, ისე ლეჩხუმსაც.

სვანეთში, რამდენადაც ცნობილია, არქეოლოგიურ გათხრებს ჯერ ადგილი არ ჰქონია და არაფერი ვიცით, თუ რა დონეზე იყო აქ ქრისტიანობის წინადროის კულტურა, მაგრამ რამდენადაც ეს სჩანს იმ მცირე ნაშთებისაგან, რომელნიც ეკლესიაშია დაცული და რომელნიც ეჭვს გარეშე ძველი სასაფლაოებიდან არის ამოღებულნი, ეს კულტურა იგივეა, რაც კობანის კულტურა ოსეთში; ამას გარდა სვანეთში დიდძალ ოქროს ფულებს პოულობენ, რაც მოწმობს მის მჭიდრო სააღებ-მიცემო კავშირს წინა აზიის და საბერძნეთის ხალხებთან. სხვათა შორის 1906 წელს ტფილისის მუზეუმში გასასყიდათ მოიტანეს 18 ოქროს ფული, რომელნიც ვნახეთ სოფელ ჩობერში რკინის წაკეტებთან და სხვა ფერადოვან მძივებთან (ბუსებთან) ერთად. ამათ შორის სამი ლიზიმახოსის იყო, დანარჩენი ალექსანდრე მაკედონელის, მაგრამ სხვა და სხვა დროს მოჭრილი. ადვილად შესაძლებელია, ის ოქროს ფულები, რომელნიც ხშირად გვხვდება საქართველოს სასაფლაოებში და რომელნიც ლიზიმახოსის ოქროს ფულის მიბაძვით არის დამზადებული, სვანეთში იჭრებოდა სვანეთშივე ნაპოვნი და დამუშავებული ოქროთი. არქეოლოგიურმა გათხრამ სვანეთში დიდი შედეგები უნდა მოგვცეს.

\*

\* \*

ავტორი წინამდებარე წიგნისა თავის ზნეობრივ მოვალეობად რაცხს უგულითადესი მადლობა გამოუცხადოს ბატონს ვიქტორ ნოზაძეს, რომელმაც თავისი უანგარო ენერგიული დახმარებით შესაძლებელი გახადა ამ წიგნის გამოცემა, ბატონს ნესტორ კალანდაძეს, რომელმაც დახატა სათაური წიგნისა და ბატონთ სამსონ ფირცხალავას და სოსო გოგოლაშვილს, რომლებიც დაგვეხმარენ კორექტურის შესწორებაში.

## ნაწყვეტ-ნაწყვეტი, გზა და გზა, სხვათა შორის

ზოგს უკვირდა, ისე ინტენსიურად რომ ვმუშაობდი ქართული ხუროთმოძღვრების ძეგლების, საეკლესიო ნივთების და ხელნაწერების შესწავლაზე და მეკითხებოდნენ ხოლმე, პეტერბურგის უნივერსიტეტში დასპეციალდი მაგ საკითხებზეო? სრულიადაც არა! იქ მე პედაგოგად ვემზადებოდი და თბილისში რომ ჩამოვედი, სწორედ მასწავლებლობით დავიწყე საქმიანობა. ხელოვნებისა და სხვა ძეგლებს კი მას მერე მოვკიდე ხელი, როდესაც დავაკვირდი, რომ ისინი ნელ-ნელა ხელიდან გვეცლებოდნენ და შემსწავლელი კი აღარავინ ჩანდა.

\* \* \*

კონსტანტინე გამსახურდია, რომ ევროპიდან ჩამოვიდა, უნივერსიტეტში მომაკითხა და მთხოვა, არქეოლოგიის კათედრაზე ამეყვანა სამუშაოდ. მაგრამ მაშინ მე მალე წავედი კიდეც ევროპაში და აღარ მოეწყო ეს საქმე. თორემ ავიყვანდი. მუშაობა უყვარს და ნაკითხი კაციცაა. ამიტომაც, რომ ასეთი ნაყოფიერი მწერალი დამდგარა.

\* \* \*

მთაწმინდის თხემიდან გადმოხედვას არაფერი შეედრება! არსად მსოფლიოში ასეთი ლამაზი ქალაქი არ მოიძებნება. პარიზში არაფერი ამის მსგავსი არაა. მთაწმინდის პარკი ხომ წინათ ჩემი ცოლოურის, პოლტორაცკების საკუთრება (გაბაშვილის ქალის ნამზითვი) იყო და იმ მამულ-ადგილებში ხშირად მივლია.

\* \* \*

კოლა-ოლთისში რომ ვმოგზაურობდი, სოლომონისის მღვიმე-ეკლესიაზე ძალიან ძნელი ასასვლელი იყო და მესხებმა ამიყვანეს ხელით ეს კოჭლი კაცი. . . ჩემს შემდეგ (ალბათ ჩემი გასაჭირი რომ გაიგო), ოლთისის მაზრის უფროსს საფეხურები ამოუჭრევინებია იმ კლდეში და თავის დროზე სწორედ მიუდგომელ ადგილას მოწყობილი ეკლესია უკვე ყველასათვის მისაწვდომი გამხდარა; ბრალიანსა და უბრალოს დაუწყია იქ სიარული და ბევრი რამე გაუფუჭებიათ კიდეც. ასე რომ გზის გაადვილება ხშირად ვნებს კიდევაც საქმეს.

\* \* \*

იშხანში იმ ფრესკულ წარწერას ალბათ ვერც მე შევამჩნევდი, ჩემი წინამორბედივით, მაშინ რომ ძალიან მჭრელი თვალი არა მქონოდა. სანამ ზედ არ

მივიყვანე და თითებით არ მოვუხაზე ასოები, ექსპედიციის სხვა წევრები ვერც კი ხედავდნენ წარწერას! ისიც უნდა ითქვას, რომ წვიმა არ წამოსულიყო და მერე მზეს აღმაცერად არ შემოეხედა ტაძარში, მეც გამიჭირდებოდა დანახვა.

\* \* \*

მიხ. ჭიაურელი რომ წავიყვანე მხატვრად 1917 წელს ექსპედიციაში, ძალიან ყოჩაღად ირჯებოდა, ყველაფერი ეხერხებოდა და თან აცოცხლებდა და ამხიარულებდა მთელ ექსპედიციას. ის ხომ მრავალმხრივ ნიჭიერი კაცია და სხვათა შორის, იმიტაციაც ძალიან ემარჯვებოდა. ერთხელ აიპარა მინარეთზე და ისე მიბამა მოლას ძახილს, რომ იქაური მაჰმადიანები შეცდომაში შეიყვანა. სხვა დროს იშხანში მაჰმადიანებს ფერხული დაებათ და თან დაიმღეროდნენ, ჩადგა ისიც მათ შორის და ისე ცეკვავდა და მღეროდა რომ ნამდვილი თათარი გეგონებოდათ.

\* \* \*

ათონის ივერთა მონასტერში დაცული ქართული ხელნაწერების ბედის შესახებ ამ ბოლო დროს აღარა ვიცით-რა. იქაური ბერძენი ბერები საერთოდ ძალიან აგრესიულად იყვნენ ჩვენს მიმართ განწყობილი და ეგებ ის ხელნაწერებიც განიავებულია?!

\* \* \*

საერთოდ, რამდენ ხანს დარჩა რუსეთის მფლობელობაში არტაანი და სხვა ძველი ქართული ოლქები, სავსებით მისაწვდომი იყო სპეციალისტებისათვის, მაგრამ ვერავინ მოიფიქრა იქაური ძეგლების რიგიანად აღწერა.

\* \* \*

იშხანის ტაძრის ერთ-ერთ ფრესკულ წარწერაში იხსენიება ქართლის პირველი ქრისტიანი დედოფალი ნანა.

\* \* \*

ამ ბოლო დროს რომ გავარდა ხმა, თითქოს ამერიკელებს აღმოუჩენიათ პალესტინის რომელიღაც გამოქვაბულში ქართული, სომხური და კოპტური ხელნაწერები, თუ მოჭორილი არ გამოდგა, შეიძლება ძალიან მნიშვნელოვანი იყოს, კერძოდ ჩვენთვის. თუ იქ მართლა არის ქართული ხელნაწერები, უთუოდ ძველი იქნება. ასეთი რამელა გვიშველის, თორემ პირდაპირ სამარცხვინო საქმე გვჭირს: ხომ რამდენ ხანს იყო ჩვენი დამწერლობა ხან-მეტი, XI საუკუნეში გიორგი

მთაწმინდელმაც იცოდა, რომ გვექონდა ასეთი და ჯერ კი არც ერთი ხან-მეტურად დაწერილი სახარება არ ჩაგვევარდნია ხელთ! საოცარია, როგორ უნდა მოსპობილიყო ასე პირწმინდად ის ძველი ხელნაწერები?... თუმცა, მეორე მხრივ, ეს რაღად უნდა გვიკვირდეს, როცა ჩვენ მეზობელ ალბანელებს X საუკუნეში ჯერ კიდევ თავიანთ ენაზე ჰქონდათ მღვდელთმსახურება და დღემდე არაა ნაპოვნი თუნდაც ერთი ნამცეცი ხელნაწერი. მხოლოდ ამ ბოლო დროს მიაკვლია ილია აბულაძემ, ალბანურ ანბანს ექმიაძინის ერთ ხელნაწერში. ახლა თითო-ოროლა ქვაზე დაწერილიც იპოვნეს აზერბაიჯანელმა არქეოლოგებმა, მაგრამ რა გამოვიდა, რომ ვერ კითხულობენ? ისე კი ზოგი ასო ქართულსა ჰგავს, ზოგი – სომხურს, ეტყობა ორივეთაგან ნასესხები და ნარევიანია. ალბათ სამივე ერთად წარმოიშვა, IV საუკუნეში.

\* \* \*

ვცდილობ, ახლავე მოვაწესრიგო ჩემი ნაწერების ბიბლიოგრაფია, თორემ ისეთი რთული შესადგენია, რომ უჩემოდ ყველას ძალიან გაუძნელდება.

\* \* \*

ევროპის სიძველეთსაცავებში და ანტიქვარებთან რომ საქართველოდან გატანილი და გაყიდული სიძველეები ვნახე, მათ შორის რამდენიმე ხატი გიორგი ორბელიანის ოჯახიდა იყო იქ მოხვედრილი, მისი ცოლის წყალობით.

\* \* \*

იქ ვნახე კიდევ ნიკო ჭავჭავაძის ნაქონი ნივთებიც. ნიკო თავის დროზე გამოჩენილი პატრიოტი იყო. ერთხანს დაღისტანს მმართველობდა მერე აქ გარდაიცვალა, ოპერაციის შედეგად. იური ჭავჭავაძე მისი ძმისწული იყო. ილიას ნათესავები არ ყოფილან, სხვა შტოს ეკუთვნოდნენ. ნიკო უცოლოდ მოკვდა, მაგრამ ისე კი ძალიან უყვარდა ლამაზი ქალები.

\* \* \*

ტარონელები ბაგრატიონები იყვნენ, ტარონში მერე გადასახლებული და გასომხებული. ტარონელი იყო ჩვენი თორნიკე ბერიც, ბარდა სკლიაროსი რომ დაამარცხა. იმათში ბევრს ერქვა სახელად თორნიკე, მთელი დინასტია იყო.

\* \* \*



იკორთის ტაძრის აშენება ნამდვილად ღირდა თავმოწონებად! ისეთი მშვენიერი ნაგებობა, თამარის დროისა, ქართველებს სხვა არც მოგვეპოვება.

\* \* \*

ნ. ადონცი რომ ამბობს თავის ნაშრომში თორნიკე ერისთავი სომეხი იყო, რა თქმა უნად აჭარბებს. ფაქტიურად ხომ ისინი ქართველები იყვნენ და ჟამთა ვითარებაში ენობრივ გასომხდნენ. რაკი ასე იყო, როგორც კი ისევ იმძლავრა იმ მხარეში ქართულმა პოლიტიკურმა მფლობელობამ და ელემენტებმა, ისინიც კვლავ გაქართველდნენ და მერე რა თავგადამკვდარი ქართველი პატრიოტები გახდნენ! მარტო გრიგოლ ბაკურიანი რად ღირს, ბულგარეთში რომ ქართული მონასტერი დაარსა, პეტრიწონს?! რა ფანატისია საქართველოსი?

ამ ქვეთავის მასალები მოამზადა **სიმონ ბალახაძემ**

## ს ა რ ჩ ე ვ ი

### წინასიტყვაობა

#### ნაწილი I. ლექსები

სოფელი ლაბეჭინა  
საირმე  
ლაჯანა  
ორბელი  
ლატორია  
მცხეთა  
ქალაქი ცაგერი  
სოფელი ზუმბი  
სოფელი ოყურეში  
სოფელი ნაყურალეში  
სოფელი ქვემო ალვი  
სოფელი ნასპერი  
ხვამლის ეკლესიის წარწერა

#### ნაწილი II. ქვემო სვანეთი

##### ლ ე ნ ტ ე ხ ი ს თ ე მ ი

სოფელი ლენტეხი  
სოფელი ფაყი  
ლექსურა  
გულიდა

##### ჩ ო ლ ო უ რ ი ს თ ე მ ი

სოფელი საყდარი  
სოფელი ზემო ჭველიერი  
სოფელი მამი  
სოფელი თეკალი

ლაშხეთის თემი

სოფელი სასაში  
სოფელი ჯახუნდერი  
სოფელი ჩუკული  
სოფელი ჩიხარეში  
სოფელი მახაში  
სოფელი დაბიში  
სოფელი ახაშენი  
სოფელი მელე  
სოფელი ნაცული  
სოფელი ხერია  
სოფელი შგედი  
სოფელი მარგვიში  
სოფელი ღობი  
სოფელი ლამზაგორი

### **ნაწილი III. თავისუფალი სვანეთი**

უ შ გ უ ლ ი ს თ ე მ ი

სოფელი ჟიბიანი  
სოფელი ჩვიბიანი  
სოფელი ჩაჟაში  
სოფელი მურყმერი

კ ა ლ ა ს თ ე მ ი

კალას ეკლესია  
სოფელი ჰე  
სოფელი იფრარი  
სოფელი ხალდე

ი ფ ა რ ი ს თ ე მ ი

სოფელი ზეგანი  
სოფელი წვირმი  
სოფელი იელი  
სოფელი ადიში

სოფელი ნაკიფარი

მ უ ჟ ა ლ ი ს თ ე მ ი

სოფელი ჩვაბიანი  
სოფელი ჟაბეში  
სოფელი ჩალდაში

მ უ ლ ა ყ ი ს თ ე მ ი

სოფელი ღობრი და ზარდლაში  
სოფელი მუშკიერი  
სოფელი ჟამუში  
სოფელი ლახირი  
სოფელი ჩოლაში

მ ე ს ტ ი ი ს თ ე მ ი

სოფელი სეტი  
სოფელი ლაღამი  
მარგიანი, მთავარანგელოზის ეკლესია  
მეორე მთავარანგელოზის ეკლესია  
სხვა ეკლესიები  
მესტიაში გაშინჯული ხელნაწერები

ლ ე ნ ჯ ე რ ი ს თ ე მ ი

სოფელი ნესგუნი  
სოფელი ლემსი  
სოფელი ქაშვეთი  
სოფელი კაერი  
სოფელი სოლი  
სოფელი ლამტხვერი  
სოფელი მუხელი

ლ ა ტ ა ლ ი ს თ ე მ ი

სოფელი ენაში ანუ იონაში  
სოფელი მაცხოვარიში  
სოფელი ლაჭილი

სოფელი ლახუმტი  
სოფელი ლამი

#### ნაწილი IV. სადადიშქელიანო ანუ სათავადო სვანეთი

ბ ე ჩ ო ს თ ე მ ი

სოფელი ბეჩო  
ცხომარის თემი  
სოფელი სვიფი  
სოფელი ლაფსხალდი

ე წ ე რ ი ს თ ე მ ი

სოფელი ბარში  
სოფელი ყურაში  
სოფელი ფხოტრერი

ფ ა რ ი ს თ ე მ ი

სოფელი სუფი  
სოფელი უგვალი  
სოფელი ლახამულა  
სოფელი ფარი  
სოფელი ლემტერის ხატი კეიშის მთავარანგელოზთა  
სვანეთის სულთა მატიანე და სხვა ნივთები  
ბერი ბაქრაძის ორი რვეული ზოგიერთი სვანეთის ეკლესიების  
ჯვარ-ხატების და ნივთების მოკლე აღწერილობით  
შენიშვნა ქრისტიანული დროის და ქრისტიანულ წინა  
დროის კულტურის გამო სვანეთში  
ნაწყვეტ-ნაწყვეტი, გზა და გზა, სხვათა შორის